

UTL AT DOWNSVIEW



D RANGE RAY SHI E POS ITEM C

PLEASE DO NOT REMOVE  
CARDS OR SLIPS FROM THIS POCKET

---


UNIVERSITY OF TORONTO LIBRARY

---

AC  
141  
A63  
v.1

'Ali Kemal  
Fetret





Digitized by the Internet Archive  
in 2011 with funding from  
University of Toronto

<http://www.archive.org/details/fetretal01alke>





# فِتْرَت

برنجی کتاب

مؤلفی

علی کمال

[ اقدامك ] سابق سرمخبری

Fetret

غریب برکنج - باباء اوغل - روم ایلی حصارنده برمساحره - برعربجه درس - ایکی  
مکتب ارقاداشی - دارالفنون عثمانیده - مطبوعات عثمانیه ده برمباحثه - برقییرعالمی

طابع وناشری

مخاخاله کتابخانسی

درسعادت : باب عالی قارشوسنده — نومرو ۱۷

۱۳۲۹



AC .

141

A 63

v. 1

مختار خال الدکنجائے

باب عالی قاری سوسندہ : نمرہ ۱۷

ہر بر حق کتابخانہ جہ محفوظ در

مطبعہ خیرہ و شرکابی



## مُقَدِّمَه

( فترت ) بر حكايه دكل ، بر تاريخدر ، يوق ، بر تاريخچه در ، بر تاريخچه كه حيات اجتماعيه مزدن بردوري عرض ايلر ، فقط حقيقي بر طرزده عرض ايلر . خيال ايچنده بيله حقيقي كوستير . چونكه ( فترت ) ك بعض طورلري ، حركتلي ، تمايللري بوكون برنبذه خيالي آنديريورسه ياريني بسبتون حقيقتدر .

برهيئت اجتماعيه نك شاعرلري ، متفكرلريدركه حالي تصوير ، لكن استقبالي انشاد ايدرلر ، فكرمجه ، ( فترت ) حالمزدن برلوحه ، استقبالمزدن بر نشيده در . اويله دكاسه بيله اويوكسك امل ايله يازلدي .

لطفاً اوقويانلريمز ، بوكتابده ، بلكه ، آز ، چوق حقائق تاريخيه وادبيه بولورلر . مثلاً بر فصلده فرانسه اختلال كييرينه دائر تدقيق وتبع محصولي بعض فكرلره تصادف ايدرلر ، ديكر فصللارده ايسه تكامل ادبیمزك اولدقجه حقيقتيه ياقلاشير برتعريفني كوريرلر . بومطالعيلرك ، طبعيدر سويله مكه حاجت يوق ، نقصاني چوقدر ، لكن برمزيتي واردركه اوده صميميتي ، جسورانه بر صميميتيدر . اعتقادمجه ، بوفضلك خدمتي قدر قيمتي ده بيوكدر .

بوملاحظه لره مبني ، ظن ايتمكه ، صرف اكنمك ، حتي اكلنهرك مستفيد اولق ايچون حكايه اوقويانلر بوئرذن محظوظ اولسونلر ؛ فقط ينه ظن ايتمكه هر درلو نشاط فكري دوشونمكده آريانلر بوتأليفدن خشنود قالماسونلر . نجه مقصود ايسه ، اساساً بوايكنسجي صنف خلقمزه خدمتدر . بتون بوانديشه سائقه سيله دركه ( فترت ) ك حكايه تماش ايدن جهتلريني ، وقعيلريني ، فجيعلريني ده زياده



چو غالتق ، مندرجاتی جاذبه دار ، متهیج قیلق خوشمه کیتمه دی . حقیقته ، فنه یاقلاشان فصللرینی ایسه آزالتمق المدن کلمه دی . حال بوکه او چو غالتق ، بو آزالتمق بو محصول ناچیزی خفیفلشدیره رک دها قولای ، حتی اکنه اکنه اوقوتمه بادی اولوردی . دیدیکم کبی ، قارئلیمی اکندیرمکدن زیاده دوشوندیرمک اندیشه لری بنی اویله شائبه لردن صیانت ایله دی .

دیه بیلیرم که بتون اوسطرلری فصل فصل یازارکن قریحه مه ، قوه مخیله مه استنادم نسبة آزا اولدی ، لکن تاریخندن ، ادبیاتدن ایجه مأخذله مراجعتم دها چوق ایدی . بعض معارضلریمک اوتهدن بری ادعا ایتدکلی وجه ایله بوانتخاللر ، اقتباسلر بکا اوبر ایجادلردن دها موافق ، دها مفید کوروندی . بلکه بواعیتیادیمک سائق عرفان ناچیزمدن زیاده قریحه مک قیصیرلغی ، قدرت تخیلیه مک کوشکلکیدر . اویله اولسه بیله ، زمانمزد ککالات حقیقه ، بالخاصه بووادیلرده ، اوقوری اخترا - علردن زیاده ، بیلیم نه ادراک ایله شعر قدیمزک اتحاملرینه بکرتدیکمز بوتبعلرده ، اقتباسلرده اولدینی ایچون بونقیصه لریمی دایما برمزیت کبی تلقی ایتمه مک المدن کلز . کرک تاریخ ، کرک بویله تاریخمسی برائر یازارکن هروقعه یی ، هر فکری برماخذدن ، مرجعدن ، وثیقه دن استخراج ایتمه مک عجمیلکه ، فقدان تبعه دلالت ایلر . مهارت اومتقبساتی براندیشه یه ، برامله کوره مزج ایدره رک برطرز مستحسنده عرض ایده بیلیمکدر . . حتی ، ظنمجه ، ساده مورخلک دکل ، علی الاطلاق محردلک بیله موفقیته منجر اولمق ایچون بودستوره اقتفا ایلک ضرورتنده د . . بوکون یازی یازانلریمز دقت بیورلسون ، اوقومادن ، تبع ایتهدن ، حتی مسائل حاضرده دائر اجاله خامه ایله یینلریمز نه سونوک ، نه ابتدائی ، نه فائده سزدرلر . حال بوکه عکسی مسلکی التزام ایدنلریمز ، دایما اوقودقدن صوکرده ، هپ او مطالعه لره سوقیله انه قلم آلانلریمز نه ایچون اولورسه اولسون یازدقلرینی اوقوتیورلر ، خلقی اولدجه محظوظ ، مستفید ایدیورلر .

کوچک ، بیوک تألیف آتارده قریحه دن اختراع ایله تبعدن استخراجک فرقی بوايضاحات صراحة کوستیر ، صانیرم .





دور اخبرده ، مثلاً فرانسه ده ، طرز تحریر حکایه مؤثر بر تکامله اوغرا دی ، او درجه ده که بعضاً حکایه لکدن همان همان چیق دی ؛ بر اثر تفکر ، تاریخمسی بر محصول تدقیق و تابع اولدی . مثلاً کچنلرده و نأت ایدن ( و و کوئه ) : « اموات کویا » دییه بر حکایه یازدی ، فقط بر حکایه که فرانسه نك تاریخ لاحقندن بر صحیفه در . حیات سیاسیه سندن پك حقیقی بر لوحه در ، اشخاص ، حتی وقایع اعتباریله حقائق دائمیه حرفیاً تطبیق اولونه بیلیر .. محرر متفکر قلمی اننه آلمش ، بعضاً کتابلره ، غزتهلره مراجعت ایدر کدن ، بعضاً کوردکلرینی دوشونهر کدن اوتالیفی وجوده کتیرمش ، انسان بر دورك تاریخی اوقویور کبی بواثری اوقور ، او مرتبه جدی ، خیالدن ، مبالغه دن عاری بولور .

بومسالت تفکرده ، تفکر عمیقده فرانسه لرک بر دیگر بیوک ، پك بیوک محرر متفکری ( آناطول فرانس ) ده ایلری کیتدی ، اکصوک آثارنده صرف فلسفه سنی ، افکار فیلسوفانه سنی بسیط برر حکایه طرزنده اوزون اوزادی یه جلد جلد تمهید ایلهدی . بواثرلرک کوزللكی وقعده دکل ؛ هیچ دکل ، چونکه وقایع پك ساده در ، پك محدوددر . فقط او کوزللك اولامعنی اعتباریله فکرده در ، او یوکسک ، او مؤثر فکرلرده در . لفظجه ایسه ، بر بلوری آندیریر درجه ده پاك ، لکن بر پرلانطه قدر لطیف ، او یله تراشیده بر اسلوبده در . انسان فکرأ مهذب ایسه او بدیع صحیفه لری بر ذوق بی انتها ایله اوقور ، فقط اوقودقجه مستفید اولور .

بو افاضله بکزه مک ، او قیراطده یازی یازه بیلمک ادعاسنده دکل . شرق ایله غربک آرالرنده کی فرق عظیمی ادراک ایدنلردنم ، فقط ینه او ادراک سائقه سیله درکه هر درلو ناچیزلکیله برابر بو تألیفی قارئلریمزک نظره تمیز و تنقیدینه عرض ایده بیلمک اوته دن بری اک خوش آمالندن بری ایدی .

تصویر ایتدیکم اشخاص وقعده دن چوغنی ساحه مطبوعات و سیاسیاتمزه طانیدقلریمزدن بعضیلرینه بکزتمک بر درجه یه قدر ممکندر . ذاتاً او یله اولماسه یدی ، اثر مزیت حقیقتدن دوشکون قالیردی . فقط ، بحق تدقیق بیوریلیرسه بواشخاصدن هیچ برینی فلاندر دییه تعیین ایتک محالدر . چونکه ، تصویر و تصور حقائقده اودرجه ایلری کیتک قواعد مرعیه یه مخالفدر . ( و و کوئه ) یوقاریده ذکر ایتدیکم



اثر معروفنده صحیفه عادتاً آلمانلرک مشهور (لاسال) فی تعریف ایله یور ، او آدمک ترجمه حالی یازیور ، ظن اولونور . بعض تفرعاته کورم بویله در ، فقط عمومیت اعتباریله او ایکی شخص بربرندن بسبتون آریلیر . بوتفصیلاتدن صوکرده ظن ایتیم که بوچشید مشابهلردن طولای بنی مؤاخذه ایده بیلنلر اولسون .



معناجه طرز اجتہادی یوقاریدن بری سویله دم . تصویرده ، بلکه تصورده قصورلرم چوق اولدی . اساساً حکایه نویس دکم . بالفرض بر فردک وجوهنی ، اشکالی ، اندامنی بحق تعریف ایتیمک المدن کله دی ، کله مه دی ؛ حتی بر اوطه یی ، بر موقعی ، حاصلی بر منظره یی نظرده تجسم ایتدیره بیلیمک ده بنجه پک ممکن اولمادی . فقط ایسته دیکم بر فردده دیله دیکم افکاری امله بجه تمهید ایله تمک موفقیتنه ایردم ، هیچ دکلسه او یله صانیرم ؛ ذاتاً شیمدیلک صرف بو نتیجه یه دسترس اولمق مقصودمدی . تالسانمزدن بر چوق عواندیمزه قدر دوشوندکلریمی سویله یه بیلدم ، یعنی سویله ته بیلدم . بر لحظه تأمل بیوریلیرسه بویله بر اندیشه نک اهمیتی البته تقدیر اولونور .

بو مقصدی تعقیده بکا ک چوق یاردیم ایدنلردن بری ده اسلوبم اولدی . وار قدرت بیانمه صاریله رق اولاطوغری ، دوزکون بر افاده ایله تبلیغ مرهمه چالیشدم . چونکه صرفاً ، هله نحواً مطبوعاً تمزده طوغری یازی یازا بلیرمز اعتقاد بجه ، پک آزدر . صوکرده ایسه ، طرز تحریریمه اوتهدن بری بسط ایتدیکم ، بو اثرده بیله مناسبت دوشدکجه مدافعه ایله دیکم ، رنک تجددی ویرمکه چالیشدم . بوسطرلری اوقویانلر ، امضایی کورمه لر بیله محرری کشف ایدرلر .

« طرز سلفه تقدم ایتدم » دیمکه دیلم وارماز ، او یله کستاخلق ایتیم ، لکن : « بر باشقه لغت تکلم ایتدم » دییه بیلیرم . بویله یامقله قازاندمی ، فازانمادمی ؟ . اومسله یی استقبال حل ایدر ، بنی متسلی ایدن اودرکه صرف کوردیکم کبی دکل ، بر پارچه ده دوشوندیکم کبی یازمق ایسته دم ، ذاتاً بو سسوزی عبدالحق حامد بک سویله مشدی ، بو چیغری ده بلکه او آچمشدی ، لکن مع الاسف کنیشه تمه دی . بو طرز افاده نک بنجه اک بیوک مزیتی تبلیغ افکاره اک جدی ، اک صمیمی ، صورتده خدمتیدر . اک درین ، اک مشکل فکرلری ، مسئله لری تصویر ، تشریح



ایده بیلیمک، فقط علی الاطلاق اوقومتق و یازمق بیلنلریمز جه قولای قولای آکلا شلمق، لسان ادبمزی یالکمز خواصه دکل، عوامه ده آشنا قیلیمق بزه کوره اک موافق بر اسلوبدر. شمدی معارضلمک بکا غربتده یاشایه یاشایه چیلدیرمش، غرور کتیرمش دییه جکارینی بیلدیکم حالده، نفسمده تجربه مله سویلرم، ادما ایلرم که ایشه او اسلوب، ولو هنوز باشلانغیجده، هنوز کالنی بولامش اولسون، بو اسلوبدر، اسلوب ناچزمدر. تاریخدن، سیاستدن، هر نهدن اولورسه اولسون، اک دقیق، حتی اک کوچ مسئله لری بتون بولسانی بیانلره آکلاتمق، حتی صیقمادن اوقوتمق، هله سلاست وسلامتله افاده مرام ایله یه بیلیمک ایچون بکا دایما او درکه یار اولدی، یاور اولدی. بو سفرده او یله اولورسه آرتق بستیون ظفردر!.

علی کمال

انگیزه — ۹۱۱







# فئەتت

برنجى ڪتاب

غريب برنج

بر کنج، غريب بر کنج بر ياز کونى اوکله دن صوکره روم ايلي حصارندن واپوره بىندی . اوست قاته چيقدى، پارماقلغه طاياندى، بشوش، لطيف برسيايله اطرافه باقنيوردی ؛ دوستلرندن تصادف ايتديكى بر انگليز ايله فصيح انگليزجه، بر ديکرى ايله ده ينه اويلهجه فرانسزجه کوروشیوردی ؛ ترجه يي پک خوش بر طرز غريبده، لکن کمال سلاسته قونوشيوردی ؛ بتون او خلق ايجنده اطواريله، قيافييله، اوصافيله راستنا تشکيل ايدييوردی ؛ کينيشندن سويله ييشنه قدر اويله ایدی .

هنوز يکرمی ياشنه يا واران، يا وارمايان بوکنجک کوزلری خفيفجه ماوی، صاحبلری صاری، کمراه، وجهی ايسه پنبه مسی بياض ایدی، فقط بوي اوزون، نارين اولمقله برابر کيکلری ايريجه اولديني ايجون طورى پک مردانه، قاديجه بر نحافتدن عاری ایدی . ايلک نظرده کوريلیوردی که عضلاتی منتظام بر تربيه ايله تراشیده اولمشدی . او قدر موزون، متناسب، هله متين ایدی . بويله پارلاق بر محفظه نك محفوظاتی ده بالطبع اويله اولتی کرکدی . فی الحقیقه روحنک صفوتی، فکرینک قدرتی، قلبنک نزاهتی عادتاً بوشاب شاطرک اوضاينده کورونیور، ناصیه سنده

اوقونیوردی. مع مافیه، بتون اوسیا یینه برغرابت ایچنده نمایان ایدی؛ وهله اولاده شرقیلردن زیاده غربایلره، بالخاصه بر انگلیزه بکزه یوردی. فقط بریاندن ده یاناق کمیکلرینک بر نبذه حقیق قلیغیه، بورننک بر پارچه یانصیلغیه اوزاقدن اوزاغه ترکلری، باتارلری آندیریوردی. او کنج ساده بویه بدنا دکل، اخلاقاده اویله ایدی. یینه هم شرقیلره، هم غربیلره مشابه ایدی، حاصلی، پک مبهم، پک آکلاشلماز بر فطرت ایدی؛ چونکه آنهجه، باباجه بر برندن ضد، بر برندن اوزاق اقلیملردن یتیشمشدی، یینه اویله بر تربیه کورمش، اویله بر حیات کچیرمشدی؛ (عثمان فترت) نامنی طشیوردی. (فترت)، بر اسم که اونکچون کویا کوکدن اینمشدی.

(فترت) ک پدری ترک، مادری انگلیز ایدی. بر ترک کنجی ایل بر انگلیز قیزی وقتیه اسویچرده بر سیاحتده بر برینی طانیشلر، سومشلردی؛ هرمشکله رغماً اوله نمشلر، مسعود، مفرح بر عائله تشکیل ایتشلردی. لکن بوسعدت چوق سورمه مشدی، زوجه (فترت) ی طوغوریرکن هنوز یکرمی بش یاشنده، حسنک، صباحتنک اوج اقبالنده سونمشدی؛ نور طوی کبی ایکی چوجغنی طویا طویا اولسون سومه دن، دیدکری کبی، دنیاسنه طویمادن وداع ایتمشدی. بو فلاکتدن صوکره زواللی زوج قلباً پریشان اولمشدی، اک جان آله حق یرندن اورولمشدی، چونکه رفیقهنی وار قدرت قلیله سوییوردی؛ او ماته قارش یانیق یانیق، ایچین ایچین:

همراهم ایدک بو یوله، ای ماه!

همراهی ترک ایدرمی همراه؟

دیه فغان ایدیوردی. چونکه بویه بر سودا اویله بر سکتیه اوغراسه سودازده بی مادام الحیاة زددلر، صارصار. فقط (فترت) ک پدری (سلمان) بک فطرتده، فکرآده فیلسوف ایدی. او آجیلره تحمل ایتکی بیلیوردی وهر تسلیی بری قیز، بری ارکک ایکی محصول حیاته وقفامل ایله مکده بولیوردی. (سلمان) بکک (سلمی) نامنده (فترت) دن اوج باتس دها بیوک بر قیزی ده واردی.



والدهلرينك وفاتندن صوكره بو چوچقلرى آننه جهندن بيوك والدهلرى  
 انكلتره نك اومعمور ، اوآسوده ، اوجيدكوبلرندن برنده ، (لوندرد) جوارنده  
 بيوتمشدى ، فقط نه خارق الماده ، نه مكمل بيوتمشدى ، تربيه ايتمشدى . چوچقلر ،  
 هله ( فترت ) بدنا برر خارق ايدلر ؛ اوغلان هنوز ايكي ياشنده ايدى ، درت ياشنده  
 كچي كورونيوردى ، اويله كوربوز ، اويله متين البنيه ايدى . قيز ايسه ، رقت  
 اعضاسيله ، نحافت جسميه سيله برابر بش ياشنده ايكن بويجه ، بوصجه يدي ، سكز  
 ياشنده ظن اولونيوردى . انگيلزلرده ، انگلترده ، اومسعود خلقده ، او مبارك  
 اقليمد چوچقلر باشقه برفيض ، برانشراح ايله بيويورلر . ( فترت ) طوغه لرده  
 اون بش كون اولمامشدى ، هم ده موسم صوك بهار ايدى ، بر اوكله وقتي بيوك  
 والده سنك قوجاغنده ، باغچه ده كزييوردي . اويله قونداق ايمش ، باصقي ايمش  
 كورمه مشدى ، تابشيكدن آزاده لكه آليشمشدى ، هر كون تميزجه ييقانيلىردى ،  
 تميزله نيليردى ، دائما پاك ، دائما لطيف طوتولوردى . معين وقتلرده يردى ، ياتاردى ،  
 قالقاردى . بوانتظامك صحت حياته خدمتي بيوكدر . قيش اولسون ، ياز اولسون  
 هوا كوزل اولدجه چوچق هر كون داديسيله هم صباحلرى ، هم اوكله دن صوكره  
 قيرم ، كز مكه چيقاردى ، مطابق اويله برنسيم صاف تنفس ايلردى . اوده ايكن  
 ( نور سري ) ديدكلرى چوچقلرايچون اويون ، اكانجه اوطه سنده قاردييله برابر  
 اويونجاقليله اوينار ، دوشر ، قالقارلردى .

( فترت ) چوچقلغنى بويله مسعود ، مفرح كچيردى . هنوز يدي ، سكز  
 ياشنده ايدى ، انگيلزجه دن باشقه برلسان بيلمه يوردى ، حتى آز اوقويور ، آز  
 يازييوردي . لكن دها اوزماندن همان هر اويونده ماهر ايدى . آرا صيره بعض  
 مكتب آرقداشلريله ( بوقس ) ديدكلرى يومروق غوغاسنه بيله حين حاجتده  
 كيريشيوردى . اوائلرده ( پارس ) ده بولان باباسنك ياننه كلدى . ( سن ژرمن )  
 ده مكتب اعداديه كيردى . بومدرسه ده فرانسزجه ني مكملأ اوكرندى . هر  
 سنه تمطيل ايامنى بيوك والده سيله ، همشير سيله انگلترده كچيرديكي ايچون ، انگيلز-  
 جه سنى ده اونوتمادى ، بالعكس ايلريه تدى . علوم ابتدائيه واعداديه ني كوزلجه تحصيل  
 ايتدى ، امتحانلرني دائما صف اقبالده كچدى . بتون بو تحصيل ائناسنده اكثريا

کجه لری باباسیله برابر چالیشدی . ترکجه یی لساندن ادبیاتنه قدر ایجه اوکرندی . دهاون سکزیاشنه کله مشدی ، پدریله برلکده مملکتی کورمک ، تحصیل شرقیسنی اکمال ایله مک ایچون استانبوله کیدرکن (فترت) لسانآده ، عرفانآده اوفق ، تفک ادیب کچینلریمزدن چوغنه غبطه بخش اوله بیلیردی . قدرت معلوماتیله ، تبعاتیله اوله مونس ، مؤثر یازه بیلیردی . فکر آ وسعت ، متانت مالک ایدی . بوسایه ده قلمآده فیض ، انشراح بولیردی ؛ غریبدرکه اعلا انکلیزجه ، اعلا فرانسیزجه بیلدیکی حالده ، تأثیرات ارث ایله اولسه کرک ، ترکجه یازمغی اوبرلرینه ترجیح ایله یوردی . انکلیزجه ، فرانسیزجه چوق اوقویور ، حتی سوق اعتیاد ایله ، اکثریا بولسانلرده دوشونیور ، لکن ترکجه یازمغی سویوردی . غالباً ، بوابتلاده مشاهیردن برینک معروف سوزینی نظر امعانه آلیوردی : « برشهرده ایکنجی ، اوچنجی اولمقدن ایسه برکویده برنجی اولمق اولادر » فی الحقیقه انکلترونک ، فرانسه نک اورتا حالده برمحوری ، برادیی بزده اوج اقبالی قولای قولای احراز ایده مزمی ؟

( فترت ) باباسیله برابر ( استانبول ) ده ایکی سنه دن زیاده قالدی . پک چوق کنج لرله عقد الفت ایله دی . حتی شباب ایچنده بیوکه برشهرت بیله قازاندی . باب عالی جوارنده کی کتابچی دکانلرینه صیق صیق کیتدی . مطبعه لری طولاشدی ، ادبای عظامه تقدیم اولوندی . فقط بوجهان ادب و تحریر اومتین کنجی اصلا وجده کتیرمه دی ، انجق تعجبه دوشوردی :

برکره بیوک برجریده ، دها بیوک برجموعه ادبیه صاحبی ، هم ادیب ، هم مورخ برذات ایله کوروشمکه کیتمشدی . بومحرر شهیر محتشم برماصه نک باشنه کچمشدی ، برمقاله تاریخیه نک مسوده لرینی تصحیح ایله اوغراشیوردی . دیرکن ، اومحررکینه اودرجه معروف ، دبده انشاسیله مشهر بر رفیق تحریری ایچری کیردی . اومسوده لردن برینی اله آلدی ، مطالعه یه قویولدی ، بردن بره :

« وقتا که جنرال ( سوواروف ) اوجهانگیر واهمه فروزک اوزمانه قدر آفات قدرت فاطردیه بیله مقاومت ایله یین عزم خوارق انکیزینه کویا فوران ایچنده بر سلسله براکیندن اذعازبا اولدیغی مرتبه ده آتشین برحائل چکدی .. »



عبارده‌سی جهراً او قودی ، او قود قدن صو کرده اطرافه شویله بر کوز  
کزدیره رک :

— استاد ، بوسفر وار اول ، ساده تاریخک دکل ، ادبیاتک ، بلاغتک ده اوج  
والاسنه ایردک . اوت ، او نه حقیقتدر ، نه مؤاددر ، فقط نه مضموندر ، نه ادادر ،  
نه افادهدر !

دیدي ، او ادیب معظمده بومدا تخه :

— اولاد ، عجمانه مبالغه‌یه حاجت یوق ، اونا چیز سوزلر ناچیز بر قلمک محصولیدر ..  
دییه بر ایتسام مغرورا . ایله مقابله ایتدی .

( فترت ) بوحاله قارشی حیرتله دوشدی ، بو آدم‌له ملول ملول باقیوردی :  
امان یاربی . بوقوجه مشاهیر ادمز حقیقتده بودرجه بوشمیدر لر که ... ارلا ( ناپولئون )  
ایله ( موسقووا ) حوالیسنده او یله حیله کارانه چارپیشان جنرال ( سووواروف )  
دکل ، فقط ( قوتوزوف ) در . ( سووواروف ) نه زمان یاشادی ؟ نه یاپدی ؟ نه وقت  
ئوادی ؟ بیلمه مک ؟ ( اسماعیل ) ده بیکلرجه دینداش لری میزی ، وطنداش لری میزی  
الی ، ایاغی باغلی معصوم‌لرله ، چو جق‌لرله ، قادی‌نلرله برابر غدارانه ، وحشیانه  
قلیج‌دن کچرن اوسردار مجذوبی حقیله طایماق ، اخلافیله قاریش‌دیرمق بر ترک  
ادیینه ، هله بر ترک مورخنه یاقیشیری ؟ اوندن باشقه ده ، غلط ، غلط ایچنده ،  
( موسقووا ) شهرینه او یله کوشه کوشه طوپدن آتش ویرن جنرال ( قوتوزوف )  
بیله دکلدی . لکن شهرک والیسی ( روستوپکین ) ایدی ، ( روستوپکین ) که  
حب وطن حرصیله ایقاع ایله‌دیکی بومدهش حرکتی ابتدالی انکار ایله‌دی اما  
صوکره اعترافه مجبور اولدی . . . .

هله حقائق معنایی بر سوری لزومسز ، مناسبسز استعاره‌لره بوغان او طرز  
غریب تحریرک بلاغتی ، لطافتی نره‌دهدر ؟ .

هر ناصلسه ، او محیطک تأثیر یله اولسه کرک ، ذهندن کچن بومصیب مطالعه‌لری  
خلاف معتاد ، او بی پروا کنج بر درلو بو استاد‌لره قارشی بسط ایتکه جسارت  
ایده‌مدی اما آرتق او آدم‌لری ده بالغمورده بر نظر استخفاف ایله کورمه‌که باشلادی .  
ایشته بو کونده ( فترت ) ترکلرک ( سوللی پرودوم ) ی دیدکاری ( حیرت )

بك اسمندم بر شاعر معروفه ، بر آرقاداشك وساطتی ايله تقدیم اولونه جقدی . شهره بوايش ایچون اینیوردی . بوشاعرك (خیال خرامان) عنوانیله بر مجموعه سنی کورمشدی ، دهايك سطرلرده پك ابتدائی ، پك خفیف بولمشدی ، بر درلو نهایت قدر اوقویامامشدی ؛ مع مافیه ، بعض کنجلیمیزك پك مرغوبی اولدینی ایچون بو ذاتی بر کره جك اواسون ، کورمك ایسته یوردی .

( حیرت ) بك ده بالخاصه بوملاقات ایچون ( ثروت فنون ) مطبعه سنه ککشدی ، یاننه الک صمیمی ستایشکارلرندن بر قاچنی آلمق ، بو صورتله شباب عثمانی یه نفوذ کلی ادیبسینی ، هراحتماله قارشى ، اوتلمیز جدید ادبه کوسترمك احتیاطنی ده الدن بر اقامشدی . سنا آتمشه یاقلاشمش اولمقله برابر او ابتلاى تجدد حسبیله اولسه کرک ، حالا زمره شبابه نسبت ایدیلن بوشاعر شهر اوج عظمتدن ( فترت ) ی هرحالنده وقورانه بر تواضع ، نیم بر التفات ايله استقبال ايله دکن صوکره فضانه ، عرفانه مهوت قیلمق ایستر ، وقتيله طول مدت فرانسه ده ، انکاتر ده یاشادیغدن بحث آچار ، صرف اسملرینی تلفظ ایتك شرطيله ( بایرون ) ی ، ( هوغو ) ی ذکرایله ، نهایت شو ملاحظه یی بسط ایدر :

— بز بو مملکتله قیاس ایديله مه یز ، اونلر دوشرلر ، قالقارلر ، ینه یاشارلر . مثلاً فرانسه ده بر اختلال کیر اولور ، بر ( ناپولئون ) ظهور ایدر ، اورتالق هرج مرجه اوغرار . دیرک ، او هرج مرجدن صوکره بر اون دردنجی ( لوئی ) کلیر ، ایشلرینه دوزه لیر .

( فترت ) ضبط نفس ایدم من :

— ( ناپولئون ) دن صوکره اون دردنجی ( لوئی ) دکل ، اون سکزننجی ( لوئی ) کلدی . آراده پك بیوک برفرق وار ...

دیر ، ( حیرت ) بك بوتصحیحجه قیزمقله برابر طورینی اصلا بوزمایه رق بوسفر حقیقی بر مهارت ايله :

— اون دردنجی ( لوئی ) اولمامشده اون سکزننجی ( لوئی ) اولمش ، مقصد اودکل ، مقصد ....

دیه بخی قاریشیق بر سفسطیه بوزار ، باشقه بر موضوعه کچر ، دره دن ، تپه دن



دم اوریر . ( اکرم ) دن ( حامد ) لره ، ( فکرت ) لره قدر و قیله اک بیوک  
شاعر لریمزدن کوردیکی تقدیرلری اوزاق، یقین برر مناسبتله ذکر ایلر .

لکن ( فترت ) آرتق آکلایه جغنی آکلامش، بوشاعر مشهور ایچون حکمنی  
ویرمشدی . مجلس طاغلقدن صوکره او کنبجاردن ایکی، اوچله برابر کوپرییه  
طوغری کلیرکن حیرت بکه هر حاله رغماً حالا پرستش، ذاباً بوملاقاته دلالت ایدن  
او مکتب سلطانی طلبه سندن آرقاداشنه دیدی که :

— آیول، بو آد مجنز ناصل بیوک بر شاعر، بیوک بر ادیب اوله بیلیر ؟ بتون  
اورو حمزه، اساسنر مطالعه لر بر طرفه طورسون، ایشته کوردیکز، تاریخک اک  
بسیط صفحه لرینی بيله بيلمور، انسانلردن ماعدا عصرلری آلت اوست ایله یور .  
او برلری بو مؤاخذه نی محق بولدیلر، تصویب ایتدیلر، ( حیرت ) بکک اوصاف  
پرستشکاری بو سوزلره جواباً :

— یوق، عزیزم، او یله بر شاعر نریمزی یانمده تحقیر ایده مرسکز ، او بر  
شاعر در ، تاریخ معلمی دکل ، اوله بیلیرکه، اون دردنجی ( لوئی ) ایله اون سکزنجی  
( لوئی ) بی بر برینه قاریشدیریر، او یله معلومات ابتدائییه ایله اوغراشمغه وقت بوله ماز،  
فقط سز ، لطفاً ، ( خیال خرامان ) ی او قودیکز می ؟ او قودیکز سه، بتون اولفظاً ،  
معناً نظر ربا نشیده لرك ( ورلن ) لره ، ( فرنان غرق ) لره ، پک یا قلاشدیغنی  
اولسون، تسایم ایدرسکزی . ( ورلن ) لره ( فلوردومال ) ی عجبا ( خیال خرامان ) دن  
پک چوق پارلاقیدر ؟ ( مالارمه ) نک او پک معروف ( آلباتروس ) منظومه سنی  
آندیریر پارچه لر ی ( حیرت ) بکک اثرنده صحیفه صحیفه بولاماز میسکز ؟ .  
دیمسونمی ، آرتق اوزمان ( فترت ) طایانامادی :

— میرم ، طارلما ییکز ، اما سز نه سویله دیککزی بيلمه یورسکز . ( حیرت )  
بککک فکر آ ، قلماً ، عرفاناً درکه سنده بر فرد آوروپاده یازی یازمغه، اثر نشر  
ایتمکه جسارت ایله یه من . بو آدمی او کلیشی کوزل ذکر ایتدیککز فرانسنر  
شاعر لر یله مقایسه یه قالقیشما کز بيلمم نه یه دلالت ایدر ؟ کلیشی کوزل ، دیورم،  
چونکه ( ورلن ) ایله ( فرنان غرق ) ی بر آرایه کتیرمک، صوکرده ( مالارمه ) نی

اور تايه صوقق بوشاعرلردن هيچ بريني اوقوماديغكزه ، اوقوديكزه آكلاماديغكزه دالدر .

هله (فلوردومال) ديديككز (الم چيچكلى) نى اله بيله آلامشكز ، چونكه اويك معروف مجموعه اشعار (ورلن) ك دكل ، (بودلر) كدر . وقتيله ، ايكنجى ايمپراطور اوق زمانده انتشار ايتدى . هر جهتجه كللى دغدغه يه بادي اولدى . ادبياتده ، شعرده لفظ ، هله . معنى اعتباريله بر فصل اختلال آچدى . مندرجاتجه قواعد موضوعه اخلاقيه يه بيله منافي كوريله رك تعقيات عدليه ده اوغر اولدى . بو ابتدائى معلومات ادبيه دن بيله محرومكز . ذاتاً (آلباتروس) ي (مالارمه) يه مال ايديشكزده فرانسه ادبياتنه فقدان وقوفكزى كوستير . بويله محاكمه لره ، مقايسه لره قالميشمادن اول اوقويكز ، يك چوق اوقويكز . اول امرده ، هيچ اولمازسه (بروتير) ك ، (فاكه) نك بوادياته دائر يازدقلىنى اولسون تتبع بيوريكز .

ديه ايچنى دوكدى . شرقيلىنى ، خاطر نوازلىنى بر طرفه براقه رق انكيزلىكى اله آلدى . بوجدل ادبى بويله جه برجدال حقيقى شكلنى آلمق اوزره ايكن بركت ورسونكه (فترت) اوزاقدن آرابه ايله باباسنك كچديكى كوردى . آرقاداشنه ينه نازكانه بروداعدن صوكره آيرلدى . (سلمان) بكك ياننه كيتدى .





بو بابا ايله اوغل عادتاً ايکي آرقاداش کي ايديلر؛ بربرينه قارشى اويله سربست حرکت ايدىيورلردى. (فترت) پدريني جانندن سوييوردى، سومکله برابر بر استاد حيات بيلور، پاك تقدير ايدىيور، بيوک کورييوردى، مع مافيه اواب معززىنك ياننده اوضاع معتاده سنى اصلاً دكيشديرمه يور، حرمتى اويله ظواهرده دكل، فقط حقائقده کوسترييوردى.

(سلمان) بك ايسه اوغلنى بتون عمرينك بر مقصودى عد ايله يور، بر نخبه غرام کي حرز جان ايدىيوردي؛ چونكه رفيقه مرحومه سنه محبتى، حرمتى، ابتلا سنى آرتق چوجقلىرينه نقل ايتمشدى. برده فطرتك بالذات اوکا ميسرايتمه ديکي مادى، مغوى کالاتى (فترت) ده، او ثمره حياتنده مجتمع کورييوردى، کوردکجه ده دها زياده سوينيوردى.

بويله اولمقله برابر، بلکده بالخاصه بويله اولدينى ايجون سلمان بك ايله فترت پدر ايله اولاد دكل، ديدىکمز کي، عادتاً ايکي آرقاداش؛ بيوک بر املک، بر طول املک برى يورغون، او برى دينج، برى دها چوق تجربه، لکن ديکرى دها زياده قدرت، استقبال صاحبي ايکي معقبى ايديلر. سلمان بك اللى طقوز ياشنده بر آدمى، فقط نهر کورمشدى، نه مهيچ ياشامشى.

(فترت) اوکون کچيرديکي وقايى، آرقاداشيله مباحثه سنى، دها طوغريسي، مجادله سنى باباسنه آکلاتدى. او بحنى دیکله دکن صوکره سلمان بك اوغلنه ديدى که: — اوغلم ايشك يوقسه، بو اقشام بنمله برابر کايرمىسک؟ تپه باشنده باش باشه ويرير، يمک يرز، بو مباحثى اکال ايدرز. صوکره بوغاز ايجنه برابر دونرز.

بو تكليف ( فترت ) ك خوشنه هم كيتدى ، هم كېتمەدى . كېتدى ، چونكى  
 او كزىدە كىچ پدرياه بويله باش باشه ادبى ، سياسى مباحثه لره كيريشمكى ، آرقاداشجه  
 دوشمكى ، قالمىنى سوييوردى ؛ كېتمەدى ، يئە چونكى ( فترت ) كىجەلرى روم ايلي  
 حصارنده قومشولرندن برعائله نك اوينه مسامره يه كيديوردى ، او اوده اقرانندن  
 بر قاچ مستعد كىچ ، برده اونلر ك يئە او ياشلرده ( سحر ) اسمنده فطرة ذكى ،  
 فكراً مترقى ، پك كوزل دكل ، فقط شيرين برهمشيرەلرى واردى . اوراق برقرابت  
 حسيله ( فترت ) دن قاچايوردى .

بر برياه هنوز رسمى كوريشيورلردى . دائىمالى كز بويله اجتماعلرده بولوشيورلردى .  
 اويله ايكن ( فترت ) ك ( سحر ) ه ( سحر ) ك ( فترت ) ه ميلى پك ظاهرى ،  
 پك قوى ايدى . اقشاملرى يىمكدن صوكره ، ( فترت ) او مسامره لره جان آتيوردى .  
 ( سحر ) ه تصادف ايتىرسه محزون اوليور ، صاراريوردى . سحرده عين تهيجاتى  
 بسله ديكي ايچون تا اولدن اوجمعيته كليور ، ( فترت ) ي بلكه يوردى . بر قاچ ساعت  
 زمان زمان بر برينه كىزلى ، عيان باقق ، كولمك ، برينك مطالعه لرينى ، فكرلرينى  
 اوبرى دىكله مك ، خنده لرينى طويلامق بوايكي كىنجك نشاطنه ، صوك درجه  
 نشاطنه بادي اوليوردى ، او معصوم قلبلرينه برغداي كاڭى ايدى . هنوز نه برينك ،  
 نه ده ديكرينك خاطرينه سوديكيله باش باشه قالمق ، حسب حاللره طالمق امللرى  
 ككه يوردى . بو عمومى صحبت ، اوصاف انسيت هرايكيسنى ده مفرح برغرامه غرق  
 ايله يوردى . اوسودا دها پك معصوم ايدى .

ايشته بوانديشه ، بو علاقه ايدى كه ( فترت ) ايچون او كىجه يى باباسيله برابر  
 كچيرمك ذوقنى تلخ ايله يوردى ، مع مافيه اوتكليف پدرانە يى رد ايدەمدى ؛ بابا ،  
 اوغل تپە ناشنده باغچه ده يىك يديلر ، صوكره بر كوشه يه چكيله رك اوزون اوزادى يه ،  
 رنك رنك مباحثه لره طالديلر .

سلمان بك دييوردى كه :

— اوغلم ، بومملكتى ، يعنى وطنكى ، وطنداشلىرىكى نظر تدقيقدن كچيركن  
 بر حقيقتى پيش عبرتدن اوزاق طوتما : بو ملك اوروپا ممالكى ايله ، دها واسع  
 بر نقطه نظردن شرق غرب ايله قياس ايديله من . ادبياتده اولسون ، سياساتده



اولسون ، صنايعده ، فنونده ، علومده ، نهده اولورسه اولسون ، بز شرقيلىر ، غربيليره نسبة حقيقتده چوق ، پك چوق كرى يز ، ابتدائى يز . غرور مى ، اختلاف دين ، حنى صلابت دينيه چوغمزه بوحقيقتى واضحاً كوستره مز . لكن او علائقدن بر لحظه تجرد ايدنلر يمز عياناً كورمه يورلر مى كه بوكون شرقك الك بيوك علامه لرى شايد كمالات غريبه يه ميل ايتزلر ، السنه غريبى او كر نملر ، صرف معلومات شرقيه ايله اكتفا ايدرلر سه علومده ، فنونده غربك عادتاً مكاتب اعداديه مأذونلر يله رقابته چيقامازلر . بوبدها تك الك بيوك دليلي شودر كه بتون جهان شرق مدنيتجه ، رفاهيتجه نسبة نه قدر فقيردر ، اويلاه اولمقاه برابر غربك خرجكدا ريدر ، اسيريدر . مدنيتده معرفتده او مرتبه يي بولمادقجه اصلاً بوفقردن ، بوسارتدن قورتوله ماز .

بوحقى تسليم ايله دكدن صوكره هر حقيقتى ، هر حقيقتمزى قولايجه ادراك ايلرسك . مثلاً ، كچن كون يانه ، ياقيله حكايه ايدسيوردك : مورخ كچين بر اديبمرك ، بيوك بر منشى عد اولنان بر محرر يمرك (سوواروف) ايله (قوتوزوف) ي بر برينه قاريشديرملرينى ، (موسقوا) يي ياقانك كيم اولديقى بيلمه ملرينى پك غربب كورييوردك ، عجباً اويلاه ميدر ؟ چونكه ملكم زده او شهرت كليهلر يله برابر او ايكي ذاتك مطالعة غريبه لرى پك ناقصدر . بر لسان غرب وقوفلرى آزدرد . او مطالعه ، بو وقوف اولمايجه تاريخك بتون او صفحاتى او كر نمك قولاي ميدر ؟ ينه صرف بوسائقه ايله دركه او ذاتلر بلاغتى ، فصاحتى ، حاصلى ادبياتى اومضنطن انشاده آرارلر ، سنك ، نم يازديقمز ساده ، كسيك ، طبعى تركه يي يابانجى بولورلر ، عجزه ، عجميله عطف ايدرلر ، چونكه غربدن دكل ، اساساً شرقدن اورنك آليرلر .

نسلدن نسله فرق يوقميدر ؟ سن نسل جديددنسك ، سكا نسبة اونلر نسل قديمندنرلر . سندن اونلره آرا كزده قدر اختلاف ، ن درين تكامل اولورسه آتيمز ايچون اودرجه اقبال ملحوظدر . يالكر ادبياتده دكل ، سياسياتده وسائرده هپ بويلاه در .

مع مافيه بتون ادبامزى ، مورخلر يمزى ده هر حالده بر چوق مز ايدان ينه محروم

اولمیان بوايكي نمو، يه كوره محاکمه ايتمک ينه حقسنزلق اولور. چونکه آرقاداشلر مدن اويله محررلر يئري طانيرم که بالفرض (ناپولئون) دوريني فکراً اکه مترقي بفرانسز قدر کافه دقايقيله بيایلر، حتی حين حاجتده او سردار معروفک هر هانكي بر سفرينه دائر اولورسه اولسون اکه پارلاق بندلری یازارلر، بالطبع اوصفحه تاریخی بر (واندال)، بر (فرددريق ماصون)، هله بر (هانری هوسه ی)، حتی (اوز بهری) کبی تدقیق ایده منزلر، اوقدرتی کوسترد منزلر، فقط بر ترك محرری ایچون شایان تقدیر بر طرزده تابع، تمهید ایده بیایلر.

کله، کله ينه او نتیجه یه کلیورز. بتون بومحاکمه لری یورو تیرکن غربک شرقه تمدنجه، تعالیجه عصر عصر تقدیمی اولدیغنی نظر امعاندن اوزاق طوتما ... شمدي بالفرض حیرت بکی، (خیال خرامان) ی تنقید ایدرکن غربی، ادبیات غربیه یی بر طرفه براقه رق صرف بو مملکتی نظر اعتباره آلملیسک. بواقليمده عصرلردن بری :

« همان بر اول قدر وارد که موزون ومقفا در »

فحواسنجه علی الاطلاق شعر سویله یئلر ادا بدن عد ایدیلورلردی. همده بو ادیبلرک چوغی اويله حیرت بک کبی اون دردنجی (لوئی) یی اون سکننجی (لوئی) ایله خلط ایتمک سویله طورسون احتمال، فرانسه نک موجودیتنه بیله واقف دکلدیلر، حتی، حتی بلکه ده :

اويله قلیج اوردیریر که فرضی  
ایلر ایکی پاره کاو ارضی

مدح مزاحنده تلمیح ایدلیدی اوزره بو چشید خرافاتک بیله زبونی ایدیلر. اوت، حیرت بکی تا کنجلمکدن بری طانیرم، فکراً، علماً محدود بر ذاتدر، صانیرم؛ فقط بزده کی شعره، ترقیات ادبیه یه نظراً اوده بر شاعر عد اولنه بیلیر. اوبکنمه دیکک (خیال خرامان) ده بر چوق امثالندن ایلری دکلسه، تسلیم ایدرسک، پکده گری قلماز. بتون، بوشعرلری، بواثرلری غربک اشعاريله،



آثاریله مقایسه‌یه قالدیشیرسهك انك مشهورلری ده داخل اولمق اوزره دیگر شاعرلر-  
 یمزی ، ادیبلریمزی حیرت بكدن بك ، بك یوكسك بولامازسك .  
 مع مافیه ، عمومیت اعتباریله كنجلیمزی ، هر حاله رغماً ، شایان تقدیر  
 كورمهك ممكنیدر ! بو مكتبسزلك ، بو عرفانسزلق ایچنده اوزكالرناصل پرورده  
 اولیور ، یتشیور ! حیرت ! اوت ، دیديكك كچی ، مثلاً (فلاسیك) لری بیلمه‌دن ،  
 اوقومادن ، (مالارمه) لرله ، اوتملی قورمادن بو فرعلرله اوغراشیورلر . (وولته‌ری) ،  
 هله (روصو) یی ذره‌جه تتبع ایتمه‌دن لاینقطع (ته‌ن) لرله دوشیور ، قالدیورلر ؛  
 سیاسیاتده اولدیغی كچی ادبیاتده بیله باشی بوزوقلق ایدیورلر ، اویله امانینه فکراً  
 بیوك بر مزیت ، بر ترقی كوسترییورلر .

مطبوعاتمزدده جرائد غریبه‌جه بیله قبوله شایسته عمومی مقاله‌لر كوروندی .  
 محررلریمزدن اوروپاده بیله بویولده نشر آثار ایدنلر اولدی . مملكتیمز ایچون  
 بو اوافق ترقی‌ی اقبال آتی‌یه بر فال خیرعد ایتك كر كدر . تركلر : قطره قطره  
 كول اولور ، دیرلر ، عربلر ده‌ا بلاغلی :

ان قطر الندی يعود غدیرا

مثلی ایراد ایدرلر . بر کون کلیر ، بونبده‌ده كل اولور ، بزندن ده (تولستوی) ،  
 (سینکیه‌ویچ) (ایبسن) كچی جهانپسند مؤلفلر یتشیر . تركجه یازلمش بر اثر ،  
 بالفرض بر حكایه السنه عمومی‌یه ترجمه ایدیله بیلمك شرف عال‌العالی احراز ایلر .  
 بو قوم بو نعمته ایرمك ایچون انحق بر نخبه اصلاحه محتاجدر ، اوده شرقدن  
 صیریله‌رق بسبتون غربه طالمق ، هر خصوصجه اصول عرفان غربی مشق ایدیمك در ،  
 یوقسه فطره اقوام سائر شرقیه بکزه‌مز ، اواستعداد تعالی‌یه مظهردر ، چونكه  
 اول امرده وقتیه مدنیترك مهدی ، لحدی اولمش بر اقلیمك پرورده‌سیدر ، ثانیاً  
 عروق مختلفه‌ك محصولیدر . بویله یرلرده ، بویله یتیشن اقوامك استعداد فطری  
 وكسیسی دایماً خارق‌العاده‌در .

حاصلی ، اعتقادجه ، تکرار ایدرم ، بز عثمانلیلك انك زیاده محتاج  
 اولدیغمز کریوه شرقدن ، اوانكلدن ، اوتعصبدن قورتوله‌رق بر تربیه غربیه‌یه مظهر

اوله بيلمکدر. شمدی یه قدر هر جهته فیض مزده، اقبال مزده حائل کسین بونقیصه مزدر؛ بونقیصه مز که اینج مزده نه قدر کوکله شمشدر. بو کون بيله بو مطالعه لریمز دیگله. یئرلیمزده یوزده لاقول یتیمی بنی، احتمال، محکوم ایدر لر، هیچ اولمازسه، خفته، حوپالقه محکوم ایدر لر، ایدر لرده، فالق اوکه، بتون طوتدقلرغی اومدخول یولدن اصلا شاشمازلر، اویولک مدخول اولدیغنه ایسه، اک صریح برهان حالمز، حال حاضر پریشانمز اولدیغنی بيله کورمز لر، تسلیم ایتمز لر :

#### شکایت جهلدن فریاد بی ادراک کلکدر دن

اوغلم، بوملکک اولادندنسک، ایر، کیچ بو طوپراقده یاشایه جقسک، اوله جکسک، اولدکدن سوکرده یاد ایدمک، ینه برنوع یاشامق ایسته یه جکسک؛ دیمک بو وطنک اقبال وادباریله کوله جک، آغلایه جقسک، یوقاریدن بری بسط ایلدیکم حقائق ملیه مزده ندرجه آگاه اولورسهک بوملکته او قدر خدمت ایده بیلیرسک، چونکه اونستده افراطدن، تفریطدن توقی ایدرک حین حاجتده آزه، چوق برایش کوره بیلیر، مشکلاتی اقتحام ایلایه بیلیرسک.

ایسته کنج لریمز اکثریتله بویله برمسلمک طوتار لر، بوکال خاصه ایررلر سه، عثمانیلر ده، عثمانلیقده شائبه اضمحلالدن قورتولور، نجات بولور، بولور، فقط بزده اوزمان جهان مدنیتک بللی، باشلی بر قومی اولور ز.

برده تجربه مه اینان، تبعمه اعتماد ایت، سنکده، آرقاداشلر یککده تکملیمز، تعالیمز ایچون او فضولی یأسکزه اشتراک ایدن لر دن دکم. انکله ترده بیودک، فرانسه ده تحصیل کوردک، کوزک، کوککک، فکرک دائما عمران، کالاته آلیشدی. آنهک تمدنک اک نزیه بر محصولی ایدی، عرفاناً خارق العاده ایدی. موسیقییه، ادبیاته، فنونه، هپ نافع بر درجه ده واقفدی. باباک ایسه هر عجزیله برابر شرقک ال مترقیلرندن عدا اولونه بیلیر. بتون بو تأثیرات ارشیه یه مظهرسک. آرقاداشلرکده قسماً اویله در.

طبیعی، سز بو مرتبه دن تماشا ایدنجه شرقی، مملکت میزیک دون، چوق کری کوریور، مایوس اولورسکز؛ فقط دها اوتوز، قرق سنه اول بوملکتک نه اولدیغنی بیایور میسکز؛ اویله سنک کی انکله ترده، فرانسه ده یتیشلریمز، انکلیزجه یی،



فرانسزجه يي لسان مادرزادی کي بیلنلریمز بویله یوزلرجه دکل، بلدکده هیچ یوقدی، حتی اوروپابه سیاحت، هله هجرت ایدنلریمز میلیونده بر، ایکی، یا بش ایدی. یاریم عصره وارمایان بویله بر مدت ایچنده بو ترقی خارق العاده دکلدر؟

جهان لسانله دونر، دیرلر، اویله در.....

بر کره لسانمزی، ترکجه یی حاده امعاندن کچیرسه کز آ.. اجدادیمز یاریم، یا کلش ایکی، اوچ سطر یازی یازابیانلریمزی کاتب عد ایدیور، مصنع، لکن مزیت طبعیه دن معری، مغلق، فکر آ ایسه هیچ اندر هیچ بر اثر جکز وجوده کتیره بیلنلریمزی برر صاحب دها صانیورلردی.

پدرلریمز، یزدها ایلری کیتدک، آز زمان ایچنده اوشابهلردن صیرلوق، دوشوندی کمزی یازمغه باشلادق؛ لکن ینه شرقدن، شرقلیلقدن قورتولما یارق لسانمزه غرب خصالتی، اوطیعیلکی، اوتکملی ویره مدک.. فقط بو وادیده، وادی تجددده سز بزی چوق کچدی کز. بو کون ترکجه یی همان بر غرب لسانی مرتبه سینه رفع ابله دی کز. نه دوشونیرسه کز، نه ایسترسه کز بو لسانده بر سهولت خارق العاده ایله، سلاستله، سلامتله ائاده ایدیورسکز. هیچ بر فکر یکزی اویله طمطراق الفاظه، حتی مشکلات بیانه قربان ایمیورسکز؛ هله لطافت ادایی دها صاف بر صورتده محافظه ایله مکله برابر معنایی، مضمونی، مؤدایی دها قدرتله کوستریورسکز.

کچنلرده رفقا کزدن بری (لاویس) ک بر مکتبده، توزیع مکاناتده طلبیه لطیف، لکن متین؛ اسلوب اعتباریله لطیف، معنجه متین بر نطقنی ترجمه ایله مشدی، نه قدرتله، نه مزیتله ترجمه ایله مشدی. ترجمه همان همان حرفیاً ایدی. جمله لک شکیلی، عبارده لک صورت تشکیلی بیله دیکشمه مشدی. استفهاملر، تعجیبلر، انکارلر، تصدیقلر، تکریرلر، تأییدلر، هپ عین وجه اوزره محافظه ایدلمشدی. مع مافیه، اوترجه نه قدر ترکجه ایدی، اوترکجه نه درجه سلیس، فصیح، بلیغ ایدی. حقیقت علمیه و ادبیه اعتباریله اسلافک یازدقلرینی نه مرتبه کواله کده براقیوردی. یوق، ترکجه مزنی بو ترقیه مظهر قیلمق، شرقدن بی پروا سوکهرک، چیقارارق بویله بر غرب لسانی وضعنه، وضعیتنه صوقق بر خارقهدر. بو خارقه یی کوسترن بر قومک آتیسندن مأیوس اولمق، هیچ دکاسه، انصافسز لقدر، خفتدر، صبرسز لقدر.

او غلامسك، ديه سويله مك ايستم ، فقط انگليز شاعر مشهورى (نيتسون) ك  
او آهيسى كه والدهك جنازه سنده رقيق سسلرله اوقوندينى ايچون، ذاتاً معناجه ده  
يك بلنددر ، بلند برحكمتدر ، فلسفه در ، حاصل ، غايت هيچانه باديدر ؛ لكن  
اونسخه نادره ادبيه ي لسائمه نه قدر سلامتاه ، فصاحتاه نقل ايتدك . اوترجه  
بكا همان همان اصلى قدر نشئه ويريور . تركه مز ، ايسته شمدي بوشه راه  
ترقيه كيردى .

مع مافيه بومظهريتك سائقارى يالكز سز دكلسكز ، سزدن اولى بركليه يدك  
بزدن اولده اسلاف درعقبمز يتشمه يه يديلر ، بولسان بوتعالى يه ايرمزدي .  
بومفخرته هيمز درجه درجه حصه مندز . بلكه اونعتمدن سز، شبايمز ، بزدن  
زياده متنعمسكز ، وارسون ، اويله اولسون . بوحقيقت فلسفيه بر فرنك ادبي  
« سيرمشكات » وصفى ويردى . آتى ماضى ي دائما اونوتديرير ، دائما سونوك  
براقير . حال ايسه ، آتى يه هر لحظه ساده ماضى ي دك ، بالذات بتون موجوديتنى  
فدا ايلر .

مدنيت جهانك بر مهدى ، مادري عد اونان اوقديم يونانستانده براعتياد  
معروف ، برنوع آلاى ، بردرنك واردى : ( آتته ) ده خلق بريره طوپلانيورلر ،  
آراده اوراق اوراق مسافه لرله بر حلقه ، برنجير تشكيل ايله يورلردى . زنجيرك  
باشندن برى ، برمشكاتى ، مشعل يي بر معبدك مخرابندن ياقيور ، ياققدن صوكبره  
همان كيديوردي ، بر ايگنج يه ، اوده اويله جه بر اوچنج يه ويريورلردى .  
مشعله بو طرز ايله الدن اله كچيوردي ، سرتيوردي . مسابقرله هر برى آرقه يه  
بر نظر بيله عطف ايتكميزين قوشيوردي ، بر ديكرينه نقل ايله مك اوزره اولدينى  
او مشعل يي سونديرمه مكدن باشقه بر انديشه كوزمه يوردي ، مقصده ايردكدن  
صوكره ده تهى دست ، ميهوت قاليور ، اومشكات مقدسك كيتدجه اوزاقلان سيرانى  
بتون اوتلاش بى تانى ايله ، اوتميات بى سودى ايله تا اوزاقلردن ، فقط ينه مفتونانه  
باقه ، باقه تعقيب ايله يوردي . ايسته ، ديرلر كه بوسير مشكات انسال حياتك بر تمايلدر .  
چوجغنى وجوده كتيرمك ايچون والده اتى ، صباحتى ، صحتنى ، حين حاجتده  
حياتنى ويرير . ديمك ، فطرت ذريت جديده نك منفعتنه ذريت قديمه يي فدا ايله يور ،



وادی استقباله طوغری اینلری، یعنی اخلاقی تجهیز، توشیح، تسلیم ایتک ایچون اسلافی بلا فاصله چالیشمغه، چابلامغه، قازانمغه، حتی بعضاً افنای نفس ایله مکه بیله دعوت ایدیور، ساده دعوت دکل، محکومده براقیور...

اسلافیز، بز سزک ایچون چالیشدق. حالاده چالیشیورز. سزده بزى هیچ حکمنده طوته رق اخلافکنزه وقف مساعی، وقف آمال ایده جکسکز. آتیه لیلر اعتقادینه امتثالاً او مصباح قدسی نی ناصل آلدیکزسه او یله جه سوندیرمه دن ویره جکسکز، ویرمه شتابان اوله جکسکز.

حیات اقوامک برچوق صفحاتنده تکامله اعتقاد ایدنلردنم. جدی برطرزده تدقیق اولونورسه، ادبیاتمکز، لسانمکز تکاملی صراحة تعقیب ایدیله بیایر. اساتذه ادبزدن هر برینک بو تکامله آیری آیری خدمتی اولدی.

۱- لافده احمدونجانی،  
آواره دلشکسته ذاقی  
ترکی سخنه تمل قوه شلر،  
اماتملی کوزل قوم شلر.

فی الحقیقه او یله در، فقط کچن عصرک ابتدالرینه کلنجهیه قدر بو لسان نه درجه محدود، نه قدر خواصه منحصر، مغلق، مبهم، حتی، دیه بیلیرز، ابتدائی ایدی؛ صرف عربجه نك، فارسینک قربانی، محکومی ایدی.

اودور ایچنده ترکلر سیاست، فکر آ غرب ایله اختلاطه کیردیله، کمالات غربی هر نقطه نظر دن آز، چوق ادراک ایتدیله، غربیلر ناصل دوشونیورلر، دوشو- ندکلرینی ناصل افاده ایدیورلر؛ بودقائقی کوردیلر، آکلادیله. بو کوروش، بو آکلایش درکه اوزمان یازی یازانلریمکز فکرینی، کوزینی آچدی. عاکف پاشا کبی، ادهم پرتو پاشا کبی منشیلریمز طرز تحریریمزی بر درجه تجدید ایله دیار، بر درجه ترکیه لشدیردیله، ساده لشدیردیله، قولایلاشدیردیله. فقط شه اسیلر، ضیا پاشا لر، کماللردرکه بو تجدده قدرت ویردیله، ادبیات جدیده مزى وجوده کتیردیله. نثریمز، شعریمز یکیشدی، هریکی وادیده آرتق فکریمزی، املمزی اولدقچه حر، متهیج، اولدقچه فریح، فخور افاده ایده بیلدک.

ترکسیدن ، ورسیدن تصویر افکاره ، عبرته فیرلامق بیوک بر انقلابدر . فقط  
 بو انقلاب مسعود ایله برابر لسانمزینه قابلیت تامه سنی بوله مادی ، یینه طبعینه شه مدی ،  
 صافلا شه مادی ، حاصلی ، تمامیه بر غرب لسانی کبی اوله مادی . شناسیلر ، ضیالر ،  
 کاللر صرف سویله دکاری کبی یازده مایورلر ، اوسهل ممتنعی کوسترده مه یورلردی .

بلیغ ایدیلر ، یوق ، پکده بلیغ دییه مه یز ، بلاغت باشقهدر ، معطنن ایدیلر ،  
 مهیج ایدیلر ، لکن او قدر طبیعی ، اولیه ساده ، صمیمی دکل ایدیلر . حال بوکه  
 حقیقتده ترقی ، تعالی هر کیمک ایچون اولورسه اولسون ، هلا بر قوم ایچون اول  
 امرده طبعیلکده در ، طبعیتدن بول ، ساده بر صورتده استفاضه ددر . مثلاً بر مقاله  
 ادبیه ده : « تختگاه سلطنتک ... » دییه شهریمزی توصیفاته کیریشمکدن ایسه ساده جه  
 « استانبولک ... » دیمک دها طبیعی ، دها بلیغدر . تختگاه سلطنت نه در ؟ هیچ !  
 لفظاً یوکسک اولسه ده معنی هیچدر .. جهانده بیکلرجه تختگاه سلطنت وار . آفریقا  
 چوللرنده بتون اومهدیلرک ، اماملرک ، اوراق ، تفک سلطانلرک بیله تختگاه  
 سلطنتلری یوقی ؟ فقط « استانبول .. » لفظاً او قدر بسیط اولسه ده معنی  
 نه درجه مختشمدر ، نه محیطدر ، نه فسحت آباددر . استانبول باشلی باشنه بر جهاندر ،  
 برلجه در ، بر تاریخدر که ازمنه قدیمه دن ، متوسطه دن ، متأخره دن الکتیهج صحیفه لرم  
 مستولیدر . کائناده انحق بر استانبول واردر .

بو ادبیاتک ، بولسانک ، بو طرز تحریرک ایکنجی بر قصوری ده یکنسق اولمسیدر .  
 او درد احتشام ایله ، او اندیشه طنطنه ایله برابر اولیه اولمسیدر .  
 « اسلوب عینیه انساندر » دیرلر ، فقط بو اسلوب ایچون دکل ..

بر انسان لا قیردی سویلرکن حتی بر نطق ایراد ایدرکن چشید ، چشید اوضاع  
 آلیر ، بعضاً بردن بره طوریر ، بعضاً بالالتزام بر سوزی برقچ کره تکرار ایدر ،  
 جمله لرینی کسر ، اوزانیر . حاصلی طبعیه ، طبعیه اتباع ایلر . ایشته او لسان  
 جدیدیمزده بو نکته لر ، بو وضعیتلر ، بو طبعیلکلر یوقدی .

مع مانیه بوانتقادلرله برابر زنه ار ، ظن ایتمه که او استادلرک ، او مجددلرک فضل  
 وفضیلتلرینی ، ادبیاتمزه ، لسانمزه او بلند مرتبه خدمت لرینی انکار ایدنلردنم .  
 حاشا ! . اعتقادیمه ، بوکون کوچک ، بیوک یازی یازانلریمز اودهات قلمک مجبوری ،



منتداری یز . . . ترجه یی اونلر او قدر یادیلر ، حق الانصاف بیوک ، پک بیوک  
برایش کوردیلر . دها زیاده یایمق ، بو وادیده دها بیوک ایش کورمک اخلافه  
دوشر .

ضیا پاشا بر لمعه عرفان ایله بو حقیقتی ایتدادن کشف ایدرک :

آیرلدی بزمه چونکه اسلاف ،  
وارسون بزی ده آیرسون اخلاف ..

دیور . فقط عجباً اخلاف او مجددین ادبمزدن پک آریله بیلدیمی ؟ لسانجه  
تکاملمزی مسعود بر صورتده یوروتدیمی ؟ بو سؤالک جوابی مشکدر . پک  
مشکل ده دکل ، فقط مزعجدر . چوغمزنک عزت نفسمزه کران کلیر .

او مجددلردن صوکره کلن نسل ادب لسانمزدده پک یکی بر چیغیر آچه مادی .  
هپ عین تجدیدی ایدی که دوام ایتدیریوردی . بو سائقه ایله ترجه رنک رنک  
شکلره کیردی ، حتی بعضاً مبهمله شدی . تحف تحف طورلر آلدی . کلیشی کوزل  
لغتلره بوغولدی ، بعضاًده شیودسنی بوزدی ، افرنجه شدی . طبعندن چیقدی :

حقیقته لسان طبعندن  
البته دوشر فصاحتندن

برحزب قایلدن ماعدا خلقمزی ایچون آکلاشلماز اولدی . فی الحقیقه شناسیلرک ،  
کبارک پک عجمی مقلدلری ده توره دی ، لکن اونلرده دیکیش طوتدیره مادیلر ،  
آرتق ، او طرز خاص تحریر ویره جکنی ویرمشدی ، اوج تکاملنه ایرمشدی .  
بو دور فترت بزده سیاسته اولدیغندن زیاده ادباً سوردی ، خیلی سوردی ،  
بلکه حالا سوره جکدی .. فقط نسل جدیدمیز ، سزیتشدیکیز . سزکه ، هیچ شبهه  
یوق ، بوزمینده بریکی یولک سالکیسکز .. فقط اوفترتک تأثیر میدیدن بستیون  
قورتوله مادیکز . سکا طوغدیغک زمان (فترت) مخلصنی اویله کیف ماتفق ویرمدمدی .  
برعه د غریبده دنیا یه کلدک ، وطنک هرجه تجه ، لسانجه ، ادبیاتجه ، سیاسیاتجه ،  
هپ فترت ایچنده ایدی .

## الاسماء تنزل من السماء

سنگچونده کوکدن اینسه ، اینسه بویله براسم اینه بیلیدی ، براسم که زمین  
وزمانه اودرجه موافق ایدی .  
دیرکن ، سلمان بك بردن بره طوردی ، جیندن تلاش ایله چیقاردی ساعته  
باقدی .

— امان ، آزیجق دها جیکیرسهك کیجه یاریسی واپورینی قاجیره جغز ! .  
حال بوکه اومدن ، اوطه مدن باشقه یرده یاتمی بنی بزار ایدیور . علی الخصوص  
یارین صباح برچوق یازیلرم وار . کتبخانه مده بولونمغه مجبورم . اوبیتمز ، توکنمز  
مباحث ادبیه مزى بوسفرلك بونقطه ده براقه رق واپوریمزه یتیشسهك هیچ فنا اولماز .  
دیدى . بابا ، اوغل درحال بر آرابه یه صیچرادیلر ، کوپری یه کلدیلر ،  
کوپریدن ده واپوره طاره طار آتلایه رق ، آز برمدت ایچنده ، صاف برهواتنفس  
ایده ایده ، بوسفر آرتق هوایاتدن دم اوره اوره ، حاصلی ، کوله ، ا کله نه روم ایلی  
حصارینه واصل اولدیلر .





## روم ایلی حصارنده برسامره

روم ایلی حصارنده بیوکه بریالینک آلت قاتنده، دکره ناظر بیوک، مفرح براوطهده اقشام یکنندن صوکره اوک بش کنجی، اوچی ارکاک، ایکسی قیز طویلنمشلردی، اوینایورلر، اکله نیورلر، قونوشیورلردی. قیزلردن بری زمان زمان پیانونک باشنکچهرک لطیف برهواچالیوردی، او برلری شوق ایله دیکله یورلردی. بوکنجلر هپ برعائله دن، استانبولجه معروف، کزیده برعائله دن ایدیلر. ارککلرک بیوکی یکریمی بش یاشنده برسواری ضابطی ایدی، ایکنجیسی بریاش دها کنج برطیب ایدی، اک کنجی ایسه هنوز یکریمی یاشنده ایدی، مکتب ملکیه دن اوسنه شهادتنامه آلمشدی. قیزلرک بری، (کزیده) سنجه اوتوزه یاقلاشمشدی، عائله نك اک بیوک چوجنی ایدی، دیکری (سحر) دها اون ایدی یاشنده، بش قاردشک اک کنجی ایدی. بودرجه مسعود برعائله یه نادراً تصادف اولونوردی. بابا، آننه صاغ ایدیلر. چوجقلر سیماجه، ذکاچه، تربیه جه فوق العاده ایدیلر. یدقدرت فیضی، نشاطی برخانه یه انجق بومرتبه صاحبه ییلردی. (کزیده) خانم پیانوده اوپک معروف (سیبه نشاط انکیز) دن بر فصلی بیتیرمشدی، حاضرین پرئشه ایدیلر. ضابط (سداد) بک بردن بره یرندن فیرلادی:

— (فترت) خلط ایدر. دون کیجه کلهدی. یوکیجهده کلزسه قیزارز.

اوشاغی کوندرهلمی؟

دیدي. هپ کوندرمکه قرار ویردیلر.

دها (فترت) ک لافی اورتایه قونور قونماز اوکوچیجک سحر قیزارمشدی،

بوزارمشدی، فقط بر پارچه کولکده اولدینی ایچون بوعلام هیجانتی کیزله یه

بیلوردی . بش ، اون دقیقه سوکره ( فترت ) قاپودن کیرنججه بتون اوجمیت  
شبابدن برخنده نشاطدر ، قوپدی . ینه ( سداد ) بك :

— میرم ، دون اقشام کله دك ، بزى محزون براق دك . یقینده ( پارس ) ه  
کیده جکسك ، بستون آریله جغز . شمدي بارى صیق صیق کوروشملى دكلى یز؟  
هممز سنى ناصل قاردش کبی سودیکمزی بیلمه یورمیسك ؟  
دیدى . ( فترت ) :

— دون کیجه پدرم بنی آلدی ، تپه باشنه کوتوردی ، یمکه آلیقویدی . کیجه  
یاریسندن سوکره اوه کلدك . مع مافیه ، مجلسکزدن محروم قالدیغمه نه قدر محزون  
ایدم . بیلسه کز ، کوکلم ، فکرم ، روحم سزه نه قدر آلیشدی . یقینده بربریمزدن  
آریله جغمزه جاندن متأسفم ، دلخونم ..

جوانی کمال صفوتله ویردی ، فقط صوك سوزلری سویلرکن بلا اختیار  
( سحر ) ه عصف نكاهدن کندینی آله مادی . ذاتاً اوقیزجغزك کوزلری چوقدن  
بری ( فترت ) ه کیزلی کیزلی معطوف ایدی . بر لحظه ایکی نظر وهاله بربرینه  
چارپدی ، چارنجه اوایکی معصوم ، متبیح ، مهتر قلبده تأثیراتی کوستردی ، سحر  
آیاقدی ایدی . اوتأثر ایله صاندالییه اوطورمغه مجبور اولدی ، ( فترت ) ایسه  
متانت ظامریه سنی محافظه ایچون قانا بهیه طایاندی .

بوایکی کنجك شولسان حالى اومجلسده کی ارککلره مجهول قالدی ، فقط  
( کزیده ) خانمك درحال نظر دقتنه چارپدی ، قادین قلبی ، هم انبساطنه ، همده  
برنبذه اغبرارینه بادی اولدی .

( کزیده ) حقیقهً برنادره فطرت ایدی . کوزل ، فقط شرقك دكل ، غربك  
خوشنه کیدر برکوزل ایدی . لطیف ، نارین براندامه ، اوزونجه بر بویه مالکدی .  
سیماجه خوش ، لطیف ایدی ، لکن برخارقه دکلدی . پك مینی مینی ایدی . بتون  
بو اوصاف غریبه محاسندندر ، شرقده اودرجه تقدیر اولونماز . هر اقلیمك ذوق  
ایچونده ، حسن ایچونده باشقه بردستوری ، برقیاسی وار .

مادهً بومزایا ایله برابر ، معنیً ( کزیده ) ، امثالنه نسبت اولونجه خارق العاده  
ایدی . فطرهً پك ذکی ایدی ، پك مکمل بر تربیه ده کورمشدی ، ترجمه ،



فرانسزجه اءلا او قویوردی ، حتی یازیوردی . هله موسیقیده ، پیانوده مهارت مخصوصه مالک ایدی ، ( شوپن ) دن اء کوچ پارچه لری اء اء بیوک موفقیتله ، سهولتله ، انشراح ایله چالیوردی . علی الخصوص او چالیشده ساده مهارت دکل ، صمیمیت ، سودا واردی .

غریبدر ، ممالک مترقیده بیله تقدیر ایدیلن بویله بر کنج قیز ایشته اوتوز یاشنه کیشدی ، صارارمغه ، صولغه باشلامشدی ، حالا املنه موافق بر قوجه ، بر رفیق حیات بوله مامشدی . بوحاله جهان متعجب ایدی . لکن حقیقت حالده تعجبه هیچ محل یوقدی .

( کزیده ) بر یاندن او مزایای کزیده سنک ، بر یاندن ایسه شرائط اجتماعیه مزك قربانی ایدی . اول امرده او یله کوریمچی یه چیقار قوجه بولمق ذلتی هیچ بر زمان نفسنه یدیره مامشدی . ثانیاً اخلاقاً ، عرفاناً بحق طانیادینی برار ککله تشریک حیاته بر درلو جسارت ایده میوردی ، ذاتاً اطرافنده بر مدتر انعقادینی کوره کلدیکی ازدواج لرك همان هیچ بری خوشنه کیتمه یوردی ؛ فنا بر تاهلن ایسه ، هیچ تاهل ایتمهك خیر لیدر ، دیور ، حسیاتنه باشقه وادیده ، ادبیاتده ، موسیقیده غذا آرایوردی ؛ بر آراق محرر لکه اوزنمش ، بعض غزته لره ، مجموعه لره یازی یازمق ایسته مشدی . فقط او غزته لری ، مجموعه لری نشر ایدن لرك ، اکثری کتج ادیب لری مزلک بر قیزه ، بر قادینه قارشی ، ولو مخبره ایله اولسون ، او پرده بیرونانه معامله لری کزیدینی یزار ایتمشدی ، او مسکندن صوغو تمشدی . تیز جغز نره یه بر اثر کوندردیسه در حال اورادن بر نامه محبت آلیوردی ، اثر در حال تقدیر لرله ، تشویق لرله طبع اولونیوردی ؛ لکن خصوصی بر مکتوب ، او مکتوبدن صوکره آتشین بر اعلان عشق او معارفه جزئیه یی تعقیب ایله یوردی .

بو حو پالق ، بو هوا پرستك ( کزیده ) یه پك چیرکین بر اخلاق سنزلق کبی کورونیوردی . ذاتاده او یله ایدی . بر ایکی دفعه دها بو معامله یه هدف اولدقدن صوکره او کنج قیز آرتی بو هوسدن واز کچدی ، مطبوعا مزه بو چیغیرده رغبت کوسترمه دی . او قویوردی ، ترکیه دن زیاده فرانسزجه او قویوردی . اء زیاده موسیقی ایله مشغول اولیوردی ؛ بر کره اوزاچه اقرباسندن بر ضابط ایله اولمك اوزر مایدی ،

دها ازدواجه قرار ویرمه دن زوج مستقبلنی یقیندن طایبق ایسته دی، قرابت مناسیتله .  
ایکی کنج بربرینی کورو یورلردی، برابر یمکلرده بولونیورلردی، کورو شیورلردی .  
سیما اعتباریله خوشنه کیتمش ایکن مغویاتی یقیندن تدقیق ایدنجه اویله بر  
قوجه کزیده نك اصلا ذوقه توافقی ایتمه دی . آد مجزك هر حالی ، هر تفکری ،  
هر حرکتی هنوز ناتراشیده ایدی، حتی یمك یشی بیله اویله ایدی . قیز جغز بو حالی  
کورنجه مادام الحیاه بویله بر عذاب آلتنه کیرمکدن ایسه ، ینه قوجه سز قالمغی  
ترجیح ایله دی .

ایشته بو وضعیتده، باخصوص بو حسیاتده اولدغنی ایچون (فترت) ایله (سحر) ک  
بربرینه تمایلنی کشف ایدنجه هم ممنون ، هم ده برپارچه محزون اولمشدی .  
(فترت) ی یقیندن طانیوردی ، هر خصوصجه تقدیر ایدیور ، مکمل بولیوردی .  
(سحر) ی ایسه روحی کبی سویور ، سودسوه تربیه ایدیور ، بر قاردش کبی ،  
بر آننه کبی ، پك صمیمی بر آرقاداش کبی ، حاصلی جاندن ، کوکلدن پرورده  
ایله یوردی ؛ ده اابتدای شبانده سحرک فترت کبی برکنجه ربط قلب ، بندامل  
ایتمسیده لطیف بولیوردی ، حتی شایان غبطه کورییوردی . بویله بر امید سعادت  
اوکا میسر ارلامشدی ، ایشته بوجهتجه محزون ایدی . لیکن هیچ اولمازسه او  
امیدی کبی بسله دیکی ، املی کبی سودیکی هم شیرهنی بو بختیارلغه مظهر کورمک  
کزیده نك او حزننی تعدیل ایله یوردی . آرتق آلتدن آلته دوشوندیکی ایسه ،  
بو تصور لطیفک برکون قوودن فعله چیقدیغنی ، (فترت) ک (سحر) ه بر همراه  
ابدی حیات اولدیغنی کورمک ایدی، بواندیشه ایچون ایسه وار شطارتیله، مهارتیله  
چالیشمغه باشلامشدی ، ذاتاً بو مسامرهلری اساساً ترتیب ایدن، او ایکی کنجی  
اکثریتله بربرینه یاقلاشدیران او ایدی .

(فترت) آرقاداشلرینه ، او مجادلات ادبیه سندن، باباسیله مباحثه معروفه سندن  
بحث ایتدی ، سلمان بکک ادبیاتمزه دائر سویله دکلیرنی مجملأ ، لیکن متین بر  
صورته ذکر ایله دی . او اوچ برادرک اک کنجی ، مکتب ملکیه مأذونی (صمد)  
ذاتاً سلمان بکک شاگردانندن ایدی ، خواجه سنک بو مطالعه لرینه قسماً واقف  
ایدی ، لیکن (فترت) ک بسط ایتدیکی درجه ده دکلدی ، چونکه سلمان بک



مع الاسف برنوع اصول نزاكته رعايت ايدرك مكتهديكي تدریساتنده افكارینی ایسته دیکی کی صمیمیتله ، حریتله تمهیدایله میوردی . ( صمد ) آتشین مشرب بر کنج ایدی ، بتون بومباحثه لرله بردن بزه هیجانه کله ركه آیاغه قالقدی ، اوطور تهیجی ایله مجلسی بر لحظه حیرته اوغراتدقندن صوکره :

— اوت ، سلمان بلك يردن كوکه حقی واردر . بولسان ، بوسودیکمز ترجه هنوز طرز کمال طبعیسنی بوله مادی ، هنوز اوکران قیدلرندن ، بتون اوشائبلرندن قورتولمادی ! اوزاق و یقین اسلافز ، اسلاف ادبمز وارا ولسونلر ، چالیشدیلر ، لکن مرامه ایره مدیلر ، بووظیفه بزه قالدی . بویوکلک آلتندن قالقه بیله جکمی یز ؟ اونلرک یاپامادقلرینی یاپاجقمی یز ؟ ترجه مزى متمدن برخلقك ایشه یارار ، مکمل برلسان مرتبه سنه چیقاره جقمی یز ؟ بویله اولورسه قوممزه ، قومیتمه جدا خدمت ایدرز ، یوقسه یازیق بزه ، بیک کره یازیق ! ..

دیدى ، فقط بوسوزلری او یله هیجان ایله ، بر قدرت خطابت ایله سویله دی که — ذاتاً فطره ده نطوق ایدی — دیکه ینلری هم محظوظ ایتدی ، هم دوشوندریدی . ( فترت ) طایانامادی ، اوبخنی تعقیب ایله دی :

— ( صمد ) ک شومتین مطالعه لرینی تصدیق ایتمه مک ممکنیدر ! برملتک ترقیسی او یله کلیدشی کوزل قانونلر وضع ایتمک ، وضع ایتدکدن صوکرده اونلرک احکامنی یا اجرا ایتمه مک ، یا ایتدیره مه مکله اولماز . حتی ، اکثریا یاپدیغمز کی قوری قوری یه آلا یلرله ، نمایشلرله ده اولماز . هله جهاد ، فتوحات ، حرب ، ضرب ، صرف اردو ، صرف دونانما دوشونمکله هیچ اولماز . مع الاسف ، هنوز انسانیت کالنی بولمادیغی ایچون هرملته بونوع اندیشه لر بر ضرورتدر ، مبرم اولدیغی قدر مزعج بر ضرورتدر . لکن بر قوم ایچون تعالی حقیقی ترقیات مضویه ایله در . عجا هر حرکت مزده بودستوره آگاه کورونیورمی یز ؟ . مشکوک .. نه ایسه ، اوترقیاتک بزه کوره کجادی بر راهبری لسانمزددر ، لسانمزه که نه قدر ارتقا ایدرسه بزى او مرتبه احیا ایلر . کیم بیلیر ؟ عصرلرجه او یله محکوم تدقی قالدیغمزه بیوک برسبب ده لسانجه نقصانمز ، ضعفمز دکلای ایدی ؟ صاف ، گمراه ، متین بر ترجه مز اولمازسه ترقیات علمیه و فنییه مظهر اوله بیلیرمی یز ؟ اوعلومی ، اوفقونی اطفالمزه ، شابمزه

ته واسطه ايله تلقين ايده بيليرز . صمد ! صمد ! واراوول، پارلاق دوشونورسك .  
 نهديرلرسه ديسونلر ، برملتك بويله يوكسك ، بويله بيوك دوشونن كنجلري  
 اولورسه آتيسي البته اميندر .

ملاحظه لرني تهيج ايله يسط ايتدي ، صوكره كيتدي ، شوق ايله صمدك  
 ايكي النى اللرينه آلدی ، صاف ، صميمي چيقدی .

بومنزله حقیقه رقت انكيز ایدی . اوایکی دلاور فضل وادبك بلند برامل  
 ایچون بومصافحه لری ، میثاقلری كوزه ، كوكله باشقه برفر ، برانشراح ویریوردی .  
 تماماً بوصره لرده سلمان بكله اوكنجلرك پدری ، كريم پاشا قاپودن ایچری  
 كیردیله . ذاتا بر مددر صفه ده ایدیلر ، بتون اومباحثه يي ایشیدییور ، فخر و مسرتله  
 ديكله یورلردی . اورقت آور مصافحه يي شوق ايله آلقیشلادیله .

نه ( فترت ) ، نه ده ( صمد ) بابالزینك كلرنندن ، حتی آلقیشلرندن محجوب  
 اولدیله ، بالعكس اووضعتلرني غایت طبعی بر صورتده محافظه ايله دیله . آرتق  
 كريم پاشا ، سلمان بك ده لطیف برغرور پدرانه ايله اومجلس شبابه قاریشدیله ،  
 اوشاق چای طاقنی ، تپسیسنی كتیردی . كزیده ايله سحر همان ماصه نك باشنه كچدیله .  
 چای حاضر لادیله ، تفرعات ايله برابر برر حضاره طاغدیله .

اوبرنوع استراحتدن صوكره او آتشین كنجلرینه بر مناقشه تاریخیه طوتولدیله .  
 اوگون یومی غزته لردن بری بر بند مهیج سیاسی نشر ایتشدی . اوبندك محرری  
 انقلاب عثمانی يي لاینقطع فرانسه اختلالنه بكنز تمكه یلته نهرك :

— ( باستیل ) ده تموزده آلدی ، بزده قانون اساسیمزی تموزده آلدق . .

کبی مقایسه لردن صوكره :

— ناصل ( مارا ) لر ، ( روبسنی ) لر ، ( دانتون ) لر ال اله ویرهرك اوبدیعه  
 اختلال کیری ابداع ايله دیلرسه مجاهدین حریتمزده . . . . اویله جه متفقاً انقلاب  
 عثمانی يي اومرتبه بلند رفیع ايله ملیدرلر . یاشاسون حریت ، یاشاسون مشروطیت !  
 دییه ختم مقال ايله یوردی .

صمد ، فترت او قدر كنج اولغله برابر فرانسه تاریخی ، علی الخصوص اختلال



کیرینی جدا تتبع ایتدکری ایچون بومقایسه لره حیرت ایدیورلر، علی الخصوص بویله سوزلرک جدی برغزته یه کیره بیلیمسنه بردرلو عقل ایردیره مه یورلردی .  
 سلمان بك بحثه قاریشدی :

— اوت ، حقکز وار . محرر مقاله تاریخ اختلال کیرک حقائقه اصلاواقف دکل، چونکه اول امرده بتون رجال اختلالدن یالکز شواوچ شخصی ذکر ایله مک، صوکرده فکرآ ، روحآ ، املآ بربرینه اودرجه ضد مخلوقاتی صوکرده متحده کوسترمک ، هله ( روبه سپیرک ) ( دانتون ) ی سائقه حقدوحسدله میدان سیاسته کوندردیکنی بیله بیلیمه مک، نهایت اوبلای مدهشکده ناصل هلاک اولدیغنی اطرافیه ادراک ایتمه دکن باشقه بدیعه اختلال کیر دیمه تعریف اولنان بر نتیجه مهمه یی او آدمزلر وجوده کتیردیکنه حکم ایله مک هپ فقدان تتبع، حتی پک درین بر فقدان تتبع اثریدر . فقط عجباً هنوز یوزده قاچمز بویله شائبه لردن مصونز ؟

چو غمز فرانسه اختلال کیرینه دائر مکاتب اعدادیه ، تاریخ عمومی مطالعاتیه مکتفی ز . لکن، فلاکت اوکه صوکرده بو اختلالی افعال سیاسیه مزه دستور ، مشق اتخاذ ایتمه کمال قافیشیورز . هیچ دوشونیورمی یزکه او انقلاب عظیم برجه در؛ حسناتک ، سیئاتک ، عدلک ، ظلمک ، جهلک ، علمک مزعج ، مغلق ، مهیج ، محتشم بر تجلیکاهیدر ؛ مقصد ، اساس ، حتی نتیجه اعتباریله ده ، بیوکر ، چونکه ساده فرانسه ده دکل ، کیت کیده بتون اوروپاده حاکمیت مللک ، اویله لایسل عمایض عمل بر شخص واحدن ، بر حکمدار مطلقدن آنه رق ، اکثریتله عامه یه ، جماعته ویرلمسنه بادی اولدی ، هله فرانسزلی سیاست ، حتی اجتماعاً ، حتی اقتصاداً آلتی سنه ایچنده آلتی عصرلق برترقیه مظهر قیلدی .

اختلال کیردن اول فرانسز کویلیلری عادتاً اسیرایدیلر ، برنوع دره بکلرینک اسیری ، فرمانبری ایدیلر . حقوق سیاسیه برطرفه طورسون ، تملک ، تصرف کی حقوق عادیهدن بیله محروم ایدیلر . اختلال کیر بزکون ، برکیچه ایچنده برقرار ایله اومیلیونلرجه خلقه بتون اوحقوقی بخش ایله دی ، همده بردها اصلا استرداد اولونه مامق اوزره بخش ایله دی . فی الحقیقه برمدت صوکره ایمپراطورلغک تأسیسه ، هله قرالغک عودتیه فرانسزلیینه حقوق سیاسیه دن اکثریتله مهجور دوشیدیلر ،

مثلاً ( ناپولئون ) ك زمان سلطنتده ، اون سكزنجی ( لوئی ) ایله اونجی ( شارل ) ك مدت حكومتده ، حاصلی ( ۱۸۰۴ ) دن ( ۱۸۳۰ ) ه قدر مشروطیتی پك مشكوك ، عادتاً یاری یاری یه مطلق براداریه تابع قالدیلر ، فقط عمومیتله آرتق هیچ بر زمان او حقوق مكتسبه اجتماعیه واقتصادیه دن ، مثلاً هیچ بر صورتله حق تصرف و تملكدن محروم ایدیلر مدیلر . اویله یكیدن دره بكارینك ، برنوع متغلبه نك منقادی اولمادیلر . ایشه انقلاب كیرك اك صریح مكتسباتی بوتقبات اساسیه ده مند مجدر .

اداره جدیده اختلال بتون دره بكارینك ، رهبانك تصرف ایتدكاری اراضی یی ، املاکی مصادره ایتدی ، ملته مال ایله دی ، اوندن صوكرده عمومیتله اهالی یه اوجوزجه ، همان باد هوا کی ویردی . او اختلال كیری تعقیب ایدن حكومتلردن هیچ بری ایسه ، نه قدر استبداده ، ارتجاعه مائل اولورسه اولسون ، بو اجرا آتیه حتی طوقونمغه جسارت ایده مدی .

بدیعه اختلال دیدكاری اساساً شوایکی تجدد فکریه ده مكنوزدر : مساوات و حاکمیت عامه . . خصوصات سائر هپ تفرعاتدن عبارتدر .

اختلال کیر مساواتی و حاکمیت عامه یی کافه فعالیت حكومتك بنیانی ، حتی شرائط اجتماعیه نك بیله روحی قیلمق ایسته دی . اساساً ( ژان ژاق روسو ) دن ، اوموثر ، مهیج فیلسوفدن فیض وفکر آلمشدی ، آمانه قسماً ایردی ، قسماً ایرمه دی ، هله بعضاً پك ایرمکی او قدر مناسب کورمدی . مثلاً ، اوبیلدیکمز « بیاننامه حقوق بشر » ك برنجی ماده سنده : « انسانلر مساوی طوغارلر . . دیدی ، فقط هیچ بر زمان بوفکری حق تصرفه ده تشمیل ایدرك ، بالفرض زمانزده کیتدکجه انتشار ایدن مسلك اشترا کیونی ترویج ایله مکه قدر کیتمه دی .

مع مافیه رجال اختلال مساواتك و حاکمیت عامه نك بالخاصه اداره حكومتده اجرای احکامی ایچون چابالادیلر ، فقط اونلرده انسان ایدیلر ، طبقی دیگر انسانلر کی هوای نفسانیلرینه مغلوب ایدیلر ، بویله بیوك امملرك فکراً معقی اولمقله برابر فعلاً پك چوق کوچکلكلردن ، حتی ردائندن ، ظلمدن منزله قالمادیلر ، قاله مادیلر .

ذاتاً فرانسه سائقه اختلال ایله ، بتون اوروپایه ، اوجهان ارتجاعه اعلان حرب



ایله مشدی . بوضرورتله احتراصات کونا کون یوز کوستردی . اختلال کیرکده تاریخده اک وحشی براداره مستبد قدر اعتسافی اولدی . هایدی بتون او اکابر مظلونه ارتجاعک ، اوصافدل اون آلتنجی (لوئی) نک ، اوسوزشناک ( ماری آنتوانت ) ک ، حیات وطن تهلکده ایکن اعدای خارجیه ایله اتفاقلری ، اویله مدھش براهانتلری مثبت اولسون ، بوسائقه ایلهده اوصورت فجیعده اعداملری معذور کورلسون ، ماضیدن آتییه برمثال عبرت عد ایدلسون ؛ لکن تصویری بیله توپلری اورپر تن اومعروف ایلول قتالی کبی فاجعه لک ، صوکردهده علی التوالی اویتمز ، توکنمز ، اوکلشی کوزل ، اوطوپدن اعداملرک ، قادین ، ارکک ، هنوز بلوغه ایرمه مش معصوملره وارنجه یه قدر فوج فوج بیچاره لری صوری بر محکمه ایله ، اکثریا سببمز میدان سیاسته کومه کومه سوق ایله مک کبی جنایتلرک عنوی ممکنمیدر ؟ ساده بوقدرمی ؟

مانند دیو بچه لرین التقام ایدر .

شورای امتده ( مونتانیار ) لر ، طاغیلر دیدکلری فرقه مفرطه نفوذحکومتی اله آلتجه بتون (ژیروندن) لری ، فضل و عرفان اعتباریله اومفاخر اختلال کیری ، مثلاً خطابتدن سیاسته کالاتجه ( مارا ) لری پک زیاده کولکده براقان مشهور ( بریسو ) لری ، ( ورنیو ) لری قره قوش واری حکملرله حقسنز ، اساسنزیره اعدام ایتدیریوردی . نهایت ، ( روبه سپییر ) اومحیطده برقطب ، اوقویو جمهو- ریتده برنوع رئیس مطلق اولونجه ، جهانیه بوتضادی بیله کوسترنجه ینه بیکلرجه ( مارا ) دکن ( قامیلده مولن ) کبی ، هله ( دانتون ) کبی او دور مهیجک اک محتشم ارکاننه انصافسنز جه سنه قییدی .

( دانتون ) بتون اورجال اختلالک اک دور اندیشی ، اک مدبری ، اک عارفی ، بویله اولدینی ایچوندده فرانسه نک پک بلند برخادمی ایدی . مدت جزئی حکومتده اوقدر اغتشاش ایچنده بیله خارجاً و داخلأ جدی ، مؤثر برسیاسته خدمت ایتدی . اورویایه قارشلی اختلال کیرک اشاعه ایله دیکی افکاره ، افکار مفرطیه اطراد ، اعتدال ویره رک بیوک برمهاتر سیاسیه کوستردی ، بوسایهده ایسه ، وطنی تسلط

اعدادن قورتارمغه بلکه باشلیجه برواسطه اولدی ، ساده یوقارینک دکل ، اشاغینک . استبدادندن ، ایشته اولک برباد استبداددن بیله قورقادی ، اقرارله اهمیت ویرمه دی ، تهدیدلری هیچه صایدی ، حتی مقابله یه ، حتی مدافعه شخصییه ده تنزل ایتمه دی . نجات وطن ایچون طوتدینی یولی بلافتور تعقیب ایله دی ، یوریدی ، نه صاغه ، نه صوله ، نه افراطه ، نه ده تفریطه حق ، حقیقی آ کلاته مادیغی ایچون اکثریا

آتلتشم ایکی لایفهمک میانه-نه  
زمینه آ کلاته مام ، آسمانه آ کلاته م

مدلوله ماصدق اولدی . فی الحقیقه مثلاً (ژیروندن) لر (دانتون) ی دیکله ییدیلر ، او یله طاغیلیرک طعمه حرص و غرضی اولمازلردی ، نافله یره قربان کیتمز لردی ، طاغیلیر ایسه ینه (دانتون) ی آ کلا یه ییدیلر او معارض محتشم لیرینک ناحق یره آتقدقلری قانلریله لکله نمزلردی . حاصلی ، او محیط بویله پستله شنبجه ، کوتوله نیجه او مرد بلند مرتبه ده محافظه موقع ، حتی محافظه حیات ایده مدی . خیاله بیله صیغماز اتهامات ایله کیفی محکوم ایدلدی ، بر یوک آرابه سیله میدان سیاسته سوق اولوندی ، بوینی جلاده اوزانیرکن : « آرقاداش ، کله می بوخلقه کوستر ، چونکه تماشا ایدلمکه دکر » دیمشدی . فی الحقیقه تاریخ عادلر ، حکم عدلی دائماً اهمال ایلر ، لکن اصلاً اهمال ایتمز . بوکون (پارس) ک اکمراه بر کوشه سنده جهان (دانتون) ک ساده کله سنی دکل ، قوص قوجه بر هیکل مرکوزینی حرمتله تماشا ایله یور ، یادینی شوق ایله تجیل ایدیور . (میرابو) یه ، (میشله) یه ، فرانسه تاریخنده اک مبجل ایز براقانلره یاپلیدیغی کبی اک محتشم برفرانسز سفینه حربنه (دانتون) نامی ویریلیور .. نه موطلی !

ایشته بویله براقبال ابدی (روبه سییر) ه میسر اولمادی ، حتی الی الابد اولمازده . (روبه سییر) که آچدینی یولک قربانی اولدی ، الجزاء من جنس العمل ، (۹ ترمیدور) هائله معروفه سنده ، عینی منوالده (سن ژوست) کبی عونیه سیله برابر یکر می درت ساعت ایچنده ید جلاده تسلیم اولوندی .

اعتقادجه او یله کیف ماتفق اختلال کیر ، اختلال کیر دییه جکمزده ، یابردوزی یه .

( روبه‌سپی‌پر ) لری ، ( مارا ) لری بیلر ، بیلمز ذکر ایده‌طوره جغمزده واختلاک .  
غوامضی ، سائقه‌لرینی ، نتیجه‌لرینی واضحاً آکلامغه ، فقط او یله عجمیجه تطبیقاتدن  
زیاده صرف تهذیب فکر ایچون آکلامغه ، او رجال اختلاک ایسه ماهیت  
فکریه‌لرینی ، حالت روحیه‌لرینی ، اندیشه‌لرینی ، املارینی ، ینه او یله بر مقصد صاف  
تعقیب ایدرکدن بیلمکه چالیشسه ق هر خصوصجه دها زیاده قازانیرز .

مثلاً بر ( قوندورسه ) ، بیوک بر فیلسوف که اختلاک ال فعال رجاندن ،  
مستحضر لرندن ، مؤثر لرندن بریدر ، ایلك قانون اساسی اختلاک ایسه بیوک بر  
مقیاسده قسماً مؤلفی اولدی ، جریده مخصوصه سیله اوکجه‌لری افکار و آثار اختلاک  
ال پارلاق‌لرینی سریدی ، صاحبدی ؛ او زمانک مفخری ایدی .

او یله ایکن دور دهشت باشلا یه رق آتش باجه‌نی صارنجه ، کورکورینه بر اعتساف  
هر طرفه دال بوداق صالنجه او هرج مرجک ال حقسز جه‌سنه ازدکلرندن ، محو  
ایتدکلرندن بری ده بو طالعسز فیلسوف اولدی . او قدر طالعسز که بر جانی کبی  
ایلرجه دلیک دلیک صاقلاندقندن صوکره نهایت نجاتی الیم بر اتخارده بولدی ، او  
درجه متاعب فکریه‌نک ، کمالات اجتهادک مکاناتی بو عاقبت فجیعه‌ده کوردی .

بیلنسه سرخلفت کیمسه‌ده تقصیر یو قدر یوق

دیرلر . بو آلامک ، بوفجایعک حقیقی مسئولرینی ده بولمق کوچدر . بالفرض  
اوندار ( روبه‌سپی‌پر ) بعض اطوار یله ، او عصمت حرکات یله ، او یورولمق بیلمز ، او  
توز بیله قوندیرماز استقامت یله نه قدر جاذبه‌داردر . ینه او ظالمک شریک افعالی ،  
رفیق خاص الخاصی ، اوکنج ، او پارلاق ( سن ژوست ) ، طبعنک اعتسافه او شدت  
تمایلیله برابر نه درجه کزیده بر فطر تدر ..

نه دندر غدره میلی طبعنک غدار حیرتده !!

اهالیدن ، اسافلدن بر چوق معصوملری میدان سیاسته کوندونلرک ال یامانلرندن  
بری ، بر ایکنجی ( روبه‌سپی‌پر ) اولدی ؛ فقط بالذات ینه عین میدان سیاسته نه شهامتله  
کیتدی . نه در او یاشایشلر ؛ هله ئولایشلر ؛ حیاته او قیرغین ابتلا لر ؛ فقط عین زماندم



تولومدن او چیلغنجه پرواسزلقلر؟ بیوکلک ایچنده بیوکلکلر، کوچکلکک ایچنده  
ینه بیوکلکلر نه در؟... بومهیج تماشالره، بوموثر تدقیقلره درکه اختلال کیر ....  
سلمان بك سامعینك دقت متمادیهلری ایله ، انجذاب دائمیلریله وجده كلهرك ،  
اساساً خواجه ، واعظ اولدیغی ایچون ، بوفصل تاریخی بویله شوق ایله ، صلاحیتله  
بسط ایدر ، کیدرکن یالینك اوکنده ، سوقاقده بر ولوله در قویدی ، هپ دیشاری  
فیرلادیلر . ریختیمده بر جماعت عظمی بریکمشدی . برقاق کشی دکردن چیقاردقلری  
کنج بر قادیخغزی قوجاقلرینه آلمشیر ، براز اوتده کی بر یالییه طوغری کوتور -  
یورلردی . بر جم غفیر بالقجی (یورکی) نك اطرافنه طویلامشدی ، (یورکی) صیر  
صیقلام ایدی . دکردن چیقمشدی ، وقعه یی شویله حکایه ایدیوردی :

— آغ المده ، ریختیم بوی بالق بکله یوردم ، بر باشند بر باشه صویه باقه ،  
باقه کزینیوردم ، بن بو طرفده ایکن او بر طرفده حسین بکک یالینسندن ، آلت  
قاپودن باش آحیق بر قادین چیقدی . نامحرمدر ، بنی کورمسون ، دییه کری  
چکلدم ، نه اولدیغی بردن بره آ کلایه مادم . قادیخغز اطرافنه برباقدی ، ایچه بر  
ترددن صوکره دکره آتدی ، درحال آقتییه طوتولدی ، کیدیوردی . آرتق  
طوریرمییم ، همان بر طرفدن آتلادم ، ایکی قولاجله اوکنی کسیدردم ، دییه طوغری  
کیتمکده ایکن قادینی بلندن قاورادم ، قییه طوغری یوزدم . آرقاداشلرده  
سسله ندم ، اوزواللی قادین قولنده باغین ایدی ، باشی اوموزیمه طایامشدی ، ابتدالری :  
« الله عشقنه ، (یورکی) براق بنی ، چوجقلریکک باشی ایچون براق ، اوله حکم ، اولمک  
ایسترم . » دییه بوغوق بر سسله بر پارچه اینله دی ، چیرپندی ، صوکره بایلدی ، ریختیمه  
چیقارنجه کوردک ، مکر حسین بکک حرمی ایمش ... اوشاقلر کلدیله ، قوجاقلایه رق  
یالییه کوتوردیلر اما ییچاره قادین حالا آیلیمادی .

ایشته بالقجی (یورکی) بو قهرمانجه حرکتی بویله پک طبیعی ، پک ساده بر  
صورتده آ کلایوردی ، حتی اوقدر خارق العاده بیله کورمه یوردی . (یورکی) او  
مشهور له ورك آوینك اك ماهر اوسته لرندن ایدی ، قاچ دفعه لر آقتی بوی قیدن  
کچدیکنی کورونجه همان جیکنی چیقاره رق دکره آتلمش اونادر ، اوقیمتدار ،  
اوقوجامان بالنی قوجاقلایه رق اولامشدی . طبق حسین بکک رفیقه سنی قورتارمغی ده

اويله بر حرکت عد ايله يوردی . او ایصلاق البسه سنی دکیشدیرمک اوزره اوینه طوغری کیدیوردی .

( فترت ) باباسیله ، آرقاداشلریله برابر یورکی دیگه یین جماعتک آراسنده ایدی ، بالقجی حکایه سنی بیتیر ، بیترمز هیجانه کلدی :  
— عشق اولسون سکا ، قوجه قهرمان .

دییه او اختیارک بوینه آتلدی . ایکی یاناغندن شوق ايله اوپدی . یورکی بر پارچه شاشیردی اما اوصاف مصافحه دن عادتاً بیوک بر مکافاته ایرمش کبی خشنود قالدی . آرتق جماعت یاواش یاواش طاغلمه باشلادی ، کریم پاشا ، سلمان بک ، صمد ، فترت ، هپینه یالییه دوندیلر . کزیده خانلمه سحر هر نه قدر اوده قالدیلر ایدیسده وقعیه یی اوشاقلردن عنغه سیله او کړندیلردی . صمد فترتک حرکتی همشیره لرینه آکلاتدی ، کریم پاشاده دیدی که :

— فترت پک کوزل بر حرکتده بولوندی . ( یورکی ) نک یاپدیغنی اوروپاده بری یاپهیدی نه تقدیر لرده ، نه مادالیه لرده مظهر اولمازدی . ایشته بو اوافق مثال نه قدر عبرته شایاندر . شریقلیرک نیجه فضیلتلری بویله نظر دقته بیله چارپماز ، اونودیلر ، کیدر .  
« بواختیار ( یورکی ) نه مبارک بر آدمدر ! نه صاف ، نه پاک بر حیات کچیرمشدر . لا اقل سکسان یاشنده در ، فقط نه قدر دینجدر ، چونکه لطیف بر قلبه ، مستریح بر وجدانه مالکدر ، بتون عمرینی سعادت عالیه سنه ، اولادینک ، احفادینک حالنجه تأمین اعاشه ورفاهیتته حصر ايله مشدر . بویله کونلرینی ، کیجه لرینی او ریختم بوینده ، قیش ، یاز او لطیف هوایی تنفس ایده ایده ، فقط هر حالده مشاق ايله کچیرر ، آلنک تریله اکمک پاره سنی چیقاریر ، او پاره یی چولوغیله ، چوجغیله یر ، اللهنه دعا ایدر ، کیمسه یه اصلاً فذالق ایتمز ، اما بواقشام اولدیغنی کبی بعضاً بیوک خیرلر ایشلر .

( کزیده ) خانم بر گوشه یه چکلمشدی . حزین بر طور آلمشدی . متصل دوشونیوردی . قیزجغزک بوه لی نظر دقت ورقتنه چارپدیغنی ایچون سلمان بک طایانامادی :

— کزیده خانم افندی اويله جزین جزین نه دوشونیورسکز ؟ وقعیه مراقظه می طوقوندی ؟

دید. کزیده خانمده بوسواله شو جوابی ویردی:

— حسین بکک کندی دکره آتان او طالعسر رفیقه سنی، او زواللی (نسترن) خانم دوشونیورم. بوقادینجغز اساساً صاپانجه دن آلمانا بر کورجی قیزدر. هنوز یکر می بر، یکر می ایکی یاشنده در، کوزیمزک اوکنده بیودی، کوچک ایکن نحیف، حتی جلیز ایدی، بیودکجه کوزللشدی، حسین بکک اونده یاشایوردی. او عائله نك اولادلغی ایدی.

« نسترن اون سکز یاشنه کیرنجه او کمره سیاه صاچلریله، او بم بیاض تنی ايله، او پنه، او موزون، پک موزون، قاشلرندن، کیرپیکلرندن چکه سنه قدر هپ موزون سیاسیله جداً دلبر اولمشدی. خارجدن کورو جیلر کلکه باشلادی. برمتصرف معزولی، حتی بيلمم نره والیسی بيله طالب چیقدی، فقط او صره لرده ایشدکجه حسین بک بوقیزه عاشق دوشدی. بیلیرسکز، بوکنج کویمزده حسن حال ايله معروفدر، عشرت بيلمز، اکلنجه بيلمز، حتی صوفیدر، آبدستدن، نمازندن بيله کری قالمز، بر آراق بنی آلمق ایسته دیدی، ابونک اکثر اقربامک اصرارینه رغماً بوطلبه جواب رد ویردم، چه نکه بر درلو کوکلم، فکرم او ذاتدن خوشلانمادی.

« نه ایسه، حسین بک او اوکسوز نسترنی آلدی. زواللی قیزجغر اوله ندکدن صوکره ضعیفلاندی، ضعیفلاندقجه ضعیفلاندی، کوزلالکنی محافظه ایتدی امانحافت ایچنده بر کوزللك، غرب کوزلالکی، انکلیر کوزلالکی. . باشقه بر ارتباطی، حتی بر غدای قلبی اولمادینی ایچون هر حاله رغماً او بیکس قادینجغز قوجه سنی جاندن سوییوردی. هپ کورییوردق. کافه معصومیتيله، وار صفوتيله سوییوردی. فقط اوزاقدن اوزاغده ایشیدیوردق. بک افندی کیتدکجه اونا نازک خانمندن صوغومشدی، چونکه طبعاً شیشمان سورمش، نسترن ایسه پک نحیف ایمش، ینه بک افندی باشقه هوا وهوس، باشقه اکلنجه بيلمه دیکی ایچون عشقه، فقط حیوانجه بر عشقه پک مبتلا ایمش، حالبوکه ینه نسترن اوجهتجه ده نزاهت حسیاته میال ایمش، حاصلی افراطه، ایستسه بيله، متحمل دگل ایمش. .

« نهایت، ایسته بتون بواحواله مبنی، حسین بک المهک رضاسیله بردها اوله نمکه قرار ویریر. چونکه فحشدن، حرامدن متوقی اولدینی ایچون بودرده باشقه دوا



بوله ماز. بوسفر والده سنك دلائييه، شيشمانجه، ايرى، يارى كنج بر قيز بولور. بيلورسكز، كچن هفته نكاحلاندى. بوكيجهده كوكي كيردى.

« بيچاره نسترن خانم بر هفته در بتون او حاضر لقلى، عاقبت بوزمانى بيك درلو آجيلر حس ايدر كدن كوردى، ظاهر او المله آرتق طايانامادى، ناسنه بويلاه سؤ قصد ايله دى. يوق، اويلاه بر قيز بودرجه قلابسز بر قوجهيه دوسرسه البته ياشامغه ئولكي ترجيح ايدر. ابوينم، قاردشلم بنى اوله نك خصوصنده اكثريا مشكل پسندلكه اتهام ايدرلر، چوق شكر كه اويلاهيم، شايد نسترن خانمك يرنده بن اوله يدم، كيمسەنك امداديه يتيشه مهيه جكي بر ئولومى بولور، او بردنيابه چوقدن كيدر دم.»

آبالاسنى تهييج ايچنده ديككه دكدن صوكره بو صوك سوزلرى ايشيدنجه سحر بردن بره ايچنى چكدى، قيب قيرمزي اولدى، نهايت برسوق طييعى ايله (فترت) ه خلجان ايچنده بر نظر اشتياق عطف ايله دى.

سلمان بك ايسه، ياشنه رغماً فكرآ اولدينى كې قلبآده دينج ايدى، كزیده خانمى بر موسيقى ديكلكر كې بعضاً شوق ايله، بعضاً ده حزن ايله، هر حالده جانندن ديككه دى، كوزلرني او سيمای مستندان طول مدت بر درلو آييره مادی، كزیده او فطانت رقيقه سيله بو انظار مفتونانك در حال فرقه وارديسه ده معناسنى پك آكلایامادی، فقط، ينه هر نه دنسه محظوظ اولدى، دوشوندى، نه دوشونديكنى كندی كندينه اعترافه بيله جسارت ایده ميوردى.

آرتق وقت كيجه ياريسنى كچمشدى، سلمان بك ايله فترت او معزز قومشولرينه وداع ايتديلر، چيقديلر، ياليلرينه طوغرى يوريديلر.



## بر عربيجه درسى

سلمان بىك فكرينه كوره تركجه يي ساده ، صحيح يازده بيلمك ايچون عربيجه بيلمك لازمدى . بويله بر مطالعه وهله اولاده غريب كورونيوردى ، لكن دوشونيليرسه پىك طوغرى ايدى ، چونكه عربيجه بيلمه نجه لسانمزد قولا نه كلديكمز او سانسز عربي كله لرك مغالرينى ، موقع استعماللارنى بحق تعيين ايتك مشكلدر . بو تصرفاتده خطادن خطايه اوغرامق ايسه پىك قولايذر . بويله اولونجهده ، طبعى ، براسلوب صحيح اولماز . صحيح اولمايان بر اسلوبك ايسه ، هيچ بر مزيتى ، اصلا ساده لكى اوله ماز ، چونكه ساده لك طبعيلك ايله توأمدر . طبعتك اك پارلاق مزيتى ده صحتدر ، سلامتدر .

ايسته ، سلمان بك صرف بو نقطه نظر دن عربيجه يي تركجه ايچون طبقى فارسى كى ، حتى فارسيدن زياده لابد كورييوردى ، يوقسه اسلاف ادبىز كى لسانمىز عربي كله لره بوغمق ايچون دكلدى ، چونكه ينه سلمان بىك اعتقاد نجه ، تركجه مقابلارى واراكن برفائده مأمول اولماقجه ، بر ضرورت كورله دجه عربيجه الفاظ قوللانمق بر اسلوب تركى يي قيمتدن دوشوريردى . حال بوكه ادبامزك ، هله كنجلريمزك برچوغي عربىنك لسان عثمانى يه لزومنى هيچ قبول ايتمه يورلر ، تحصيلنه اصلا رغبت كوستر مه يورلردى ، لكن ، ومن الغرائب ، يازيلارنى الفاظ عربيه يه بوغيورلردى ، همده يالان ، ياكلش بوغيورلردى . مثلاً ( قولاي ) كى صاف ، لطيف ، ساده بر تركجه مقابلى واركن عربىك ( سهل ) كى تلفظجه مشكل بر كله سنى ، فقط عربيجه بيلمه دكلرى ايچون طبعى مدهش بر غلطه اوغراته رق ( سهيل ، شهرت سهيله ) ديه يازيورلردى . بودرجه عادى خطالردن بيله توقى ايده مەين براسلوبده نه مزيت اوله بيلير؟

بتون بوملا حظه لره مبنی، سلمان بك تا استانبوله موصلتندن بری (فترت) ه عربجه اوكرتدیریوردی، فقط بوتحصیل مستتی برمنوالده جاری ایدی. اوتهدن بری مدرسه لریمزده، جامعلریمزده، مکتبلریمزده کوردیکمز عربی تحصیللرینه بکزمه یوردی، بیوک براستاددن باشقه برطرزده ایدی.

سلمان بك تا کنجلیکنده اولاد عربدن برخواجه ایله، شیخ نیهان افندی ایله دوشمش، قالمشدی، اوقومش، چالیشمشدی. بوشیخ اوزمان هنوز اوتوز یاشنده یوقدی، لکن اجازتی آلمش، المقله برابر مدرسه نك اوافق بر اوطه سنه چکیله رك عمرینی علوم عربیه حصر ایله مشدی، هیچ او عزلتکاھدن دیشاری چقماز، هیچ او یله دعوتلری، ضیافتلری قبول ایتمز، کیجه کوندوز متصل اوطه سنه قاپانیر، اوقوردی. آراصیره یالکز سلمان بك کبی بعض احباسنی، برده تلیدلرینی حجره تبغه آلیردی، لکن اواجتماعلرده ینه صرف علمدن بحث اولونوردی. شیخ نیهان سویلردی، عربك، لسان عربك، ادبیات عربیه نك مناقبی، غوامضی، کالاتی آکلاتیردی، زیارتجیلر شوق ایله، حرمتله دیکلرلرایدی.

قدرت علمیه سیله برمهات قازانمشدی، او یله شباب حیاتنده بیله نیهان افندی براستاد پیر قدر کنج، اختیار هرکسدن احترام کوریوردی. بو ذات اولاه خارق العاده برحافظه مالک ایدی. بلا مبالغه دینه بیلیرکه تا اصحاب معلقه دن متأخرینه وارنجیه قدر عربك اک مشهور شاعرلرینی یالکز اوقومقله اکتفا ایتهمش، لکن بتون اوشعرانك اک معروف بیتلرینی، حتی نشیده لرینی عادتاً ازبرله مشدی، ساده بوقدر اولسه، نثرده بیله آیتلردن، حدیثلردن ماعدا برچوق امثال واقوال عربك، کلام کبارك حافظی ایدی.

ثانیاً اک دقیق، او یله اولدینی ایچونده اک کوچ قواعد عربیه یی قدرت احاطه سائقه سیله، برچوق مثاللره استشهاد ایدرك، نه بسیط برطرزده شرح ایلردی، نه قولای آکلاتیردی، چونکه منطقده پك مهارت صاحبی ایدی، دیدکلری کبی، غواص بحار منطق ایدی. عربك منطقی، او یله اوستون کوری دکل. فقط بحق تحصیل اولونورسه فکره بوجیادتی ویریر.

ثالثاً شیخ نیهان افندی اومحیط ایچنده یتیشمش اولمقله برابر متعصب دکلدی.



دینی سوردی ، حافظ قرآن ایدی ، فقط هر بر آیت کریمه نك معناسنی كافه دقا ئقیله آکلایه رقدن ، بیضاویدن ، هله کشفدن استدلاللر ایله تفسیر ایدر کدن حافظ قرآن ایدی . حدیثه ینه اواطلاعی کوستیردی . صوك درجه صلابت اعتقاده مالک ایدی ، مثلاً بر کون شویله بر فقره نقل ایله یوردی :

زمان سعادته شعرای عربدن بری حضور نبویده بر قصیده معروفه سنی او قور :

ولا خیر فی حلم اذا لم تکن  
له بوادر تحمی صفوه ان یتکدرا

حکمتی تقدیر پیغمبری یه مظهر اولور . شاعر او زمان وجده کله رک :

بلغ السماء مجدنا وثناءنا  
فانا نرجو فوق ذلك مظهرا

دیر ، « بوتعالینک فوقنده نه دیلیورسک ؟ » سؤالنه : « النعیم ! » جوابنی ویرنجه لسان رسول انامه دن : « لافض الله فاك » خطاب تبشیری صدور ایدر . ابن اثیر روایت ایلرکه بوشاعر یوز بر یاشنه قدر یاشادی . فقط اوتوز ایکی دیشندن برینی بیله ضایع ایتدی .

بوصافیت اعتقاد ایله برابر شیخ نهمان افندی حقیقی بر علامه اولدیغی ایچون حریت فکریه طرفداری ایدی ، مثلاً بر ملحد ایله ادیبانه ، عالمانه بر مباحثه دینییه کیریشیردی . مختصمنی او یله شتوم ایله دکل ، فقط منطقله ، حکمتله الزام ایله مکه چالیشیردی . بالفرض اوصره لرده مطبوعات عثمانیه ده بر مناقشه جریان ایدی یوردی : حکمای افرنجدن بری دین اسلامه دائر کلیشی کوزل بر اثر نشر ایله مش ، صوره دکاسه ده سیره کنج بر ادیمزده او اثری کیف ماتفق ترکجه یه ترجمه ایتشدی . بو ترجمه علمای اسلامک ، دها طوغریسی علمادن زیاده او یله کچینلرک غیظنه بادی اولدی . کتابی ده ، کتابک مؤلفی ده ، مترجمی ده کویا تنقید ایله دیلر ، حقیقتده فوری قوری یه تحقیرلرده بوغدیلر . شیخ نهمان افندی بوتجاوزلری خوش کورمدی ، چونکه جداً علامه ایدی . بویله عادیلرکله خصمی ایدی ، بر مختصمک قناعت

وجدانیه‌سنه ، هر نه اولورسه اولسون ، حرمت ایتکی بیلور ، دائمقا انتقادلری  
تزاھتله ، فقط قدرته تمهید ایله یوردی .

( فترت ) و یردیکی درسلی بویله حادثات روزمره یه تماس ایتدیریوردی .  
چونکه بوضورتله شاگردنی فکرآ دها زیاده تهیجه دوشوره رک هرجهتجه دها  
چوق مستفیض ایده جکنه قانع ایدی . مثلاً اوکون روم ایلی حصارینه کله رک  
درسنی تقریره باشلادیغی زمان طوغریدن طوغری یه شو ذکر ایتدیکمز مناقشه  
دینه نك صورت جریانی موضوع بحث ایلهدی ، ایلهدی ده مطالعات آتیه یی بلیغ  
برادا ایله بسط ایتدی :

« بویله مباحث عالیده نزهت لسانه رعایت ایدمه یین کوچکلکنی کوستیر . بتون  
او حقیقتلرک برچوق جهتلی عصرلردن بری مبهم قالدی . ساده حکمای افرنج  
دکل ، اسلامک برچوق افاضلی بیله بویله درین ترددلره دوشدیلر .

الا کل شیء ما خلا الله باطل  
و کل نعیم لاحالة زائل

دیین قوجه محی الدین عربی ، جداً تتبع اولونسون ، بعضاً عین فلسفه نك ،  
زبونیدر ، دوشکونیدر . سنک لوحه مزارینه :

قد کان صاحب هذا القبر جوهره  
مکونونه صاغها الرحمن من شرف ،  
عزت فلم تعرف الايام قيمتها  
فردها غیره منه الى الصدف

قطعه غراسنی نقش ایتدیره رک مرقد مبارکنی شامده حرمتله زیارت ایده کلدیکمز  
بومتبحر فاضلی ، بعضاً او یله بر فلسفه تردده میل ایتدیکی ایچون ، تذلیله می جرات  
ایده جکمز ؛ یوق ، عالم حقیقی هیچ بر زمان کافه حقائق نفسنه ارجاع ایله یه مز ،  
علی الخصوص آخرک فضلنه ، لیاقتنه حرمتی بیلیر .

بر نفس توحیددن آیرلما دم ، الله بر !

دیه ختم عمر ایله یکن اک ساده بر مؤمن متقی بیله بعضاً :

الهی ! حکمت ایجاد کی کیمدن سؤال ایتسون ؛  
مؤثر پرده پوش کبریا ، آثار حیرتده !

دیمکدن کری قالمادی . شهرستانی کی اسلامک نیجه افاضلی ایسه :

لقد طفت في تلك المعاهد كلها  
وقلبت طرفي بين تلك المعالم  
والم ارا الا واضعاً كف حائر  
على ذقن او قارعاً سن نادم

دیورلر .

نهایة اقدام العقول ، عقال !  
وغایة سعی العالمین ، ضلال !

دین ینه بر علامه دیکردر .

حال ، حقیقت بویله ایکن ، یوق ، تکرار ایدزم ، هر نه صورتله اولور سه اولسون .  
بر صاحب نقل و کمالک ، هله بر دهانک شخصنه حرمتده قصور ایتمه ملی یز ، بعض  
افکارینه معارض اولسه ق بیله ، ینه ایتمه ملی یز . عرفان حقیقی بویله ایجاب ایلر .  
مثلاً نامق کمال بک مرحومک ، غالباً (تخریب خرابات) ده ابوالعلاء کی بردهای  
مجسمه (خیث) دیمسنی کالات معروفه سنه یاقیشدیر مق ممکنی در ؛ فی الحقیقه ادیب  
معرینک بر چوق نازک مسئله لرده فکر افراط ، بعضاً یولسز طاشقینقلری واردر .  
فقط فضلی ، عرفانی فوق العاده دکلیدر ؛ انسانه وله ویرمزمی ؛ او یله اولونجه ده ، بویله  
بر نادره فطرته کفر ایتک ، اک ساده بر محب معرفت ایچون بیله بر ذلدر ، عفو  
اولونماز بر قباحتر . نامق کمال ایچون ایسه ، .. عربلر :

اکل جواد کبوه

دیرلر .

کچن اجتماع مرده سزه (متنبی) دن بحث ایتدمدی ، بالخاصه قدرت الفاطجه



بو شاعرك من اياسنى كوستردمدى ، فقط معنى اعتباريله خيفلكنى سويله دمدى ،  
حتى بتون :

فر بما صحت الاجسام بالعلل

كې معروف حكمتلى ده يونان حكما سندن ، بالخاصه ( ارسططاليس ) دن  
اقتباس ايتديكنى اكلا تدمدى . ها ، خاطر مده ايكن اشارت ايده يم :  
( عكس صدا ) عنوانيله بر غزته نشر اولونمغه باشلادى . بو جريده نك صاحبي  
( متنبى ) نك :

فدع كل صوت بعد صوتى فان  
نى انا الصاع المحكى والاخر الصدى

ييتنه واقف اوله يدى ، او خطايه اوغرامازدى . ( متنبى ) نك ، حتى لقبندن  
مستبان اولدينى اوزره ، ساده مدائحه دكل ، تمديح نفسه ده شدت تمايلنى اطرافيله  
كوردك ، ايشته ، ( معرى ) لفظاً بلكه او مرتبه بلنده وارده ماز ، لكن فكرياً اوسلف  
مبجلنك چوق فوقنده در . اول امرده اويله تفاخر نه در ، بيلمز ، حتى بيوك بر محويتله :

دعيت ابا العلاء وذاك مين  
ولكن الصحيح ابو النزول

دير ، يالكىز بر قصيده سنده :

وانى وان كنت الاخير زمانه  
لاكن بمالم تستطعه الاوائل

دعوا سنده بولونور . حقيقتيه مطابق اولدينى ايچون بو دعوى نه درجه محقدر .  
فى الحقيقه ( ابو العلاء ) تجددات فكريه اعتباريله عربيده بر خارقه در ، طقوزنجى  
عصر ميلاديه ياشدى . يدى ياشنده چيچكدن كوز اولدى ، اويله ايكن اودرجه  
كالاتى ناصل اكتساب ايتدى : بتون او خوارق افكارى نه درلو كشف ايله دى !  
بو معمايه مبهوت اولماق ممكن دكل . .

غريده قرون اخيره نك يتشديدكى فيلسوفلره عطف اولسان بر چوق

فکرلری اونلردن بر قاچ عصر اولی بو شاعر نابینا بلیغ بر لسان ایله جهانہ عادتاً صاووردی .

مثلاً، اودورایچنده شرقده و غربده حکومت مطلقه کیف مایشاء جاری ایدی . حکمدار افعالنندن ، آمالندن غیر مسئول بر آمر مطلق ایدی . عمومک متبوع مسجودی ایدی . معری بو حسیات عامه اشتراک ایتدکدن ماعدا بو حالی شویله جه نه یامان وصف ایله یوردی :

ما جهل الامم الذین عرفتهم  
ولعل سالفهم اضل و ابر  
یدعون فی جمعاتهم بسفاهة  
لامیرهم فیکاد یبکی المنبر

شرقده فکرأ بو درجه مترقی بر شاعره حالا زور تصادف اولونور . فرنکلرک (په سیمیزم) دیدکلری جهانی سینه ، سیم ساه کورمک مسلک فلسفینسی که بالخاصه عصر اخیرده (شوپنها ئوئر) ایله بیوک بر رواج آلدی . (معری) ده زمین زمین مند مجدر :

فیا موت . زر ان الحیاة ذمیمة  
ویا نفس . جدی ان دهرک هازل

بو قدر کسکین بر ندای ضجرت او آلمان فیلسوفندن ده نادرأ صادر اولدی . دیرلرکه روسیه ده بر فلسفه نظریاتدن تطبیقا کچدی ، نسل بشری ادامه دن منع ایتمک ، تمدید ذریتی بر جنایت عد ایتمک افراطنه قدر واردی . او عرب شاعری :

هذا جناء ابی علی - ی وما جنیت علی احد

بیتنی سنک مزارینه یازدیردی ، او مرتبه طاشقینلغه بیله بیکانه اولمادیغنی کوستردی .

ینه عصریمزده ، باشقه بر وادیده بر مسلک جدید ظهور ایله دی . بر صنف خلق صرف آکن النباتدرلر ، هیچ ات یمزلر ، قوجه معری بومسلکک ده سالکی

ایدی . حتی بر کره صوڪ درجه خسته ایدی . طیب خسته یه پلیج یدیرلمسنى  
توصیه ایتدی . پلیجی کتیردیله . فقط ابو العلاء ینه یمدی :

« زوانی حیوانجغز ! زبون اولدیغك ایچون سکا بویله غدر ایله دیله . برازسلان  
یاوروسی اوله ییك البته بر قیلکه ایلشه مزلردی . آه ، انسانلر ! انسانلر ! .. »  
دیدى .

حاصلی ، بتو او دورده غیرت دینه نامنه غرب و شرق آتش ایچنده  
قاوریله رکن معری اعلان الحاده بیله جرأت ایله مشدی ، ایله مشدی ده جهانه قارشى  
علناً

نحوت النصارى والحنیفة ما اهدت  
ومجوس حارت والیهود مضلله  
سلفان اهل الارض ذو عقل بلا  
دین و آخر دین لا عقل له

دیمکدن چکنمه مشدی . بز لله الحمد مؤمنز ، متقیز ، بو کفریاتدن بالضروره  
متأثر اولورز ، فقط معرفت اودزکه او تأثیری ضعیف ایدرک ، هر نه اولورسه اولسون ،  
او شاعر دها پروری تحقیر ایله مکة قدر وارماملیز . بو سماحت فکریه یی ایسه  
انسانه انجق درین بر عرفان ویریز . هر حالده بو عرفاندن محروم اولانلردرکه ،  
بالخاصه مسائل دینه ده ، مناقشه یی رفق ایله قبول ایده مزلر ؛ حدتله ، شدتله ،  
حتی قائلده بو غارلر . شرقده ، غربده ، هر طرفده بوفلاکت ، بشرک بو فلاکتی  
بویله در .

( فترت ) بو محق مطالعه لری تقدیر ایله دیکله دکدن صوکره جسارته کله رک  
خواجه سندن شو مسئله یی استیضاح ایله دی :

-- خواجه افندی ، اکثریتله علمای شرق ادعا ایله یو : لرکه بو کون بیله عربک  
ادبیاتی ، عرفانی ، معرفتی ، حاصلی مدنیت عربیه اساساً اوروپا مدنیتندن کرى  
قالمازمش . بتون او معالی فکریه یی محتوی ایمش ، سزده بو اعتقادده میسکیز ؟  
شیخ نهان افندی بو سوآلدن برپارچه اغبرار حس ایتمکه برابر او شاگرد  
معرفته شو جوانی ویردی :



— اولاد، بکا بویله برادعای خامی اسناد ایتک شمدی به قدر در سیریمی لایقيله  
 آکلامادیغکزه دلالت ایدرکه، اوده، امینم، حقیقته توافق ایله مز، مرتبه عرفانکز  
 عندمده یوکسکدر، بلکه مقصدیکزخی اوبحت دقیقه دأر سویله تمک اولسه کر کدر. ایله ایسه،  
 بآس یوق: ادبیاتيله، علوميله، فنونيله مدنیت عربیه یی حالاً مدنیت عربیه نک فوقنده  
 عد ایتک بالفرض یدنجی، سکزنجی، طوقوزنجی عصر میلادینک عصریمزدن دها  
 مترقی، دها متمدن، دها مکمل اولدیغنی ادعا ایله مکدرکه عادتاً بداهته قارشیدر،  
 عادتاً بلاهتدر. اوت، مدنیت اسلامیه نک، مدنیت عربیه نک جهانیه بیوک خدمتی  
 اولدی. آسیانک اوزمانه قدرمنسی، متروک، پرمردده بر قومی آلتنجی عصر میلادی  
 اوائلنده سایه اسلامده، فیض محمدی ایله بردنبره پارلادی، یوکسکدی، بیودی؛  
 غربیه، شرقه، شماله، جنوبه طوغری یاییلدی؛ بر یاندن تاجینه قدر کیتدی؛ بر  
 یاندن اندلسه قدر کلدی؛ فقط هپ کچدیکی یرلرده اوزمانه کوره نورایزی، ترقی  
 ایزی، تعالی ایزی براقدی؛ ساده قدرته، قلیجله تجلی ایتهدی؛ فکرآ، علماً،  
 عرفانآده رنک رنک مزایا کوستردی، فتوحات عربی مدنیت عربیه دائماً تعقیب  
 ایله دی.

هدایت محمدیه ایله بوخوارقی ابداع ایدن عربدر: اسلامدن اول عرب نه ایدی؟  
 اسلامدن صوکره عرب نه اولدی؟ دوشونمک، اوظلمتله بونوری، اوتدن ایله بو  
 ترقی یی مقایسه ایتک اک متین، فقط منصف بر فکره بیله وله ویریر.

ایشته صرف بو نقطه نظر دن زمین وزمانه کوره مدنیت عربیه بیوکدی،  
 حالاده بیوکدر؛ بلکه یونان مدنیتی، روما مدنیتی قدر بیوکدی، اوقدر بیوکدر.  
 اقلیمدن اقلیمه، اقوامدن اقوامه، مدنیتدن مدنیتده فرق واردر. فنون نفیسه نک  
 برچوق شعبه لری حوصله عربیه کیرمدی، کیره مزردی، مقایسه یی او مرتبه توسیع  
 ایتهمیلدر. مثلاً یونانیلرده، رومالیلرده کوردیکمز هر درلو بدایع نفاستی عربلرده  
 آرامامیلدر. فقط عربک اجتهادات فکریه سنی، عربک شعشعه قلمیه سنی، عربک  
 لسانی، احاطه لغویه سنی، شعرینی، فصاحت و بلاغتی تجیل ایتهمک ممکنیدر؟

اوت:

بر قاعده در بو جاودانه؛  
 البته کیدر کن جهانیه ..

ابن خلدون ده ، اوندن اول و صوکره برچوق فضلاى غربده بسلا ايله ديلر :  
 طبقى انسانلر کي اقوامده بر تکامل ازليفت منقادى ، زبونيدرلر ، کمال وزواله  
 تابعدرلر ، طوغارلر ، بيورلر ، ياشارلر ، نهايت فنا بولورلر . سلطنت عربييه ، مدنيت  
 عربييهده بوقانونه فرمانبر اولدى ، اوندن اول ديگر سلطنتلر ، ديگر مدنيتلر ناصل  
 فرمانبر اولدى ايسه اوده اويله اولدى . وار قوؤ ناميه سنى استهلاك ايله دکن ، اوج  
 تکاملنه يردکن صوکره سوندى ، بوکون کوردیکمز هنگامه انقراضه دوندى ؛  
 آرتق بيومک ، يوکسلمک شويله طورسون ، جوهر اصلينى بيله ضايع ايلهدى ؛  
 ايشته عصرلردن برى ، امويلرک ، عباسيلرک زوالندن صکره بو اضمحلال ايچنده  
 سوروکلەنير ، کيدر .

قصص شرق ايچون حقيقى فلاکت اوکه بوزمينده مدنيت عربييه نك هيچ وارثى  
 توردهدى ، اومدينته خيراخلف اولور باشقه برمدينيت يتيشمهدى ، اوسلسله معالى  
 دوام ايدمى . اساساً شرقك بتون تدنيسى ، بتون دردى بو انقطاع يوزندندر .  
 شرقيلر اوميراثدن مستفيض اوله ماديلىر ، عربلردن صوکره مثلاً برترك مدنيتى ،  
 يابرتاقلار مدنيتى ، نه مدنيتى اولورسه اولسون ابداع ايدرك يکيدن برسائق اعتلا  
 ايدينه ماديلىر ، غربدن ده بسبتون آيرلديلىر ، آيرى ياشاديلر ، بوضرورتله مدنيتجه  
 بوييله يتيم ، فکراً ، معرفه بوييله کرى قالديلىر . بوکون بويوقسز لقله ، بوييچاره لکله  
 نهديرلرسه ديسونلر ، مدنيت عربييه نك افولنى ، زوالنى ادراك ايدمه سونلر ، غربى ،  
 مدنيت عربييه ي استخفاف ايله سونلر ، معذوردرلر .

لکن شرقك بو نصيبسز لکنه مقابل غرب ، جهان غرب اوزکه تجليلره مظهر  
 اولدى . بالخاصه يونان مدنيتنك ، روما مدنيتنك فوج فوج وارثلىرى توردهدى .  
 لاتينلر ، جرمنلر . آنغلو صاقسونلر ، يرير معارف ، معالى ، ککالات ابداع ايتمه  
 باشلاديلر ، اوفاقى اولسهده محتشم ماضيدن استعانه ايله ديلر ، يونانيلرى ، روماليلرى  
 تتبع ايتديلر ، بالانفس ده چاليشديلر ، عصرلرجه چابالاديلر ، قروندن قرونه کچيديلر .  
 اقوام شرقيه کي دن ، عرقاً ، اساساً قابليت مظهر ايديلر . بو سايلهده مدنيت  
 عربييه ي ابتدا وجوده کتيرديلر ، صوکردهده عصردن عصره ، دوردن دوره ، حتى  
 سندن سنيه توسيع ايله يهرك حال حاضر محتشمه رفع ايتديلر .

شمدي انسان نه درجه فکراً صبی، علماً خفیف اولمی که هر جهتجه کل غرب ایله زوال شرقی بر بردن تمیز ایده مسون، هله بوا انحطاطی او اعتلادن یو کسک کورمک خضنه قدر وارسون. بو کون ایش ایشدن کچدی، بزشرقلیر ایچون بر چاره نجات وارسه آرتق اوماضیدن فراغته آراده کی حائل چاک چاک ایدرک طوغریدن طوغری یه صحنه غربه آلق، اوبساط مدینته قونمقدر، اشتراک ایله مکدر. علم ایچون، معرفت ایچون، مدنیت ایچون حدود یوق؛ ملیت یوق واوله مازده، آثار عرفان کائناتک مالیدر، مالی اوله بیلیر. هر محتاجی، هر مشتاقی مستفید، مسعود ایده بیلیر.

بلای تدنیدن یاقه مزی انحق بویله قورتاره بیلیرز. بویله یایامازسه ق، بر انکلز فیلسوفنک کشف ایله دیکی قانون طبیعی یه کوره طبق حیواناتده اولدینی کبی ناصل تکمل ایدنلر ایده مهینلری بلع ایله یورلر، نابود ایدنیورلر سه، اقوام متکمله غربیه ده بزی، بزشرقلیلری اوله جه تسخیر، تمیل ایدرک جهان تگوندن حذف ایده بیلیرلر.

ایشته، اوغلم، فترت بک، آق دقالمله، جبهه مله، صاریغمله برابر، لله الحمد پک متقی بر مؤمن، بر حافظ حقیق قرآن، حتی بر مفسر معروف ایکن بيله — چونکه :

یامشز حضرت قرآنه مفصل تفسیر .. —

اومسئله دقیقه دائر بتون بو حقائق بی پروا سکا سویله دم، فقط اقتضا ایدنجه مثلاً ایاصوفیه جامع شریفنک بر کرسی وعظندن عامه مسلمینه ده سویله یه بیلیر. بو طوغری دوشونجه لر، بو صحیح سوزلر ایمانه ضرر کتیرمز، بالعکس قوت سلامت ویریر. « النجاة فی الصدق »

شیخ افندی بو موعظه غرادن صوکره اونظر دورینی پنجره دن دکره ، قارش یاقه یه، افقلره طوغری دیکدی، برمدت ملول، متفکر اوله طور دی، نه ها طور یوردی، طوره جقدی، فقط ( فترت ) او بیانات بلیغنه نک مدلولنی تعمیق ایله دجه وجده کلدی، بردن بره یرندن فیرلادی. الی شوق ایله اوپد کدن صوکره خواجه سنه دیدی که :

— استاد، کالاتکزک ذاتاً حیرانی ایدم، فقط یالکوز شرقی دکل، غربی ده



بودرجه درین. بویله حقیقی ادراک ایتدیگیزی بو سفر کورونجه بو حیرتم سزه حرمت قدر آرتدی. وار اولکیز، ایشته بو اقلیمی، بو خلق، حاصلی بتون شرقی انجق سزک کی علما، سزک کی ورثه انیا قورتاریسه قورتاریر.

شیخ افندی آرتق درسنی بیتیرمش، آياغه قالمشدی، کیتمه حاضر لانیوردی، صاغ النی (فترت) ک صول اوموزینه قویدی :

— فترت، جهانده بر کشتی یه بحق مجبور شکرانم، اوده پدريکزدرد، پدريکزکه سنه لجه شا کرد عرفانمدي، بدن عربجه ني، شرقی اوکرندي، لیکن بکاده غربی مکمل، نه حقیقی اوکرتدی، آکلاتدی، ایشته صرف او سایه ده درکه بومسائله دائر دوشوندکلرم بویله صوابدر، صواب اولدینی قدر مستنادر. یوقسه، احتمال، بنی ده شمدی علمای سائره کی بومباحثده مخطی کوریردک.

دیدي، بیان وداع ایله چیقدي، کیتدی. (فترت) ده آرتق ماصه سنک باشنه کچدی، بر یاندن خواهه سنک او مطالعات جیده سنی حالا حاده تفکر دن کچیریوردی، بر یاندن ده او درسنی، مقیداتی ترتیب ایله یوردی. لیکن :

نهاية اقدام العقول عقل .  
وغاية سعي العالمين ضلال

بیتنی ضبط ایدرکن بوزدی، چونکه ادا دکل، مؤدا اعتباریله بکنمدي، عادت ایتشدی، بکنمه دکلینی دفترینه قید ایتیه یوردی.

شیخ افندینک سویله دکلینی دوشوندکجه قانع اولیوردی که اقدام عقولک نهایتی عقل دکل، بالعکس نجات، سعی علمینک غایتی ده ضلالدن زیاده رشاد ایدی. انجق، ایشته کوریورز :

رشادی اکلماز آدم ضلالی اکلماذن





## ایلی مکتب آرقاراشی

بر صبح دکنز را کد، هوا پک صاف ایدی. سلمان بك ایرکندن، کونش طوغمدن اول قالقشمیدی، چالیشمیدی، اوکله دن صوکرده ینه چالیشمه مجبور اولدینی ایچون، فکرأ بر پارچه استراحت، بدناده بر نبذه فعالیتیه احتیاج حس ایله یوردی. وقت کلمیدی. قهوه آلتی ایچون يمك اوطه سنه ایندی، (فترت) ی سفره باشنده بوندی. بابا، اوغل بریاندن چایلرینی ایچر، یمکلرینی یرکن بریاندن ده لطیف بر مصاحبه ادبیه کیریشدیله.

سلمان بك دیدی که:

— غریبدر، تربیه ابتدائیه اعتباریله، حتی صباوتده بيله شرق ایله غرب بربرندن نه درجه ایریلیور! غربك چوجقلری ده باشقه دوشونیورلر، باشقه دوشونجه ایله یاشایورلر، باشقه بر امل تعقیب ایندیورلر. اقلیمدن، محیطدن ماعدا، قانون ارثک ده جداً تأثیری وار: بو صبح بیوک بر فرانسر مورخنک، (لاویس) ك اخیراً بر مجموعه موقوتده نشر ایله مکه باشلادینی خاطره لرینی، بالخاصه چوجقلده یاپدقلرینی، دوشوندکلرینی او قودم، او قودقجه حیرتله دوشدم. چونکه او چوجق چوجقلیمزه نسبتله عادتاً باشقه جه انسانیتک محصوله بکزه یور، طبیعتی، آثار طبیعتی چوجقلیمزك کورده مهیه جکی بر نظرله کوریور، او یله کوردیکی ایچون ده تدقیق، تتبع ایله یور.

سلمان بك جینندن، جزؤ دانندن اوافق، اوافق کاغدلر چیقارهرق اوکنه قویدقدن صوکره سوزینه دوام ایله دی:

— بر مقاله مه اساس اتخاذا یله مك ایچون بو اثردن ترجمه ایتدیکم بعضی پارچه لری ایشته سکا اوقویه یم، دیکله. مع مافیه شرقد طوغمادك، بیومهك، باخصوص



شرقه تربيە وتعليم كورمىك ، بو فرقى اوقدر آكلامازسىك ، فقط يىنە دىكە ،  
مثلا صاحب خاطرات دييوركه :

«مكتبدە ايكن چكهمجه لىمىزده كىزلىجه ايك بوجكى يقيشديرىردك .  
ايلك بهارده قوزىلردن بوجكلرك حدوتى بكلردك ، بو خىوانجىزلرك قورنىدەكى  
بياض چىزكىلرى صياردق ، بو چىزكىلرك هر برى بر سنە حياتيه معادل ايمش ،  
صائمق ايسترىك » ... هايدى يىنە چوجقلىمىزدن طبعى بو درجه تجسس ايدنلر  
اولسون ، فقط يىنە او خاطره لردن برده شو سطرلره دقت ايت : « بر چوجق  
زمان زمان سمايه باقار ، دها كوچىجك ايكن بر جلىر طانيغه باشلامدى . ايجده  
اوكرندمدى .. »

طبيع ايچون بويله . تمدن ايچون ، آثار تمدن ايچونده يىنە عىنى چوجقده ،  
عين تمايللار كورونيور . (لاويس) فرانسه نك اوراق بر شهرنده ، بر مكاتب ابتداءده  
ايمش ، بوشهرده بيوك ، معروف ، قديم بر كليسا وارمىش ، بوكليساياه دائراومورخ  
شو خاطره لطيفه يى بسط ايله يور :

«فن معمارىدن ، نده تاريخ بدايع معمارىدن اصلا معلوماتم يوقدى : (رومان)  
(غوتيك) ، يا متوسط ديدكلرى اصول معمارىه ندر ؟ بيلمه يوردم ، بتون بوقبلرك  
نه فن ايله ، نه علم ايله يوكسليكنى ، بويله كسب توازن ايتديكنى دوشونم يوردم ،  
فقط بو فسيح ، بو معلا بنانك آلتنده شخصى اوقدر كوچك ، اويله كوچىجك  
حس ايدىيوردم كه !... بتون شهر بيله اومعبد محشمك ياننده بكا اودرجه يابانجى  
كورونيوردى كه !... »

قابلى ؟ حتى استانبولده جوامع شريفه مزدن ، بتون او مباني معظمه دن برى  
بيكده بر چوجغمزه بو طرزده تفكرلر الهام ايدى بيلسون ، بنجه ممكن دكل ، نيچون  
ايشته بوسوالك جوابيدر كه شرق ايله غربك ، مدنيت شرقيه ايله مدنيت غربيه نك  
حاصلى شرقليلر ايله غربيليلر آرالرنده كى فرقى ، دعوايى فصل ايچون ان حقيقى  
بر معيارك كشفه خدمت ايلر .

( فترت ) بومطالعلىرى مشتاقانه ديكه دكدن صوكره باباسنه ديدى كه :

— اوت ، بوسوزلر بنجه محض حقدرد ، حقيقتدر . معارضلرك ، كوزييورم ،

ایشیدیورم، شرق ایله غربك بوتفاوتلرینی پك زیاده اصرار ایله ایلری سوردیكك،  
 دائماًه ورد زبان ایله ديكك ایچون سنی مواخذه ایتمك ایسته یورلر، فقط الدانیورلر،  
 چونكه اساس نقصانمز اوموثر فرقتی هنوز ادراك ایدمه دیکمزدند. بو ادراك  
 اولمادجهده، ینه دائماً دیدیکك کبی، مرض تدنیزه دوا بوله مایز. .  
 سلمان بك ذاتاً یمکنی بیتیرمشدی، بردن بره آیاغه قالقدی :  
 — اوغلم، دیدیکك مواخذلر :

او ماهیلر که دریا ایچره در دریایی بیلزلر

بحه بيله آلمغه دکمز، شمدی وقتك وارسه بنمله کل، هوا پك خوش، هر  
 جهتجه پك مساعد، . . برصنداله بینرز، استانبوله اوילה اینرز. فی الحقیقه ایجه  
 برزمان غائب ایتمش اولورز اما برطرفدن فکرآ تنزه ایلرز، برطرفدن یولده بر  
 پارچه کورک چککرك بدئاده فعالیتده بولونورز. بوصورتله فکریمک یورغونلغی،  
 وجودیمک اویوشیققلنی زائل اولور. ناصل، بوتفرجده بکا آرقاداشلق ایده بیلیرمیسک؟»  
 دیدی، (فترت) ایسه باباسنك آرزوسنی یرینه کتیرمکه درحال شتاب ایله دی.  
 برمدتجک صوکره حصاردن حرکت ایدن ایکی چفته تمیز بر صاندالك دومن  
 یرینه سلمان بك اوطورمشدی، (فترت) ده کورکه کچمشدی، اختیار بر  
 صاندالجی ایله برابر کورک چکیوردی. بو آدمجغز سلمان بکه پك دقتله باقیوردی،  
 باقدجهده کولومسنه یوردی. سلمان بك بو حاله برمعنی ویره مدی، نهایت مراقندن :  
 — صاندالجی باشی، نهیه بکا اوילה باقیور، کولومسه یورسك، یوقسه بنی  
 برینه می بکزه تیورسك ؟  
 دیدی، صاندالجی ده :

— بکم، طارلما ییکز، حقیقتی سویله ییم، چوجقغکز پك بکزه دیک  
 ایچون اوغلکزدن، کوچك بکدن سزی طانیدم : حسن احسان الله افندی  
 مرحومک مخدومی سلمان بك دکلیسکز؟ چوجق ایکن کلخانه رشدی عسکریسنده  
 سزکله برابر ایدک، سز اوقودیکز، ایشته ماشالله آدم اولدیکز. بزاوقویامادق،  
 بویه نهایت قایتجی اولدق، صاچیزی، صقالمزی قایقجه یلقده آغارتدق. سز بکا

نسبتله دها کنج کورونیورسکیز ، فقط ایکیمز بریاشده یز . حتی ، کوجنمه بیگز ، مکتبده ایکن بربریمزله پک قفادار ایدک . اوزمان سزکده اوقومغه پک هوسکیز یوقدی . اکثریا برابر مکتبدن قاچاردق . آدم محمددر ، چوجقلقده لقم : آبوللابوط ! . ایدی ، قوم قاپولی . .

جوانی ویردی . سلمان بک درحال محمدی خاطرلادی ؛ چونکه کلاخانه رشدی عسکریسند چوجق ایکن کچیردیکی حیاتی کافه صفحاتیله خاطره سنه عادتاً نقش ایله مشدی .

( فترت ) بومکالمه غریبه یی مراق ایله دیکله یوردی ، بومعارفه دن حیرتله دوشمشدی . سلمان بک صاندالچی یه جواباً دیدی که :

— وای ، آرقاداش ، آبوللابوط محمد سنمیسک ؟ سنی خاطرلامام اولورمی ؟ انجق صاحک ، صقالک پک آغارمش ، بندن زیاده اختیارلامشسک ، باخصوص آرادن سنه لر ، کچدی ، سیماکی تشخیص ایده مدم ، یوقسه ، آزمی آرقاداشلغمز واردی ! اوبر آرقاداشلریمز ، بویاجی رضا ، یومورطه جی شکری ، شکرچی حسین نه اولدیلر؟ . مکتبده اکثریا چوجقلرک لقبی بابالرینتک صنعتی ایدی . هی کیدی کلاخانه مکتبی هی ! . بزى فى الحقیقه هیچ اوقوتما دی ، فقط نه قدر اکلنه یدردی ! . ذاتاً ، دکلی ؟ هفته ده بر مکتبه یا کیدر ، یا کیتمز ایدک ، کوننریمزى بتون خارجه ده اویونله ، اکلنجه ایله ، یازلری چاتلادی قاپوده ، قوم قاپوده یوزمکله ، چایرلرده قوشمقله ، کورشمکله ، قیشلری یوقوشلرده قیزاق قایمقله نه خوش کچیرردک . حالاً خاطرمدددر ، محمد افندی سن بالخاصه یوزمکده پک مهارت صاحبی ایدک . مکمل قولاج آتاردک ، هیمزه یوزمکی ، قولاج آتمی ، صوالتدن یوزمکی اوکرتدک . بر نقطه دن دکره طالار ، یکمی مترواواقدن چیقاردک . خاطرلایورمیسک ؟ سرای بورنندن آقینتی یه آتیلر ، دکزک دینندن کیدرک طوب طولی کچن قاریوز قایققلرینی آلتدن صارصاردک ، قاریوزلر دکزه دوکولوردی ، دیرکن هیمزده یوزه یوزه کیدر ، اونلری طویلاردق ، زواللی قاریوزجیلر قیزارلردی اما آقینتی یه قایلماق ایچون یوللرینه بالضروره دوام ایدرلردی ، پشیمزه دوشه مزلردی . حتی برکزه ، غالباً دقت ایده مدک ، اویله بر قاریوز قایغنی آلتدن صارصدقن ، قاریوزلری دکزه دوکدن صوکره صویک



اوسته چىقۇيرىدۇ ، قايقىچىدە قفا كە بر قانچە اوردى ، سنى يارەلادى ، بزبوخالى كورنچە ، قىيدىن قاينى طاشە طوتۇق . بو طاشلىك دردىلە قارپوزجىلر پوصىلەنى شاشىردىلر ، موازنەنى غائب ايتدىلر ، قايقۇدە آقتىيە طوتۇلدى ، پرىشان بر صورتدە قوم قاپو آچىقلىرىنە طوغرى دوندى ، آقدى ، كىتدى . آرقاداش ، نىمچون هېچ سنى ، كلىخانەنى ، بو خاطرەلرى اونوتۇق مەكىمىدر ؟ قواعد عثمانىە خواجەمىزك لىقى تىلىكى ايدى ، چونكىه آدجىغىز طورىلە ، قىاقىلە ، حتى سسىلە تىلىكىيە نە قدر بىكزردى ! عربچە خواجەمىز ، مصنف ، متصل هر برىمىزە : « كوفتە خور ، ترەجىيە ترە ساتىلىرمى ؟ » دىر ، طورىر ، فقط حلىم بر آدمى . موالىرىمىزە يە قاناردى . درسە چالىشماق اىچون وار ذكامزى ، وار شىطىتمىزى استعمال ايدردىك . عربچەدن اكثرىتلە اوكرىدىكىمىز صرف بو تىركچە ضرب مىل ايدى . سادە اك چالىشقانلىرىمىز : « قال اصلندن قول ايدى ، واو حرف علت ، متحرك ، ماقبل مفتوح ، واوى الفه قلب ايتىدك ، قال اولدى » اعلالنى يامىغە قدر وارىرلردى ، آفرىنلر قازانىرلردى ، فقط بويە موفىقتىلر سكا ، بكا هېچ بر زمان مىسر اولمادى . دىكى ؟ . اصول دىفترى ، فارسى وسائره ، بتون او بر درسىمىزده فائىدەسىزلىكچە عىنى قىراطدە ايدىلر ، بويە اولدىنى اىچونده اوقويانلىرىمىزله اوقومايانلىرىمىز ، مەكتەپدن قانلىرىمىزله مەكتەپە دوام ايدىنلىرىمىز هې عىنى نەتىجە هېچىيە ايرىرلردى ، بلكە حايلانلىرىمىز دها زيادە قازانىرلردى ، چونكىه عمرلىرىنى اويون ايلە ، يوزمىك وكورشىمىك ، كېى رياضىتىلرلە كچىردىكلرى اىچون بر نوع تربىە بدنەيە مظهر اولورلردى . جىادت فكرىلەرىنى بو سايدەده محافظە ايدىرلردى . محمد افدى ، سنى اوقومىقدىن محروم براغان ، امىن اول . كلىخانه مەكتىپى اولمادى ، فقط او مەكتەپدن باشقە موافق بر دار تحصىلە كىرمەمەك اولدى .

سلىمان بك بو سوزلرى بىتىردىكن صوكرە اوغلنە توجىيە خطاب ايلە :

— فترت ، ايشتە بو خاطرات صباوتىدە دىكلە ، دىكلەدە دىمىندن اوقودقلىرىمىزله مقابىسە ايت . او زمان ايكى جهانك ، ايكى مدنيتك برىرىدن فرقى دها كوزل ادراك ايدىرساك . اونلر ناصلى يتىشىورلر ، بز ناصلى يتىشىورلر ، كورىرساك .

صوکره بوجدال ابدی حیاتده غالب ، الی الابد غالب کیمدر ؟ مغلوب ، حشره  
قدر مغلوب ینه کیمدر؟ هپ آ کلارسک .

سلمان بک بردن بره صوصیوردی ، درین برتفکره طالیدی ، کوزلرینی صویک  
جریاننه دیکدی ، بر مدت اویله قالیدی ، نهایت ایچنی چکه رکدن :

ماندکیاهی که - از راه بر آید  
زیر قدم محنت ایام شکفتم

یتیمی یوکسکجه بر سسله او قودی .

فقط ، هیات ! عجبا یتیشد کی ؟ یتیشه بیلد کی ؟ بومنشأ ایله ، بوزمین ایله ،  
بوزمان ایله یتیشمک ، یتیشه بیلدک ممکنمی ایدی !  
ملاحظه سنی ده ینه جهراً بسط ایلهدی .

صاندالچی اکثریتله نه او ملاحظه لری ، نه ده بوبیتی آ کلامشدی ، فقط سلمان  
بکه جواب ویرمک ایسته دی :

بکم ، اوت ، مکتبک تأثیری بیوکدر اما انسانک ده استعدادی مساعد  
اولمیدر ، چوققلغکنزده بیله ، حایلازلغکنزه رغماً کوریلیردی ، سزک او قومغه  
استعدادیکز واردی . حافظه کنز پارلاق ایدی . بز اویله دکلدک . اویله اولمادیغمز  
ایچونده کلخانه دن صوکره باشقه بر مکتبه کیتمک ، کیرمک ایسته مدک ، کیممز  
بویله قایقچی ، کیممز زنیایچی ، کیممز شکرچی اولدق . او صنعتلرده صاحیزی ،  
صقالیزی آغارتدق . ایچمزدن آدم اوله بیلنلریز مکتبدن شهادتنامه آله رق اعدادی  
عسکری یه ، قله لیه کچنلریز اولدی .

فقط سلمان بک آرتق او قدیم یولداشنی دیکله مه یوردی ، ینه تفکراتنه  
قویولمشدی ، بوحادثه غریبه ایله تأثره کلشدی ، بتون عمر مهیجنی باشند باشه یاد  
ایله یوردی ، ناصل طوغمش ، ناصل بیومشدی ؟ علی الخصوص نه لر کورمش ،  
نه لر کچیرمشدی ؟ دوشونیوردی ، بر پدرینی ، او دفعات ایله حاج الحرمین  
حسن احسان الله افندی بی خیالنه کتیردی ، برده اوغلنه ، فقرته ، یسینی او مرحومک  
حفیدینه باقدی ، قیزی (سامی) ده کوزینک او کنه کلدی . «زهی تکامل ! زهی تکامل !

فقط عجبا شادمی؟ ناشادمی؟ دیدی. صوکره دهاچوق شهیه دوشدی: «تکاملمی؟ یوقسه اختلامی؟ هرج مرجی؟ شرق ایچون بر نشانه تجددمی؟ یابر نتیجه تملمی؟ خلاصه، نجاتمی؟ قنمی؟» دییه دها زیاده هیجانه اوغرادی. کورک چکمک آرزوسندن، فلان واز کچمشدی، فکرآ استراحت ایتمک ایسترن ایشته یکیدن یورغونلغه اوغرامشدی.

(فترت) ده سلمان بکی بویله متفکر کورنجه کورکلری بر اقمشدی، باباسنک یاننه کچمشدی، اوطورمشدی. باشقه دوشونجه لر بسله دیکی ایچون:

— پدر، اعتقادجه، مکتبدن، صباوتدن اعتبارآ ترکلرک حیاتنده اک بیوک نقصان نماوسه فکریه در، فکر دائماً خام، دائماً ناتراشیده قالیور، بحق فعالیت کورمه یور، امینم که سزایشته کلخانه ده ایکن فکریکزی هیچ یورمادیکن، هیچ معنویات ایله فکریات ایله اوغراشمادیکن، مثلاً (لاویس) کچوجقلقده دوشوندکلرینی اصلاً دوشونمادیکن، هیچ شبهه یوق، دیگر آرقاداشلریکن، اک ذکیلریکن بیلله بومرتبه یه ایرمه دیلر، ایشته ظنجه، اک برنجی، اک پیدار نقصانمز بو محرومیتدر، بودردینر در که بر چاره تدای آرامق لازمدر. چونکه فکرآ کمالیه ترقی ایدمه یین بر قومک جهان تمدنده اقبالی، آتییی اوله ماز.

دیدی، نجل معززینک بو مصیب مطالعه لری ایله سلمان بک بوسفر لطیف لطیف هیجانه کلدی، دمیکی تأثراتی بر پارچه تعدیل ایله دی، صوکره او ملاحظه لره جواباً دیدی که:

— فترت، بر قومده فعالیت فکریه یی اولیه اساسندن پیدا ایتمک ایچون بر چوق شرائط، بر چوق اسباب ایستر که اونلرده قسماً انسال ایله، قسماً ده آثار ایله مقیددر. مثلاً (لاویس) ک نسلی پدردن اولاده هر نوع تهیجات فکریه ایله آز، جوق مؤلف ایدی. بوالفتک، قانون ارثه اتباعاً، اجداددن احفاده تأثیری بدیهیدر. ثانیاً بتون اواجداد، اواجفاد اساساً فعالیت فکریه ایله وجوده کلش بر چوق آثار و مبانئ تمدنک عصر لر دن بری متنعمی، مستفیضیدر لر. شمد او محیضنده طوغان، اولیه یتیشن بر چوجفک قابلیت فکریه سیله، هیجان فکری سیله بتون او وسائطدن محروماً، مهجوراً یا شایان بر چوجفک استعداد مغنویسی بر اولور می؟ البته اوله ماز.



(لاويس) هم بويله پايخته ده بر مدرسه ده دكل ، فقط بر كويده ، بر قصبه ده ، اوافق  
بر مکتبه ، كوچيچك بر چوجق ايكن ناصل بيويور ، ناصل دوشونيور ، ناصل  
تحصيل ايدييورمش! كورييورز . ينه او خاطرات صباوتدن شو صحيفه لری ده ديکله :  
سلمان بك جيندن چيقارديني اوافق اوافق كاغلدری شويله جه اوقومغه باشلادی :

« بزاوله ياراماز چوجقلردن دكلدك . بر بر يميزله خوش كچينيوردق ، صميمي  
دوستلرم واردی ، حالا خاطرلارم . يكدیكر يميزه اوافق ، تفك ايشلر يميزی  
آكلاتيوردق ، طفلانه سرلر يميزی توديع ايله يوردق . اوزمان نيتم مکتب حربه يه  
حاضر لانيمقدی . المه كچن ايلك پاره ايله اشترا ايتديكم برنجی اثر مطبوع مکتب  
حربه نك درس جدولی ایدی . اك سوديكم آرقاداشلرمدن بری ده مهندس اولمق  
ايسته يوردی . قرار ویردك ، ايلريده اوباش مهندس ، بن ايسه برسه دارا اولديغمز زمان  
كیده جكدك . (لوندره) ي محاصره ایده جكدك ، چونكه (ژان دارق) ايله (ناپولون) ك  
انتقامی آلمق املنده ايدك . خاطر مده در . بر بر يميزه قارشى وفا كارلغمزده واردی .  
عائله جه شرائط اجتماعيه مزك اختلافی مناسبات متقابله مزه اصلا تأثير ايتمه يوردی .  
يالكز بر كره زنكین ، احمق بر قبا كويلی مکتبه مجانا قبول ايديلنلردن اولديغمی  
بر قباحث كی يوزيمه اورمشدی . چوجقلرك بر چوغی شهر ك اك معروف عائله لرينه  
منسوب ايديلر . . . »

« تعليم حد ذاتنده تربيه يي حائزدر . حقيقتده بويله در ، مؤلفلرده مصادف  
اولديغمز امثال اخلاقيه بزه لطيف كورونيوردی ، افعال نحييه ايسه ، دقتمزه بادى  
اوليوردي . ازمنه قديمه نك وطنه وقف حيات ايدن اوقهرمانلری ني مفتون ايله يوردی .  
مثلا (هوراچيئوس قوقلهس) كی كه بر آراق بر حادثه ادبيه مناسبتيله بكا بر مدت  
(قوقلهس) لقبی بيله ویردیلردی .. »

فترت ، كورييورسكيا ، بلکه (سن ژرمن) ده ، مکتبه ايكن نفسكده تجربه ده  
ايتمشكدر ، بوحيات يكرمی ، اوتوز سنه اول كذران ايتمش اولمقله برابر كلخانه  
مکتب رشديسنده كچن حياتدن نه درجه باشقه ، ترقی ، تمدن ، معالى فكریه اعتباريله  
نه درجه باشقه در !

تفسيری ده علاوه ايتدی ، فقط بو مطالعه لر فترته مهم بر اضطراب ویردی .

او غریب کنج حزین حزین دوشونمکه باشلادی . نه دوشونیوردی ! والده جهتیله منسوب اولدیغی ، تربیه سنی ، تعلیمی اول حیاتندن بری کوردیکی ، ایدیندیکی اویله برجهاندن قطع رابطه ایله باباسنک بوابتدائی ، بویانیق وطنه آتیلدیغی ، صارلدیغی می دوشونیوردی ؟ یوق ، بودوشونجهده اوقدر ایلری کیمکی روا کورمه یوردی ، خیانت عدایدیوردی ، چونکه هر حاله رغماًینه او مملکتی ، مملکتی سویوردی .

سلمان بك اوغلنك ماهیت اضطرانی ، دوشونجه لرینی در حال کشف ایله دی .

ایله یخجده شو محاکمه بی بسط ایتدی :

— فقط بویله اولمقله برابر سنده ، بنده بو وطنك اولادندز ، بوجدالده ، بو حیاتده عهده مزه دوشن وظیفه اومادر مشفقمری وار قوتمزله مدافعه در ، تدنیدن قورتارمق ، ترقیه ایردیرمکدر . بویله مساعی نجیه دن زیاده انسانلق ایچون نه ذوق اوله بیلیر ؟

ذاتاً ذهنی بومسئله ایله مشغول اولمغه باشلار ، باشلاماز . ( فترت ) ك اوکنج قلبی خلجان ایچنده ایدی . معامله قلییه محاکمه کوتوریرمی ؟ انکلترده طوغان ، فرانسه ده بیوین بوترك چوجنی هرچشید نقائصیله برابر مملکتی جهانك اك معمور مالکندن زیاده سویوردی . تأثیر ماضی ، امید آتی ایله ، نه ایله اولورسه اولسون سویوردی .

( فترت ) بو تهیجات ایچنده ایکن صاندالده سرای بورتنی کچمشدی . سرکه جی اسکله سنه طوغری یا قلاشمشدی . اوصرده بوغاز ایچندن کلن بر واپورك یان قاماره سندن سلمان بکله فترته ایکی خانم مندیله صالایورلردی . ده ایلک نظرده ( فترت ) ، اوقدر اوزاقدن اولسه ده سحری طانیدی ، قلباً ، فکرآ نشئه لره مستغرق اولدی . چونکه اومشوقه روحنی ساده قلنیله دکل ، فکریله ده سویوردی ، بوسائقه ایله ده بومملکته اوارتباط عمیق مهیجنی بر درجه ده آکلایوردی .

سلمان بك ده کزیده نك تمثالنی اومحیط ، اومنظره ایچنده باخصوص اوتحساستدن صوکره کورونجه غریب برتهیجه طوتولدی ، ایام خزانده برجلوه طبیعتله مستثنی اوله رق بعض موجودات فنا رسیده نك یر لحظه تجدیدی نه ایسه صاف ، لطیف بر

عشق هر مزده بر قلبه انعطافی ده اویله دره، اویله مؤثر دره، منعمره، فقط من کل الوجوه  
ینه حزیندر .

یاریم ساعت صوکره دارالفنونده برجم غفیر طلابه قارشی کرسی تدریسه  
کچهرک تاریخدن بر فصل مؤثری تصویره، تقریره باشلادیغی وقت سلمان بك اومستتر  
غرامك زیر تأثیرنده ایدی ، اویله اولدیغی ایچونده درسنه باشقه بر فر ، بر فیض  
ویریور، طلبه یی اوکون مستتی بر طرزده مستفیض ایلهور، انجذابه کتیریوردی .  
ایشته عشق هر درلو خطرلرینه قارشی بوانعامی انکار اولونه ماز . . پاك ، حقیقی  
برسودا انسانك قلبه ، فکرینه ، حتی بعضاً قولنه بیله خارق العاده بر قدرت ویریر .





## دارالفنون عثمانیه

بر بازار کونی اوکله دن صوکره ساعت ایکیده اکثریتله طلبه دن ، طالبادن مرکب برجم غفیر خلق دارالفنون عثمانیک مراسمه تخصیص ایدیلن درسخانه سنده طویلاشمشلردی . تاریخ معلمکنه معاون صفتیله اخیراً تعیین اولان بایدور بک اسمنده برکنجک بر موضوع تاریخی یه دائر بر تقریری دیکله یه جکلردی .

دارالفنون عثمانی صوکره دورده انشا ایدلمش اولمقله برابر بک محتشم ، پک مکمل بر بنا ایدی ، غربک صنعت جدیده معماریه سندن بر نمونه ایدی ، حکومتک غیرتیه دکل ، رجال سابقه حکومتدن بر فردک همیتیه ، اغانه سیله ، پاره سیله وجوده کلشدی . بو ذات وقتیه ، دور قدیمده وکلادن ، اک متنفذ وکلادن ایدی ، اون آلتی ، اون یدی سنه ناظرلقد قالمشدی ، ناظر اولمادن اول یننده ، حلبده ، بغدادده والیه کلرده بولونمشدی ، احوال خصوصیه جه اخلاق حمیده صاحبی بر آدمدی ، افراد عائله سنه مشفق ؛ معیتیه ، اوشاقلرینه ، هرکسه قارشی منصف ، محق ، نازک ایدی ، خصوصی معاملاتنده استقامتدن اصلاً ایرمازدی ، هیچ بر فردک حقنی هیچ بر زمان یمزدی ، لکن مأموریت حکومتیه ، خدمت عمومیه یه کلنجه ، بویله دکلدی ، مع الاسف مرتکب ، مرتشی ایدی . تایمندن اعتباراً والیه کلرنده کلی ارتکاباتده بولونمشدی ، مثلاً ایلك صنعا عصیاننده مشایخی تأدیه مأمور اولدیغی زمان انصاف سزجه سنه صویمشدی ، خزینه خزینه ریالیر غصب ایتمشدی ؛ حلب ولایتده ایسه ، ینه ارتشا ایله ، متعدد چفتلکاره ، واسع اراضیه ، بر چوق بنالره صاحب اولمشدی ؛ انشا آتدن ، مبیاعتدن ، التزاملردن ، اغنامدن ، اعشاردن ، نه دن اولسه چالمشدی .

پروسیا قرالی بیوک (فره‌دریق) ك دستور اخلاقی مضاعف ایدی، مناسبات بین‌الدوله باشقه ایدی، معاملات خصوصیه وداخلیه‌ده ینه باشقه ایدی. دستور اوله كوره عهده وفاسزلق، یالانچیلیق، مزورلك هپ مباح ایدی، حتی اوقوص قوجه قرال: «دولتنك كوچك بر منفعتی ایچون بیوك برسوزینی آیاق آلتنه آلمایان حکمدار اوکوزدر.» دیمكه قدر وارمشدی؛ لهستان امورنده، اوتوز سنه محاربه‌سنده، فرانسه ایله، اوستریا ایله، روسیه ایله مناسباتنده فعلی‌ده بوقولنه توفیق ایله‌مشدی؛ (بیسمارق) ه وارنجه‌یه قدر بتون پروسیا رجالی بومسلکدن اصلا آیرلمادیلر. فقط معاملات خصوصیه‌ده، احوال داخلیه‌ده هیچ بویله حرکت ایتمه‌دیلر، دستور عمومی اخلاقه اتباع ایله‌دیلر، هیچ برزمان یالانی، استقامتسزلیکی، عهد شکنلیکی تجویز ایله‌مدیلر؛ دیمك، اواخلاقسزلقلری محضامنافع عمومیه‌یه مفرطانه خدمت ایده‌بیلیمك اندیشه‌سیله ارتكاب ایله‌یورلردی، معذور ایدیلر.

حال بوكه بزده، شرقده بالعكس منفعت عمومی‌ه دولت منافع خصوصیه ایچون دائماً فدا ایدیله كیشدر، سرقت مال میری عادتاً مباحدر، حکمت عوام: «دولتك مالی دكز، یمه‌ین طوموز» دیمكه بیله جرأت ایدر. غالب دده کبی صوفی خصلت برشاعریمز (حسن وعشق) ده:

اسرارینی منویدن آلدیم،  
چالدمسه‌ده میری مالی چالدم.

دیوركه عادتاً بوچشید سرقتك برجرم، بر جنایت اولمادیغنی ادعا ایله‌یور. جهان شرقده هیئات اجتماعیه‌نك چوروكلکنه، دولترك چوق سورمه‌دن انقراضه اوغرامسینه، اقوامك هیچ برزمان فلاح بولماسینه یوقاریدن بری تعریف ایتدیکمز بوخصلتك، بواعتیادكده دائماً بیوك تأثیری اولدی.

ایشته مداربحث ایله‌دیکمز نریمان پاشا بویله والیلک کرده بر ثروت کلیه ایدندکدن صوکره ناظرلغه کچنجه بالطبع ده‌ها زیاده چالمشدی، چرپمشدی، ذاتاً سنه‌لرجه پادشاه‌دنده کلی احسانلر المشدی، میلیونلر ایدنیمشدی.

وقتا که انقلاب عثمانی وقوعه کلدی، دیدیکمز کبی اساساً اخلاق حسنه‌سینه،

خصوصیاتده حسن حاله، حلمه، سخاوتنه مبنی نریمان پاشانک بتون اوخرسز لقلری سکوت ایله کچشدیرلدی، مبنی مامضی حکمنه توفیقاً اونودلدی، مالنه طوقونلادی، حتی شخصنه برمرتبیه حرمت بیله کوسترلدی.

فقط احوال بستیون تبدل ایدرک حکومتک دستور اخلاقی ترقیات غربیه کوره تعین ایدنجه نریمان پاشا فطره صلاحه میال اولدینی ایچون، ماضیسندن صرف وجداننه قارشلی اوطانمغه، حتی اوطانمقلده قالمایه رق :

وجدانیدر اسائت فعلنده آدمک

دعواجیسی، شهودی، قوانینی، حاکی

معنی المرحس ایتیمکه باشلادی. آرتق کیجه وکوندوز اواضطر ابدن نه یاپه جغنی بیلمه یوردی، اوتهدن بری (دوران) اسمنده بفرانسز صرافلی ایله دوست آیدی، کلی ایش کورمشدی، حالاده کوریوردی.

پاشانک نقود موجوده سندن برقسم وفیری بو صراف محافظه ایله یوردی، فقط پک مستقیمانه، پک وفاکارانه برطرزده محافظه، هر درلو ضیاعدن، تهلکه دن صیانت ایله یوردی، بر معامله دن نه زمان یوزده یوز امین اولورسه انجق اومعامله یی پاشایه توصیه ایدیوردی.

مثلاً وقتیه، (بالیا - قره آیدین) معدنلرینک تحویللری چیقیدینی زمان (دوران) ک الحاحیه نریمان پاشا بو کاغدلردن یکر می بیگ لیرالق قدر آلمشدی. چوق کچمه دی، اومعدنلر منتظماً، مکملأ، اومولدیغدن زیاده ایشله مکه باشلادی، تحویللرک فیئاتی آرتدی، اویکر می بیگ لیرا قرق بیگ اولدی، صوکره یوز بیگ اولدی، ایکی یوز بیگ اولدی، نهایت دور حریتده درت یوز بیگ، بش یوز بیگ لیرایه قدر چیقیدی. برکون (نریمان) پاشا (دوران) ی چاغیردی، آرتق بو (بالیا - قره آیدین) تحویللرینی صاتمق، بومبلغ عظیمی ایسه دونانما جمعیتنه بخش ایتیمک ایسته دیکنی او صرافه سویله دی. ذکی فرنک بوا یکی تصور دن برنجی یی در حال تصویب ایله دی، چونکه اوتحویللر حد معقولدن زیاده فیئاتجه فیرلامشدی، لکن ایکنجی تصویری خوش کورمادی، کورمه نیجه ده (نریمان) پاشایه دیدی که :



— دونانما جمعیتہ نہ ایچون درت، بش یوز بیک لیرا ویره جکسکز؟ زرهلیلر  
 آلمق، محتشم بردونانما وجوده کتیرمک ایچون دکلی؟ بش یوز بیک لیرایه بردکلی،  
 یاریم زرهلی بیلہ زور آلنیر، حال بوکە بللی، باشلی ایشہ یارار بردونانما بویله اون  
 بش، یکر می زرهلی ایله انجق حصوله کله بیلیر. لوصرفیاته، اویله تجهیزاته ایسه،  
 بودولتک، بوخلقک شمدیلک قدرتی هرجهتجه اصلا مساعد اولماز. او اولمادجه  
 سزک درت، بش یوز بیک لیرا کزکی مصارف بوش یره، فائده سزیره دکزه  
 آتیلیر، کیدر. فقط، له الحمد، ثروتکز کفایت ایلر: بویاره بی برپارچه دها  
 چوغالتسه کزده مثلاً استانبولک کوبکنده طبقی (پارس) ک او مشهور (صوروبون) ی  
 کبی بردارالفون یاپدیرسه کز صوکره اوبنای محتشمی ده بومملکت هدیہ ایتسه کز  
 تاریخده نه قدر پارلاق برنام براقش اولورسکز. اومنبع معارفدن بواقلیمه فیوض  
 عرفان جوش خروش ایله آقدجه باشده شبان وطن اولدقلری حالدہ علی الاطلاق  
 بتون عثمانلیلر سزی خاطرلار، یادیکزی تحیل ایدرلر. مروتکز هم سزه، هم ده  
 مملکتکزه یارامش اولور.

(نریمان) پاشا طبیعتجه حقیقی برترک، براناطولی ترکی ایدی، اویله اولدینی  
 ایچونده محدودیت معلوماتیله برابر بر فکر سلیمه مالک ایدی، (دوران) ک  
 نصیحتنی درحال تقدیر ایله دی، تقدیر ایدر، ایتزده قبول ایتدی، موقع اجرایه  
 قویدی. عزم وامعان صاحبی ایدی، تصویرینی آز وقت ایچنده قوه دن فعله  
 چیقاردی.

فی الواقع پاشانک دلالتیله ارباب لیاقتدن برانجمن مخصوص تشکیل ایدلدی.  
 فرانسه دن معمارلر، اوسته لر کتیرلدی. رسملری، ترتیلری حاضرلاندی،  
 کشفلری یاپلدی. آلتی، یدی یوز بیک لیرا صرف اولنه رق چنبرلی طاش ایله  
 نور عثمانیه نک آراسنده کی اراضی\* واسعة خالی ده (دوران) ک اخطاری وجه ایله  
 طبقی (پارس) ک (صوروبون) ی کوچک بر مقیاسده تقلید ایدلدی، فقط مملکت مزه  
 کوره پک معظم، پک مکمل، پک منتظم بردارالفون انشا اولوندی.

جهت بنا چنبرلی طاش میداننه ناظر، هم مهیب، هم حزین ایدی، اورتاده  
 بیوک بر دمیر قاپودن، ایکی طرفده ینه بیوکه، ینه دمیر ایکی دیگر قاپودن ایچری،

مستطیل الشكل بر منتظم حولیہ کیریلوردی . حولینک آرقہ جہتندہ ، وسطدمہ  
 طبقی بر معبد شکلندہ فسیح بردر سخانہ یہ یوقاریدن ، آشاغیدن ، صاغدن صولدن  
 دخول ایدیلوردی . بودر سخانہ دہ کرسی خطابت اوصورتله ترتید اولونمش ، قہ اویلہ  
 قونولمشدی کہ خطیک ، خواجہ نک سوزلرینی ہریردن ایشیتمک ممکن ایدی ، حال  
 بوکہ بومظنن دائرہ تقریباً بیک کشی استیعاب ایدہ بیلہ جک قدر واسع ایدی ،  
 صرہ صرہ مقعدلرہ مالک ایدی ؛ دیوارلردہ اویلہ معنیدار ، فقط نفیس نقشلر  
 واردی کہ مثلاً یا ہارون الرشید زمانندہ بغدادی مدرسہ لریلہ ، مبانیسیلہ ، جوامعیلہ ،  
 اندلسدن قرطبہ یی ، غرناطہ یی ینہ اویلہ جہ مکارمیلہ ، بدایعیلہ ، الحمرا لریلہ ، یاخود  
 پارس ، لوندردہ ، برلین ، واشینگتون کی بلاد متمدنہ یی بلند مدارس معظمہ  
 عرفانیلہ عرض ایلہ یوردی .

فکرہ ، نظرہ وسعت ، انشراح ویرن بوتقوش مشعشعہ قسماً بر فرانسز ،  
 فقط قسماً دہ پک معروف برارمنی ، بر عثمانی رسامنک محصول مہارتی ایدی .  
 اوروپا جہ بیلہ مظهر تقدیر اولمشدی .

ینہ بوبنادہ اوبیوک حولینک ایکی طرفندن اوزونجہ ، کنیش ایکی دیوانخانہ  
 ایلہ او بر درس خانہ لرہ ، علوم شعبہ سنہ ، ادبیات شعبہ سنہ ، حقوق شعبہ سنہ ، شعبات  
 سائرہ یہ کیدیلوردی . ایکنجی قات ایسہ ، کیمیا ، حکمت ، الکتریک تطبیقاتی  
 ایچون عملیاتخانہ لرہ ، بردہ مذاکرہ اوطہ لرینہ مخصص ایدی . بنانک تسخنی ،  
 تنویری ، تطہیری ، بتون او خصوصات اک صوک ترقیاتہ کورہ ترتیب ایدلمشدی .  
 معلم معاونی ( بایدور ) بکک تقریرتاریخیسی ذکر ایتدیکمز بیوک درس خانہ دہ  
 ویریلہ جکدی . بوداژدہ قادینلر ایچون ، طالبات ایچون دہ آریجہ بریز ، برنوع  
 محفل یاپلشدی . اومسئلہ یہ دائر اوزمان ایجہ کورولتی حیقمشدی . بعض محدود  
 الافکار آدملر قادینلرک ، قیزلرک بویلہ دارالفنونہ دخولی کویا شعائر اسلامیہ یہ  
 مخالف کورہ رک منع ایتمکہ قالقیشمشلردی . فقط باشدہ شیخ نہان کامل افندی اولدینگی  
 حالہ بر حزب فطین علما بویلہ بر ادعانک ، ادعای خامک کنہ منیف اسلامہ  
 مغایرتی سادہ اواصر نبویہ ایلہ ذکل ، و قتیلہ ( اندلس ) دہ کی دارالفنون حیاتیلہ ،  
 اوحیاتہ مخدرات اسلامیہ نک اشتراکیلہ ، حاصلی امثال تاریخیہ ایلہ اثبات ایلہ مشلردی ،  
 بوسایہ دہ اودغدغہ جہلک اوکنی پک پارلاق بر صورتدہ آلمشلردی .



ایشته بویله مراسم مخصوصه علمیه ده قادینلر ایچون دارالفنونه بر محل خصوصی استماع موجود ایدی، بویله یایلمایهیدی، فی الحقیقه هم کولونج، هم یازیق اوله جقدی. چونکه مخدراتمه ظهوری قولنی آندیریر، قره کوزه بکزر منظره لره، پک بایاغی تیاترولره کیتمک ایچون مساعده ایدیورز. فقط بویله بر مأمّن ادب و عرفانی آر قالدی، سد ایله یه جکدک :

### آه من الجهل وحالاته

(بایدور) بک نسلأ استانبول خلقدن، سنأ یکریمی یدی، یکریمی سکر یاشنده، پک ذکی برکنج ایدی. اولاً مملکتده تحصیلتی کوزلجه بیتیردکن صوکره برای تکمل فرانسه یه کیتمشدی. (پارس) ده اوچ سنه متمادیاً (صوبون) ه دوام ایدرک تاریخ و جغرافیا شعبه سندن مأذونیت رؤسی المشدی، بالخاصه تاریخ قرون متأخره ده پک زیاده اختصاص کسب ایله مشدی. (پارس) ده اک صوک امتحانلرینی ویرمک ایچون حاضر لامغه مجبور اولدینغی تألیف، که ایکنجی ایمپراطورلق زمانده فرانسه نك شرقده کی سیاستندن باحث ایدی، خواجه لرینک تقدیرینی جلب ایتمشدی، حتی رغبت عمومیه یه بیله مظهر اولمشدی. طبعی بتون بو موفقیتلر (بایدور) بکه مملکتنجه پارلاق بر شهرت قازاندیردی. فقط بعض اقراننک عداوت حسودانه لرینی ده جلب ایله دی. (بایدور) استانبوله عودت ایدرک دارالفنونه خواجه لقله کیرنجه، فقط بویله شعشعه ایله، اقبال ایله کیرنجه بالضروره اوعداوت آرتدی، آرتدی، آثار سمنا کنی کوسترمک ایچون وسیله آریوردی. فرصت بکله یوردی.

کزیده، سحر، صمد، هپ بواجتماعده موجود ایدیلر، چونکه (بایدور) ایله اوزاقدن اوزاغه اوافق برقرابته مالک ایدیلر، سلمان بک، فترت ده اوراده ایدیلر. (بایدور) ذاناً سلمان بکک بر تلید قدیمی ایدی. اواستادمشفق بوشا کرد معرفتنک شورسم فاتحه تدریسنده حاضر بولونمغی جانندن، کوکلدن اوزله یوردی. او قوص قوجه درس خانه همان همان طولمشدی. کرسی وسیع خطابتده دارالفنون معلملری، دارالفنون مدیری هپ حاضر ایدیلر. اولاً مدیر ایاغه قالدی، استاد جدیدی حضاره تقدیر کارانه تقدیم ایله دی. بو مؤسسه نك عنعناتندن اولمق



اوزره بوکنجک او کون او اجتماعده تاریخن برفصل منتخی مدار بحث ایده جکی سویله دی ، سوکره سوزی بایدوره ویردی ، اوده بشوش برسیما ، سربست برطور ایله سویله جه تقریره کیریشدی :

خاملر ! افدیله !

بویله بر جمعیتده ولو مصاحبه طرزنده ، ولو برنبذه اولسون تاریخن برفصلی تمهید ایلمک بنم ایچون ، بنم کی بر مدرس مبتدی ایچون بیوک بر شرفدر . بوشرفه قارشی عرض شکران ایچون موضوعی برنجی ( ناپولئون ) ه حصر ایده جکم ، چونکه آرادن بر بچق عصره یقین بردور ، انقلاباتیه مهیب ، ترقیاتیه محتشم ، بر دور مهیب و محتشم کچدیکی حالده اوخارقه فطرت ینه شعشعه داستانیله اذغانی قاماشدیریور ، مفکرهیه جهان ایچنده برجهان دیگرخوارق کوستیریور .

فقط ابتدادن عرض ایده یم که بتون بومباحثده اوصاحب دهانک اویله صاندقلری کی دولتمز ایچون خیرخواهغنی ، ینه دیدکلری کی سلیم ثالثه مخادنتی اساس اتحاد اتمهیه جکم ، چونکه بونوع مدعالر هپ عندیاتدن عبارتدر . ( ناپولئون ) ک دولت عثمانیه هیچ بر زمان خیرخواهغنی یوقدی ، اولمادی . اوله مازدی : مصر سفرنده موفق اولهیدی ، املی بتون نیل وادیسنی ، عراقی ، سوریه یی اله کچیردکن ، هندستانی ده ضبط ایله دکن سوکره استانبول طریقیه اوروپایه دونه رک بلکه سلطتمزه خاتمه چکمکدی ؛ ایشی ، کوچی ایسه بزی دائماً مقاصد سیاسیه سنه آلت ایتک ، بعضاً انکلتراهیه ، بعضاً روسیهیه ، آوستریایه قارشی قوللانمق ایدی . سلیم ثالثه بر زمان او صوری نوازشلری بو سائقه دن منبعثدی ، ذاتاً جهانده نفسندن ، اقرباسندن ، طولایسیله ده فرانسهدن باشقه نهیه مخادنتی اولدی که ...

مع مافیه ، مورخلکک اساسی بی طرفلقدر ، تاریخن اک حقیقی استفاده بیطرفانه منصفانه حقیقی سویله مکله در . فرنکلرک دیدکلری کی قیصرک حقنی قیصره ویرمکله در . ایسته بو دستوره اتباعاً احتیاسات ملیه می بر طرفه براقه رق ( ناپولئون ) ک مناقبنی ابتدادن انتهایه صحتله ، سلامتله بسط ایده جکم ، تمثال تاریخنیشنی پیش نظر امعانکرده حقیقیله تجسم ایتدیره جکم ، یوق ، اویله دکل ایتدیرمکه جهد ایله جکم :

(۱۵) اغستوس (۱۷۶۹) ده قورسیقه آله سنك پك آسوده دكلسه ده اوجرا برکوشه سنده ، اورتا حالده بر عاڭله دن ، نحیف برچوجق ، (ناپولئون) طوغدی ، بیودی ، هنوز اون یاشنه باصنجه فرانسه یه کچدی ، برمدت قاردشی (ژوزف) ایله برابر (اوتون) ده مکتب اعدادیده قالدقن ، فرانسه یه یی اوکرن دکدن صوکره (بریهن) مدرسه سنه ، فقیر اولدیغی ایچون ، قرالک بر لطف مخصوصی ایله مجبانا کیردی . جلوه تقدیری کوریکز : اوتاریخدن اوتوزسنه صوکره (ناپولئون) بر حکمدار معظم ایدی ، ندیم خاصی (قوله نقور) ه دیوردی که :

« (بریهن) ده ایکن آرقداش لریمک اک فقیری بن ایدم ، اونلرک هپ جیب پاره لری واردی ، بنم هیچ بروقت بش پاره م یوقدی . متکبر ایدم ، واردقمی بو حقیقتمی ستر ایتمه ک حصر ایلردم ، باشقه لری کبی کولمک ، اکلهمک نهدر بیلیمزدم . » اوکنج (بوناپارت) ، (بریهن) دن مکتب حربیه یه کچدی ، آز صوکره ضابط اولدی ، چالیشقان ، جدی ، حتی سنه نسبة پک جدی ایدی ، ذوقه ، سفاهته هیچ میل ایتمه یوردی . سکز چوجقله طول قالدیغی ایچون بیچاره والده سنه کوچی یتدیکی قدر یاردم ایدیوردی . اک کوچک قاردشی (لوئی) یی - که بالاخره (هولاندا) قرالی اولدی ، اوچنجی (ناپولئون) ک پدریدر - یانه آلمشدی ، سویوردی . تربیه ایدیوردی ، اولاد کبی بیوتیوردی .

اوزمان انقلاب کیر ایکی سنه دن بری پارلامشدی . فرانسه آتش ایچنده ، هرج مرج ایچنده ایدی . کنج (بوناپارت) ایجه صاغی ، صولی طولاشدی . بر مدت آچیقده ، ضرورته قالدی ، نهایت طویجی ضابطلکیله (طولون) ه کتدی . بوشهری اوصره لرده دکزدن انکیز دونانمالری صارمشدی . بو محاصره ائناسنده ، اودم مهیجده اوکوچک (بوناپارت) ک بیوک برخدتمی اولدی ، برخدتم که دشمن کیلرینی پوسکورتدی ، محاصره یه خاتمه چکدی ، اوکنج ضابط ایچونده اکتساب شهرته ، پارلاق برترقیه بادی اولدی . چوق کچمه دی ، ده اابتدای شبابنده ، هنوز یکریمی بش یاشنده ایکن (بوناپارت) لوا ، جنرال ایدی . اووقت مشفق بر پدر کبی بتون عاڭله سنه ، قیز قاردش لرینه ، قاردش لرینه جانندن باقدی ، فقط ینه او ائنالرده بر مصیبه اوغرا دی ، بر افترایه هدف اولدی ، حکومت جمهوریه یه



اهانتله اتهام اوله رق تحت توقیفه آلدی ، معصوم ایدی ، جزئی بر موقوفیتدن  
 صوکره یاقه یی قورتاره بیلدی ، قورتاره بیلدی اما اوزون مدت آچیقده قالدی .  
 برکون او دورک حریبه ناظرینی کورمه کیتدی . بر خدمت ، بر مأموریت  
 ایسته مک ایچون کورمه کیتدی ، ناظر قابا بر حریف ایدی ، نه حربدن ،  
 نه ده رجال حربدن آکلایوردی ، (بوناپارت) :

— سز هنوز کنجسکر ، اولا دها قدمیلر قایرلسونده صوکره سزه نوبت  
 کلسون ...

دیدی ، (بوناپارت) ایسه :

— میدان حربده انسان چابوق اختیارلایور ، بنده محاربه دن کلیورم .

جواب مسکتی ویردی ، فقط ینه ایسته دیکنه ایره مدی ، ایره مه نیجه ده هیچ  
 اولمازسه بر مأموریت مخصوصه ایله خدمت عثمانیه یه کیرمک هوسنه دوشدی .  
 بو هوسی کوسترمزمی که (ناپولئون) ایچون الک بیوک احتراض حب نفسدر .  
 نفساً موفق اولمق ، پارلامق ، فقط نه صورتله نزده اولورسه اولسون پارلامقدر .  
 ایشته (بوناپارت) او یله غریب برامک پشنده طولاشیرکن ، حتی ممالک عثمانیه یه  
 متهی حرکت ایکن برکون ناصلسه حریبه نظارتجه بر مأموریتله قایرلدی . او وقتلر  
 بیوک قاردشی (ژوزف) ه یازدینی مکتوبلردن برنده بو مأموریت ایچون شویله  
 سویله یوردی :

« شمدیلک (سلامت عمومیه) انجمننک تحطیط اراضی شعبه سنده (قارنو) نک  
 یرینه اردولر اداره سیله مشغولم . مع مافیه ، ایسته سه م طوپچی قوماندانی صفیله  
 علی الخصوص بر اهمیت مخصوصه ، بر معاش وفیر ایله عثمانلی اردوسنی تنظیم ایتک  
 خدمتی درحال استحصال ایدر ، ممالک عثمانیه یه کیده بیلیرم ، فقط حالا مأموریتیم  
 هم مهمدر ، همده باعث مفخرتمدر . قورقارم که آرتق بنم ایچون خدمت عثمانیه یه  
 کیرمکه حاجت قالماسون . »

فی الحقیقه ده قالمادی . بو ائشارده جنرال (بوناپارت) بر یاندن همشیره لرینی  
 اوله ندیرمکه ، برادرلرینی یرله شدیرمکه اوغراشیوردی ، بر یاندن ده بالذات بللی ،  
 باشلی بر تاهل پشنده ایدی . بر کره فراخ مادری اوله بیلیر ، اوچ ، درت



چو جق طوغورمش ، فقط اسکیدن بری طانیدینی بر طول قادینک ید ازدواجنه طالب اولدی ، بر جواب رده اوغرا دی ، صوکره کیتدی ، کسندن هیچ اولمازسه ینه درت ، بش یاش بیوک ، بری قیز ، بری اوغلان ، ایکی چو جق صاحبی دیگر بر طول قادینه ، ( ژوزه فین بوآرنه ) یه مبتلا اولدی ، بوسفر مراده ایردی . اوبی تاب ، اوبی تاب سودا ، سودانک انواعی کورمش ، کچیرمش ، عشووه وجلوه دوشکونی قادینله اولهندی ، همده چیلدیریرجه سنه سوه رکدن اولهندی ، فقط ، غریبدر ، اوله نیر اوله نمزده ایتالیا اردوسنه فوق العاده سردار تعین اواندی ، هنوز فردای زفافده سودیکندن بر آتش عشق ایچنده آریله رق محل مأموریتنه کیتدی . دها یولدن زوجه سنه شویله آتشین فراقنامه لر یوللاپوردی :

« هر لحظه بنی سندن اوزاقلاشدیریور ، فقط هر لحظه ده افتراقکه تحملدها زیاده آزالیور ، فکریمک دائماً مشغله سیسک ، قوه مخیله م نه پایدیگی ، ناصل وقت کچیردیکی تصور ایده ایده بی تابدر . سنی محزون کوریرسه م ، کوکلم قان آغلا یور ، انم آرتیور ، شاید شن ایسه ک ، شاطر ایسه ک هنوز اوچ کونلک افتراق الیمزی درحال اونوتیوردیکک ایچون سکا قیزیورم ، اوزمان خفتکه ، بر حس محبتدن محرومیتکه حکم ایدیورم ... »

« یاز ، بکا اوزون اوزادی یه یاز ، معشوقه نازنینم . اک صمیمی ، اک آتشناک بر سودازده نک بیك بر بوسه مشتاقی سنکدر . »

بر پادشاهمزه عطفاً دیدیکمز کی : شیرلری پنجه قهرنده زبون ایدن برجهانکیرک بویله بر کوزلری آهویه قارشى بو ضعفنه تعجب ایدلمسون ! ( ناپولئون ) دائماً ، دائماً اسیر سودا ، همده احتراض ایله ، افراط ایله اسیر سودا ایدی ، همان همان خاتمه حیاته ، هله خاتمه سلطنته قدر شوق ایله ، هیجان ایله سودی ، ( ژوزه فین ) دن صوکره بالفرض مادموازل ( ژورژ ) ه اولدینی کی غرامناک اولسه ده مختصر ، موقت ابتلا لر قاله آلمانزسه لطیف ، نزیه ، معصوم بر له کوزلنی ، مادام ( والوسقا ) یی سودی . ینه او یله حرص ایله سودی ، اوچنچی ( ناپولئون ) ک او معروف خارجیه ناظری ، پارس مؤتمر کیرینک رئیس مشهور ( والوسکی ) بو علاقه نک محصولی ایدی . حاصلی ، امپراطور ( ناپولئون ) ایکنجی زوجه سنی ، ( ماری لوئیز ) ی ده بر معتاد

مشتاقانه ، محترسانه سودی ، فقط بتون بو سودالرله هیچ بر زمان ، هیچ بر عزیم جهانگیرانه‌سندن کری قلمادی .

ایشته اوسردار مظفر ، دها او دورده ، ایتالیا ده طاغری ، اووالری بو آتش عشق ایله یانارقدن آشوردی ، فقط معرکه لرده اڤارلاق ترتیلری ینه اجرا ایدیور ، اڤ بئند ظفرلری ینه اکتساب ایله یوردی ، دشمندن برنبذه فارغ اولدجه درحال سودیکنی دوشونیوردی ، نهایت طایانامادی . آدم لر کوندردی ، او معشوقه فکر وقلبی یانه کیترتدی .

لکن ( ژوزفین ) اوزمان بو آتشین سودانک ، سودای کرانک قدرینی بیلمه یوردی . اواقتاده زوجنه بیکانه جه ، حتی برودتله مقابله ده بولونیوردی ، بوفعلنک جزای مغویسنی بش اون سنه صوکره چکدی ، اوزمان مفتون ، مبتلا ، سودازده ، هپ اوایدی ، بیکانه ، بارد ایسه ( ناپولئون ) اولدی ، ( ناپولئون ) آرتق نامه لرینی ایتالیا دن یازدقلری کبی : « بیک بوسه ، بوسه آتشین ، سن نه قدر بارد ایسه ک اودرجه آتشین ... » ستمیله بیتیرمه یوردی .

( اوستریا ) ایله ( قامپونورمیو ) معاهده سنی غالبانه عقد ایله دکن ، ( راشتاد ) مؤتمر مخصوصنی تشکیل ایدرک بتون آلمانیا ایله مصالحه یی تأمین ایتدکن صوکره ( بوناپارت ) مظفرانه پارسه دوندی . ایشته اوزمان انکتره ایله قوزی پایلاشمق ایچون مصر سفرینی ، تاهندستانه قدر شرق فتوحاتی قوردی .

( بوناپارت ) ک بوتصوری خیاله بیله صیغمازدی ، اودرجه محال الاجرا ایدی . بو ضرورتله کاملاً قوه دن فعله چیقه مادی . ولو قسماً اولسون ناصل چیقه بیلدی ، متحیر اولماق ممکنیدر ؟

تا اهرامدن عکا پیشگاهنه قدر نسبة جزئی برمدت ایچنده او ده ای حربک او یله بر جولانی خوارقدندر . هله مصرک ساده حالنه دکل ، آتسنه ، عمراننه ، اقبالنه او تأثیر عظیمی مفکره یه وله ویرر .

بو فطرت خارقه یی انسان یالکرز حربده ، میدان هیجاده تماشا ایتمکه اکتفا ایتهملی ، ساحه تنظیم وترقیده کورمکه ده آلیشمیلدر . جهانک هیچ بر فاتحی یوقدرکه ( ناپولئون ) قدر فتح ایتدیکی یرلرده ایز ، عمران ایزی ، تعالی ایزی ، تکمل ، هر نقطه نظر دن ، مادی و معنوی تکمل ایزی براقش اولسون .

(بوناپارت) اوشرق وادیلرنده بوداستان خوارقنی شعشه ایله انشاد ایدر ،  
 بونشیده لرله وطنی ، وطنداش لرینی اوزاقدن اوزاغه وجده کتیریر ، طوریرکن  
 فرانسه ده حکومت کوزدن ، اهمیتدن ، قدرتدن دوشیوردی ، صوره حریت ،  
 مشروطیت دیور ، کیدیور ، حقیقته قراللاک استبدادی تعقیب ایله یوردی ،  
 مطبوعاتی قبضه انقیادینه آلمشدی . سربستی کلامی ، سربستی اجتماعی لغو ایتشدی ،  
 مخالفلرینه نفس آلدیرمایوردی ، آغز آچدیرمایوردی . مرامنه قارشی کلنلری ،  
 حتی خوشنه کیتمینلری برر وسیله ایله زندانلره آتیور ، قلعه لره بند ایدیوردی .  
 فی الحقیقه برحزب قیلدن عبارت ، برشرذمیه مستدایدی ، فقط اودور فترتدن  
 استفاده ایله بتون فرانسه یه حاکمدی . مع مافیه ملت ، هر حاله رغماً بو اداره دن  
 عدم خشنودیسنی آلدن آله کوستریور ، برانقلابه وسیله آریوردی .

(بوناپارت) مصر وادیلرنده ، سوریه چوللرنده اومدیغنی بولامینجه بوسفر  
 امل وعزم اقبالانی نه مملکتنه توجیه ایله دی ، ایلر ایله مزده فرانسه یه دوندی ،  
 لکن ، عرض ایتدیکمز کی ، وطنده احوال داخلیه یی او یله قاریشیق ، امور  
 خارجیه یی ایسه ده ابر بادبولدی ؛ فرانسزاردولری هر جهتن هزیمته اوغرایورلردی .  
 (بوناپارت) اول امرده (۱۸ برومر) حادثه انقلابیه سنی ایقاع ایلدی ،  
 برکون ، برحمله ده ، برضربه ده اومستبد قیرینتیلرینی سوپوردی ، ملتی اوتضیقدن  
 قورتاردی ، داخلی تحت انتظامه صوقدی ، حاکمیتی ، حکومتی اله آلدی ، فقط  
 بوموفقیتی تأمین ، ادامه ایتک ایچون خارجاً مظفریتلر کرکدی .

ایشته بوسائقه ایله درکه بویله فرانسه نك حاکم اولی اولدقن صوکره (بوناپارت)  
 درحال حدوده قوشدی ، اردونك باشنه کچدی .

رفقای حکومتی : « مظفر اولورسه کوکله چیقاریرز . مغلوب دونرسه تدفین  
 ایلرز . » دیورلردی ، اوسردار دلیر ایچون اودرجه بی امان ایدیلر . فقط حریت  
 مظفر اولدی ، نه ظفر ، نه ظفرکه مشعش اولدیغی قدر مؤثر ایدی ، سورکلی ایدی ، بتون  
 فرانسه یی وجده ، استغراقه دوشوردی . (مارنغو) مظفرتی پک غرب برطرزده ، خلاف  
 مأمول وقوعه کلدی . فقط نه بیوک نتیجه لره بادی اولدی . اوستریالیری شمالی ایتالیا دن  
 سوردی ، چیقاردی ، (مورو) ده آلمانیا ده یه اوستریالیره قارشی (هوهنلندن) غالبیتی



قازانجه (ویانه) حکومتی مغلوبانه (لوزویل) مصالحه سنه مجبور اولدی. فرانسرلرینه بریاندن ایتالیا به دال، بوداق صالدیلر، بریاندن ایسه بلجیقایی استرداد ایتدکدن ماعدا (رن) سواحلنه قدر یکیدن تمديد حدود ایلدیلر. بتون بوقتو حاتی اوستریالیله معاهده ایله قبول وتصدیق ایتدیردیلر، بو آراق انکلزله (آمین) معاهده سنی عقد ایله نجه (بوناپارت) اوج اقباله ایردی، کوکلری تسخیر ایتدی، عدولری، عداوتلری صوصدیردی، صیزدیردی، آرتق جمهوریتک او حاکم اولی ایچون برنجی (ناپولیون) عنوانیله ایمپراطورلغنی اعلان ایله مک پک قولای ایدی، بر مدتجک صوکره اوده اولدی.

بودورایچنده فرانسه یالکز خارجا شرفجه، عظمتجه دکل، داخله اداره جه، اصولجه، انتظامجه یوکسلیدی، بوکون بیله بواقلمده حالا حکم سورن بر چوق قانونلرک، مؤسساتک اساسی هپ او دورده، هپ او سردار مظفرک تلقیناتیه، تعلیماتیه قورولدی. اودهانک بوصفحاتی درکه انسان بهت ایله ادراک، ولهله تماشا ایلر. بولوحه غرانک یالکز بر نقطه سیدرکه سینا کدر، الیم برلکه در: بوصیره لرده (ناپولئون) بر لحظه اک مردود بر حرصک، بر غرضک مغلوبی اوله رق (بوربون) خاندانندن برکنجی، بیوک (قونده) نک کوچک حفیدی (دوق دانکن) ی آسایش حکومتی اخلال ایله اتهام ایدرک اجنبی طور اغنده توقیف ایتدیردی، صوری بر محاکمه دن صوکره یکریمی درت ساعت ایچنده ناحق یره قورشونه دیزدیردی. تاریخ بر درلو بو ذلتی او فتح اعظمه عفو ایتدهدی. بوفاجعه ایچون بر فرانسر شاعری دیورکه:

« شان وشرف هر لکهی سیر ، فقط جنایتی سیله من »

ایمپراطور اولدقدن صوکره (ناپولئون) دها پارلاق خارقه لر، دها مدبدب ظفرلر میدانه قویدی، (اوسترلیج) لری، (ایهنا) لری ابداع ایله دی، (نلو) و (فریدلاند) غالبیتلریله روسیه یی، او قوص قوجه چاری ده مرامنه رام ایدنجه، انکاتره مستثنی، بتون اوروپانک بر نوع ناظم عمومیه سی کسلیدی، وقتیه مصره کیدرکن تصور ایتدیکی کوکبه غرای فتوحاته بوسفرده نصب امل ایله دی، بتون بو حرص



دیدیکمز کبی ، آدیله ، صانیله اوبیوک اردوئی تصویردن کچیردی ، برکرده معیتله باقدی ، امرینه منقاد صف صف قرانر ، فرماننه مطیع بیوک بیوک تابعلر کوردی ، زمانک شرق حکمدارلری کبی اویله صوری دکل ، فقط حقیقه برشاهنشام اولدیغنی آکلادی .

( ناپولئون ) ی پک زیاده تجیل ایدن بیوک بر مورخ بومنظره یی قدرته تصویر ایله دکدن صوکره دیورکه :

« من القديم فرانسه یه عداوت ایله پرورده اوله کلن بوایمپراطورلری ، بوقراللری ؛ عصرلردن بری فرانسلره حسدله ، نقرته یاشامش سلاله لک اوعضولرینی ، اوعدو ابن عدو حکمدارلری ، حکمدار زاده لری ، ( فرهدریق ) لک ، ( فردینان ) لک ، ( لئوپولد ) لک بوخلقلرینی برفرانسه حکمدارینک ، اوفرد فریدک - بر فرد فریدک قدرت وعظمت ملیه مزنی بومرتبه یوکسکلره رفع ایتدی ، بتون اوجماعتی زیرپای شالیتمده برمدت پریشان ، متذال طوتدی - اوکنده بویله زبون ، بویله فرمانبر کورمک بروطنپرور ایچون نه کسکین ، نه خارق العاده برذوقدر . »

اوت ، برذوقدر لکن بوجهان فناده :

وکل نعیم لامحاله زائل

اودیده ، اوقدرت ، اوعظمت ده چوق سورمدی . ذاتاً بتون اوکاشانه ظفر واقبال احاطه بشرک فوقنده ایدی ، فقط ینه بر صنع بشر ایدی ، اویله اولدیغنی ایچون طبیعتیه محکوم زوال ایدی .

( بیوک اردو ) روسیه بادیهلرنده . انسانلره غلبه چالدی . لکن طبیعتله ، کرم و سرد طبیعتله چارپیشمغه مجبور اولدی . نهایت ( موسقوا ) محاربه خونینی متعاقب والی عمومی ( روستوپکین ) شهری طرف طرف آتشلره ویرمش ، دشمنی اوقیشده ، اوقیامتده یرسز ، یوردسز براقق ایسته مشدی ، براقدی ، کلی قورتارمق ایچون جزئی فدا ایتدی ، برجنایت ، فقط شانلی برجنایت ایشله دی .

بو آفتدن ، بو فلا کتدن صوکره اوسرداز غالب ، اونا مغلوب اردو زبون دوشدیلر ، روزگارک مقهوری اولدیلر ، مصائبه طایانامادیلر . او بری مبهوت .



مدهوش صولوغی فرانسهده آلمغه مجبور قالدی ، یکسیدن بر اردو تجهیز ایتمه قالدیشدی . بریکنک ایسه باشنه کلهیندر قالمادی ، اوبیوک اردودن کوچک بر آلاي بيله دونمادی .

آرتق بوتاریخدن صوکره ( ناپولئون ) ک حیاتی برادباردر ، برادبار کشفدر . فرانسه یورغون ایدی . ولو مهیج ، مشعشع اولسهده سنه لردن بری بیتمک ، توکنمک بيلمه یین او محاربه لردن ، حتی او آغر ظفر لردن بیقمشدی ، صلح وسکونت ایسته یوردی . بوسبیه مبنی درکه ( ناپولئون ) روسیه دن عودتنده وطنی ، وطنداشلیینی دوشکون ، بزکین بولدی ، مع مافیله شویله بویله یینه بریکی اردو تجهیز ایده بیلدی ، دشمنه قارشی یینه یوریدی .

او ( موسقموا ) رجعتی ، بیوک اردونک اوهریمتی متعاقب گروه اعدا لایعد بر لشکر عزم اولیویرمشدی ، متفقلر ، دوستلر هپ اوطرفه کچمشدی ، بتون آلمانیا بویله خصمانه آیاقلامشدی ، پروسیه درحال ید اتفاقنی روسلره وزاتمشدی . اوستریاییله او قدر مخادنیلله ، صهریتیلله برابر همان اویله یامق اوزره ایدی ، دیدکلی کبی : احبا شیوه یغماده اعدای مهوت ایله مشدی .

( ناپولئون ) ایچون موقع مهلک ، چونکه « دوست بی پروا ، دشمن قوی » ایدی . مع مافیله ، هر حاله رغماً اودها یینه شعشعه غراسنی بر لحظه کوستردی . الحق او قدر مهاجمانه قارشی کلک محال ایدی ، ( اوستریا ) نک واساطیلله ( پراغ ) ده بر مؤتمر عقد اولوندی ، لکن مصالحه ممکن اولمادی ، چونکه متفقلرک مقصودی هرچه باد آباد فرصتدن استفاده ایله اوجهانگیری اورتادن قالدیرمقدی ، فرانسه یی حال قدیمه ارجاع ایتمکدی ، یوقسه اصلاً ( ناپولئون ) ایله مصالحه ، یینه اوسلطتی محافظه ، ادامه ایله مک دکلدی . ذاتاً او ( پراغ ) مؤتمری ده متفقلردن طرفه بر آن اول علناً کچه بيلمک ایچون ( ویانه ) حکومتیجه بروسیه ایدی ، اونیتله تشکیل اولونمشدی .

صلح امید قالمایجه ، ( ناپولئون ) آرتق اوحدهسز ، حسابسز خصم لریله چارپیشمغه مجبور قالدی . ( لیزیک ) ده بیوک بر محاربه اولدی . متفقلر پک قوی ، پک متعدد ایدیلر . روسیه دن ، پروسیه دن ، انکلتره دن ، اوستریادن باشقه ، مثلاً

اسوچ قرالی ( برنادوت )، ( ناپولئون ) ك اورفيق قديمی ، اوسابق فرانسز سرداری ده سوق حرص ایله اونلره اتحاق ایتمشدی ، وطنه قارشى یوریوردی . ( برنادوت ) ك قازیبی و قتیله ( مارسیلیا ) ده اوفاق بر قیز ایكن ( ناپولئون ) ك سودیكى ، حتی نكاحله آلمق ایسته دیكى ، بریاندن ده بالدیزی بر قیدین ایدی ، كرك او و قتلر ، كرك صو كر دلری اوجهانكیرك محبتنه ، لطفنه مظهر اولمشدی ، او یله ایكن بوسفر او بیله ( ناپولئون ) ك ازلیكنی ایسته یوردی .

ینه سابق فرانسز سردار لرندن ( مورو ) ، شهرت مخصوصه سیله ( هو هناندن ) قهرمانی بر زمان قرال طرفدارلریله بر لكده ( ناپولئون ) ه اهانتله اتهام ایدیله رك فرانسه طو پراغدن چیقار لمشدی ، آسریقاده ، منفاده ایدی . بوسفر متفقلر فن حربده او خصم اعظمه فائق بولونمق املیله ( مورو ) یی منافسندن جلب ایتدیله ، آرالینه آلدیلر ، اوده ( ناپولئون ) ه عداوت سائقه سیله وطنك علیهنه یوریدی ، تاریخده نامنی الی الابد لكه لهدی ، بو محاربه ده حاضر ایدی ، متفقلره متصل فرانسز اردوسندن ( ناپولئون ) ك بالذات باشنده بولونمادیفی قوللاره هجومی توصیه ایدیوردی ، فقط بر ككه كلدی ، ( مورو ) نك با جاقلرینی قوپاردی ، كوتوردی ، موتنه بادى اولدی . تاریخك هیچ بر زمان عفو ایتدیكى ، اصلاده ایده میه جكى جایتلردن بری ده كوچك ، بیوك هر كیم ایچون ، مشروع ، غیر مشروع هر نه سببه مبنی اولور سه اولسون ، بر فردك مملكتنه قارشى یوریمسی ، مادر وطنه تعرض ایتسیدر .

بودرجه متعدد ، مدهش اعدایه قارشى فرانسز اردولری ضعیف ، دوشكون ایدی ، بوضعه ، بو دوشكونلكه ساقسونیالیلر كی متفقلرك ، معاونلرك ده اهانتی ، محاربه تماماً قوامنده ایكن ، انضمام ایدنجه آرتق ده ای حربده فائده ویرمدی ، ( ناپولئون ) منهزم اولدی ، انهزامدن انهزامه ، نهایت ( فونته نبلو ) یه قدر چكیله رك متفقین اردولری ده مظفرأ پارسه كیرنجه ، بالخاصه رفقای جهادینك ، ( ماقدونالد ، نهی ، مارمون ) كی سردارلرك ابرامیله استعفاسنی ویردی ، دولترك قرارینه اتباعاً ( الب ) اطه سنه چككدی ، بو عزلته ده جهانندن ، حتی اقرباسندن ، قاریسندن ، انشته سندن ، همشیره سندن اهانت كوردی ، ( ماری لوئیز ) قوجه سنك یانه كیتمك شویله طورسون ، اومعاشقات معروفه فضیحه سنه باشلامق اوزره ایدی .

بوصیر دلر ده یالکز (ناپولئون) ک همشیر دلرندن بری، اک کوزل، اکروچپوری،  
 روماده لطیف بر هیکل مصنعی شوق ایله تماشا ایدیله کلن (پولین بورکهز) جداً  
 مزیت، وفا کارلق کوستردی، یرینی، یوردینی ترک ایله (الب) اطهسنه، قارداشک  
 یاننه قوشدی. وارینی، یوغنی، بتون الماسلرینی اوکا ویردی، بر مدتجک صوکره  
 اوپله مظفرانه، غالبانه فرانسه یه دوزکن بوئروتک اوسردار خارقه پردازه یاردیمی اولدی.  
 یوز کون سورن بوایکنجی سلطنتی (ناپولئون) ک اک صوک برشعشع افعالی،  
 (واترلو) مغلوبیتی ایسه دهای تابدارینک برلعه اخیری ایدی، (سنت هلن) ده  
 کچن حیاتی مماتنه برفاتحه، برنوع مرض متمد موت دیمکدر، اودرجه الیدر.  
 وسعت وعظمتنه مبنی انجق بو طرز ناجیزده خلاصه وتمهید ایدیه بیلدیکم بو ترجمه  
 غرای حیاته بر نتیجه اولق اوزره دیرم که:

بوصاحب دهأ، اعتقادجه، سرور دهاتدر، تمادی زمان ایله بیور، بیور،  
 فقط کوچلمز، فردای انکشافنده عدولرنجه عادی، وحشی، غدار، حریص  
 برصاحب خروج کبی تلقی اولونیوردی، مزایای حقیقیه انسانیهدن معری عد  
 ایدیلوردی. ارتق حق، حقیقی انکارده اودرجه ایلری کیدنلر، اونوری،  
 اوفضلی هیچ تسلیم ایتمهینلر قلمادی.

روسیه چارلرینه وارنجه یه قدر پازسی زیارت ایدنلر کوچک، بیوک، دوست،  
 اولسون، دشمن اولسون، (ناپولئون) ک مرقد محشمنی تماشا ایدرکن عرض  
 حرمت وخشوعه مطلق شتاب ایدیورلر.

تاریخ جهان برچوق دهالرك معرضدر، فقط، قرون سالفه برطرفه طورسون،  
 عجبا قرون اخیره، جامع الکل اولق اعتباریله، بوداهیة دهیانک برمثلی کورده بیلدیمی؟  
 ازمنه متقدمه ده اوچ بیوک سردار ظفر یتیشدی: اسکندر، آنیال، قیصر.  
 بیوک (فرهدریق) ک فکرنجه بودهاتک اک بیوکی (آنیال) در. (ناپولئون) ده  
 اواعتمادده ایدی، ازمنه متأخرده ایسه ینه اوچ دهای حرب توردهدی: تورن،  
 فرهدریق، ناپولئون. بودهالرك اک پارلاخی ده (ناپولئون) دکلی در؟ (ناپولئون) که  
 مبدأ و منتهاجه بیوک (فرهدریق) ی بیله کچمزمی؟ هله آثار و افکارجه بتون  
 اودهات اسلافه تقدم ایتمزمی؟



بو حکمی تتبعات تاریخیه ایله ده‌ها زیاده اوغراشانلر ویرسون . بومصاحبه‌ده  
امل ، اندیشه‌م اولجهدن برموجه ، فقط صاف . حقیقی ، او یله اولدینی ایچوند  
سهولتله ادراک ایدیلیر برموجه عرض ایتکدی . ایده بیلدیمسه ، ( ناپولئون ) ی  
حقائق اخلاق و آمال و آثار یله سزه بر لحظه خاطر لاتدمسه بر بنده‌دها آ کلاتدمسه ،  
خاملر ، افندیلر ،

بکانه موطلیدر ! چونکه ، شو مامن قدسی عرفانده کچیره حکم حیاتک ایلاک  
خطوه اقبالی بوسعی ناچیز مدر . »

( بایدور ) تقریرینی ناصل باشلادیسه ، ینه او یله جه نشاط ایله بتیردی . بتون  
سامعین اوکنج معلمی آلتیشلره بوغدیلر . سلمان بک جهت مسعود ایدی ،  
اولا برشا کرد قدیمک موفقیتینی کوردرک مفتخر ، ثانیاً دارالفنون یکی برخواجه  
قازان دیغندن منبسط اولنوردی . ( فترت ) ده باباسنک سرورینه اشتراک ایله یوردی .  
یالکز ( بایدور ) ک زقییلرندن ، اسکی آرقاداشلرندن ایکی کنج او موفقیتلردن ،  
بو آلتیشلردن عادتاً متأثر اولدیلردی ؛ حتی اوتبریکلرک ، تمیحلرک تمادیسنه قیزارق  
درس‌خانه‌دن ، دارالفنوندن دیشاری بیله فیلا دیلردی . باب عالی جاده‌سنه طوغری  
کیدییورلردی .

یولده اوکنج‌لردن بری اوبرینه دییوردی که :


— فرقه واردک یا ( بایدور ) ک سوزلرنده قهرمان بکک کچن کون ( کامران ) ده  
علمدار مصطفی پاشایه دائر نشر ایله دیکی بر مقاله تاریخیه آلتدن آله اعتراضلر  
واردی . سلیم ثالث ( ناپولئون ) ایله مناسبتنه ، اودورده فرانسه‌نک دولت عثمانیه  
ایله مخادنته دائر بتون اومطالعهلر ( کامران ) ی ضمنی مواخذه دیمکدی . شمدی  
کیدر ، وقعیه‌ی آ کلاتیرز ، قهرمانز یارین جریده‌سندنه آتشین بر مهاجه ایله  
اوشیارلیق ( بایدور ) ه حدینی بیلدیریر . آرتق اووقت ، ایشی ، کوچی یوقسه  
سلمان بک ده شا کرد کزینک امدادینه یتیشسون .

ایکنجی کنجده :

— آه ، شو ( بایدور ) اواطوار عوامپسندانه سیله ، اواوضاع غالبانه سیله اوقدر  
سینیرلریمه طوقونیورکه ، او یله برسله یسه نه‌اعلا اولور . ذاتاً کچن کون کیزلیجه

کود و شد کدی، سوز آزار مرده قالسون، قهرمان بک بو حویبایه هجوم ایچون برفرست  
 آرایور. حتی شمدی دیکله دیکمز مصاحبه تاریخیه سنی هانکی اثرلردن اقتباس ایله  
 یازدغنی بیلدکلرندن بری واسطه سیله تحقیق ایتدیردی، وقتیه یاپدینگی کبی ینه او معلم  
 یاماغنک اتخالترینی میدان قویه جقدی..

دیدي، بوچیرکین حسب حال ایله برپارچه تشفی صدر ایله یه رکدن بوایکی ییچاره  
 (کامران) مطبعه سنه واردیلر، همان تلاش ایله قاپودن ایچری کیره رک باش محررک  
 اوطه سنه طوغری چیقديلر.



## مطبوعات عثمانیه بر پایه

مناك عثمانیه ده مشروطيتك تأسيسله مطبوعات مظهر حریت اوله لیدن بری  
در سعادت غزته لرندن اك زیاده (سلام) رواج بولمشدی . (سلام)ك ترك ، خالص  
آناطولی تركی، فقط استانبولده طوغمش، اولدجه تربیه، تحصیل كورمش، فعال،  
مقدر ، مقتصد وقورناز بر مدیری واردی . اساساً موفقیتی ده بوسایه ده ایدی .  
بوزاتك اسمی تیمور بك، لكن عزمی، اجتهادی ده او قدر متین ایدی.

تیمور بك عمرینی مطبعه سنده ، غزته سنده کچیریر ، دیشاری چیقارسه آنجق  
مطبعه ، غرته ایشلری ایچون چیقار ، اوینه ، چولوغنگ ، چوجغنگ ، یانه بیله  
هفته ده بر، ایکی کره یاکیدر، یاکیتمزدی؛ ایجه یازی یازاردی، باخصوص لفظدن  
زیاده معنایه اهمیت ویریردی، معنی مجلوبی ، لفظ دوشکونی ، لكن یازی صرافی  
ایدی ؛ یازیدن خارق الماده آكلاردی ، خلقی مستفیض ایدن ، رغبت خلقی جلب  
ایله یین نه یولده مقاله لردر ، رعنا بیلیر ، کشف ایدر، او یله یاپه بیلمك ایچون ، حین  
اقتضاده، اك امین واسطه لره مراجعت ایلردی ، بتون بوخصائل مقبوله سایه سنده  
جریده سنك اقبالنی تأمین ایله مشدی، کیتدجده بوفیضی آرتیریوردی.

تیمور بك بوموفقیتلره مهمجه برثروت صاحبی اولمشدی، او یله اولمقله برابر  
آقشام اوستی مطبعه ده ایشنی بیتیردکن، مختصرجه بر یمك یدکن صوکره ایرکندن  
اوطه سنه بر یاتاق سردیریر، طبقی بر معرکده، یامشکل برسفرده ایش کبی طاره  
طار یاتار، فقط اوته دن بری بونوع مشاقه آلیشیق اولدینی ایچون یینه اعلا حورل  
حورل بر اویقو چکردی ؛ دباحلین کونشدن اول وپك دینچ قالقار ، کینیر ،  
ایشنك باشنه چکردی.

بر کون بویله جه او یاندقن صوکره، تیمور بك بر معناد ما کنه اوطه سنه کیتدی،



غزته سنك توزيغنه نظارت ايتدى، على العموم موزعلردن قورنازجه سنه بعض سواللر  
 صورتى؛ فقط باش موزعه اوزون اوزادى يه اوبر غزته لرك، رقيملرك صايتشلىرىنه  
 دائر كوروشدى، (سلام) كينه جمله سنه بوجهتجه پك زياده فائق اولديغنى آكلاينجه  
 كنيش نفس آلمغه باشلادى؛ فقط عادت ايديشدى، بوحقيقتنه رغماً ينه هر كسك،  
 على الخصوص هيئت تحريريه سنك او كنده :

« صايتشمز بر پارچه تنزل ايتمكه باشلادى . بيلمم نه دندره؟ » دير، آرقاداشلرينك  
 غيرتنى آرتيرمق ايستردى.

غزته باصلدقدن، طاغلقدن صوكره تيوربك او طه سنه چككلى، اوراق سائر  
 حوادثى كوزدن كپردى، (كامران) ده قهرمان بكك بر مقاله سنى اوقودى، بيتيرد كدن  
 صوكره بر دها اوقودى، صوكره دوشونمكه باشلادى، نهايت (تله فون) حجره سنه  
 كيتدى، روم ايلي حصارنده سلمان بككه شويلاهجه محاوره يه كيريشدى :

تيور بك — ذات عاليكز سكر، دكلى؟ سلمان بك افندى .

سلمان بك — اوت، سز كيمسكز ؟

— تيمور، (سلام) ك مديرى...

— واى، سز ميسكز؟ تيمور بك، نه وار، نه يوق؟

— (كامران) ك بوكون (بايدور) بكه هجومى كورديكز مى؟ نه قدر حقسز !

باخصوص نه درجه شخصى، باياغى ! . بويلاه بر تجاوزى جوابسز بر اقاملى يز .  
 فكرمجه بوجوابى (بايدور) بك دكل، سز ويرميسكز، شخصياتى، اوقورى  
 تعرضلى براقه رق صرف تاريخدن، معرفندن بحث ايتلميسكز. پك مناسب ومؤثر  
 اولور. سويلاهكه حاجت يوق، (سلام) ك صحيفه لرى سزه دائماً آچيقدر . همده  
 بيلديككز شرائط ايله آچيقدر .

-- فى الواقع (كامران) ك يازدقلى پك آشاغى، مع مافيه (بايدور) ي مدافعه

ايتمكدن زياده بعض حقائق علميه يه خدمت ايله مك ايچون بويحشه دائر سز سويلاه مهن  
 اول بر مقاله يازمق خاطريمه كلى؛ نه ايسه، شمدى وقتم يوق. اوكله دن صوكره  
 مطبعه يه اوغرام، كوزوشيرز، مقاله مى ده كورورسكز. اللهه اصمارلادق ...

تيور بكك مقصدى بر آتيشده ايكي اورمقدى، چونكه اول (كامران) كى

شویله بویله بر رقیق خفیف بر بندینی اویله متین بر طرزده تنقید ایتدیرمک هر حالده اعتبارینی قیرمق ، بر درجه دها رواجنه سخته ویرمکدی ؛ صوکردهده سلمان بکک بویله مهمجه بر موضوعه دائرجدی بر مقالهسنی نشرایله مک (سلام) کی قیمتی آرتیرمقدی .

تیور بک بواشی بویله فصل ایتدکدن صوکرده ، اوطنهسنه چککدی ، ماصهسنک باشنه سکدی ، چالیشمغه باشلادی ، دیرکن قاپودن ایچری والی معزولی بر پاشا کیردی . بوذات برقاچ کون اول (توسیع مأذونیت) مسئلهسنه دائر (سلام) ه بر بند ویرمشدی ، تیور بک بالخاصه پاشانک موقعنه ، شهرتنه حرمة اوبندی درحال نشر ایله مشدی ، فقط نشر ایله دکدن صوکرده او قدر موافق بولمامشدی ، بر اثرده دگری ایچون بویله شبهه دوشونجه همان باب عالییه کیدر ، اکابر مأموریندن قوه تمیزیهسنه اعتماد ایتدیکی بر ایکی ذاتک رأینی هیچ سز دیرمدن استمزاج ایلردی ؛ بوسفرده اویله یامق ایسته مشدی ، انجق بوذاتلر آیری آیری دها تیور بکی کوریر کورمز :  
— عزیزم ، (سلام) ک بوکونکی بندی نه قدر کوشک ! اوپاشایی ده نرهدن بولدیکنز ؛ حریف حقوتدن ، حقوق اداردن کاملاً بی خبر ، فقطینه مرکزیتدن ، عدم مرکزیتدن ، توسیع مأذونیتدن ، مختاریت سیاسیه دن وسائرده دن حارل حارل بحث ایدیور . هانکی دوردهیز ! عنديات و کیفیات ایله علم اولورمی !  
ملاحظه لرینی بسط ایتدیلر .

بومزعج ماجرای خاطرلادیغی ایچون (سلام) ک مدیر بیامانی بو دفعه والی پاشایی عادتاً بارد برصورتده قبول ایتدی . پاشا ایسه ، غالباً طالغینلغندن ، اومعامله نك فرقه وارمادی . جیندن بردسته کاغد چیقارهرق .  
ایشته بر مقاله دها مدیر بک افندی :

دیهه تیور بکه اوزاتدی . اوده نوبران برادا ایله بوکاغلرلی آلدی . شویله اوستون کوری براوقودی . صوکرده آچیقندن آچیغه :  
— پاشا حضرتلری ، بز غزته مزه بویله بندلر قویامایز ، چونکه صائیشمزی دوشوریرز ، خلقم زک ایسته دیکی ، محتاج اولدیغی بونوع یازیلر دکل ، سوزیمه اعتماد بیوریکز .

دیدى . مقاله یی اعاده ایلهدی ، باشقه بویله کوروشمکه باشلادی .  
 زواللی والی پاشا عمر نده بویله درشت بر معامله یه هدف اولمامشدی ، پک بوزولدی .  
 صیقلدی ، نهایت باشقه مسافرلرک کلمرندن استفاده ایدرک اغبرار ایله چکلدی ،  
 کیتدی ؛ لکن تیمور بک او اغبراره فلان اصلا اهمیت ویرمه مشدی ، بوسفر باشقه  
 برینی حاشلا یوردی : نظار سابقه دن بری ( سلام ) ده آرا صیرا بعض علمی ، فلسفی  
 مقاله لر کوندر یوردی ، فی الحقیقه بویازیلر پک بوش دکلدی ، بدرجه یه قدر تدقیق ،  
 تتبع محصولی ایدی .

فقط محررک اول امرده اسلوبی غایت مغلق ، پریشان ایدی ؛ درجه ثانیده  
 انتظام افکاردن ، ترتیدن ، اطرا ددن جهنده خبری یوقدی ؛ بو نقائصه منی او  
 مقاله لر بر درلو رغبت عمومیه مظهر اولمایوردی .

ایشته بوذاتک طبع اولونمق اوزرده یکی بر بندینی کتین اوغلنه تیمور بک هر کسک  
 اوکنده دیوردی که :

— پدریکزه سویله ییکز ، قارئلریمز شکایت ایدیورلر . بز ( سلام ) ده آرتق  
 بوچشید بندلر قویامیز . بر اسلوبده اول باول وضوح کرکدر ؛ پدریکزک اسلوبی  
 ایسه ، دمیربللی کبی در ، اویله چتیندر ، صوکره بر مقاله ترتیب ایله ، بر قاعده یه اتباعا ،  
 منطق دائره سنده قلمه آئینر ، پدریکز بومنطقدن ده بسبتون بی خبردر ، ابتدا وانتها  
 کوزتمدن کلشی کوزل یازیور ، کیدیور . بویله اولماز ، بز بو غزته یی بو حاله  
 کتیرنجیه قدر نلر چکدک !

حاصلی ، تیمور بک بویله مسائل جدیدده خاطر ، کوکل بیلمزدی . حقیقتی کیمه  
 قارشى اولورسه اولسون ، بی پروا سوبلر ، کیدردی .

( کامران ) بر غزته ایدی که ( سلام ) دن بسبتون باشقه برمسئلکده ایدی ،  
 ابتدالری ایجه بر رواجه مالک اولدی ، چونکه برچوق مسائل مهمده بر صنف  
 عوام خلقک ، سویه ادراکنه کوره اداره افکار ایدر ، الک بیاغی احتراصاته آلت  
 کسلمکدن چکنمزدی ؛ کاد قوتمزدن ، بری و بحری قوتمزدن غلوا یله بحث ایلر ،  
 اورویایه ، اوروپالیرله عادتاً میدان او قوردی . کاده سیاست بین الدولی املنه ، کیفه  
 کوره آلت اوست ایدر . برکون انکلیزلری ، فرانسیزلری باطیریر ، آلمانلری چیقاریر ،



بر کون ددوانلری بر طرفه براقه رق موسقو فلر دمیله قدر واریردی. اقتصاد، سیاسیات، حقوق، نه اولورسه اولسون، هر مسئله یی، هر حادثه یی او یله موضوعات علمییه و فیه یه استناداً دکل، فقط اجتهاد مخصوصنه کوره کلیشی کوزل فصل ایلردی.

تحفدر، شرائط وضعیت حاضره مزه مبنی، او بر حقائق بزه آجی کلدیکی ایچون بوباطلر بر چوغمزك اوکجه لری خوشنه کیدردی، فقط کیتدکجه، حقیقت واضحاً تجلی ایتمکه باشلادی، بوفویاده ناچار میدا، چیقدی، اوزمان (کامران) ایجه اعتباردن، ضروری، دوشدی.

بو غزته نك برمدیری، باش محردی قهرمان بك وار ایدی که شوتصویر ایتدیکمز مسلکك عادتاً موجدی ایدی؛ بو ذات فی الحقیقه سنأ اللی یی کچمشدی، فقط فکراً، عرفاناً حالا چوجقدی. جدی بر تحصیل کورمه مش، حقائق شئونی هیچ بر زمان آکلامامشدی؛ آرتق، او یاشدن صوکره، کورده مز، آکلایامازدی ده. ذاتاً حادثاتك یاردیمیه بیوک بر شهرت عامیانه قازانمشدی؛ هر نقطه نظر دن، مادی و معنوی، معاش و شرف اعتباریله مهمجه بر موقع ایدینمشدی؛ او یله بر کلفتدن مستغنی ایدی، مع مافیه پك او قدر بوشده دکلدی، حیرفاً، هله نحو آخطیئه دار، دوشوک، فقط قولای اوقونور، قولای آکلایلیر، هر حالده آز، چوق مزایای بدیع و بیانی حائر بر اسلوبه مالک ایدی، بواسلوب ایله، او عامیانه افکار ایله، کاه کیریدایشنی، طرابلس غرب مسئله سنی، کادر و ملری، کاه بلغارلری، بعضاً آرناتودلری بیهاله آله رق خیاله صیغماز خلطیاتی یازاردی، فقط احتراصات عوامی اوقشامغه کوزلجه موفق اولوردی.

فی الحقیقه بو چشید یازیلرک نتیجه المی خارجاً قدر عرفان عثمانی یی تنزیل ایله مک، داخلاً بعض بچاره لریمزك فکر صافنی ناروا یرد افساد ایتمک، حتی زهرله مک ایدی اما اون نتیجه یی ادراک ایلنلریمز نه قدر آز ایدی. ایچمزده حقایق شئونك غوامضنی کشف ایدنلریمز یوزده قاچ نسبتنده در!

قهرمان بك بو خصیصه لر دن باشقه خویله ده، یاخود خویسر لقلرده مالک ایدی. اوسه ولت افاده سیله کوچك، بیوک هر کیمه اولورسه اولسون، کیف مایشاء تجاوز ایلردی. بعضاً بو وادیده کمی آزی به آله رق او یله ایلری کیدردی که مخاصملرینك نه آلاقلقلرینی، نه رذیللکلرینی، نه جانیلکلرینی براقیردی.

مملکتده مبارزه اصولی، اواصول ایله فصل دعوی ایله مک غادتی یوقدی؛ سربستی، مطبوعات هنوز قانون نامنه تحف تحف تجلیاته تابعدی، کلیشی کوزل علی یه ملایمدی، ولی یه بی امان ایدی. قهرمان بک فطرتنده، خصلتده یارادیلانلر، وضعیتده بولنلر بوحالندن، بوفرستدن طبیعی استفاده ایدیورلردی.

ایشته بوقهرمان بک بوسفر (ناپولئون) د دائر اومصاحبه تاریخیه مناسبتیه (بایدور) ی قلمنه طولادی. تپه دن طیرناغه قدر خیر پالادی، فی الحقیقه اومصاحبه نك نه موضوعندن، حتی نه تاریخندن، نه ده غوامض تاریخیه دن بحث ایله دی، ذاتاً ایله یه مزیدی؛ اوعر نندن بیله محروم ایدی، فقط (بایدور) هانکی اثر لره مراجعت ایدر کدن او تقریری قلمه آلدیغنی سویله دی، حتی بعض جمله لرك، عبارت لرك فرانسز جه دن حرفیاً اصلارینی کوستردی، نهایت شوتعرض لره قدر واردی:

« ایشته مقتبسانك بونوعنه اتحصال، ده ا واضح بر تعبیر ایله سرقت دیرلر. چونکه بویله بر ذاتی قبوله تنزل ایتمه یین بر محرر بونوع تألیفاتده مأخذلرینی سویلر، ترجمه لرك متشائی عرض ایلر، بویله جه قارئلرینی بحق مستفیض، حقائقه جداً آگاه ایدر. منتحللر، سارقلر، بوچشید فضا حتلری ارتکاب ایدنلر ایسه بومورخ طاسلا غناک یاپدینی کی یاپارلر. »

« بیلم هانکی ترك شاعری، سرقت شعر ایدنك دیلنی کسمك لازمدر، دیمش. بزاو قدر ایلری کیتمك ایسته منه یز. ایشته ماهیت و مزیتلری میدانده ایکن ناموس حقیقی، عرفان جدی اصحابی تحقیر یلته نن بوشارلاتانلرك قلملرینی پارچه پارچه ایدرک اغزلارینه طیماق کافیدر، صابیرز؛ چونکه اوزمان مطبوعات عثمانیه برنبده فراخ نفس آلیر، بوتعفتادن، بوافسادادن، بوتلویثادن قورتولور. »

« بلکه اصلاح نفس ایدرده آتیده سیئاتندن تصفی اینر دییه - سوزم یابانه - بومورخك حیات خصوصیه و سیاسیه سنه دائر بیلدکلریمزی ترجها، تأدباً سویله میورز، فقط قورقارز که بوکیدیشه اوچیرکین حقائق ده اورتایه دو مکده مضطر قاله جغز. »

قهرمان بک بوانتقاد غریبی، بوتجاوز شدیدی بالطبع جهله ناسه بر معتاد تأثیر ایتدی: « قوجه حریف! اما یازمش ها، بایدوری برباد ایله مش! » دینلر چوق اولدی؛ فقط عارف اولانلر بتون او سوزلرك بوشلغنی، علی الخصوص

چیرکیندنکنی در حال ادراک ایلهدیلر. شوقدرکه بویله دوشونسلر اقلیت ایدی، اکثریت او بر طرفده ایدی. بویله اولدینگی ایچونده اوتعرض انتشار ایتدیکی کون روم ایلی حصارندن کوپرییه کلیرکن واپورده همان بتون یولجیلر بر قضایه اوغرایاناره، بر قباحه ایشلهینلره ناصل نیمرحیمانه، نیم غضوبانه بر نظارله باقارلرسه (بایدور) دهده اویله باقیورلردی، اوزواللی ده فی الحقیقه مهم ایمش کی مضطرب، متأثر ایدی. ساده فترت، صمد، بتون اویله منور کنجیلر نه اوخلقک بو حسیاتی، نهده بایدورک شو تأثراتی اکلایورلردی.

بو حالی مرصاد عبرتدن تماشا ایدن سلمان بك دیدی که :

— فترت، بیلمم، شیخ کامل افندی سکا کوستردیمی؟ ادیب معرینک شو ایکی بیتی کرک بوخلقک، کرک (بایدور) ک حالت روحیه لرینی متقابلاً نه کوزل تفسیر ایلر :

فلما رأيت الجهل في الناس فاشياً  
تجاهلت حتى ظن اني جاهل !  
نوا عجباً كم يدعي الفضل ناقص !  
نوا اسفاً كم يظهر النقص فاضل !

فقط بر کون صوکرده سلمان بکک (سلام) ده بو مناقشهیه دائر نشر ایلهدیکی بند آتی حقیقتی واضحاً اورتایه قویدی، افکار عامه یی ده کوزلجه ایقاظ، تعدیل ایلهدی: «کنج بر مورخیز، (بایدور) بك سکن کون دار الفنون عثمانیده کزیده بر جمعیت ایچنده بیوک (ناپولئون) ک خلاصه حیاتی لطیف بر مصاحبه طرزنده بسط ایلهدی. بو مصاحبه ساده لطیف دکل، مؤثر ایدی، مفید ایدی؛ بتون سامعینی محفوظ ایتدی، مستفیض ایتدی. نیچون: چونکه اول (بایدور) بك تزیه بر ائادهیه، ساده اولدینگی قدر صحیح بر اسلوبه، مونس، حتی مهیج بر طور بیانه مالکدر. ثانیاً موضوعی وسعتله احاطه، وقوف ایلهم مدار بحث ایلهور، بنابرین باشقه لرینه ده اویله جه بیلدیریور، آکلاتیور.

(ناپولئون) ک حیاتی باشدن باشه برجهاندیر، بر محیط فسحت آرادر، بو جهانی، بو محیطی اویله بر زمینده، بر زمان محدود ایچنده مجتلاً عرض ایده بیلیمک،



لكن ديديكمنز كې مفيد، مؤثر برطرزده عرض ايدە بيلمك بيوك برمهارة متوقف ايدى . ايسته اوكنج استاد بوموفقيته مظهر اولدى . هر حالده شايدان تبريكدر . بو موفقيتك غوامضنى آراشديرمق ايسترسەك ابتدائى امرده كوريرز كه (بايدور) بك سادە (ناپولئون) ك حياتنه دكل، فرانسه تاريخنه مكملاً واقفدر، حتى يالكز فرانسه تاريخنده دكل، عموميتله تاريخه بحق آشنادر: مثلاً (ناپولئون) تورهديكى وقت فرانسه نه حالتده، نه وضعيتده ايدى ؟ انقلاب كيرك نتيجهلرى ا كثریتله نه ظلمتلره اوغرامشدى ؟ بردور دهشت اختلال اورتالنى ياقشدى ، قاوورمشدى . فقط اودورى تعقيب ايدن حكومتلرده بعضاً درد ارتجاع ايله معلول، دائماً مشوش، مظلمدى ، بتون فرانسه، نه اولورسه اولسون ، بوكشمكشاردن قورتولمق ايسته يوردى ، عادتا برمنجى بلكه يوردى .

ايسته (بايدور) بك فرانسه تاريخنه تعلق ايدن بو حقائق مجملأ ، فقط واضحاً تمهيد ايله يور . مع مافيه او قدرلده قالمايور ، تاريخ سياسيات عموميه يده حادئ تدقيقدن كيرهك بالفرض اوجهانكيرك دولت عثمانيه قارشى ضميرينى ، سياست شرقيه سنى نه موقوف بر صورتده بسط ايدى يور ، ايسته كلنجه عثمانيلره خير خواه ، كله نجه بدخواه اولديغنى نه صراحة كوسترييور . ابتدائى شبابنده ، دورمنكوييتنده نه سائقه ايله ، نه اندیشه اقبال ايله خدمت عثمانيه كيرمك ايسته ديكنى ، فقط او حرصنى ملككندە تسكينه موفق اولونجه آرتق عثمانيلينى بسبتون اونوتقدن ماعدا بر مدت صوكره معر سفرينه نه امل ايله كيريشديكنى ، اوصيره لرده بلا سبب ، بى پروا بزه قارشى ناصل اعلان خصومه قالميشديغنى نه درجه ايجاز ايله ايضاح ايله يور ، نهايت ، ( ۸۱۰۷ ) ده (تيلزيت) ده ، دها صوكره (ارفورت) ده روسيه چارى ايله بولوشنجه ، باريشنجه ، فصل دعوى ايدنجه همان دولت عثمانيه يى او خصم اكبريمزه فدا ايتمكه بيله ازادن مهيا اولديغنى نه مدللأ سويله يور . . .

سويله يور ، فقط (كامران) ك - علمدار مصطفى پاشا - عنوانيله اخيراً نشر ايله ديكي بر بندده :

« سلطان سليم ثالثك دور سلطنتنده فرانسه دولتى ايله عظيم بر محادثه تجارى ايدى ، (ناپولئون بوناپارت) روسيه قارشى كندى عاقبت مدهده سنى انتاج ايدن اومشهور موسقوه سفرينى آچق صيره لرده ايكن روسيه ليرده دولت عليه فرانسه ليه معاونت ايدر

خکریله حکومت عثمانیه نك حدود استحكاماتی احتیاطاً الله بولندیرمق ایچون بقتة حدودی تجاوز ایدرك بندر و خوتین قلعه لرینی استیلا ایله حقوق دولی پائمال ایده جك بر صورتده اتلان حرب ایله دیلر . دولت بالطبع سفره مجبور اوله رق حدوده بر اردو کوندردی . روسجق یارانی نامیاله معروف اولان ذوات و علمدار مصطفی پاشا بوردوده موجود ایدی . . . مطالعة سقیمه لری کبی حسابسز خطالرینی ضمناً کوستردرك بر تعیر عامیانه ایله ، بالطه نی طاشه اورییور . فی الحقیقه تاریخه پك جزئی وقوفی اولانلر بیله یویله برقاج سطرده اودرجه خطیأت تاریخیه یی زور جمع ایدرلر :

( ناپولئون ) ک سلیم ثالثه ، دولت عثمانیه یه قارشی اساس مخادتی ابتدادن انتهایه نه ایدی ؟ ( تیلزیت ) ده ، حتی ( ارفورت ) ده آلتدن آلتیه برنجی ( آلكساندر ) ایله سلطنت عثمانیه ایچون دوشوندکلی نهلر ، نه دولابلر ایدی ؟ کوردك . هاییدی ( کامران ) ی یازانلردن بودرجه حقائق سیاسیة بکله مک عبث اولسون . فقط بوذاتلر دهایلیمه یورلرکه ( ناپولئون ) مشهور ( موسقووا ) سفرینی ( ۱۸۱۲ ) اواخرنده آچدی . روسلر ایسه ( بندر ) و ( خوتین ) قلعه لرینی ( ۱۸۰۶ ) ده ضبط ایله دیلر ، برسنه صوکره ( ناپولئون ) ، عرض ایتدی کمز کبی ، ( نیلزیت ) ده چار ایله اوزلاشنجه بزده روسیه ایله بر متارکه عقد ایله دك ، فقط یینه بالخاصه ( ناپولئون ) ک بزده قارشی وئاسزلنی ، پیانسلنی سائقه سیله بو متارکه مصالحه یه منجر اولمادی ، ذاناً چوقده دوام ایله مدی . ( ۱۸۰۸ ) ده یکیدن موسقوف ایله محاربه یه طوتوشدق ، اوزمان ایسه علمدار مصطفی پاشا استانبوله ککشدی ، غزای معروفنی یامشدی ، حتی شهید بیله اولمشدی . علمدارك ظهوری ، قتلی ، سلیم ثالث خلعی ، شهادتی هپ روسیه ایله شو عرض ایتدی کمز متارکه زمانه تقابل ایلر . حتی ( ناپولئون ) ده موسقووا سفرینه کیریشمه دن ، ( ۱۸۱۱ ) ده بز موسقوفلرله ( بکرش ) مصالحه سنی عقد ایله دکدی . برمدت صوکره ( موسقووا ) هائله سنی متعاقب منهزماً رجعت ایدن فرانسه اردوسنی ( نیه من ) دن جکر کن ک فنا صورتده خیرپالایان بزمله مصالحه تقرر ایتدیکی ایچون آرتق احوالی یه دونن موسقوف کتیه لری اولدی . ایشته اوسردار جهانگیرده بیچاره صاف ترکله ره قارشی حقیقتسز لکنک جزاسنی بوضورتله بولدی .

( تیلزیت ) معاهده سنی متعاقب روسیه ایله متارکه واقعه مزنی مصالحه یه تحویل

ایچون فرانسه‌ده کی سفیریمز محب افندی مرخص تعیین اولونمیشدی ، ( ناپولئون )  
 ظاهرده سلیم ثالث خلعتی وسیله اتخا ایدرک ، حقیقته برنجی ( آکساندر )  
 ایله شرقه دائر باشقه درلو اویوشدینی ایچون بو مصالحه دلاله بیله ایتدی ،  
 روسلرله بزینه باش باشه قالدق ، ینه چارپیشدق ، ینه مغلوب اولدق . نهایت ، عرض  
 ایتدیکمز کی بکرش معاهده‌سنی عقد ایله دک .

ایشته ( کامران ) محررلری بتون بو غوامض تاریخیه دن کاملاً بی خبردرلر ،  
 او یله اولدینی ایچون ده بر علمدارک حیاتی ، محدود ، مختصر بر صفحه تاریخی  
 عرض ایدرکن خطا ایچنده خطا ایدیورلر . حال بوکه ( بایدور ) بک ( ناپولئون )  
 کی بر جهانگیرک ترجمه حالی ، او یله بر فصل محتشمی بر چوق حقائقه بسط  
 ایتدی ، ایتدی ده بوچشید بریا کلش اولسون یامادی ، نه دندر ؛ بوسوآلک جوابی  
 ینه ( کامران ) محررینک ( بایدور ) بکه قارش موأخذملرنده ، مهاجمه لرنده  
 بولورز :

او کنج مورخ بتون او مصاحبه تاریخیه سنی مخدرات مختلفه دن آیری آیری  
 تتبع ایله ، ( کامران ) ک تعیرینه کوره اتحال ایله وجوده کتیدی . اساساً تاریخه  
 جداً واقف اولدینی ایچون بو تتبعاتنده اصلا مشکلاته او غرامادی . اصلا خلطیاتده  
 بولونمادی ، یوقسه او وقوفه مالک اولمایه ایدی ، اولاً او مأخذلری او یله احاطه  
 ایله الده ایده مزدی ، ثانیاً ده الده ایتسه بیله بویله مفید ، مسعود بر صورتده پیش  
 تدقیقه آله مازدی . حاصلی ، ( کامران ) ک علمدار مصطفی پاشا بندنده یاپدینی  
 کی قفا ، کوز یازارقدن ، وقایعی آلت ، اوست ایدرکدن یاپاردی .

مع مافیه دییه مهیز که ( بایدور ) بکک او مفید ، مفرح مصاحبه لری بسبتون  
 نقائصدن بریدر ، حقیقه شرائط علمیه موافقدر . یوق ، او کنج استادک هنوز  
 بر چوق نقیصه لری ، بو مصاحبه ده بیله ، یوقاریده عرض ایتدیکمز مزایا ایله  
 برابر ، ایجه قصورلری وار : مثلاً بتون او تصویرلر ، تصورلر پک عمومیدر ،  
 عمومیاته منحصردر ، وثائقه او درجه تماس ایله مز ، طبقی بر منظره نک اعماقی .  
 نکته لرنی اهامال ایدرک سطحی ، هیئت عمومیه سنی عرض ایدن بر لوحیه بکزر .  
 بویله بر لوحه نه قدر لطیف اولورسه اولسون ، بالخاصه ، صحنه تاریخده ناقصدر .



بالفرض (بایدور) بك تا چو جقلقدن اعتباراً (ناپولئون) ك اخلاقی ، اطواری  
تعریف ایله یور ، فقط بك مختصر ، بك صوری بر طرزده تعریف ایله یور ، بتون  
کریز کاهلریله میدانله حیقارده مایور : خواجه لرینك شهادت لریله ثابتدرکه او کنج  
( بوناپارت ) صوك درجه معند ، متغلب ایدی ، آمرلكی سوردی .

بركون مكتب مدیری اوکا :

— افندی ، سز کیمسکز که بکا بویه جواب ویریورسکز :

دیمشدی ، اوده :

— بر انسان ! مدیر افندی .

دییه مقابله ایتشدی ، ینه بالذات ( بوناپارت ) درکه بو حیات صباوتی بالا آخره  
حکایه ایدرکن :

— بنی هیچ برشی اورکوتمه یوردی ، هیچ بر کیمسه قورقوتما یوردی ،  
آرقاداشلرمدن کیمنی دوکیوردم ، کیمنک یوزینی ، کوزینی طیرمالا یوردم ، حاصلی  
هرکی ییلدیریوردم .

دیورددی . مكتب اغدادیده ایسه کندی عالنده یاشایوردی ، رفقاسندن  
هیچ بری ایله تکلیف سزله شمه یوردی ، قهوه یه حیقمایوردی . صوك درجه تصرفه  
رعایت ایله یوردی ، البسه سنی بیله بالذات سوپوریورددی .

ایشته بو نوع منقبه لری ذکر ایدرک (بایدور) بك ( بوناپارت ) ك چو جقلغنی ،  
کنجلكنی اخلاق ، طبیعت نقطه نظرندن دها عیاناً کوسترملیدی . مثلاً ینه  
اوبکزی صولوق ، حتی او برنبذه جیلز کنج دکلای ایدی که بتون شو عرض ایتدیکمز  
خویسنزلقلریله برابر غایت چالیشقان ایدی . ریاضیاتی بك سوردی ، چوق او قوردی ،  
حتی یازاردی ، ( قورنه ی ) لری ، ( راسین ) لری سوه سوه تتبع ایدردی . فقط  
( وولتهر ) ی ده تعمیق ایتدکجه سوردی ، هله ( روصو ) ی ، شرائط اجتماعیه ی  
الذن برامقازدی . بو سائته ایله مفرطانه جمهوریت طرفداری اولمشدی ، بوافکار  
افراطی ساده او قودقلرنده دکل ، یازدقلرنده بیله کوستریورددی . بو تاریخدن  
اون ، اون بش سنه صوکره رئیس حکومت ، ایمپراطور ، حاصلی مطلق بر مستبد  
اولدینی وقت بواحرصات شبانی خاطرلادی ایسه ، هیچ شبهه یوق مبهوت ، متفکر :

نه قدر بکنزه منامشم بکا بن !

دیمشدر .

بو عمر مهيجك بودقيق صفحه لريدركه اك زياده عبرته شاياندر . (بايدور) بك  
اطنايه دوشمه دن بودقائقي بزه مجملأً كوستره بيليردى .  
كنج مورخز ( ناپولئون ) ك مصر دن عودتنده ( ۱۸ رومر ) ضربه سيلاه  
حكومتى يد غصبنه آلمسنى معذور كوسترمك ايچون جمهوريتك اوزمان فرانسه ده  
نهدركه استبداده دوشديكى واقعا بك حقيقى ، بك مؤثر برطرزده بسط ايله يور ،  
فقط بالاخره ( ناپولئون ) ك عين استبداده بتون او اسلافه رجعت اوقوتديغنى  
درجه كفايه ده كوسترمه يور .

بوصاحب خروجك زمان حكومتنده انقلاب كييرك وضع ايتديكى حريتلهپ  
الغا اولوندى ؛ موسوس ، مدهش ، بى امان برضايطه هيچ بر كيمسه ده قدرت مخالفت ،  
انديشه استقلال بر اقادى ، حق اجتماع سوپورلدى ، انجق اوده سياستدن بحث  
ايمه مك شرطيله ، يكرمى كشي قدر بر آرايه طوپلانه بيليرلردى ، فضله دكل . ضبطيه  
نظارتنده مطبوعاتى تفتيش ايمك اوزره بر قلم تأسيس ايدلدى . حریت مطبوعاتدن  
آرتق اثر قالمامشدى . ده ( ۱۸۰۰ ) ده ، ( ناپولئون ) ك ابتدای حاكيتنده  
غزته لك عددى اون اوچه اينديرلدى . ( ۱۸۱۰ ) ده ايسه ، آرتق بتون ولايتلر  
ايچون بر ، پارس ايچون ده انجق درت غزته موجود ايدى . فضله اوله رق ده بواوراق  
حوادثك مديرلرني حكومت تعيين ايدىوردى ، مندرجاتى قبل الطبع تفتيش  
ايله يوردى . كتابلرده غزته لر قدر تحت تضيقده ايدى . اك بيوك مؤفلر نفى  
اولونيوردى : ( شاتوبريان ) كى ، مادام ( استائل ) كى . حریت كلام ، حریت  
شخصيه مفقود ايدى . ( ناپولئون ) بعضاً بالذات ضبطيه ناظرينه شهر ك قهوه خانه لرني  
نظر تفتيشدن دور طوتامسنى تنيه ايمكه قدر وارييوردى ، چونكه اويرلرده  
حكومت موجوده نك عليهنده آلتدن آلت سوزلر سويله نيوردى .

ايشته ( بايدور ) بك فى الحقيقه ( ناپولئون ) سلطنتك شعشعلريني كماليله كوسترييور ،  
اوصاحب دهانك فتوحاتدن تنظيماته قدر خدمتلريني اطرا ايله يور ، پايدى قانونلرى

بحق تجیل ایدیور؛ اوت، بحق. چونکه بالذات (ناپولئون) خاتمہ حیاتنه طوغری (سنت نالن) ده حرفیاً شوسوزلری سویله مشدر:

« بنم ایچون شان حقیقی او یله قرق محاربه قازانمش اولمق دکلدر، بتون بوظفرلرک خاطر سنی (واترلو) سیله بیلیر، فقط جهانده کیمسه نک سیله مه یه جکی بنم قانون مدنیدرکه، هیچ شبهه یوق، الی الابد یاشار.. »

حقیقت، شمدی یه قدر زمان بو حکمی تأیید ایلهدی. فقط مورخلرکه دوشن، بو محتسم مادالیه نک بویله ساده یوزینی تصویر ایلهمک دکل، بلکه ترسنی ده تعریف ایتکدر. یوقسه (ناپولئون)، (ناپولئون) ک سلطنتی صرف (بایدور) بکک توصیف ایتدیکی کبی اولسهیدی، او یله (موسقووا) رجعتی متعاقب همان همان قاشله کوز آراسنده کومبور کومبور ییقیلیویریر میدی؟ نه اولورسه اولسون، بودور اخیر تمدنه، آرتق بتون اوانقلابلرک تجلیسندن، افکارک ترقیسندن صوکره عالمده براداره مستبده اصلاً پایدار اوله ماز.

(ناپولئون) ده ساده فرانسه دکل، اکثریتله آلمانیا، بلجیقا، اسویچره، هولاندا، ایتالیا، اسپانیا، هپ منقاد ایدی. فقط هپ زور زورینه، هپ کرهه منقاد ایدی، وقتا که روسیه بادره لرنده اوقدرت عظمی بر لحظه سکتیه اوغرادی، در حال بتون بوتابعلر باش قالدیردیلر، مطیع ایکن برر برر عاصی اولیویردیلر. ایشته قهرایله، استبدادایله حکومت، حاکمیت بویله سوزشناک نتیجه لر ویریر.

(ناپولئون) ک بردردی بو استبداد ایدی؛ بردرد دیکری ایسه سیاست عالمه، بالخاصه اوروپا سیاسته، اوسطوت دهایه رغماً، نقصان وقوف ایدی. دولتر ایچون جهانده قوت قدر، بلکهده قوتدن زیاده سیاستک، تدیرک لزومی واردر. دولت اولورکه صرف سیاستله، تدیر ایله ادامه حیات ایلر، ایله یه بیلیر. ینه دولت اولورکه هم تدیر ایله، سیاستله، همده قدرته، سلطنتله شانی، موقعی محافظه ایدر. لکن دولت اوله مازکه، نه قدر معظم اولورسه اولسون، صرف قوتله یاشاسون، حکمی الی نهایته سورسون. ایشته (ناپولئون) بیله اواخره دهاسیله برابر بو محالی ممکن قیله مادی، دائماً بر قدرت عظمایه مالک ایدی، فقط سیاستجه ینه ضعیف



ایدی، داخلی، باخصوص خارجاً ضعیف ایدی. داخلی نهدن ضعیف ایدی؛ عرض ایتدک. فقط خارجاً اوجهانگیر ادراک ایده میوردی که فرانسه ایچون اوایل قبدن طاشمق، بریاندن ایتالیایی، اسپانیایی استیلا ایتدک، بریاندن ایسه تا (هولاند) به، (اسکو) وادیسنه، آلمانیانک کوبکنه قدر یاییلمق صورة مهیب، فقط اساساً چوروك، جدی بر صدمه ده انهدامه درحال منهمك بر بنسا قورمق دیتك ایدی.

اولاً، انکلتزه انکلتزه اولدقجه بویله بر رقیبک، بر فرانسه نك موجودیتیه راضی اوله مازدی، هرانکایز کوملکنه وارنجهیه قدر صاتار، ینه دولتی اوفرانسه یه محارب کورمك ایستردی. ثانیاً، آلمانر، اسپانیولر، بلجیقایلر، هولاندایلر هپ برر قومیت، حریت ملیه یه جان آتار برر قومیت ایدیلر؛ بوملتلری جبرایله، طول مدت ربقة انقیادده طوتمق آصمقلا، کسمکله ده اولسه ممکن دکلدی. محول ایدی؛ ثالثاً، انکلتزه سندن روسیه سنه قدر بتون دول معظمه نك متفقاً ایلک فرصتده اومعظم، اومظفر، اوجهانه مستولی فرانسه یی حال قدیمه ارجاع ایتدک قالدیشملری پك ضروری ایدی.

(ناپولئون) لك (تالهیران) کی دورین مستشارلری او کاشانه سلطنتک بوچوردوکلکلرینی رعنا کوریورلردی. ده (۱۸۰۹) ده، (ارفورت) ده ایدی که (تالهیران) روسیه چارینه:

— هیچ سزك ایچون (ناپولئون) ایله عقد وفاق ایله مات اولورمی؛ بو آدمت سلطنتی سورسه سورسه بر ایکی سنه ده یا سورر، یاسورمز.

دیوردی، کندی تعبیرنجه بر «حساب معقول» ایله آتی نجاتی حاضر لایور، افندیسندن ده او زمان، (موسقووا) لری، (لینزیغ) لری، (واترلو) لری بکله مه دن آریلیوردی.

فی الحقیقه بر مستشار مؤتمنی اولمق اقتضا ایتدیکی ایچون بویله بر حرکت اساساً چرکیندر، حتی بر فرانسر مورخنک حکمنه کوره او «حساب معقول» ه تاریخ خو غریدن طوغری یه اهانت نامنی ویریر، او یله دره فقط، مع الاسف جهانک دها ب سیاسیونی هیچ بر زمان بونوع شائبه لردن منزله اولمادیلر، حتی نتیجه ده اصابت ایله.

موفقیت به بوقصور لرینی اونو تدیریور ، عفو ایتدیریور لر بیه . ایشه ( تالهیران )  
ایچون ده بویه اولدی .

حاصلی ، ( بسمارق ) یدده ( سادووا ) لردن ، ( سه دان ) لردن کچهرک  
( ورسای ) ده قدر کتیرن ، بوقوص قوجه آلمانیا یی ابداعه موفق ایدن ( رون ) لرك .  
( مولک ) لرك حاضر لادقلری اردو ایلده ، قوتله ، او واسطه ایلده برابر ، بلکه اوندن  
زیاده او ( تالهیران ) واری تدیرلر ، سیاستلر ، اویله حساب معقوللر ، حتی  
اهانتلردر .

( بایدور ) بك یوقاریده عرض ایتدیکمز کی ، تدقیقاتی ده زیاده تعمیق  
ایدیدی ده مثلاً ده جنرال ایکن اوستریا ایلده عقد ایلهدیکی ( قامپو فورمبو )  
معاهده سندن ( موسقووا ) رجعتی متعاقب انعقاد ایدن ( پراغ ) مؤتمینه کلنجهیه  
قدر ( ناپولئون ) ک دول معظمه ایلده مذاکره لرینی ، مناقشه لرینی بر نبذه ده ایضاح  
ایله سیدی بتون بولدنیا تی بولور ، کوریر ، کوستیردی .

رفیقمز بو حقائقدن یالکز شو مسئله یی ایچه تشریح ایله یور : بعض مورخنلر  
( پراغ ) ده اوروپا ایلده اویوشمادیغی ایچون بیچاره ( ناپولئون ) ی موأخذه ایدرلر ؛  
فی الحقیقه او زمان فرانسه ایچون ، فرانسه ایمپراطوری ایچون عقللیق بش اشاغی ، اون  
یوقاری اوروپا دولترینه ایسته دکلرینی ویرمک ، محاربه یه خاتمه چکمکدی ، چونکه آرتق  
فرانسزلرده او اتفاق مهیه قارشی کله بیلیمک ایچون طاقت یوقدی ، ( ناپولئون ) ک  
اضمحلالی محقق ایدی . فی الحقیقه ده بویه اولدی .

( بایدور ) بک دیدیکی کی ، ظواهره اعتبار ایدیلیرسه بو موأخذه طوغریدر ،  
فقت حقیقته ( پراغ ) ده دولترلره اوزلاشمق ( ناپولئون ) ایچون محال ایدی ،  
چونکه بو مؤتمر اساساً صلیحه دکل ، تمادی حربه بر زمین حاضر لاق ، متفکرلکدن  
مخاصله کچ بیلیمک ایچون ( مترنخ ) ک ایجاد ایلهدیکی بر خدعه ایدی ، اوروپانک  
مقصدی ( ناپولئون ) ی اورتادن قالدیردق فرانسه یی حدود قدیمه سنه ارجاء  
ایتمکدی . او مقصده چوق چکمه دن حصوله کلدی .

تاریخک مک معین فوآدی ، حتی عمومیتله ذوقی بو غوامضک بیلنمسیله ،

بو حکمتلردن عبرت آلمسیه در . یوقسه وقایعی کیف مایشأ مطالعه دن بیوک بر استفاده ایدلر .

بوانتقاد لرله برابر ، ابتدادن سویله دیکمز کی ، (بایدور) بکک بو مصاحبه تاریخیه لری مشکور ، مبجل بر سعیدر . دیلر ز که مملکت مزده بویه جدی چالیشانلر ، چالیشه بیلنلر کوندن کونه چوغالسون ، چوغالسون ده مطبوعا تمزده شمده کوره کلدیکمز او قوری ، او شخصی ، او عادی مهاجمه لره ، مناقشه لره آرتق نه زمان ، نه ده آرزو قالسون . »

بومقاله بتون قارئلره ، خلقه شدتله تأثیر ایتدی ، (کامران) ی دوشوردی ، آچالتدی ، (بایدور) ی ایسه قالدیردی ، یوکسه لتدی .

معارضلری دائماً (سلمان) بکدن حدتله بحث ایدرکن : بو حریفی مغلوب ایتک ایچون یازی یازمقدن منع ایتلیدر ، باشقه چاره یوقدر دیورلردی . بومطالعه طوغری ایدی . فقط بوغالیته ک سرنی آکلامق قولای ایدی . سلمان بک اساساً او برلری کی بر غرض و عوضک زبونی دکل ، دائماً حقه ، حقیقه خدمت ایله یور ، دائماً صاف ، صمیمی دوشونیوردی ، ایشه اک زیاده بو سایه ده یازیلرینه او تأثیری ، اوسحری القا ایدرک هر مباحثه ده غلبه سنی نأمین ایله یوردی . اومقاله نشر اولوندینی کون ، اقشام یکنندن صوکره ینه روم ایلی حصارنده کریم پاشانک افراد عالیه سیله سلمان بک ، فترت ، برده (بایدور) طویلاندیلر . (فترت) نشه لر ایچنده ایدی . بومسرتک برسبی واقعا (سلمان) بکک او بندی ، اوموفقیتی ایدی ؛ فقط برسبی ده او ایدی که او کون ایلاک دفعه اوله رق بومعصوم کنج (سحر) ده عشقی حس ایتدیرمشدی ، ایتدیرمشدی ده یالکزه نه درجه سودیکنی آکلاتمامشدی ، نه قدر سولدیکنی ده آکلامشدی .

عین زمانده سومک و سولمک عمومیتله حیاته ، علی الخصوص او یله آتشین برحیات شبابه مستنی بر فعالیت ، بر قدرت ، بر انشراح ویریر ؛ سوز جهانی ، حادثاتی باشقه بر طراوتله ، صباحتله ، جاذبه ایله کوستیریر ، حس ایتدیریر . سومکده کی صفا ساده جانانک وصالنده دکل ، او سودا ایله یاشامقدن علی الاطلاق ادراک ایدیلن درین بر ذوقده در .



مسعود بر عاشق جهانی، شئون جهانی، تجلیات طبیعتی باشقه بر نظر ابتهاج ایله کوریر. افکارجه، حسیاتجه، خیالجه صوڭ درجه تهیجه، رفته هر خطه طوتولور! بر مسئلهی تتبع ایدرکن اڭ دقیق نقطه‌لری کشف ایلر، بر لوحه‌ی، بر منظره‌ی تماشا ایلرکن اڭ کورولمز سرلری، سرأری کوریر، بر موسیقی‌ی، بر آهنگی دیکلرکن اڭ ایشیدلمز، اڭ محرم نغمه‌لری، نوحه‌لری ایشیدیر. عشق، عشق بشریتک، بلکهده عمومی بر نقطه نظر دن، بتون طبیعتک سائق تعالیسیدر، روح تجلیسیدر.

طبیعی، سودازده بکام اولدجه درکه بو مسعدته ایرر، محرومیته اوغرایجه او اقبالک ادبارینی کوریر.

عالمده نه وارد درکه بوقانون ازلییه تابع اولماسون؛ نه وارد درکه عاقبت سونمه‌سون، بیتمه‌سون، کچمه‌سون؛ مع مافیه، نهایت عشقک قهرینه اوغراسلر بیله عمری بر ماجرای سودا ایله کیرنلر بونوع تهیجالتدن محروماً یاشایانلردن دها زیاده غبطه اولونمغه دکرلر، قیمتجه اویله بر حیات بویله بر حیاته فائق، پک زیاده فائقدر. طبقی دوز، قوراق، یابانچی بر زمینه، چاغلایانلرله، شلاله‌لرله، شجره‌لرله، اوجوروملرله، قورقونج قایالرله، مهلاک قوغوقنرله محاط بر اقلیمک لطافتجه، بدیعجه بیك کیره مرجح اولدینی کی...

(فترت) او کون صباحلین (سلام) ک مقاله‌سنه دائر تعاطی افکار ایچون صبرسنلرله (صمد) ی کورمکه کلشدی. باغچه‌دن کچرکن باقدی‌که (سیجر) ساده، لیکن شیرین، شوخ بر طرزده، بیاضلر ایچنده کینمش. بر گوشه‌ده چیچکلری، منکشه‌لری، ضیالری، شبویلری تنظیم ایدیوردی. (فترت) ی کوریر کورمز مبسوط، متبسم:

— (فترت) بک، باقکیز، نه کوزل چیچکلرم وار.

دیدی، بو سس، بو منظره او سودا زده کنجی هیجانه دوشوردی، وجدده کتیردی.

بو صحنه‌ده، بو صباحت ایچنده (سحر) حقیقه دلربا ایدی. (فترت) ایلاک

دفعه اوله رق بویله شدتله عشقك ضربات استغراقه طوتولدی ، طوتولدی ده  
اختیارینی الدن قاجیره رق او معشوقه نورانورینه بی محابا :

— اوح ! چیچکلریکنز کوزل ؛ فقط سز او چیچکلردن بیک کره دها  
کوزل ، کوزلسکنز ، امل عمرمسکنز !

دیدى ، قیزجغز بو نا کهانی اعلان غرامدن اویله هیجانه کلدی که بردن بره  
سندله دی ، صوکره ملول ، مشتاق ( فترت ) ه برباقدی ، نشاطندمی ، حجابندمی  
قیب قیرمزی اولیوردی .

چنلرك اوته طرفدن طوغری ( صمد ) آرقاداشنی آرامغه کلیوردی . ( سحر )  
شوق ایچنده بر خلجان ، بر اهتزاز ایله ، ( فترت ) لك الی صیقارقدن تیترك بر  
سسینه :

— بیلسه کنز بو دقیقه حیاتمك نه قدر مسعود برمدیدر ، او اوچ کله ایله  
بکانه ابدی برنشته ویردیکز ..

دیدى ، اوزاقدن ( صمد ) لك کلدیکنی کوردیکی ایچون مخاطب معززینك جوابنی  
بیله بکله مهن کویا مستعجل بر ایشك شننده ایمش کبی تلاش ایله اوه طوغری  
کیتدی .

ایشته بو لطیف حادثه مناسبتیله ( فترت ) اوکون مونس بر تهییج ایچنده  
ایدی ، حیاتی نورلره نشئه لره مستغرق کوریوردی . چونکه عشقك ، احساسات  
عشقك ایلک تجلیاتنه بکر قلبنی بویله برنجی دفعه اوله رق مستغرق بولیوردی .  
( سحر ) ده اویله شوق ایچنده یوزیوردی .

بو ایکی کنجك شو سروز صمیمیلری زمین مساعد اولدیغی ایچون او برلرینه ده  
سرایت ایتدی ، آرتق او جمعیت بر دوکون کیجه سنه دوندی .  
( صمد ) دییوردی که :

— عثمانلیق تحف بر نشاطه مالکدر . او لاینقطع سویله نه کلن قصورلرینه  
وغا خلغمزك بیولک بر مزیتی واردر که اوده فکر سلیمیدر ، انصافیدر ، سلامت  
ونصننه میلی ، مجلوبیتیدر . مثلاً بوکون ( سلمان ) بکک مقاله سنی اوقویانلر نه قدر  
مصیب ، محق بولیورلدی . حتی نه شتاب ایله تصحیح فکر ایله یورلر ، باطلدن

آرینیور ، حقه یاناشیورلردی . حقیقت ، بویله بر ملتک ، هر حاله رغماً ، نجاتندن نومید اولماملیز . اولیله دکللی ( بایدور ) بک ؟ ..

( بایدور ) او کیجه همان ( فترت ) قدر شاد ایدی ، اولا ( سلمان ) بکک او فضلا نه دلالتیله مخاصملرینه غلبه چالیدی ایچون شاد ایدی ، ثانیاً ده بومظفریت سائقه سیله چالیشغه . فیض و اقبال عثمانییه وقف حیات ایله مکه یکیدن یکییه شوقلر ، املار پیدا اولدی ، او سائقه ایله شاد ایدی . ( صمد ) ک سوزلرینی شوق ایله تصدیق ایدرکدن شو مطالعه بی بسط ایله دی :

— عثمانیلر ، اوت ، ازلدن بر قدرت نامیهیه ، بر تجلییه مظهردرلر ، بو مظهریتلرینی او ماضی محشمیلرینه اثبات ایدرلر . شرقک عربلردن ماعدا هانکی اقوامی واردرکه او قدر آز زمان ایچنده بو درجه معظم بر سلطنت تشکیل ایدوبیلیمش اولسون . بو سلطنت ابتدای تأسسنده کرک افراد ، کرک حکومت اعتباریه ساده سطوتجه . مهاججه دکل ، فقط من حیث المجموع ترقی و تمدنجه ده غربیه غبطه فرما ایدی . اک منصف غرب مورخلری : « وقتاکه شرقی فتحه باشلادیلر . اینک عثمانلی پادشاهلری سیف سطوتلرینه رام ایتدکلری خریستیان امپراطورلرینک پک چوغندن زیاده فضیلت ، حتی مزیت ابراز ایلدیلر [\*] » دیمه یورلرمی ؟

« عثمانیلرک همتیله اوز اوچنچی عصرده خریستیانلر نهایت اسلامیتک نه اولدیغنی اوکرنیدیلر ، مسلمانلرک کنیدیلرندن زیاده متمدن اولدقلرینی اعتراف بیله ایلدیلر [\*] » دیمکه قدر وارما یورلرمی ؟

نیچون بو اقبالمز چوق سورمدی ؟ یوکسلمه دی ؟ عاقبت ایسه ادباره مبدل اولدی ؟ چونکه ، بز ، عثمانیلر شرق ایله غربک مخاصمه ازیله لرینه قربان کیتدک . او مخاصمه نک دردیه کریوه انقراضه اوغرادق ، جهان مدنیتدن ایرلق ، کری قالدق . بویله اولقله برابر بوگون اقوام شرقیه ایچندهینه اک مترقی بز ، عثمانیلردر . عثمانیلردرکه خلقالاً و حکومتاً غربیلره بکزه مک ، یتیشمک ، مدنیت غربیه بی تمثیل ایتک استعدادینی کوستریورلر . بو مدعایه اوفاق بر دلیل ایسترسه کز اورویایه کوتدر دیکمز طابه عثمانیه بی نظره امعانه آلکمز . علی الاطلاق بوکنجیلر تحصیلده



و تربیه ده اقوام متمدنه نك شبانندن هیچ آشاغی قالمازلر ، ذكاجه عرفانجه عینی استعدادی ، عینی اقتداری کوستره بیلرلر . ( صمد ) ك دیدیكى کبی بو نکته لری کشف ایتدکجه درکه انسان عثمانلیغك ، عثمانلیلر ك آتیسندن امید وار ، همده پك زیاده امید وار اولور .. »

بو صیره لرده ( کزیده ) خانم ( سلمان ) بکله برکوشه ده همان باش باشه بر حسب حاله طالمشدی :

— ایشته باقیکنز ، شبانمزه نه بیوک نفوذیکنز اولیور . مثلاً ( صمد ) ك ، ( بایدور ) ك شو سویله دکلیرتون او دوشوندکلریکنزك ، یازدقلیکنزك او کنج فکرلرده تجلیلرندن برجلوه ، لکن او یله قوری قوری یه تقلید دکل ، برتفکر ، برتبع سائقه سیله اولدیغی ایچون مفید ، مفرح برجلوه در . فی الحقیقه نه قدر آجیلر کورمش ، کچیرمش اولسه کزده سزینه بختیارسکز . انسان حالکزی ، حیاتیکنزی یقیندن تدقیق ایدنجه ، او قدر فلاکتله رغماً وادی حیاته نشاطکزی ، متانتکزی . ثباتکزی ناصل محافظه ایده بیلدیکنز؟ قولایجه آکلار . سزی بحق طانییجه .. تقدیر ایتهمك ممکن اولمسه کرکدر .

دیدی . صوك سوزلری برپارچه متحسانه ، متردانه سویله مشدی . آزقادی « تقدیر ایتهمك » یرینه « سومه مك » دیوردی . کندینی طویلادی ، فقط ( سلمان ) بك اونکته نی کشف ایله دی ، ایله یجه ده قلبی ، صمیمی برابته اجه طوتولدی . او نشئه ایله ده بحث آتی یه کیریشدی :

— کزیده خانم افندی ، غرویمه حمل ایتسه کزده ینه سویله یه جکم : آزمان ایچنده بنی نه چوق آکلامشسکز! حقیقتی نه کوزل طانیورسکز! مادام که او یله در . فلسفه حیاتی می سزه محلاً تمهید ایدیم : برفرنك فیلسوفك دیدیكى کبی ، حیاتی سورم ، فقط نماتدن قورقام ، چونکه او یله بر قورقو انسانی ذوق حقیقی حیاتدن محروم ایدر . حیاته بنجه برمنتها ، برچوقده وسائط واردر . او منتها دن نومید . بسبتون نومید اولورسه ایشته اوزمان بیترم ، سوزر ، فقط شمیدی یه قدر کوردیکم کچردیکم فلاکتله هپ وسائطه متعلق ایدی . مثلاً ثروت ، پاره نم ایچون نه در ؛ منتهای حیاتی ؛ حشا ، بلکه او منتهایه وصول ایچون برواسطه ، حتی عادی برواسطه در .

بو حکمته مبنی در که بر زمان بیوکه بر شروتمی بر بخران مالی یه قایدی ردم ، قایدی ردم ده .  
متأثر اولمادم ، دیه نم ، لکن مایوس اولمق خاطریمه گنهدی ، چونکه او مصیبت  
به قدر بیوک اولورسه اولسون مقصود حیاتی تعقیب ایتمکدن بنی منع ایده مزیدی .  
فی الحقیقه ده او یله اولدی .

دها صوکره ، دها باشقه آجیلر کورددم ، غربته دوشدم ، موقعی ، مدار  
معیشتمی الدن قاجیردم ، ضرورته اوغرامدم ؛ ینه ، متأثر اولمادم . دیه نم . انجق  
بوسفرده یأسه طوتولمادم . سعیمی ، متانمی آرتیردم ، دیشمی صیقمه ، امل حیاته  
طوغری ینه یوله حقیقه بیلدم .

بویولده بر همراهیم ، بر رفیقۀ حیاتم وارایدی که اقبالده بنمله مشترک ایدی . لکن  
ادبارمده شجیع ، وفاکار ، مونس بر معینم ، مستمند اولدی . اک سیاه ، اک قورقونج  
دم حیاتمده : یورو قورقما ، آتیدن اصلا ، اصلا مایوس اولما . « دیور ، بر نکاهیه ،  
بر خنده سیله ، هاه بر بوسه سیله بنی یکیدن یکی یه امیدلره دوشوریوردی .

ایشته بنم ایچون عالمده اک بیوک فلاکت او اولدی : اجل بردن بره کلدی ،  
بویولداشمی ، بویار جانمی ، جانانمی المدن آلدی . هر لحظه او منظرۀ الیه کوزومک  
اوکنده در : بر صوکه بهارده ایدی ، انکلترونک او پاک ، او مطرا . او باغچلر ، او مشجره لر  
ایچنده تجلی ایدن شهرلرندن برنده ایدک . کهرام ، بلند ، یشیل ، قیش یازیم یشیل  
آغاچلریله ، بیاض بیاض چیچکلریله ، مزین طاشلریله ، مرمرلریله عادتاً بر روضه  
هشتی آندیریر بر مزارلغه کیتدک ، او وجود عصمت و محاسنی طویراقلره کومدک .  
او مقبره ایکی کشیلک ایدی ، احتیاطاً او یله یانیشدی ، چونکه هپسر ایرکن او یولک  
یولجیسی دگلی یز ؟

فقط ایشته یالکنز او زمان الیم بر فحرت کوکلی ، کوزیمی صاردی ،  
کیجه اود دونجه فکرمدن کچن آرتق عمریمه خاتمه چکمکدی ، نماتده بیله رفیقهمه  
همراه ، بر درجه یه قدر توکل ایله ، خشنودسزلق ایله همراه اولمقدی . فقط  
یاتاق او طه سنه چکلمه دن اول ، قیزم ( سلمی ) - که او وقت او یچ یاشینده  
ایدی - کلدی ، بر معتاد بنی اویدی ، بوسفر او پرکن بوینه صارلدی ، صارلدی .  
عادتاً مینی مینی قوللریله بنی صیقیشدیریور ، بندن ایرلمق ایسته میوردی . او زمانه

قدر هیچ بویله یا پامشدی ، غالباً بر الهام طبیعتله آرتق آنه سز قالدیغنی ادراک  
ایدیور ، باباسنه دها زیاده میل ایله یوردی . بر لحظه صوکره قائم والدم (فترت) ی  
کتیردی ، قوجاغمه ویردی . طوغه لی هنوزیکرمی بش کون اولمشدی . فقط چوجوق  
بر نور طوی کبی ، بر بارقه سودا ایدی . کوزلرم یاشله ، کوکلم رقتله طولدی . وظیفه  
نجیه حیات وار مهابتیله نظره امعانده تعین ایله دی . او کیجه یی او یله تفکرات  
ایچنده بم بیاض کچیردمدی . آرتق بردها اوسیا تصورلر خیالمدن بیله کچمه دی .  
رفیقه مک خاطره ماتمی اونو تمق ، بر لحظه اولسون اونو تمق بم ایچون محال ایدی ،  
فقط چوجقلریمک سعادتیی ، آتیسنی دوشونمکده بکا دائمی ، مسعود بر اندیشه  
اولدی . بر اندیشه که امل ازلی عمریمه باشقه بر فر ، بر تاب ویردی ، یکریمی سندهر  
بنی بویله چالیشدیردی . چابالاتدیردی . غریبدر ، بیوک بر عزم ایله ، بر شوق ایله ،  
سوده کدن ، سوبینه رکدن چالیشدیردی ، چابالاتدیردی . باقکزه ، بویاشمده بیله بنی  
یاشامغه نه قدر مهمک ، جهانندن نه درجه خشنود کوریورسکزه ، دکلی ؟ فی الحقیقه :

باغلیدر دامان حشره رشته طول امل ،

های هوی امل دنیا بیتمه دن دنیا بیترا .

فقط فریضة انسانیه ، نه اولورسه اولسون ، عزم ایله ، اجتهاد ایله ینه اواملی  
تعقیب ایتک ، حتی هر حاله رغماً مبسوط ، مستریح تعقیب ایتک ، اوسایه ده ایسه  
بشریتک تعالیسنه آز ، چوق بر خدمت ایدرک ، دیدکاری کبی ، بوقبه ده خوش  
برصدا براقه بیلیمکدر .

(کزیده) خانم بومنتقه یی هیجان ایله دیکله دی . دیکلرکن بعضاً اودرجه رفته  
کندی که برایکی کوز یاشی بیله دوکدی . دوکدی ده سلمان بکه دها زیاده ربت  
قلب ایدر کبی اولدی . بوسائقه ایله ده :

— تحفدر . بعضاً خلق نه قدر انصافسزدر ! سزک فلسفه کزده ، سزک  
خلقتک کزده بر آدمک بودرجه دشمنلری اولسون . مادام که او بلند فکرلرک ، اوصاف  
امللرک مجلوبیسکزه ، بنجه الکزدن ، ایسته سه کز بیله ، بر فالح کز . ینه تحفدر .  
سنه لردن بری اوجدالره ، بو مرتبه عداوتلره ، عدولره رغماً صاچکزه بیله همان



همان آغار مامش کبی ، عادتاً بر شباب دائمی به مظهر سکر . دیمک ، آلامه اور تبه متحمل سکر ...

دیدی . ( سلمان ) بک بو التفاته قارشی کولومسه دی ، کولومسه به رکدن شو مقابله ده بولندی :

— کزیده خانم افندی ، سزه دمنیدن اوزون اوزادی به فلسفه حیاتی آکلاتدم ، شمدی اوقدر باشکزی آغریتمدن سزه حیاتی ده سویله بهیم : فی الحقیقه بنی بیلنلردن ، بیلمه ینلردن ، باخصوص بیلمه ینلردن بک چوق عدولرم وار ، فقط کیمسه به عداوتم یوق ، اصلاً یوق . بوکون بکا اک چوق فالق ایتش بر فرد کسه ده النی اوزاتسه ، اولی صمیمی صیقارم ، اوقالقلری هپ اونوتیرم . ایشته اخلاقک بوانشراحیدر که اک آجی دم حیاتمه بیله شطارتی محافظه ایتدیریر . بعض دوستلرم بو حرکتی ، بو خصلتی ضعف خلقتمه عطف ایدرلر . اویاه اولسه بیله ، بوضع خلقی بنی نفسه جه حسد دن ، غیظ دن ، غرض دن دائماً صیانت ایتدیکی ایچون عندمده بر نقیصه دکل ، بلکه ده بر فضیلتدر .

اوت ، دائماً دشمنلرم چوق ایدی ، چوقدر ، فقط ینه دائماً بر دوستم ، جان دن ، کوکلدن ، صاف ، صمیمی بر دوستم وار ایدی ، واردر که لطف مخادنتیه بکابتون اودشمنلری اونوتدیریر . رفیقۀ مرحومه مک صدق ، محبتی ایشته اویاه بر ملک صیاتمدی . حتی شمدی بیله ، جهانده عداوت اولورمی که سزک دمندن بری بنم ایچون بذل ایتدیکنکر نوازشلره ، التفاتلره ، توجهلره قارشی هیچ حکمنده ، سونوک ، بک سونوک قالماسون ؟ .. »

بومتهیج سوزلردن سوکره ( سلمان ) بک بلا اختیار کزیده خانمک النی کیزلیجه انه آلدی ؛ او قیز جغزده بو صمیمیتدن ، بو بر نوع اعلان محبتدن درین بر نشئه طویدی ، او ایکی ال برمدت ، ایجه برمدت بر برندن آیرلادی . او مصافحه ده دوام ایده جکدی ، فقط بتون اوکنجیلر اومونس ، مؤثر مکالمه لر یله ، مناظره لر یله ، صوک مرتبه نشاطه ایرمشلردی ، بواجتماع لطیفه خاتمه ویرلمه دن اول بر پارچه پیانو چالمسنی کزیده خانم دن رجایه کلدیلر .

بوماهر قیز او کیجه بتون او تحسساتک سوقیله موسیقیده عادتاً خارقه لر کو ستردی،  
 الهام سودا ایله، شوق صمیمیتله فنک، مهارتک فوقه چیقدی، چالادی، اک بلند،  
 اک وجدانربا فصللری چالادی. ساده سلمان بکی دکل، (فترت)ک سحری ده استغراقه  
 دوشوردی. او درجه ده که بر مدت صوکره او جمعیت طاغلدی، هر کس اویقو  
 اوطه سنه کیتدی، چکلدی؛ فقط او آهنک نورانینک تأثیر سحر انگیزی او کنجلرک  
 رؤیالرینه باشقه بر شعشعه، بر جاذبه، بر زینت ویریوردی. بویله جه:  
 ایشته او کیجه صباحه ایردی!



## بر غیر عالمی

« استانبول کائناتک طبیعت اعتباریله معالی، بدایع ایچنده بر موقعیدر؛ آسیانک، اوروپانک بر نقطه اتصالیدر؛ دکنزلرک حاکمیدر؛ بوغاز ایچنه، صنع ازلک اویله بر خارقه سنه مالکدر.

نهدر او زمردین، او دائماً نورانی، دائماً براق موجهلر، اوبیانه صیغماز جاذبهلر ایچنده او دکنز نه در؟ نه بدیعه در، نه لطافتدر، نه شعر در؛ یا او دکنزی هرایکی طرفدن صاران، قوشتان او منور، اومطرا ساحل تا کناردن تپه یه قورولریله، مشجره لریله، تارلالریله، رنگارنک ثروتیله، احتشامیله نه آهنگدر، نه نشیده در! فیاض قدرت بوزمین مواهنی آووج آووج سرپرکن اویله بر سخاوت کوسرتمش که!.. استانبول، استانبول بر حجه فطرتدر.

اک مسعود، اک مفرح مناظر دمام طبیعت، بتون او نظر فریب خارقهلر، او خیاله وله ویریر طلوغر، غروب لر، مهتاب لر، سحردن شفق لره، شفقدن سحر لره قدر بوساحده پارلار، طوریر.

متحسس، مدرک بر سیاح کمی ایله مرمره دن طوغری ایلرلرکن، یاقاره دکنزدن کلیرکن او منظره غرای کورونجه، حس وادراک ایدنجه وجده، استغراقه دوشر، استانبول فطرتک اویله بر تجلیزاریدر.

استانبولی اوزاقدن، یقیندن تماشا ایدن سور، استانبولی جهان بر بدیعه ازیله کبی ادراک ایدر. بویله ادراک ایده مینلرینه اکثریتله استانبوللیلردر. استانبوللیلرکه بشیکدن مزاره قدر ایچنده یاشادقلری ایچون او خوارقی تقدیر ایله یه مزلر، هیچ دکلسه اک آز تقدیر ایدرلر.



استانبول یر یر، کوشه کوشه یکی بدیعه لره مظهر یر زمین محاسن در، بر خزینه غیدر، بر دینه در. طبیعتجه بویه در، لکن تاریخچه، ماضی اعتباریه بر درجهیه قدرینه بویه در، بویه خارقه لره لبالبدر، قرون اولادن قرون اخیریه قدر تمادی ایدر بر حیات مالکدر؛ جهانک اک معمور، حتی ساده معمور بویه دینه مز، فقط قدیم، فقط معروف بر شهریدر. بر شهری که او فصل فصل مهیب، بعضاده سوزشناک، فجیع، لکن دائماً مؤثر، دائماً عبرت انگیز عمریه، سر انجمله تاریخ عالمک بلند بر صفحه سنی تشکیل ایلر.

حتی سلطنت عثمانیه و ارنجهیه قدر بویای تحتک منافی، آثاری دریندن درینه تدقیق اولونسه تا فن معماریدن، فنون نفیسه دن، عسکرلکدن، اخلاقه، اجتماعیه قدر نه دقائق کشف ایدلر.

انکلیزلرک عصر اخیرده یتیشن بیوک بر فیلسوف مربیلری، (راسکین) مثلاً بر ونڈیک شهرینی بویه آثار بدیعه جه تتبع ایده ایده، اثردن مؤثره انتقال ایتک اوزره بر خلقک بیوککلکرینی، کوچکلکرینی، کالاتی، نقائصی، علویاتی، سفلیاتی، کوستره کوستره جهان، بالخاصه وطنداشلیرینه بر درس اخلاق، بر درس تعالی و یریور. ینه او یله بر صاحب دها استانبولی ده عینی وجه ایله تتبع، مطالعه ایتسه عینی حقیقتلره، عینی نتیجه لره ایزم می؟ ایرر، هیچ شبهه یوق، ایرر. مثلاً بر ایاصوفیه نک، او بنای معظمک سرگذشت مهیجی بتون غوامضیه، بتون خفایاسیه، سرائیله تشنه معرفت بر فکری نه هیجانلره او غراتماز، لکن نه استفاضه لره ده مظهر قیلماز!

بر سلیمانیه نک، او جامع مبجلک تاریخینی بویه اودرجه تهیجانی احتوا ایتمه مکه برابر حیات اجتماعیه مزدن نه رنگین بر فصلی مصورددر، بر نخبه بی محتویدر. فنوندن، علومدن او بهره سزک ایچنده او عظمتک بانسی نه در؟ نه صلابت اعتقاددر! نه مهابت فکر و قلبدر!

اوسر گذشت، بو تاریخ بیلنمه دیکی ایچون، بو طرزده عرفان لابد حقیقیدن محروم، عسرلردن بری محروم قالدیغمز دندرکه بر مدینتک واضعی، خادمی، معقی اوله مادیق.

استانبول ، استانبول ساده اسرار حکمتله ، ساده مکارم طبیعتله لبالب دکل ، فقط قاموس تمدندنده بر نسخه کزیده در . عثمانیلر یالکیز او پای تحت سلطنتلری اولسون ، کافه دقائن ماضیسیله ، بنالریله ، هیکلریله ، آثار عتیقه و اخیرسیله ، مناظریله ، محاسنیله ، تتبع ایتسه لردی ، بیلسه لردی ، آکلایه بیلسه لردی بو کون تمدناً دهامستثنی بر رتبه ایرمش اولور لردی .

بو شهر معظمده بر لوحه ، بر منظره ، بر اثر ، بر خاطره یوق که مفکره یی . درین درین تهیج لره دوشور مسون : ادوار سالفه بر طرفه طورسون ، یالکیز دوریمز ، تاریخیمز ، تاریخ عثمانی پیش تدقیقه آلسون ؛ اطرافمه شویله بر باقسه ق ، کوکلیزی ، کوزیمزی نورلاندیریر نه منقبه لری ؛ یاخیلمزی ، حسیاتمزی قرار تیر نه فاجعه لری خاطر لارز .

بالفرض ایشته روم ایلی حصاری دیور ، کچورز . بر شهریار جهانگیریمزک ، فاتحک استانبولی فتح ایدرکن ابداع ایله دیکی بر اثر شهامت ، او غزای مبعثک اوفصل اذعانسوزینی دوشونور می یز ؛ حتی اکثریتله بیلیمور می یز ؛ بو واقعه غرایه تلمیحاً بر مورخ افرنج بیله :

« نهایت ، سلطان محمد بر چاره یه مراجعت ایله دی که عزم دلیرانه نک بو درجه سنه قوه مصوره بیله مبهوت اولور . او دورک مورخلری طرفدن متفقاً تصدیق ایدله مش اولسه ، بویله بر وقعه یی حکایه یه جسارت اولونه ماز .. »

دیمه یورمی ؟ او فتح مبین ، او واقعه غرا ایشته درت یوز الی طقوز سنه اول بو زمیندن ، بو نقطه دن ، بو حصار دن باشلادی ...

فقط بزشمی قیر عالمنه ، اکله نمکه چیققدق . تاریخک بو دقائقی ایله او غرا شمع زمانی دکل ، ذاتاً شوبوغاز ایچنی ، بو منظره خوارقی بویله طویا طویا تماشا ایتکده بزه بر درس حکمت آلمق ایچون کفایت ایلر . موقعک ، زمینک تأثیر یله ، تشویقیله بی محابا شو سویلدکار مدن بیله محجوبم ، صاقین ، معرفتفر و شلغمه ذاهب اولماییکیز ... »  
بو مطالعه لری تمهید ایدن سلمان بک ایدی . ایلولده ، صوک بهارده بهار آرا بر کون ایدی . هوا نه صیجاقدی ، نه صوغوقدی ، عادتاً سنبلی ایدی ، فقط کوزلیدی . سما صاف ، اولدجه براق ، زمین بر پارچه قوراجه ، صولوق . نکل

ینه لطیف ایدی. استانبولک بهاری قدر، بلکه بهارندن زیاده صوکه بهاری مؤثردر، ایلول آیلرک، بکزی بر نبذه اوچوق اولسهده، بلکه اویله اولدینی ایچون اک روح استیناسیدر.

خلاصه، ایشته بویله برکون بر صباح ایرکندن بتون کریم پاشا عالمه سیله برابر سلمان بک، سلمی، فترت، بایدور، هپ حصارک اوست طرفه، برقیرکزینتیسنه چیقمشلردی؛ یمک ییه جکلر، کزه جکلر، اکلهنه جکلر، بتون اوکونی او عالمده کچیره جکلردی.

سلمان بکک قیزی سلمی بر قاق کون اول، بر مدتجک باباسیله یاشادقندن صوکرده قاردشیله برابر ینه اورویایه دونمک اوزره، انکلهتره دن استانبوله گشدی. (فترت) یقینه اکمال تحصیل ایله مک ایچون (پارس) ه کیدیوردی.

کریم پاشا ایله سلمان بکک بوقیر صفاسنی ترتیب ایتمکدن بر مقصد مخصوصلری واردی. بر صفاکه هم عادتلریمزه، اکلهنه لیمزه موافق ایدی، همده انکلیزلرک او معروف (پیق نیق) لرینی آندیریوردی.

بو جماعت اولایالیدن صباحله ین قالدیلر، تپیه طوغری کوله، اکلهنه یوله قویولدیله؛ ایجه یوریدیله، بر لحظه برجک اتکلرنده طور دیله، دیکله ندیلر، دیکله نیرکنده سلمان بکک محملاً ذکر ایتدیکمز او منقبه سنی دیکله دیله، صوکره ینه یوریمکه باشلا دیله.

کنجلر، صمد، فترت، سحر، حتی سلمی قوشوشیورلردی، چشید چشید احتیاسات معصومه نك سوقیله اعلان شادمانی ایله یورلردی، حیاته او متین، او کمره ارتباطلرینی، علاقه لرینی کوستیریورلردی.

بعضاً یولده سحرله فترت باش باشه قالیورلر، اوزون مدت اویله یان یانه، برلکده یوریورلردی، آرتق بر بریله عاشقانه تعاطی افکار، مبادله حسیات ایدیورلردی. (فترت) دییوردی که:

— سحر جکم، جهانده امل نه در؟ بیلیمیسک؟ بر آن اول (پارس) ه کیدرک تحصیل اکمال ایتک؛ کیجه، کوندوز چالیشه چالیشه، صرف سنی دوشونه رکدن چالیشه چالیشه اکمال ایتک؛ صوکره وطنمه دونه رک عرفانمه،



فکریته کوره بر موقع ایدینک ، بر ایش کوچ صاحبی اولوق ؛ نهایتده سنکله اوله نمت ، او سعادتیه ایرمکدر . نه ساده ، فقط نه پارلاق بر امل دکلې ؛ ایکیمز ال انه ویریر ، نه مسعود برعائله تشکیل ایلرز . بر بریمزی سویورز ، بر بریمزی آکلا یورز ، بر بریمزی بختیار ایتک ایچون نه لازمه ، او یله بر فکره ، او یله بر قلبه ، او یله بر مظهریته هر ایکیمزده آیری ، آیری مالکز .

سحر جکم ، حیاتمک نوریسک ، نور سحریسک ، سکا بویله ابتدای شبامده تصدوق ایتک بنم ایچون نه لطیف بر حسن طالعدر ! کیجه لریمی ، اک یکنسق ، اک مزعج کیجه لریمی ، غربتده بیله ، یاد منیرکله نورلره غرق ایده جکسک ؛ ( پارس ) ده سنی دوشوندکجه انزوایی ، سعی دها زیاده سوه جکم . کونلریمی خاطرده خندانکله ملالدن ، صیقینتدن قورتاره جکسک ، نه زمان یورولسه ، نه زمان صیقلسه . بوضرورتده نه زمان طوغری یولدن چیقارکې اولسه ، امینم ، او خیال متبسمک معصوم ، معصوم قارشیمه کلیر ، پناهم اولور ، بنی او مصیبتلردن در حال خلاص ایلر .. سحر جکم ، فرشته نجاتمسک ..

دون کیجه بور و وحپور ، فقط مهیج دوشونجه لرله اویقوم قاچشدی ، ذاتاً مهتبدده او طهمه خارق العاده بر انشراح ایله انعطاف ایتشدی ، پنجره می آچدم . یادک ، یاد مونسک کوزیمک اوکنده ، نورلر ایچنده پارل پارل پارلا یوردی . ذاتاً صباحیم ، سحرلرمده بویله سنکله ، محبتکله ، خیالکله ، خاطرکله مالا مالدر . غریبدر : زمان زمان ساعتلرجه بر مسامرده بر بریمزله بولوشیورز ، کوروشیورز ، دکلې ؛ فقط سندن آیریلنجه ینه سنک خیالک ، ینه سنک یادکدرکه ندیمدر ، ندیم تفکرمدر ، همدمدر ، همدم روحدر ، نه حکمتدر !

بیشته بویله جه ، ینه دون کیجه ده او منظره ، احوال ، بتون تفکراتم بنی وجده کتیردی . سحر جکم ، شاعر دکم ، فقط سوق عشقکله اواثانده لسانمدن آهسته آهسته شو بیتلر صادر اولدی .

طوغارسک هر صباح آفاق امید وصالده ..  
کزرسک هر کیجه بیک ناز ایله عرش خیالده ..

نەلر پيدا ايدرسك فكر حيرت اشتالمده ..  
 هويدادر سكا ميلم بنم هر حال وقالمده ..

شبايم ، ماھتابم . آفتابم . هپ ، سحر ! سنسك ..

سحر بتون بونشيدۀ غرامی بر موسیقي ، پك مؤثر بر موسیقي ديكر كي  
 ابتهاج ، احرار ايچنده ديكله يوردی . بو صاف ، بوساده لكن مونس شعری  
 ایشيدنجه درين بر نشاطه طوتولدی ، سوديكنك النی اشتياق ايله صيقارقدن  
 سوينه سوينه :

— وای فترتچكم ، شاعردە می اولدك ؟  
 — اوت ، سحر .

بودنياده - نك فيضكله در بر شاعر اولدم بن  
 سنكچون هر نه سويلرسەم او بر شعر دلارادر .

— بنم ايچون دە ، فترت ، عالمده بر سعد طالع تصور اولونه بيليردي . اوده  
 وادی حیاتده سكا ، سنك كي بر همراهه ، بر يار جانه تصادف ايتمكدي . بوسعادت  
 نجه او قدر بيوك ، اويله معزز كه بنی ، اوت ، سويندرييور . حتی پك زياده سويندرييور ،  
 فقط بعضا ده نه قدر قورقوتيور ، نه درجه تلاشه ، اندیشه يه دوشورييور ! فی الحقیقه  
 بن نهيم ؟ بر ترك قیزجغزی .. سنی جلب ايتك ، جذب ايتك ايچون بنم نهيم وار ؟  
 فوق العاده بر عرفانمی ؟ فطانتمی ؟ کمالتمی ؟ نه كزر ! حتی حسنم ، جاذبه يه بيله  
 نه قدر بسيطدر ! قيمتدار بر متاعم وارسه اوده قلمدر . قلم كه هپ سنكله  
 طولودر . سكا شدتله مربوطدر . بنی سودكسه ، هيچ شبهه يوق بوقلم ايچون  
 سودك .

فترت ، فترت ، بويكنسق ، بو آسوده حیاتده بردن بره بر كونش كي پارلادك .  
 كوزلريمی قاماشدير دك . كوكلی جذب ايتك . وارلغم آرتق سنكله در . سانس ياشامق  
 بنم ايچون محالدر . آه ، فقط شمدي ( پارس ) ه كيدييورسك ، ايكي ، اوج سنه  
 اور وپاده قاله جقسك ، يازلری انكله زده چيره جكسك . اوياشاديغك يرلرده فرانسه بردن  
 انكليزلردن حسناً ، عرفاناً پك مطرا ، پك مكمل قيزلره تصادف ايدە جكسك ،

صییعی نصادف ایدد جکسک . عجبا او کزیده معارفه لردن بری برکون بنی، بو کو چیچک  
 سحری سکا اونو تدرمازمی ؟ اوت ، قلبک صافدر . وجدانک نجیدر . بیلیرم ،  
 لکن وجهان تمدن بتون آلاشیله ، اوتابشیله وجدانه بعضاً سکت ویرمه یورمی ؟  
 قلبی ایسه انقلابه اوغرا تمایورمی ؟ ایشته بواندیشه لردرکه بو سعادت بی انتها ایچنده  
 بنی زمان زمان دوشوندری یور، قورقوتیور، فترت، امین اول، نه اولورسه اولسون  
 آرتق سنسر یاشامایه جغمندن، یاشایامایه جغمندن امین اول ، فلاکت بکا، ویل بکادر،  
 شاید برکون برضربه سوء طالع بنی سندن ابدآ آیریرسه ، محروم ایدرسه .. اوکون  
 ایشته بوزواللی سحر جهانه ، حیاته ، شبابه نه عزم ایله، نه شتاب ایله وداع ایدر ،  
 سوتر ، کیدر . . .

— سحر جکم ، بنی نه ایچون بویله سوزشناک برامتحانه چکیورسک ؟ عشقمندن،  
 قلبمدن امین دکلیسک ؟ دیمات حالا بنی بحق طانیما یورسک . کوردیکم تربیه، بسله دیکم  
 امل بنی فکرمه موافق، کوکله مونس بر رفیقۀ حیات بولمغه سوق ایله دی ، جلوۀ  
 طالعده سکا ملاقی قیلدی ، هر حالکله ، هر حرکتکله ، مغنویاتکله ، حسنکله بنی  
 جذب ایتدک . تسخیر ایتدک . بودقیقه ده کوکلم ، کوزم ، هپ سنکله مشغولدر .  
 بیلیم جهانده سندن کوزل . سندن مکمل قیزلر وارمی ! بیلدیکم اودرکه بوکون  
 بنم ایچون جهانک اک کوزل ، اک مکمل قیزی سنسک . ساده حسنک مفتونی ،  
 قلبک پرستشکاری دکلم ، عرفانکک ، شطارتکک ، بویاشده اوفکر سلیمکک ده  
 حیرانییم . عالمک اک متمدن بر اقلیمی ده یتیشدیرسه یتیشدیرسه بویله بر دختر پا کیزه  
 یتیشدیرد بیلیر .

سحر جکم ، طالع بکانه درجه یار ایمش ، یاور ایمش که ابتدای شبایمده سنی  
 بولدم . کوردم ، سودم . بویله بر سودا ایله یاشامق ، مشکلات عمری اقتحام ایتک  
 نه بختیار اقدر ، نه بختیار اقدر که بیکنده بر فردا یامیسر اولور ، یا اولماز . شممدی  
 بوسایده سنک عشقکله ، سنک خاطراتکله اورویاده کچیره جکم عمرکالی کوزاوکنه  
 کتیر : دائماً سنی دوشونه، دوشونه، اومستقبل معرزه وقف امل ایدرکدن چالیشمق،  
 یابدقتریمی هپ اومسعود، اومدوح اندیشه ایله یامق بکا بر نعمت، هله جدال حیاته  
 موفقیت ایچون جدی ، مؤثر بر سائق دکیدر ؟ بویله اولمایهیدی، بسودا بنده تجلی



ایتمه ییدی ده (پارس) ك اوساحه طرب انكیزینه مغلق برامل ، بوش برقلب ایله دوشه یدم ، احتمال قضادن قضایه اوغراردم . رنكا رنك ، فقط اكثرثیا مردود ، هله دائماً مشكوك ، دائماً فیضه مانع هوالرک ، هوسلرك پشنده چیرینیر ، طوریردم ؛ یوق ، سحر جكم ، سنی ناصل جانندن ، كوكلیدن ، وار قدرت قلبله سومه یه یم ؛ بنی فکراً ، املاً ، هپ ، هپ احیا ایتدك ، اعلا ایتدك . بیلیرمیسك ؛ انكلیز کنجلری ، انكلیزلر اساساً حیاته نیچون اقوام سائرده دن زیاده موفقدرلر ، مسعوددرلر ؛ چونكه ابتدای شباده اکثریتله معصوم ، منعم ، معزز بر سودایه ربط قلب ایدرلر ، بوسائقه مغویه ایله ده بریاندن عزم و فعالیتجه دها زیاده متین اولورلر ، بریاندن ده مساویدن ، معاشقات مردودده دن ، اسراف تحساستدن ، افنای قلبدن محافظه نفس ایده بیلیرلر ؛ عاقبت ، امله ایرنجه ، اوله نجه ده هم معنا ، هم بدناً دینجدرلر ، سلیمدرلر . رفیقهلرینی ، عائله لرینی مسعود ایتك ایچون نه لازمه بتون اوخصائمه بول بولنه مالکدرلر .

سندن صاقلایه مام ، کچن کون پدرم بكا ایلک دفعه اوله رق سكا قارشى پسه دیکم حسیاتی ، آمالی صورتی ، اوکاده عینی ملاحظهلری بسط ایتدم ، اوپله تفصیلات ایله بسط ایتدم ، بربریمزی ناصل سودیکمزی ده اودرجه شوق ایله سویله دم که سلمان بك طایانامادی :

— اوپله ایسه (پارس) ه کیتمه دن اول سخره نشانلا نعلیسك .

دیدى . عجبا اوسعاده نه کونی ایره جکز ؛ سحر جكم !

بوصوك تبشیر اوقیرجغزه او بر مباحثهلری هپ اونوتدیردی ، اونوتدیردی ده :

— آه ، دیمك ، دون صباح آبلامك بنی سكا میلمه ، محبته ، سنكله علاقه مه دار

اوزون اوزادی یه عادتاً امتحان ایتمی بوسببه مبنی ایمش ، اوح ! فترتجكم ، پدریکك حقی وار ، بربریمزه برآن اول نشانلانسه ق ، نشانلانسه ق ! دیدیرتدی .

اوانشاده او برلری اوافق برکوی مزار لغنك کنارنده توقف ایتدیلردی ، اوشاغی

کوندرمش ، فترتله سحری چاغیری یورلردی . اوحسبحال عاشقانه بالضروره ختامه

ایردی . فقط (فترت) بتون اوماجرانك شوقیله سوینجندن نه یاپه جغنی بیلمه یوردی .

اوموقعده بویله هیئتجه توقفه سبب (سلمی) اولمشدی . (سامی) تاصباوتندن

بزي رسمه چالیشيور، مستتی براستعداد کوستریوردی. دها شمیدن تقدیره،  
 تماشایه دکر لوحه لر یامشدی. اکچوق تصویر مناظره میل ایله یوردی، (قورو) لری،  
 (روصو) لری پک سویور، فیضنه، سعینه مشق تتبع، مشق امل اتحاد ایله یوردی؛  
 فطره نفاست آشنا ایدی، رسام ایدی؛ دها دوت، بش یاشنده ایدی، اله بر قلم  
 کیرنجه برخانه، بر آغاچ، بر چیچک رسمی یامغه چابالار، یاپامانجه یالوارده یالوارده  
 آنه سنک دست مهارتنه مراجعت ایلر، یاپدیغندن دقتله اورنک آیلردی. بویله لکله  
 دها چو جقلقده رسمه آلیشدی؛ اون، اون ایکی یاشنده ایکن عادتاً چیزییور،  
 قارالایوردی؛ شمدی هنوز یکرمی بر، یکرمی ایکی یاشنده ایدی، فقط بر رسام  
 عد اولونه بیلیردی. اودرجه مهارته مالک ایدی؛ اک بیوک فطاتی مناظر طبعیه یی  
 کشف و تدقیقه، باخصوص بومنظره لردن موضوعی انتخابده ابراز ایله یوردی؛ اک  
 متین قدرت صنعتی ایسه آثار نفیسه یی تماشاده، تبعده بولایوردی؛ (پارس) ده، (لوندیه) ده  
 صیق صیق (لوور) کبی، (رووایال غالی) کبی بر مشهر نفائسه، بر (موزه) یه کیدر،  
 اوراده بر لوحه نفاستک اوکنه کچهرک اوزون مدت بتون دقائک بدیع سنی کشف  
 ایله اوغراشیردی، جهانده اک بیوک ذوق حیاتی بویله براشتغال کزینده بولوردی.  
 سامی ایچون بومشغله نك، بومعرفتک فوقنده بر مسعدت یوقدی، اوله مازدی؛ قلب  
 فکر، هپ او امله معطوف، او اندیشه یه منحصر ایدی؛ حتی - انکاتره ده بیومش  
 بر قیز ایچون غریبدر! - اوله نمک؛ او، بارق صاحبی اولق بیله خاطره کبه یوردی.  
 بر کنج، ولو نحیف بر قیز جغز اولسون، بودرجه وجد ایله، استغراق ایله  
 بر صنعت، بر فقه ابتلا کوستریرسه، حقیقه ده براستعداد مالک ایسه البته عاقبت  
 خارق العاده مراده ایرر. سلمی ده بویله مسعود، موفق بر یولی طوتمش کبی  
 کورونیوردی، او کوی مزار لغندن بوغاز ایچنه طوغری معرفتمندانه بر نظر عطف  
 ایدنجه عادتاً غشی اولدی؛ آرتق هر کون فیرچه لریله، بویالریله، طاقیله اورایه کله رک  
 او منظره بدیع یی تصویر ایتمه قرار ویردی. فی الحقیقه او لوحه طبیعت جداً محتشم  
 ایدی، بوغاز ایچندن اک بدیع برنجه یی احتوا ایدیوردی، اک کمره بدایعی احاطه  
 ایله یوردی؛ اناطولی یاقه سنک اویشیل، یمیشیل قورولرینی، مشجره لرینی یریر  
 دکره طوغری انعطاف ایچنده، عادتاً سجده ایلر کبی کوستریر الهی بر تماشا ایدی.

تظر استغراقه اویله کورونیوردی که بعضاً دکز یوکسه‌لیور ، آهسته آهسته یوکسه‌لیور ، آغاجلرک سایه‌لریله مصافحه ایلدیور ، ظن اولونیوردی . او صاف ، او معصوم یشیلک ، صویندن طویراغنه قدر ، بتون اوزمینه مستثنی برکوزلک ، رقیق بر جاذبه ، خارقه‌لر ایچنده بر طبعیلک ، بر علویلاک ویریوردی .

جهانی دور ایدنلر مناظر طبیعه‌دن اوروپاده ایکی بدیعه‌نک حیرانیدرلر . بری بوغاز ایچی ، دیکری (ناپولی) کورفزی ... بیلیم وطندن بر جزء معرزی عرض ایلهدیکی ایچونمیدر؟ نه‌در؟ بوغاز ایچی بکادائما (ناپولی) کورفزدن بیك کره زیاده مکارم ایله مطرا، حتی مالا مال مطرا کوروندی .

نظر ، بر نظر اشتیاق مفتون مفتون اودریای نورا نوره انعطاف ایتدجه ایسته‌دیکی رنگی ، موجی ، اوزله‌دیکی لونی ، تموجی بولور ، هواده ، فضاذه ، قیرلرده ، تپه‌لرده سماوی بر ماوی‌یه ، بهشتی بر یشیله ، درین بر صفوته ، کمره بر طراوته کومولور .

متأخریندن بر ادیب افرنج ، بر شاعر ، آدیله ، صانیله (پیه‌رلوتی) بواقلم محاسنی تصویره صیغماز بر خارقه بیان ایله نارین اولدینی قدر ناشینده بر اثر مشهورنده ، (ناکاملر) ده نه‌مکمل تصویر ایلر! انسان اوپارلاق صحیفه‌لری او‌قورکن او صنع ازلاک عادتاً اودرجه روح‌پرور بر نظیره‌سنی بولور ، چشم جانیله کورور ، روحیه . فکر یلده ده اک مستر دقائق حسننه آگاه اولور . (لوتی) قدر بوغاز ایچی تصویر ، تکریم ایدن شاعر ظهور ایتده‌دی .

ایشته سلمی بویله بر لجه‌دن بر نخبه‌یه ، بر نخبه بدیعه‌یه تصادف ایتشدی ، مفتونانه ، مشتاقانه باقیوردی .

او رنگلری ، او الوان ، او روح شیونی ، سومه‌مک ممکن دکلدی . طبیعتک بوالصافی بویله سود سود سیر ایتدجه ، قلباً ، فکر آده سویمه‌مک ، بوسودا ، بوسوینج ایله حیاتدن خشنود اولماقوده ممکن دکلدی .

قیرجغز بوتأثیر ، بوتأثر ایله بر نشاط بی انتها ایچنده ایدی ، بر مدتدن بری بر مزار طاشته طایانمش ، کوکلنی ، کوزینی او تماشایه حصر ایله‌مشدی . بر آراق (فترت) ده آبلاسنک یاننه کلدی ، عینی انعامه ، استغراقه مظهر اوله‌رق



شوقدن تحف تحف اعلان شادمانی ایله مکه باشلادی ، نهایت :  
 — اوح! نه کوزلیر! نه نورانی بر تپه! بخیده اولونجه بومزارلغه کومسونلر،  
 روح شاد اولوردی.

دیدي ، او شباب ، او حیات ، او قدرت ایچنده پارلایان کنجك تولومه دائر  
 بوساده سوزی، بیلنمز نه دندر؛ بر ضربه برودت کبی بتون او جمعیه تاثیر ایتدی،  
 هر کسی بر لحظه تترهتدی ، حتی اورقیق ، بر فغفور کبی رقیق سحر جکی ایسه بر  
 نبذه صولدیردی، صارارتدی. قیزجغز یاواشجه حق سودیکنه :

— فترتجکم، او ناصل لاقیردی! بکا آجیایورمیسک!

دییه سرزنشده بولوندی .

حیاته بر درجه یه قدر بیکانه لکیله برابر سلمان بك ، اوغلنك او ملاحظه  
 صاقیانه سندن پك متأثر اولدی. ذاتاً ، بیایورز، موتك درین برزخمه سنی یمشدی.  
 او یارده «آمان اویله بر مصیبت ایله قتمرله نمه سون» دییه بردن برده قورقدی. فقط چوق  
 سورمدی، او قورقو کچدی .

یوخیلر آرناتود کوینك اوستلرینه طوغری یورینیورلردی . آیازمه نك اوکنه  
 کلدیلر. وقت اوکله یی کچیوردی. هرکس آجیقه مشدی . بیوکه بر چنار آغاچنك  
 آلتنده اوطورمغه، سفره یی قورمغه قرار ویرلدی .

اوشاقلر چنك اوستنه اورتولری سریدیلر. حولیلری قویدیلر. سفر طاسلرینی  
 آچدیلر ، شیشه لری دیزدیلر ، چاتالار ، یچاقلر ، طاباقلر ، بارداقلر عمومه توزیع  
 اولوندی. صحنلر الدناله طولاشدیریلیور، هرکس طباغنه ایسته دیکی یمکدن ایسته دیکی  
 قدر آلیوردی. حلوالر، یالانچی طولملر، تعبیر معروف ایله، اودرجه نفیس ایدی که  
 یوچشید یمکلره شمدی یه قدر پك آلیشما دقلری حالده بیله ینه (فترت)ك (سامی)نك  
 غایت خوشنه کیدیوردی .

فترته سحر طبعی یان یانه اوطورمشلردی . حتی بر برینه قارشى پك تکلیف سزجه  
 طاورانیورلردی ، بر آراق (فترت) سحرک بارداغندن صو ایچدی ، قیزجغز بو  
 یواشتر اکدن، صمیمیتدن ایچین ایچین بر سونینج طویدی ؛ دهها صوکرده ، (سحر)  
 بر موزك یاریسنی یمشدی :

— آمان، فترت، طاباقدن بر موز آلدده، يه؛ طبق چيلك، آرنائود كوي  
چيلكي كي، اويله كوزل قوقويور.

ديدی، فترت ايسه كوله ركبن سوديكنك النده قالان موز پارچه سنى قورادی،  
آغزینه کوتوردی. يمكه باشلادی.

— صحيح نه لطيف، نه لطيف قوقويور. فقط او كوزل قوقو سندمى! لېكدمى!  
يوقسه ميوددى؟

ديدی. بوشو خپرستك او معصوم قیزی هم شوقه، هم حجاب دوشوردی. حاصلی،  
غرامه بىستون رام ايله دی.

كريم پاشا، سلمان بك، كزیده خانم، هپ اوزاقدن اوزاغه، آلتدن آله فترته  
سحرك بو حسب حاللرينى، حسب حال عاشقانه لرینى انبساط ايله تماشا ايديورلوردی.  
او ملاحظه عشق تماماً قوامنده ايكن كريم پاشا آياغه قالقدی، بتون حضارك اولا  
مبهوتانه بر سكوتی، صوكرده صميمی بر آلتیشی ايچنده شو سوزلری سويله دی:  
— خانملر، بكلر!

بيلورميسكز! بزىچون بوكون بوتنه، بومسیره چيقدق؟ برصفا سورمك،  
طبيعتك الطاقندن بول بولنه بر لحظه مستفيض اولمق ايچونمى؟ اوت، فقط يالكز  
اوقدر دكل... بزدها بيوك برسور، دها سوركلی بر سرور ايچون بو اجتماعى  
ترتيب ايله دك. هپمرك قلبدن، روحدن سورديكمز فترت، سحر، بوكون، بو  
لحظه بتون شومكارم طبيعته قارشى، جهان محتشم شونك شواك صاف، الذاشمى،  
الك بليغ تجدداتى ايچنده ايسته بربرينه نشانلانيورلر، مسعود، معزز بر عائله وجوده  
كتيرمك ايچون ينه بربرينه وقف حيات ايله مكه عهدله شيورلر. سلمان بك برادر يمز  
ايله بن آيلردن برى كوردك، آكلادق كه بو ايكي محصول عمر يمز يكديكرينى  
سوييورلر، جدی، صميمی سوييورلر. بو سودا بويله بر نتیجه مسعوديه  
شايبسته ایدی.

ديدی، صوكرده كيتدی، فترتی ده، سحری ده آیری آیری اوپدی، تبريك  
ايتدی، سلمان بك، كزیده، سلمی، صمد، هپ بويله ياپديلر. ايكي نشانلى ده  
بربريله ايلك دفعه اوله رق شوق ايله، صفوتله اوپوشديلر. ايسته بو اكلنجه حقيقی

بر سور سرور؛ او مسیره ایسه پک محتشم، پک رعنا بر دوکون اوی اولدی. کنجلر جهت جهت تنزه طاعلایلر، ملاطفهیه قویولایلر. اغاجک آلتده مستریح بر زمینه یرلشدکدن صوکره کریم پاشا سلمان بکه دیدی که:

— عزیزم، بیلیم، اجتماعی، سیاسی، ادبی هر درلو ترقیاتمزدن خشنود دکاسک؛ تکاملمزی کوشک، یوان بولیورسک؛ فقط بر کره چوجقلغمزی، کنجلکمزی خاطرلا؛ بر کرده شو کنجلیمزه، بالخاصه فترتمزه، سحریمزه باق. باقده هیچ اولمازسه بو تکاملمزی، یالکیز تکاملمی؛ بو انقلابمزی اولسون، تقدیر ایت؛ اجدادیمز، پدرلیمز، حتی بز بویله می بیودک؛ بویله می سودک، سولدک، نشانلاندق؛ احوال اجتماعیه مزده کوردیکک بو تحول سیاسیاتمزدده، ادبیاتمزدده، حاصلی، کافه خصوصیاتمزدده دها زیاده واقعدر. یوق، سلمان، مکتبدن بری بر یریمزی طانیرز، طارلما، فقط مفرطسک، دائماً تهیجسک، هیچ بر زمان، سن کالکده بیله، قابکه صیغمادک.

سلمان پک بو مطالعه لره شو مقابله ده بولوندی:

— پاشا، بر ضرب مثلزم، برکل ایله بهار اولماز، دیر. بر جزء ایله، بر جزء صغیر ایله قوص قوجه برکی ایچون حکم ویریه مز. ملاحظه لریکیز قسماً طوغریدر. دیدیککیز تحول، تحوللر واقعدر. اوت، ساده اجتماعیاتمزدده دکل، ادبیاتمزدده، سیاسیاتمزدده هپ واقعدر؛ فقط قورقارم که بو تحولاته بر اثر تکامل، حتی انقلاب دییه مه یز؛ دیسه ک، دیسه ک اختلال دیرز. تکامل تدریجاً، روح املیسنی محافظه ایدرکدن، عمومی بر صورتده اولور. انقلاب ایسه بردن برد وقوعه کلکله برابر ینه عمومیدر، ینه بر اطرا ده نتیجه ویریر. حال بو که اختلال بر هرج مرجدر، بعضاً بر حسن عاقبه اقتران ایدر، لکن اکثریاده بر جماعتی بستیون یولدن چیقاریر، قارغاشه لغه بوغار، باطیریر.

انکلتردی، انکلیز تاریخی نظر تبعدن کچیرنجه اجتماعیاتده، سیاسیاتده، ادبیاتده تکاملک بر نمونه خارق العاده سنی کوریزسکیز. بر خلق، بر هیئت، بر جمعیت آهسته آهسته، اویله اولماسه بیله. هیچ هرج مرجه میدان ویرمه دن. همان همان هیچ یاقادن، ییقمادن، قان دوکمه دن تشکیلات اجتماعیه و سیاسیه سنی تعدیل ایله یور،



اصالتدن عوامه، زنکیندن فقیره طوغری تعدیل ایله یور؛ اول امرده اداره کیفیه دن، مطلقیتدن فسیح، متین بر مشروطیته کچور، کیتدجکده عواملاشیور، سیاسیاتجه، اجتماعیاتجه، هر جهتجه عواملاشیور، دها صوکره اصحاب اصالتک امتیازلرینی برر یرر آلیور. بین الاهالی مساواتی کیتدجک تأمین ایله یور.

بیلیرمیسکز؟ ینه انکاترده بوصول سنه لرده اجتماعاً، سیاستاً او یله آثار تکامل تجلی ایله دی که بوتحول باشقه بر مملکتده اولسه ایدی، انقلابه، حتی اختلاله بادی اولوردی. مثلاً عمله نك، فقرانك حقوقی نسبةً توسیع؛ حیاتی، معیشتی ممکن مرتبه ترفیه ایدلدی. اصیلزاده لرك، زنکینلرك ایسه امتیازلری هان بستیون قالدیرلدی؛ فقط ویرکولری، مکلفیتلری ده صوکره درجه آرتیرلدی. اومشهور (لورد) لرجلسنك حکمی کلی اسقاط اولوندی. کافه نفوذ حاکمیت مجلس عوامه ویرلدی.

ایشته بتون بوتقلبات، اوت، جدال ایله، مناقشات ایله، فقط آهسته آهسته، فقط مشروع بر طرزده، خلاصه قانون تکامله ترفیقاً وقوعه کلدی. ادبیاتجه، حتی عاداتجه ینه بویله در.

انجق بوخارقه لر انکلتیره، انکلیزلره مخصوصدر. مثلاً فرانسه ده بویله تحوّلر دائماً انقلاب ایله، بعضاًده اختلال ایله حصول بولور، فقط نه اولورسه اولسون، نتیجه ینه آز، چوق مسعوددر، مفیددر.

ایشته بتون بومالک متمدنه بویله یوریر، یوکسه لیر، طورماز، هیچ طورماز؛ طورمادی ایچونده انقراضدن یاقه یی قورتاریر. ویل اومملکتلره که اونلر بوقدرتی کوستره مزلر، اونلر بومشی ازلیده توقفه اوغرارلر. اوغرایجه ده انقراض بولور، پریشان اولورلر.

دیمک، بزدکیشمزسه ک، یوزیمزسه ک، یوکسلمزسه ک عینی تهلکه یه معروضر. دیمک، تکامله، اولمازسه انقلابه، اوده اولمازسه اختلاله، فقط نتیجه ده شاد، موفق براختلاله محتاجر.

(فترت) هیئت اجتماعیه مزده ندر؛ برثمره تکاملی؛ برمحصول انقلابی؛ یوق. بلکه بر نتیجه اختلالدر. برترك چوجنی که برانکلیز آنه دن دنیا یه کلدی، انکلتیره ده طوغدی، فرانسه ده بیودی. عثمانلیق ایچون تکامل بویله اولماز، بویله

اولورسه اختلال اولور . نچون بویله یایدق ! چونکه بزا اساساً ، اسباب مبسوطیه مبنی تکامله ، انقلابه مقتدر اوله مادیغمز ایچون اختلالجی یز ، اختلالجی اولدق . قوممیزی ، قومیمیزی فضله محافظه کار ، ترقیات عصریه یه پک بیکانه بولدق ، قیزدق ، قاباردق ، نهایت وادی اختلاله صایدق . قانون تکاملی ، قواعد انقلابی هیچ کوز تمه یه رک اوله یایدق ، فقط اسف که بوسائقه ایله ده هیئت اجتماعیه مزدن ، کتله حقیقیه عثمانیه دن بر مرتبه آیرلدق ، کوندن کونده آیرلیورز . عمومیت اعتباریه ، انبای وطنمیزی آ کلاماز ، بکه مزی : آ کلایانلر ، بکه نلر الحق بر شرمزه قلیله در که اونلرده اختلالجیدرلر .

بر قومک ترقیسنه ، نجاتنه اختلال کفایت ایتمز ؛ بالعکس ، اکثریا مانع اولور ، لکن تکامل ، انقلاب کر کدر . بز نه زمان بو وطنات حقیقی خادمی اوله بیلیرز ؛ نه وقت اختلال واقعی منتظم بر شکل تکامله ، یامعقول بر طرز انقلابه صوقابیلیرسه ! ایشته هیئت اجتماعیه مزدن آیرلدیغمیزی آ کلایورز ، یولمیزی بر پارچه تعدیل ایتمک ایسته یورز . دکللی ! فقط او هیئته ده آ کلامق کر کدر که بو محیط آرتق تجده محتاجدر ، کهنه لکدن بوغولیور . طبیعتات مادی و معنوی هر درلو یاردیمنه رغماً بوغولیور . افکار عثمانیه او عصرلرک تشییقندن صیرلمغه ، عصریمزک مقتضیاتنه هر جهتیجه آشنا اولمغه یا لکز محتاجده دکل ، عادتاً مقتدردر . بویله اولمازسه عثمانلیلق معنوی ، مبهم بر فقر الدمله کوندن کونه سوز ، بیتر ، ازایلر ، کیدر ، طبقی شمدی اولدینی کی ...

بداخته قارشی کوز یومق جا زمیدر ؟ معنویاتمزه ، مادیاتمزه ، هر حالته عبرتله باقیکنز ، نه کورورسکنز ! بر پریشانلق ، بر طاقتسنزلق ، بر ناتوانلق دکللی ! نچون بویله در ؟ چونکه ، دیدیکمز کی ، عصرلردن بری طور یورز ، یوریه میورز ، اطرافزده ملل سائر یوریدیلر ، ایلریله دیلر . بز بویله اولیرسه ق البته مضمحل اولورز .

پاشا ، بو حقائق سز ، بز آ کلامشز ، نه پاره ایدر ؟ بز بر اقلیت قلیله یز . جمهور عثمانی بوادرا که ایرملیدر . ایشته اختلال واقعیمزک امید ویرن جهتی اودر که شو ابتهاج ایله کورد کلریمز کی کنجلیرمز یتیشیرلر ، چوغالیرلرده بودردلریمیزی کشف

ایدرنر ، بر عزم خارقه پرداز ایله بو اختلالی یاواش یاواش تهذیب ، توسیع قیلارلر .  
اولا بر انقلابه ، صوکره بر تکامله قلب ایلرلر ، عمومیلشدیریرلر ، اوسایهده  
ایسه هیئت قومیه مزه بر تجدد ویریر ، بر نخبه غرای ترقی صوقارلر .

کریم پاشا بومصیب ملاحظه لره حق ویردی ؛ فقط ملول ، محزون دوشونمکه  
قویولدی ؛ چونکه علماً محدود اولقله برابر فکر آ مترقی ، قلباً نجیب بر آدمدی ؛  
وطنک فلاکتی آ کلایوردی ، سعادتتی جانندن اوزله یوردی ؛ بو سائقه ایله ده  
عائله سنات ، اطرافنک فیضی ، ترقیسنی بتون عثمانلیلرک ترقیاته بر مقیاس عدایدرک  
سوینیوردی ؛ فقط سلمان بکک اوانتقادلریله ، ایقاظلریله بوطنونک حقیقتدن زیاده  
خیال اولدیغنی آ کلادی ؛ بالطبع متأثر اولدی .

سلمی ایله کزیده قول قوله کیرمشلردی ، هم چمن چمن کزییور ، زمان زمان  
چیچک طویلا یورلر ؛ هم ده صاف ؛ صمیمی کوروشیورلردی .

کزیده خانم سلمایی بر همشیره کبی سوییور ؛ علماً ، کلا گده پک تقدیر  
ایدیوردی . حقیقه سلمی ساده رسمده دکل ، عمومیتله معرفت نفائسده  
خارق العاده ، فلسفه نفاسته کالی واقف ایدی ؛ چونکه چوق اوقویوردی ؛  
انکلیز فیلسوفلرینی برر برر نظر تتبعدن کیریوردی ؛ ذاتاً فطرتاً ده فیلسوف  
ایدی .

مثلاً کزیده یه دییوردی که :

— اوله نمکمی ؟ نیچون ؟ حال حاضریم سعادت محضه دکلی ؛ قاردشمی ، بابامی ،  
بیوک آنه می ، هپ جانم کبی سورم . بو محبتلر قلم ایچون پک صحیح بر غدای  
کافیدر . صنعت ، رساملق ایسه ، ناشطه فکرمدر ، نشوة روحمدر . بو آهنگ  
حیاتی محافظه ایتمک نیم ایچون اک بیوک بر اندیشه در . باشقه بر دوشونجه یادیمه  
بیله کلز . انکاتر ده بیوک آنه مله برابر کچیردیکمز حیات پک ساده در . فقط  
نه درجه منعمدر ؛ قلبمه ، فکریمه لایق قطع انشراح ویریر . بعضاً پدرم ، برادرمد  
کلیرلر ، هپ او مسکن معززیمزده طویلانیرز ؛ ساعتلرجه باش باشه ، بززه  
کوروشیرز ، اکله نیرز . اکثراً هپ برابر کزیمکه چیقارز . تاچو جقلغمزدن بری  
عادتدر ؛ زمان زمان باباجمماک بویتنه صاریلیرم ، اووقت بیچاره آنه می خاطرلارم ،



کوزلرم در حال یاشله ، لکن ایلرمده دعا ایله ، مرحومه نك روح پاکی ایچون دعا ایله طولار .

حالشق زمانی کانه ، حجره مساعیمه چکیلیم . رسملیمه ، لوحه لیمه وقف اجتهاد ایلرم . ساعتلم انشراح ایله کچر ؛ مسعود ، معزز نتیجه لره ایررم .. حیاتدن ده فضلنه نه بکله نیر ؟ .. اوت ، ازدواج بر قیز ایچون خوش برکاشانه املدر ، فقط بالنفس بکا اومرتبه جاذبه دار کورونمه یور ، حتی بلکه بو انتظام عمریمه سگته ویریز کی کلیور . اوت ، بیلیم ، عمومیتله کنج قیزلر بویله دوشونمزلر ، فقط کزیده خانم افندی ، امین اولکیز ، سوزلرم صمیمیدر ، دوشوندکاریمی صیمی دوشونیورم .

کزیده یکریمی یاشنده بر قیزك بودرجه تمکین ایله ازدواج کی بر مسئله حیاتیه ایچون بسط مطالعه ایدیشه مهوت اولدی .

ناسل اولماسون ؛ حیاتده اواعتدال ، حتی اوکالات نه در ؛ او عمر صاف وساده دن اونه خشنودیدر ! ایشه بوفیضك باعثی ده اونزیه تربیه در ، انگیز تربیه سیدر . مع مافیه کزیده سلما دن نهایت شو استیضاحه کیریشدی :

— سلمی خانم ، هر خصوصجه مزیت صاحبی بر کنج سزه عاشق ، ید ازدوا . جکزه طالب اولسه نه یاپارسکز ؟ او طلبی ردمی ایدرسکز ؟ مطلق بکار قالمقی ایسترسکز ؟

— کزیده خانم افندی ، بوسوالکیزك جوابی قولاید ، او یله بر حال وقوعه کلیرسه اولافکریمه صورارم ؛ فکراً ، عقلاً او یله بر علاقه یی تصویب ایدرسه م صوکرده قلبمه مراجعت ایدرم ؛ قلباً موافقت حس ایدرسه م البته او ازدواجی قبول ایلرم . فقط شمیدی به قدر بویله بر وقعه باشمه کله دی . فی الحقیقه بنی ایسته ینلر اولدی ، کوزلجه بر قیزی علی الاطلاق ایسته ین دایماً اولور ، فقط بو طالبرك هیچ بری عقلمه ، فکریمه ملایم کورونمده دی ، او یله اولونجه ده قلبی امتحانه بیله حاجت قلمادی . بنده قلب دایماً فکره منقاددر . قلبك محاکمه لرینی عقل آکلاماز ، دستوری بکا کوره دکل ، ادراکم دایماً حسیاتمه غالبدر . سودیکمی ، سومدیکمی هپ اسباب معقوله سیله سورم ، سوئم .

کزیده نك سلمای بوضورتله ازدواجه دائر امتحان ایدیشه بر سبب واردی .  
 بایدور بك بوقیزه مبتلا ایدی ، فقط سلمادن قوری بر ترا کتدن ماعدا بر مقابله  
 کورمه دیکی ایچون بوابتلاسنی اظهاره جسارت ایده مه یوردی ، بو حالک فرقه  
 چوقدن وارمشدی ؛ بومکلمه دن صوکرده آکلادی که بایدور ایچون سلمادن امید  
 یوق ایدی .

صمد ، بایدور ، سداد فترتک شعر سویله دیکنی خبر آلمشردی . سحر ایچون  
 یابدیغی قطعه یی ده کورمشلردی ، حیرت ایچنده ایدیلر ؛ بویله آزر زمانده اوکنجک  
 شاعر اولسنه عقل ایردیره مه یورلردی ؛ نهایت ، کیتدیلر ، وقعه یی کریم پاشایه ،  
 سلمان بکه نقل ایتدیلر . پاشا او حیره اشتراک ایتدی ، حال بوکه سلمان بك  
 شومطالعهری بسط ایله دی :

— تعجبه هیچ معنی یوق ، فترت شاعر دکل ، ناظم اولمش ؛ یعنی افعله وفعله  
 اوکر نمش .. بوتجربه و قتیله هیمزک باشمزدن کچدی . علی العاده تحفه وهی یی  
 او قور او قوماز اکثریتله برهوسه دوشرز .

حمد بی حد اوکر مفرمایه  
 فعلاتن ، فعلاتن ، فعلن

تقطیعی بولور ، بولماز شاعر اولورز . هله صوکرده بعض قدمای شعرا مزك ،  
 بالخاصه متأخرینزك حافظی اولیویریرسهك بر چوق سوزلری قولای قولای وزنه  
 صوقه بیلیرز .. ایشه ( فترت ) ده بویله یاپدی ، دیمکدر ؛ فارسیدن ، عربیدن ،  
 ترکجه دن او متعدد بیتلری خواجه لرندن دیکله یه دیکله یه ، دیکله دیکه حفظ ایله ایده  
 نظمه آشنا اولدی ؛ نهایت ؛ عادتاً بر سوق طبیعتله :

شهابم ، ماهتابم ، آفتابم ، آب وتابمسک ! دیدی ، فقط نیچون بوقدرله اکتفا  
 ایتدی ، بالفرض :

بهارمسک ، کسک ، کابنمسک ، کاستامسک ! دیه دوام ایده بیلیر ، بر منظومه  
 غرا میدان قویاردی ، قویاردی ده اوده باشمزه بر شاعر نورسیده کسبیلردی ،

فقط اومارم که بو چو جلقدن محافظه نفس ایلر، چونکه بویله ملعله شه شعر دینه میه جکی ایچون بویولده صرف ایدیلان اجتهادده، وقتده هدردر.

بونوع شاعر لکک، ناظمیغت بر نفی اوله بیلیر. اوده ترکیبی غوامض قواعدیه اوکرمکدر، فترت ایسه، بوکالاته چوقدن مالک اولدی. یوق، شعر باشقه بر فن، بر نخبه معالیدر؛ باشقه بر ادراک، بر تعالیدر، حتی دینیه بیلیر که بزده اوافعله و تفعله قید کرانی حقیقی شاعر لکک، حقیقی شعره بر درجهیه قدر مانعدر، هیچ دکلسه انکادر.

صمد — استاد، بوملاحظه لریکن اساساً طوغریدر، فقط شعریمزک تکامل اخیرینی تقدیر بیورمازمیسکن؟ اساتذه متأخرین اوضرورت عروض ایله برابر بوزمینده بیوک بر تجمده موفق اولمادیلمی؟ غریبه یا قلاشمادیلمی؟ آز، چوق بر بدیعه کمال ایدینه دیلمی؟ اک صوک شاعر لریمز، حتی کنج لریمز ینه او وادیده قسماً دهایلری بیله کیتمه دیلمی؟ بر قدرت تکامل، بلکه ده بر فیض انقلاب کوسترمه دیلمی؟ اویله معنایی لفظه اسیر، قربان دکل.

معنی نه در؟ الفاظ ایله اوغراش بره اوغراش!

— فقط الفاظی معانییه همان همان ایسته دکلی کی تابع، مطیع قیلما دیلمی؟ شمدی منظمه لریمز، مفصل، منتظم آثار شعریه من یوقی که بر فکری، برامی، بر اندیشه نی حقیقی بر بلاغتله، بر انشراح ایله باشدن باشه تبلیغ، بر منظره نی بر لوحه نی کافه دقایق له، سنو حاتیه تصویر ایله یورلر؛ بر واقعیه نی، بر فقره نی، بر حکایه نی بتون تهیجاتیله، صفحاتیه اینجه دن اینجه یه نقل ایدیورلر. بو ترقی ایتمک که تصدیق، حتی تجیل بیوریر سکن. اوت، بز فترتک قطع هسنی طبعی بر شعر حقیقی دکل، بر نظم بسیط کی تلقی ایدرز، فقط آز وقت اینجده، ولو ساده اولسه ده، قواعد نظمی اوکرنه بیلیمسنی در که شایان حیرت بولاق.

سلیمان — صمد بک. مطالعه لریکن طوغریدر، لسانجه ترقیاتمک شعریمزده انعطافی بلنددر. انجق شعری، شاعری تقدیریمزده سزکله بر بریمزدن آریلیورز. فکرجه، شعرك محیطی، افق، روحی، تأثیری؛ شاعرک ایسه نفوذی، قدرتی؛ بر قومه، بر قومیه، بر هیئت اجتماعیه خدمتی بزده کوردکاریمزدن، حتی اک صوک



کوردکاریمزدن ؛ اومسعود ، مشکور تجلیاتمزدن بیله باشقه در ، دها باشقه در .  
 شعر ، شاعر اودر که تحساستیله ، تهیجاتیله ، آثاریله بر خالقک باشند باشه ،  
 عوامندن ، خواصنه ، کنجندن اختیارینه قلبنی ، فکریخی ، خیالی خلیجه دوشوریر ،  
 فقط مطلق بر نقطه نظردن تکملنه ، تهیجنه ، تعالیسنه ، تصفیسنه خدمت ایدر ،  
 حتی یالکز بر قوم ایله ، بر دور ایله ، بر محیط ایله قلماز ؛ اقوامه ، ادواره ،  
 محیطلرده کیتدجه حلول ایلر ، پایدار اولور . ( ایلیادا ) بر شعر ، ( هومر ) بر  
 شاعر اولدینی ایچون بومظهریته ایردی ، همده قرنلردن ، عصرلردن بری ایردی ،  
 الی ماشاللهده ایرر .

اوقدر یوکسکلره ، او معالییه چیقمایهرق زمینمزه ، زمانمزه اینسه کده بالفرض  
 ( فترت ) ک دیدیکی کی کلشی کوزل زمان زمان ذکر ایتدیکمز ( بودلهر ) ک ( الم  
 چیچکاری ) فی اله آلهق اوده بر شعر در ، ( بودلهر ) ده بر شاعر در . چونکه  
 او اثر تقریباً الی سنه اولی فرانسه کی برجهان کالاتده بیله یکیدن یکییه کوزلکلرک ،  
 حقائق نفائسک کشفنه بادی اولدی ؛ فکرلری تهیججه ، قلبلری هیجانه ، خیاللری  
 توجه دوشوردی ؛ حسن ایچون براق نوین آچدی . بوشعرک قائلی بر غریبه  
 خلقت ایدی ، بعض اطواریله ، حرکاتیله عالمی شاشیرتدی ، حتی بعضاً قیز دیردی ،  
 لکن شاعر ایدی ، بر نادره فطرت ایدی ، تاریخنده یاشادی . حتی شاعر اودر که  
 بالفرض ( شاتو بریان ) کی تاچوجتلغندن خاتمه حیاته قدر همان همان نه یابدیغنی  
 بیلمز ، کولرکن آغلار ، آغلارکن کولر ؛ فرانسه یه صیغماز ، دها شبانده آمریقاه  
 قوشار ؛ مدنیلردن بیقار ، وحشیلرله دوشر ، قلقار ؛ صوکره ینه وطننه دوز ، انقلاب  
 کیر ایله اوغراشیر ، بیوک ( ناپولئون ) ایله چارپیشیر ؛ قرانلرده کینه مز ، سفیرلکی  
 استخفاف ایدر ، ناظرلنی کوچک کوریر ، جهانک الک کوزل قادینه ، بر ملکه جله  
 بیله ناز ایدر ، بر تعبیر عامیانه ایله قضا طوتار ؛ عمرینی ، استعدادینی اسراف ایلر ،  
 مغروردر ، خود پسنددر ، وفاسزدر ، یار جاننه ، رفیقه حیاته بیله یار اولماز ، مغلق ،  
 مبهم ، مجهول بر دردک اسیریدر ، اسیری اولمنله برابر :

اما اونکلر در ینه عالمده وارلر  
 قورتارما ای خدا ، بنی بواکتر ابدن

دیر ؛ دائماً بزرادر ، دائماً مضطربدر ؛ سومکدن ، سولمکدن ، کائناتدن ،  
 حیاتدن بیاه مشتکیدر ، معذبدر ؛ فقط بتون بونائزاتی ، بوعدایلرینی ، اضطرابلرینی  
 اویله آلهی صولتولرله تبلیغ ایلر ، اویله مونس ، رقیق ، مهیج اثرلرله پی در پی  
 فصل فصل بزه احساس ، افهام ایدر ، اسلوبده کی کالاتیله ، تجدداتیلله لساننه بیله  
 معنی ، لفظاً او وسعتی ، اوانجذابی ویریر که شاعر لکنی بحق عالمه تسلیم ایتدیریر ،  
 یازدقلرینی ، شعرلرینی هر صاحب ذوقه سوه سوه اوقوتدیریر ، اوقویانلری ده  
 دوشوندیریر ، فکرآ ، قلبآ ، خیالآ ، هپ ، هپ یوکسه لیر .

ینه فرانسزلردن ، ینه اوعصر ایچنده (موسه) بر شاعر در ؛ خلقآ ، خلقه بر  
 شاعر در ؛ هنوز وارلغنی ادراکه باشلار بر کنجدن غایه حیاته یاقلاشمش بریر ؛ نییه  
 قدر بتون بشریتک دائماً متحسسانه اوقودینی ، اوقودجه سودیکی بر شاعر در .  
 بر شاعر در که مثلاً کیجه لری تصویر ایلر ، جهانی حزن ایچنده سرورده ، سرور  
 ایچنده حزنه ویریر ، یریر کولدیریر ، آغلاییر . موسه ، موسه ، حتی بر سرور  
 شعرادر ؛ اویله اما حیاتی نه حویبالقله ، حتی نه گریه ایله ، نهایت نه ماتمه کیردی ،  
 بدبخت اولغه وار قوتیله چالیشدی واولدی ؛

بر شاعره انتخابی مقصد

بر شاعره شرایب بر سمن خد

دیدی ، الک کوزل عمرینی بویکی ابتلایه حصر ایله دی ؛ دهاسن کاله ایرمه دن  
 قنایی آرادی ، آرادی ؛

قراریاب اوله مام کرچه مست سرشارم .

حسد! اورنده که آسودده در مزارنده . .

مدلولنه ماصدق کسادی ؛ نهایت ، مرادینه ایردی ؛ فقط شعرینه ، شاعر لکنه  
 کائناتی حیران ، مفتون ایله دکن صوکره ایردی .

انکیزلرک اومشهور (اوسقار وایلد) ی همده فرانسزلرک (بودلهر) یی  
 هرجهتجه آندیریر ، بیوک بر شاعر در . اوده عمرینی دهافنا بر صورتده افدایله دی .

عالمده اڭ مستكروه مساوىء اخلاقه طوتولدى ؛ جانيلر كې زندانه آتلدى ؛ ذلت ، سفالت ، فلاكت ايچىندە ئولدى ؛ لىكن بوكون جهانك تىكرىم ايله ، مشتاقانه نظر مطالعه دن كچىردىكى بدايع فكريه نك والدىدر ، اويله شعرلر ك شاعرىدر ..

بو محيط واسى بر درجه دها وسعتله شىر يرسەك ينه شعر ، شاعر اودر كه سنوحتايه ، اوت ، صرف سنوحتايه ، تفكراتيله قومنى ، قومىتنى بر دركە پستيدن آهسته آهسته بر مرتبە بلندە رفع ايدر ، رفع ايتىمكه چالیشانلر ك راهبرى ، مشوق ، نورى اولور ؛ قارانلق ، زفيرى قارانلق بر كىجەدە بر وادى بى انتهانك افقندە ، افق ازليسنده پارل پارل پارلايان برستارە اقبال كې ... مثلاً (شيلار ، گوته) آلمانلر ايچون بو خدمت مىردى ايفا ايله ديلر ، اولردن اول آلمانيا پست ايدى ، طاغىنيق ايدى ، پريشان ايدى ؛ اولردن صوكرەدر كه يوكسەله بيلدى ، طوبلانه بيلدى ، شان ، سطوت قازاندى .

جهانك اڭ معروف اقوامى ، انگليزلردن روسلره ، مجارلردە قدر آتيلرىنى ، اقباللرىنى بر زهره سحر كې تا اوزاقلردن ، افقلىردن شعرلره ، شاعرلرينك الهاماتيله ، عادتا هاتفانه الهاماتيله كوردىلر ، بولدىلر ، نهايت ايدىندىلر . انگلترەدە بر (نيسون) ، روسيەدە بر (پوشكين) ، مجارستانده بر (پەتوفى) انگليزك ، روسلق ، مجارلق ايچون بر قطب مهيىج تعالى ، بر مهر مشعشع تكميل اولدىلر . شعر ، شاعر اودر ، اومرتبە غرايه ايرر . بزده ايردىمى ؟ بزده شمدى يه قدر اويله اوله بيلدىمى ؟

ايشته ، صمد بك ، تخالفمىز بونقطه دقيقه ددر ، دكلى ؛ يوقسە سزك سرد ايتدىكى كىز ترقيات شعريه مزى ، تجددات شاعرانه مزى ، بر مرتبە يه قدر شعري مزى ، شاعرلكى مزى انكار ايتىمك انصافىمىز لقدر ، المدين كىز ..

بايدور — فقط سلمان بك افندى ، ينه منصفانه دوشونىليرسه ، بزيالكنى شعردە ، شاعرلكىدە دكل ، بتون شعبات معرفتده ملل سائرەدن كرى دكلى ير ؟ ذكر ايتدىكلى كىز كې شعرلىمىز ، شاعرلىمىز يوقسە اويله لوخەلىمىز ، رساملىمىز وارمى ؟ اويله علملىمىز ، عالملىمىز وارمى ؟ تاريخلىمىز ، مورخلىمىز وارمى ؟ يوق ، البته يوق .. اوحالده يالكنى شعريمىزدن ، شاعرلكىمىزدن دكل ، بتون معارفىزدن مشتكى اولمىز .



سلمان — بایلدور بک، سزکله ده اساسده متفقز، لکن تفرعاده دکانز. اوت، هر معرفتجه بز جهان تمدندن کریز، فنونده، علومده، هپ اویله یز. بویله اولمقله برابر دمندن بری عرض ایتدیکم شرائطی احتوا ایلر شعره، اومرتبهده شاعرلره مالک اوله بیایردک. (هومر) توره دیکی زمان یونانیلر البته سلسله ترقیجه حال حاضریمزدن دون ایدیلر. اویله قرون قدیمیه کیتمسک، زمانمزه یاقلاشسه عجباً (پوشکین) یتیشدیکی وقت روسلر، (شیللر) ک زماننده آلمانلر اودرجه مترقیمی ایدیلر؟ کالات سائره ایچون طبعی تمدنک تأثیری کلیدر؛ فقط الک بسیط برقومک بیله دیدیکمز، دیله دیکمز شعری، شاعرلری اولور، اولق کرکدر.

بزده نه ایچون بویله اولمادی؛ بو سؤال عادتاً بر مسئله اجتماعیه درکه تاریخ اجتماعیمزه تعلق ایلر. ناصل، نه زمان، نرده برملت، برقومیت؛ لسان، تاریخ موجودیت صاحبی برملت، برقومیت اوله رق تشکل ایتدک، ایدیه یلدک؛ یازدق لریمزی، دوشوندکلریمزی، بربریمزه اکلایمغه، دیکله تمکه ناصل، نه زمان، نرده باشلادق، موفق اولدق؟ عرفانمز، لسانمز، ادبیانمز، حاصلی بتون کلاقمز ناصل، نه زمان، نرده وجوده کلدی؟ خلاصه، بتون بو مسائل تالیه تحلیل ایدیلیرسه، نتیجهده اومسئله اساسیه کشف اولونور. نیچون شمدی یه قدر هر درلو شرائط مبسوطه سیله شعریمز اوله مادی، شاعرلریمز یتیشه مدی؟ اوحقیقتده اووقت میدانه چیقار.

سلمان بک، کریم پاشا اوکنجیلرله باش باشه ویردرک بومباحثیه طالمشلردی. کزیده ایله سامی اوجوارده قدیم برکلیسانی زیارت ایدیور؛ (بیزانس) دن اثر، خاطره ارایورلردی. (فترت) ایسه شانلیسیله برابر خنده لر، مسرتلر ایچنده تارلالری سیر ایدیوردی؛ زمان زمان یلدرمه سنک اتکلرینی ایله طوته رق سحرک بردمت یایمق ایچون منکشه لر طویلا دیغنی کوردکجه:

صانجوب بله نازنین اتکار،  
طویلاردی اتک اتک چیچکلر!

ترانه سیله اعلان مسار ایله یوردی. اوایکی کنج بویله مشتاقانه ساعتلردن بری

الاله، يان يانه قوشوشور، كزييور، اكله نيورلردى؛ فقط آرتق ايكندى اولمشدى،  
اقشام ياقلاشمشدى، بتون يولجيار ياواش ياواش ينه اوچنار آناچك آلتنه طويلانديلر،  
صوكرده بياك طريقيه روم ايلي حصارينه طوغرى يوله قويولديلر .

سحر حالا نشاط. نشئه ايچنده ايدى، سياحه ساده پنه دكل، عادتا بركل كبي  
قينقيرمى ايدى، كوكنه ده بردمت منكشه طقشدى، اوطور معصوم آتشييه،  
حسنيله، صباحتيله حقيقه دلربا ايدى؛ اويله اولديغى ده شمدى بالذات اكلامغه  
باشلامش، باشلامشده برپارچه نازين برادا آلمشدى . ( فترت ) ينه اويله آتش،  
اويله خلدجان ايچنده ايدى، متصل سوديكنه سوه سوه، سوينه سوينه باقيوردى،  
بربرندن بردرلو آرييه مايورلردى .

بتون جماعت بويله كوله، اكله نه كوچك بىكقدردى كلديلر، انكليز كليسانك  
اوكندن كچركن لطيف برترانه ايشتديلر، طورديلر، ديكه ديلر. كليسانك ايجريسنده  
قادينلر، قيزلر طويلانمشلردى، عبادت ايدىيورلردى؛ اثنائى عبادتده ايسه مطرد  
بر آهنگ، مكمل بر موسيقى ايله هپ بر آغزندن برنشيده اوقيورلردى . اوبدايع  
غروبه قارشى بونوحات عابدانه مؤثر ايدى. ذاتاً سسلرده كوزلدى .

كريم پاشا :

-- نه كوزل اوقيورلر، عجباً نه اوقيورلر ؟

ديدى . بوسواله سلمى خانم :

— بو اوقونان نشيده انكليزجه پك معروف بر شعردر كه كليساد، خارجه،  
ترده اولسه اكثراً خالقك لسانده در .

جوابى وىردى . اوتدند ( فترت ) سوزده قارىشهرق :

— آه، سلمى بوشعري اويله مونس بر آهنگ ايله سويلر كه :

ديدى . عمومك رجاسنه قارشى كلهمدى، سلمى خانم بىكدن روم ايلي حصارينه  
طوغرى ريلختم بويى يوريركن اومنظره غراي غروب ايچنده؛ آسمانك، زمينك،  
دكزك، ساحلك احتشامنه قارشى بر صوت صميمى رقيق ايله اونشيدى  
اوقودى، او اوقودقندن صوكره ( فترت ) ده همان حرفياً شويله جه تركجه به ترجمه  
ايتدى :

« کونش باغیور . اقسام ییاندیزی کوروندی ، بلیغ بر ندا قولاغمه ایردی ،  
 بو قیلری آرتق براقه رق دکنه طوغری آچلمق زمانی کلدی . .  
 » او دمدمه بیتنجه ، او مدامدید چکیلنجه شمدی طالعهلر نه قدر ساکندر!  
 سطح دریاده نه کوپوک وار ، نه کورولتی ! . . .  
 » او قمر بی انتهدان نه چیقیدیسه غربت بیتنجه ینه اورایه کیرر . شفق ،  
 غروب ، چاڭ صدالری ، دها صوکره ، دها صوکره کیجه در . . .  
 » دیلرم ، بن بویله ساحلدن آریلیرکن وداعمدن کیمسه متأثر اولماسون .  
 چونکه طالعهلر بنی بو جهانک ، بو فضانک اوتهسنه ، اویله اوزاقلره سوق  
 ایدنجه ؛ برکده ساحلدن اوزاقلاشدیره رق او آچیلرله کوتورنجه اومارم ، اومارم  
 عاقبت خالقماه یوز یوزه کلیرم . . . . . »

او مویسج انشاد ، بو صاف ترجمه او تحمیط ایچنده ، او منظرلرک اوکننده بو  
 جماعته صوت درجه تأثیرایتدی . همان هرکسک کوزلرینی صولاندیردی ، چونکه  
 هرکسه فنا حیاتی خاطرلاتدی ، هرکسده الیم خاطرلر اویاندیردی .  
 سلمان بک تأثرینه غلبه چالقدن صوکره صمدله بایدوره دیدی که :

— ایشته بکلر ، شعر بویله اولور . سنلردن بری میلیونلرجه خلق لایتنقطنع  
 بوشعری اوقویه اوقویه نئزیه فکر وقلب ایدیورلر . نولومه قارشى سلاحلانیورلر ،  
 حیاتدن بیقمايور ، فقط موتندنه ییلمایورلر ، خلاق کائناته عرض طاعت ، حتی  
 سجده ایدیورلر . همده نه نزیه ، نه عمومی بر لسان ایله ! . . . شاعر فردای  
 عمری بر مهابت ، بر انشراح ، بر نور ، حزن انکیز اولسهده تسلیتبخشا بر  
 نور ایچنده کوستریيور ، بیچاره بشریتی مأیوس ایتمه مکه چالیشیور ، فقط  
 نه موفقیتله ! . .

سلمی ، قیزم ، شونشیده یی برکده دها یوکسک بر سسله اوقورمیسک؟ هیمز  
 ینه مستدارانه دیکلر ز . .

سلمی او منظومه غرانک صوک قطعهنی آهنگ ایله آهسته آهسته انشاد  
 ایله یوردی . کونش حجله فراقته بستیون چکلمک اوزره ایدی ، ائصوک اشعه سنی  
 حزین حزین ، بی تاب ، ناتوان صاحیورددی .



یولجیلر روم ایلی حصارینه واردیلر ، اولرینه طاغدیلر . فترت ، سحر  
 برندن آریایرکن محزون اولدیلر ، کویا برکون صوکره ینه بربری  
 کورمه یه جکلر ، بولمایه جقلمش کی محزون اولدیلر ، آرتق او درجه یکدیکرینک  
 مجلوبی ایدیله...

خلاصه ، بویله جه بوادی او کونده اقشامی . . .



## فصل اېمونه ياره

تشرین اولك لېتدالرنده بر پنجشنبه كونی ایدی . ( مسائری ) نك ( بوسفور ) نامنی طاشیان بیوچه بر پوسته واپوری غلطه ریختیمنه یاناشمش ، طوریوردی . مارسلیه متوجهاً حرکت حاضرانیوردی .

واپورك آرقة طرفنده كوكرتهده بر چوق یولجیلر واردی ، کلی بر خلقده بو یولجیلری تشیيعه كئشلردی . فترت ، سلمی او یولجیلردن ، سلمان بك ، کریم پاشا ، كزیده ، سحر ، صمدده بو تشیيعه كئشلردن ایدی .

( فترت ) اكمال تحصیل ایچون ( پارس ) ه كیدیوردی ، ( سلمی ) ایسه فرانسه طریقيله انكلترهیه دوشیوردی .

( فترت ) باباسندن ، وطنندن ، بالخاصه سچردن ایرلدینی ایچون محزون ایدی ، فقط نهایت اوچ سینه صوكره املنه ایره جکینی بیلیوردی ، بو حزن الیمی متین بر عزم ایله محضم ایله یوردی ، مع مافیة زمان زمان قلبنه حکمنی کچیره میوردی ، مشتاقنه سحره باقدچه کیزلیدن کیزلییه برقاق کوزیاثی دوکیوردی ، افتراقی اودرجه آجی بولایوردی .

یچاره سحر طبیعی نشانلیسنك او متانتنه مالک دکلدی ، قلباده ذاتاً پك رقیق ایدی ، برقاق کوندر بوروز وداعی دوشونه دوشونه اوطه سینه قاپاندچه آغلامشدی ، کیجه لرینی اویقوسز کچیرمشدی ، لیکن ، عاقبت اوده خیال مستقبل ایله بر نبذه تسلیت بولمش ، بوفراقك وصالنی وار قدرت تفکریله ، وار تاب تخیلیله هدف آمل ایدینمشدی .

سلمی ده هم باباسنی ، همده استنبولی سودیکی ایچون انکرتدی اوزله مکله برابر بو افتراقدن متأثر ایدی ، هله سلمان بك تأثرینی ضبط ایتسه ده درونی قان آغلا یوردی ، چوجقلرندن بو آیریلیشی او مرتبه سوز شاك بولیوردی ، فی الحقیقه حیاتنده بك چوق کوردیکی ، کچردیکی بویله وداعلرله مألوف ایدی ، لکن سنأ ایلرله مش ، عتبه شیخوخته آياق باصمش اولدینی ایچون او الفته رغماً بو آجیلره آرتق زور تحمل ایدیوردی .

حاصلی ، برآی اولی اوقیر عالمنده شوق ، شطارت ایچنده کوردیکمز بو ایکی عالمه بوسفر ملول ، مکدر ایدیلر ، انحق بیوکلر ، اختیارلر کنجلره قابأ صلابت ویرمك ایچون ظاهراً شن ، شاطر کورونیورلر . انلرینی ضبط ایدیور ، سز دیرمه یورلردی .

وقت حرکت یاقلاشدی ، واپور عزیمت دودوکنی چالیدی ، آیرلق زمانی کلدی . سحر ایله فترت اوپوشدیلر ، دفعات ایله اوپوشدیلر ، عزم و نیتلرینه رغماً متاتلرینی محافظه ایدمیدیلر . سحر مردیواندن ریختیمه اینرکن بلا اختیار بول بولته کوز یاشلری دوکیوردی . ( فترت ) ایسه کریه لرینی قوروتق ایچون بر لحظه قامارده سنه چکلمکه مجبور اولدی ؛ برپارچه اکتساب تمکین ایله کوکرتیه حقیقدینی وقت واپورده حرکت باشلادی ، سرای بورننه ، مرمریه طوغری آچلیدی . ریختیمدن سحرک خفیف خفیف صالادینی مندیله ، سودیکنک بتون تمالی کوزدن نهان اولونجهیه ، برخیاله ، برخیالته تقاب ایدنبهیه قدر . ( فترت ) انظارینی او نقطهیه دیکدی ، محزون ، متهیج ایله طوردی ، او علام و داعه مقابلهده بولوندی .

بویله وداع دملری حیاتک نه مهیج دقیقه لریدر ! انسان اک سودکلرندن امیدلر ایچده آریلیر ، فقط ینه بیلیرکه بعضاً او فراق ایدیر ، حشره قدر سورر . وداع که فرقتک الیم بر قائمه سیدر ، چوق کرده بر خاتمه وصلته منجر اولماز ، ابدیله شیر . وداع ، وداع ، کردش ایامی ادراک ایدنلر ایچون نه درجه کریه انکیز بر دمدر !

سلمی قلباً دها متین ، طبعاً دها معتدل ایدی . ایله اولدینی ایچون ده



بوتیجات و داعدن دها چابوق نفسی قورتاردی ، حتی قاردشك قوانه کیردی ؛  
موتس ، منع سوزلرله تسلیته چایشدی .

فترت همشیره سیاه چوق قلمادی ، قاماردهنه چکلدی ، تایمک وقتنه قدر  
کتابخی آچدی ، درین بر تتبعه قویولدی ، چونکه مسعود بر فطرته مالکدی ،  
بر عادت ایدینمشدی ، بویله اک خزین دم حیاتنده اک کوچ ، اک بلند بر مطالعهیه  
وقف ذهن ایلهور ؛ بوسایهده قلباً ، فکرآ عاقبت سکونت بولیوردی ؛ بر بیوک  
فیلسوفک او دستور معروفه اتباع ایلهوردی . ایلهوردی ده کدر بیلیمه یوردی که  
بر ساعتک مطالعه ایله زائل اولماسون ! برمدتدر ، اون طوقوزنجی عصر میلادینک  
اواسطنده یاشامش بر فرانسز نحریر معروفک ؛ ( پرووست پارادول ) ک تاریخ  
کائنات ایچون یازدیغی بر فذلکه یی تتبع ایله اوغراشیوردی ، اودراک نوشکفته سیاه  
بر اثر متینی خارق ماده بولیوردی ، اویله بولدیجه تدقیقه ، احاطه یه چالشیوردی .

فی الحقیقه تاریخ عالمی اودرجه مسعود ، مفید بر صورتده خلاصه ایلیمک  
بیکده بر مورخه میسر اولمامشدی ، مؤلف تازمنه متقدمه دن متأخریه ، اقوامدن  
اقوامه ، دوردن دوره ، مدینتدن مدینته وقایع کائناتک بنیانلرینی تمهید ایلیمش ؛  
نخبه ، لباً تمهید ایلیمش ، فقط هیچ بر حقیقت مهمه یی نیسیان ایتیمش ، ینه فقط  
بتون بولجه یی عادتاً بر موجهده کوستره رک ایکی جلدده صیقیشدیره بیلیمشدی . ( فترت )  
مکتب اعدادیده تاریخ عمومی وقوعات اعتباریه دها مفصل اوقومشدی اما  
بو خلاصه تاریخیه یی محضاً بر فلسفه یی ، بر چوقده غوامض حکمتی احتوا  
ایله دیکی ایچون دها جاذبه دار بولیوردی ؛ علناً اعترافه جسارت ایده میوردی ،  
لکن تحصیانی اکمال ایدر ، تاریخدن مأذونیت رؤسای آلیسه ترجهده اویله بر اثر  
یازمق املنی کیزلیدن کیزلییه بسله یوردی ؛ حاصلی ، بو تألیف بهینی حرز جان  
ایتمشدی ، اوقدرکه عرض ایتدیگمز کی ، اک یأس انکیز ، اک مزعج آوان حیاتنده  
بیله پیش تتبعه آلنجه غمی ، غصه سنی عادتاً اونوتیوردی ؛ ایشه بوسفرده اویله  
یاپدی .

( فترت ) ک بو وجه ایله تتبع ایلهدیکی بو مؤلفک فکر نخبه تاریخدن مقصود  
اویله قوری قوری یه وقایعی بیلیمک دکل واوله ماز . چونکه حادثاتک ار صورتله

اینبه دن اینجهیه حقیقتی آکلامق معاصرینی ایچون بیله اکثریا محال ایکن آرادن عصر لر کچدکن صوکره البته هیچ قابل اولماز . حتی ( پارادول ) مقدمه ائرده بر فقره نقل ایله یور : بر انکیز مورخ فیلسوفی تاریخ کائناتی یازمق ایچون وثائق لازمه یی ، مأخذلری طویلار . صوکر بر قلهیه قایانیر ، سنه لرجه اواعتكاف ایچنده اویله بر اثر معظمی حاضر لامق ایستر ؛ لیکن دها ایشه باشلامدن ، قلمی اله آلمادن اشاعیده بر کورولتی ایشیدیر ، بر حادثه نك وقوعنی آکلار ، در حال اینر ، باقار ، فی الحقیقه بر وقعه اولمش اما نه قدر تحقیقاته قویواسه ده بر درلو او وقعه نك صورت جریانی صحیح بر طرزده آکلایاماز ، شاهدلرک افاده لرینی بر برینه میان بولور ؛ خلاصه ، نه اولورسه اولسون ، او حقیقته کسب اطلاع ایدمن ؛ صوکره دوشونورکه کوزینک اوکنده جریان ایدن وقیعی بیله بحق آکلامق بویله محال اولورسه عصر لرجه ، قرن لرجه اول جریان ایتمش وقوعاتک صحتیه مطلع اولمق امکانه صیغارمی ؟ بو ملاحظه لر دن صوکره قلمنی قیرار ؛ او اعتکافدن ده ، او تألیفدن ده واز کچر .

( پارادول ) دیورکه فی الحقیقه وقایع جهانک بو درجه تفرعاتنه آکاه اولمق محالدر ، معاصر لر ایچون بیله محالدر ؛ فقط هر وقعه ده بر نخبه واردر ؛ ایشه تاریخ ایچون او نخبه یی میدان قویمق ، محاکمه ایتک تأمین فوائده کافیدر : مثلاً ( ۱۸۱۵ ) ده بیوک ( ناپولئون ) ایله دول متفقه اردولرینک آرالرنده ( واترلو ) ده بر محاربه اولدی . بو محاربه نك دقائق تفرعاتنی حرفیاً ادراک ایله مک شمدی بیله کوچدر ، بر قاچ عصر صوکره ایسه هیچ قابل اولماز . ( بلوخر ) ، ( ودلینغتون ) نه یاپدیلر ؛ ( ناپولئون ) ، ( نهی ) ناصل حرکت ایتدیلر ؛ ( غروشی ) نه خطاده بولوندی ؛ بو غوامضی کاملاً آکلامق اویله قولای دکل ، فقط بر حقیقت وارکه معیندر : فرانسه مغلوب اولدی ، متفکر غلبه چالدیلر . بو نتیجه ده اورویاچه کالی تحوللره سببیت ویردی . مورخ ایچون استنباط حکمتیه ، تعیین فلسفه شئونه بو معلومات ، بو معلومات اساسیه کافیدر .

( پارادول ) او اثر معروفنی ده بو دستوره توفیقاً یازمشدی ؛ ابتدادن اتمایه کافه حادثات جهانک هبلنی آلمشدی . هبل اولبدن ده بر حکمت چیقارمشدی .

ایشته (فترت) ی جلب و جذب ایدن ، دوشوندرن بو طرز مؤثر تألیف ایدی .  
 بو اشتغال جید اوکنج ذکایی اویله اشغال ایلهدی که بر مدت اوالم افتراقدن  
 قورتاردی .

یمکدن صوکره (فترت) همشیردسیله برابر کوکرتهده او طور ییور ، کزیوردی ؛  
 زمان زمان بلا اختیار ایچنی چکرکدن استانبولی ، سحری آنیوردی ، لیکن آرتق  
 اوآلامنه غلبه چاله بیلیوردی .

واپورک یو جیلری آراسنده بر (خاقان) بك وار ایدی که پک محترم ، پک  
 جاذبه دار برسیما ایدی . بو ذات یتیمش یاشنده بر بیر ایدی ، قرق سنه دن زیاده  
 (پارس) ده یاشامشدی ، فقط کدیمیله ، ثمره عرفانیله یاشامشدی . بر ترک ایچون  
 بویله بر حیاتدن ده پارلاق بر حسن شهادت اوله ماز .

خاقان بك ، ابتدادن اتهایه حقیقه تصویر ایدلسه ؛ مهیج ، موثر بر حکایه  
 تشکیل ایار بر ترجمه حاله مالک ایدی ؛ اصلاً استانبولی ایدی ؛ چو جلقنده پک  
 حایلار ، کنجلیکنده پک حاشاری ایدی ؛ دور سابقده مکتب حریه نك صوکر  
 صنفنده ایکن پارسه قاقشیدی ؛ فقط زنکین دکادی ، اوزمان مدار معیشتی بیله  
 تأمیندن عاجز قالدی ؛ اولده غربتده او کجه لری چوق صیقندی چکدی ، چوق  
 کره لر ناچار ، تکلیفسز ، تکلفسز طانیدینی بعض وطنداشلیرنک مسافرتلرینه بیله  
 صیغمنغه مجبور اولدی ؛ حاصلی ، اوچ دلت سنه متادیا هر فلاکتی کوردی . علماً ،  
 کالاده همان بیوک بر ترقیه مظهر اولادی ، چونکه چالیشغه پک وقت ، فرصت  
 بوله میوردی ؛ ذاتاً اویله چالیشه بیلیمک ایچون اقتضا ایدن حضور فکرده او قدر  
 مالک دکادی ؛ بو حیات سفالتنده بر کون (لوکسمبورغ) باغچه سنده بر صیردنک  
 اوستنده مایوسانه پینکله یوردی ، دریندن درینه دوشونیوردی ؛ برزخ ضرورتدن  
 ناصل قورتوله جغنی دوشونیوردی ؛ نالکتنه دونه مکه حزم ایتشدی ؛ ذاتاً  
 دونه مزدی ، دونه یدی ، سله استبداده اوغراردی ؛ اوچ کوندر یمک بیله  
 یمه مشدی ؛ صباحلری چوق اولسون دییه اون پارلق بایات اکمک آلیوردی ،  
 بتون کون اونکله تغدی ایل یوردی ؛ فقط بوغدا کفایت ایتهدیکی ایچون صارارمش ،  
 صولمشدی .



اضطرار بندن شایسته چیقاردی؛ او کمره. کمره اولدیغی قدرده سیاه صاچلریله،  
 او مردانه سیاهیله کوزل برقفایه صاحب ایدی؛ بوی، بویجهده لوندا ایدی؛  
 بر لحظه آیاغه قالقدی، شویله برطاش پارماقله طایاندی، (لوکسمبورغ) سراینه،  
 معرض نفائسنه، حوضه، بتون او هیکلره، واقشامه عطف نظر تحسیر ایلهدی؛  
 یو ثروت ایچنده شوقر ذاتینسی دوشونمکه طالادی؛ تضادک بومرتبه سینه مبهوت  
 اولیوردی؛ اولیوردی ده مسلك اشتراکیونه حق ویریوردی:

«بن، بنم کی دهاردو اردو بیچاره لر آچ ایکن، چیلایق ایکن بتون بوعظمت،  
 یواسرافات جرام دکلیدر: یوق، شرائط اجتماعیة جهان حقیقة محتاج اصلا حدر..»  
 دییوردی.

بوتفکرات ایله او یله طالعین طالعین او منظره نی تماشا ایدرکن برپارچه اوتوده  
 بر صاندالیهده اوطوران اولدقجه کنج، سوسلیجه بر خانمک زمان زمان کندیسنه  
 باقدیغنی کوردی، تعجبه دوشدی.

برمدت صوکره قادینجیز اویاقیشلره خفیف بر تبسمده علاوه ایدنجه خاقانی  
 بمبتون مراقه، خلیجانه دوشوردی؛ پارس حیاتی بو، یاواش یاواش یاننه قدر  
 جلب ایلهدی؛ نهایت، اوفلکزده کنجه مشفقنه، متبسمانه:

— او یله دریندن درینه نه دوشونیوردیکز! یوقسه عاشق، بدبخت بر عاشقمیسکز؟  
 دیدی؛ (خاقان) طایانامادی؛ فقرینی، ضرورتی بر درجه صاتلامقله برابر  
 ایچنی اوندیمة نا کهظه ورینه کمال صفوته دوکدی، فقط او یله صافیتلده دوکدی که  
 قادین اوکنجک صاقلادقلرینی هم آکلادی.

(خاقان) یکر می بش یاشنده ایدی. بو خانم ایسه اوتوزه یاقلاشیوردی. نسل  
 کبار برعائله دن ایدی. اساساً کوزل بر تربیه، ایجه تحصیل کورمشدی، لکن ده  
 اون سکر یاشنده آنادن، بامدن یتیم، جهانده بیکس قالمشدی، تأمین معیشت ایچون  
 چالیشمغه مجبور اولمشدی. کوچک بر یازیچی صفتیه بیوک بر بانقیه کیرمشدی.  
 اوئانده تصادفاً طایاندی بر محرومه، بر حکایه نویسه علاقه ایتشدی، دوست اولمشدی،  
 سنه لرجه اونکله برابر یاشامشدی؛ فقط حریف بالاخره شهرت، ثروت صاحبی  
 اولونجه زنکین بر قیزله اوله نه رک او بیچاره نی انصافنرجه سنه ترک ایلهمشدی.

بو سرگذشت حزين شـبابـنـدن او قـيـزك يـانـكـز بر كـاري وار ايدى ، او ده مـكـتـسـبـات عرفانى ايدى . او يله مقتدر بر صاحب قلمله طول مدت عاشقانه ، معاشقانه ياشايه ، ياشايه ، ذاتآده مستعد اولدينى ايچون ، بو قيزجغز بر مزيت ادبيه ، بر قدرت قلميه ايديشدى ؛ او درجده كه انبياته ، حتى بر درجهيه قدر سياسياته كللى آشنا ايدى ؛ چوق او قومشدى ، فقط حين اقتضاده يازيوردي ده ؛ حتى يار بيوفاسندن آيرلدقندن صوكره ، بيكس ، بيوايه قانجه ، ينه حياتى قزانلق ايچون ، بو اقتدارينه مبنى ، معروف ، مسمول بر مبعوثك يانسه كاتب صفتيله كيره بيلمشدى .

مبعوث افندى مکتوبلرينى ، بندلرينى ، تقريرلرينى اوکا دائماً كايلىشى كوزل كويا استمكتاب ايدىيور ، فقط او محضاً قريحه سندن ، باطامه معلومات ذاتيه سنده مراجعتله عادتاً يكيدين يكييه بويازيلري مكملاً قلمسه آليوردي . او مبعوثده بو سايله بر قدرت قلميه و علميه ايله شهرت بولمشدى .

بو حيات ، بومساعى بوقيزجغز ايچون اوچ درت سندهر بويله دوام ايدىيوردي . ابتدالري يار قديمى بر درلو اونوته ماديني ، دردینه صرف بو مشاغل روز - مرده سنده بر نوع دوا آراديني ايچون او بيچاره قيز آرتق باشقه بر ذوق ، برسودا ، بر ذوق سودا دوشونمىيوردي ، ايسته ميوردي ؛ فقط آرادن بويله سندر كچكدكن صوكره زمان زمان آيينهيه باقهرق حال دوام ايدن حسنتك ، لطافتك بوش يره هيا اولدينى كوردكه بر اضطراب ؛ او اضطراب ايله برابرده كوكلنده بر آرزو ، بر احتياج محبت حس ايدىيوردي .

ايشته بو حالده ، بو حسياتده ايكن بركون ، بر تفرجده ، او ( لوكسمبورغ ) باغچه سنده ( خاقان ) ي اويله جه . او وضعيت مردانده كورمش ؛ كوريز ، كورمزده ، او فقريته ، پرمرده لكسه رغماً ، حتى احتمالدر ، اويله اولدينى ايچون سومشدى ؛ چونكه حياتى بول بولته قزاندينى ايچون ثروت آراما يوردي ، صفوت آرا يوردي ، صفوت و صميميت صاحبي بر دوست ، بر دوست وفاكار آرا يوردي ؛ بتون آلامنى ، سرانجامنى ديكله دكدن صوكره خاقانه ديدى كه :

— سـزكـ كـيـ بر كـنـجـكـ ، دـيـنـجـ ، مـقـتـدـر بر كـنـجـكـ جـدال حـيـاتـدن بو مـغـلـوبـيـتـه

تأسف اولونور. بو قدر یاسه نه معنی واردر؛ برایش، بر مدار معیشت آراسه کز آ،  
(پارس) بر محشر عجاآبدر، فقط، اوفضائی انکار ایتمه ملی یز، چالیشانلری هیچ بر زمان  
مأیوس ایتمز، منابع کونا کونیه هر کسک رزقی تأمین ایدر. بکا مساعده ایدر میسکز؛  
سزده بر خدمت بواهیمی؟

ایشته بو حضر واری تصادفدن، بودقیقه دن اعتباراً (خاقان) جهانده بر انسان  
اولمغه باشلامشدی، نهایت اولمشدی؛ اولا اوقیز جغزک دلاتیه، اوعرض ایتدی کمز  
مبعوثک توصیه سیله اوفاق تفک یازی ایشلرینی کورمک، مسوده لری تصنیف ایله مک،  
اوراقی حفظ ایتمک اوزره بر جموعه موقوته یه جزئی بر معاشله انتساب ایتمشدی،  
اوسایه ده ایسه بر یاندن حیاتی تأمین، بر یاندن ده معلوماتی توسیع ایله مشدی.

آرتق فلکک کرم و سردینی ایمدن ای یه، اونودماز بر طرزده کوردیکی، کچر دیکی  
ایچون او یله حایلار، حاشاری، هله هیچ تبیل دکلدی، وظیفه سنده صوگ درجه  
اقدام کوستریوردی.

ثانیاً، اومرتبه نجات فکر و قلب ایله، علوجناب ایله المشکل بر دم حیاتنده  
امدادینه یتیشن او مخلوق کزین ایله دوست، جاندن، کوکلدن دوست اولمش  
ایدیلر؛ بر مدت صوکره بر برینی جداً طاینجه، سونجه برابر اوطورمغه، برابر  
یاشامغه باشلامشدی لر، طبق قاری، قوجه کبی ایدیلر.

بورابطه سنه لرجه مسعود، معزز سورمشدی، حالاده سوریوردی؛ فقط  
(خاقان) ی ده علماً، معنی احیا ایتمشدی. اوفرانسز قادینی اواطلاع واسعیله،  
کالاتیه او غریب ترک ایچون مشفق، منعم، بختیار بر خواجه فضیلت، مدرسه لردن،  
دارالفنوندن زیاده بر راهبر، راهبر تعالی اولمشدی.

بو حیاته ایردکن صوکره، خاقان باشقه بر خاقان کسایدی؛ فسیح بر قریحه،  
بر قدرت علمیه ایدیندی؛ سیاسیه، ادبیاته دائر فرانسز مطبوعاتنه بول بول یازیلر  
ویردی؛ (پارس) ی آرتق مدارسیه، کالاتیه، هر درلو غوامض معرفتیه رعنا  
طانیدی.

ایشته مسعود بر رابطله، مفرح بر عشق، نزیه بر حیات بو معجزه یه بادی اولمشدی؛



اوپریشان خاقانن بویله برانسان کامل چیقارمشدی . قادین ، قادین ، اوت اکثریا آدمی برباد ، افنا ؛ فقط بعضاًده بویله احیا ، اعلا ایلر .

خلاصه ، خاقان بك بویله بر ذات ایدی ؛ یالکز ، مع الاسف ، وطنی اونوتمش ، وطنداشارنجه اونودمش ، فرانسه لاشمش ، بسبتون فرانسه عالمده یاشایوردی . انقلاب عثمانینک وقوعندن بر قاج سنه صوکرده ایدی . حکومت عثمانیه بر مسئلهدن بك عاجز ، بك مضطر قالمشدی ، اوده برای تحصیل اورویایه ، بالخاصه فرانسییه اعزام اولونان طلبه نك احوالی ایدی ، احوالنه دائر بر خط حرکت ایدی .

اولا بر معارف ناظری گمشدی ، اوسنه (پارس) ده کوندریلن کافه طلبه عثمانیه یی یوز ، ایکی یوز افندی یی بردن بر (ایسه) یه ، بر مکتب اعدادی یه صوقدیرمشدی . ارمنی ، ترک ، عرب ، روم ، آرناتود کی مختلف قومیتلره منسوب بولونان بو عثمانلی کنجلی کویا بویله بر یرده یاشاینجه بر برینه ایصینه جقلر ، مملکت مزده ائتلاف عناصره بر زمین حاضر لایه جقلردی . فقط بو تجربه یی استنبولده دکل ، (پارس) ده اجرایه قاتیشیق حقیقه غریب دگی ایدی ؛ نتیجه نه اولدی ؛ او کنجلر او یله هپ بر آراده اولدقلری ، هپ بر برلریله کوزوشدقلری ایچون کویا ممالک عثمانیه ده ایمشیر کی (پارس) حیاتندن ، او تحصیلدن همان هیچ استفاده ایدمه دیلر ، اوسنه لرینی هدر ایله دیلر . ذالاً مختلف مسلک نك سالک لری بولوندقلری ایچون کافه برلکده نه یایه جقلرینی ، نه اوکر نه جکلرینی بیلمه یورلردی .

دها صوکرده بر دیگر ناظر (صوروبون) ده ادبیات تحصیل ایتک اوزره یینه (پارس) ده کلیشی کوزل بر آلا ی کنج کوندرمشدی ؛ بو افندیلرک چوغنی درست ، دوزگون فرانسه زجه بیله بیلمه یورلردی ؛ فقط ایکی ، نهایت او چ سنه ظرفده اودار العالمدن ادبیات رؤسنی آلمغه ، بویله بر معجزه کوسترمکه مجبور ایدیلر . بورؤس ایچون لاتینجه . روجه بیلمک ؛ فرانسه زجه یه ده اساسندن آشنا اولمق ، خاتمه تحصیلده ایسه بری یینه فرانسه زجه ، دیگر لاتینجه برر تالیف وجوده کتیرمک کی شرائطی کیسه دوشونمه مشدی .

بوسائقه ایله اوزواللی ادبیات شاگردلری ده (صوروبون) ده نه ایش کورده بیله جکلرینی ، بر درلو آکلا یامایه رق شاشیرمش ، قالمشردی .

نهایت، اوچنچی بر ناظر هر نظارتدن، حتی حربیه دن، هله بحریه دن لسان، صرف لسان او کرمک ایچون هیج فرانسزجه بیلمه یں، فقط سنا اولدجه مترق بر چوق کنجلی طواغون معاش ایله (پارس) ه یوللا تمشدی. بوافندیلر او بول پاره ایله بویله بر شهر شعشعه پاشده بر گوشه یه چکیله رک او یاشدن صوکره ساعتلرجه صرف ونحوه دائر قفا پاطلاته جقلردی! هیهات!...

بتون بواحوالک الجا آتیه (پارس) ده طلبة عثمانیه نك بر قسمی، قسم جزئیسی محضا شطارت ذاتیه ایله شویله بویله بر مسلك، بر امل، بر مسلك و امل تحصیل ایدینه رک بر درسه، بر مدرسه یه دوام ایله دیلر؛ آز، چوق بر نتیجه مسعودیه ایردیله؛ اما بر قسمی، بر قسم کلیسی ده ایشسر لکدن، صیقتیدن هوایاته مبتلا اولدیله؛ اوبوش، اومزعج عمرلرینی اویونله، قادینله، قهوه خانه ایله طولدر مقده مضطر قالدیلر. او زمان استانبول آیقلا ندی. هرایشه کلیر، هر دوره یارار، هرتلدن چالار قودودومان بر محرر قلمی اله آلدی، بوکنجلیک علیه یوریدی، حتی عامه عثمانیه جه اوروپاده، بالخاصه (پارس) ده تحصیله قارشى بر جریانه بیله بادی اولدی. معارف نظارتی بو حالدن تلاشه دوشه رک مسئله یی بر انتظامه صوئق ایچون چاره آرامغه قویولدی، نهایت بر صاحب خیرک دلالیه خاقان بکک تجربه سته، عرفانه، حیمته مراجعت ایله مکه قرار ویردی، اوزاتی (پارس) ده طلبة عثمانیه یه مفتش تعیین ایله دی.

خاقان بك بو وظیفه یی درعه ده ایده لیدن بری او مغلق مسئله نه درجه وضوح کسب ایتمشدی؛ هر جهتجه بر طریق انتظامه کیرمشدی، آرتق طلبة عثمانیه (پارس) دن بحق استفاده ایدیورلردی. مفتش بك هر سته یازلری استانبوله کلیور، ناظرلره کوروشیور، طلبه نك مسابقه امتحانلرنده حاضر بولونیور، صوکره منتخبلره برابر (پارس) دونه رک اونلری امللرینه، استعدادلرینه، عرفانلرینه کوره اوراجه مدرسه لره یرله شدیوریوردی. آرتق او افندیلردن سفاهته، حایلازلغه ابتلا کوسترنلر، وظیفه تحصیلنی ایفا ایتمه نلر پک آز ایدی.

خاقان بکک فکر نجه طلبة عثمانیه (پارس) ده تحصیل ایچون دکل، ا کمال تحصیل ایچون کلیدر؛ کله دن اول علمک لذتی طامش، مبادیسنی کلی ایدیمش اولمیدر.

فرانسزجه بی ییلملیدر؛ چونکه، اوت، غریبدر، فقط او یله در، (پارس) ده فرانسزجه اوکر دنیلمز. فرانسزجه مملکتده اوکر دنیلیر، (پارس) ده انجق توسیع. تعمیق ایدیلیر.

تحصیلک اولیاتی کورمه من، ذوقی آلامش برکنج (پارس) د کلیرسه تحصیلدن اول باشقه ابتلارده، اکنجه لره، هوسلره طوتولور؛ بالخاصه فرانسزجه بیلمزسه علمدن، عرفاندن مایوس اولور. لکن هوأیآتده، اوزاقدده یأسنه سهولتله برمدار تلافی بولور.

(پارس) ه کوندریلن طلبه تحت تفتیشه آله ماز. جبراً طوغری یوله سوق اولنه ماز. باصق آلتنده یاشایه ماز، یاشاسه بیله ینه بر فیضه ایره مز؛ انجق خیرینی، شرینی بالذات تقدیر ایده بیلیر؛ بالذات سبیل نجاتی بوله بیلیر، بالذات مسساویدن توقی ایله بیلیر؛ سودادن معقول بر طرزده منع نفس ایلر؛ سومک، سومک مانع تحصیل، مانع ترقی اوله ماز؛ بالعکس سومه مک بعضاً فطرتی هر خصوصجه گوشه تیر، چوروتیر.

(پارس) ده برکنج زمان زمان لطیف برقادیله کوروشمکدن بر ضرر کورمز، فقط او یله بر الفتدن دائماً محروم یاشارسه فکر آده. بدناده مستریح اوله ماز، مضرتیه بیله او غرار.

ایشته خاقان بك بوفکر اساسیلری (استانبول) ده اولیای اموره بی پروا عرض ایله مشدی، او یله صفوته، سلامتله عرض ایله مشدی که هپ قبول ایتدیر مشدی؛ بالاخره بروجه آتی بسط اولونان فقراته کچدی:

(صوروبون) نهدر؛ بر ترك کنجی (صوروبون) ده نه اوکر نه بیلیر؛ فرانسه ادبیاتی تحصیل ایده بیلمی؛ لاتینجه یه، روجه یه واقف اوله بیلمی؛ حتی چوجقلغندن باشلاسه، او مرتبه یه وارسه، عاقبت او یله بر تحصیله موفقیته ایرسه ترک کنجه فائده لری نه اولسه کرکدر؛ محذورلری ایسه، اوکنج ایچون اول امرده تحصیل ملیسنی بسبتون اھمال، نسیان ایله مک اولمازمی؟

حال بوکه عینی کنج ینه (صوروبون) ده مثلاً تاریخ، یا جغرافیا شعبه لرینه انتساب ایدرسه فکر آ، علماً عین بهره لری ایدینه بیلیر، لکن او بهره لرینی مملکتنه مفید قیله بیلیر، حصر ایله یه بیلیر.



خاقان بکه کوره بر ترك اوروپاده تحصیل ایدرکن ترککنی اونو تماملیدر ،  
ترککندن چیقما ملیدر ، مملکتته دائماً مربوط ، دائماً آشنا ، علاقه دار قالملیدر .  
اویله اولمازسه ، اجنبیله شیرسه قیمت ذاتیه سنی تهوین ایلر ، مکتسباتی ده قیمتدن  
دوشوریر . او پیر نییه بو آجی تجربه لری نفسنده کورمش ، کچیرمشدی .

حقوقده بیله خاقان بك اوروپاده ینه تحصیلدن زیاده ا کمال تحصیل طرفدار ی  
ایدی ، چونکه استانبولده مکتب حقوق مکمللاً ا کمال ایتش برکنجک (پارس) ده  
تدریسات حقوقیه دن ده ا زیاده فیض آله جغه قانع ایدی ؛ یالکز طبابت ، هر نوع  
مهندسلک کی مسلک لرده ، او چشید علومده ، بوقاعده یه بر درجه یه قدر بر استثنا  
بولیوردی ؛ فقط هر حالده مهندس لریمیزک ، طیب لریمیزک ، بتون عالم لریمیزک ده ترککنی ،  
ترکجه یی اهل ایتمه لری ینه طرفدار ایدی .

بو نظریاتدن ماعدا ، خاقان بك تطبیقا تجده افکار مخصوصه یه مالک ایدی ،  
اویوزدن ده (پارس) ده طلبه عثمانیه یه چوق دلالت ایلده مش ، چوق خدمت ایتمشدی ؛  
بوسایه ده ایسه ، مملکتده آرتق بیوک بر شهرت قازانمش ایدی ؛ اویله متکبر دکلدی ؛  
کنج لریمیزله دوشر ، قالقار ، حسب حال ایدردی ؛ مسامره لرده ، اکنج لره لرده بیله  
بولونوردی .

خاقان بك بو خدمته مأمور ایدیلده ایدن بری (پارس) ده مکمللاً تحصیل ایدن  
طلبه عثمانیه نك عددی سنه دن سنه یه چوغالیوردی . ایشته (بایدور) اوزمره  
کزیده دن ایدی .

باباسنک بر دوست قدیمی اولدینی ایچون (فترت) بو ذاتی طانیوردی ، حتی  
تجیل ایدیوردی . اوده (فترت) ی اولاد کی سوییوردی ، ده ا کوریر کورمز  
(پارس) ده تحصیلنه نه صورتله باشلا یه جغه ، حتی ناصل یاشایه جغه دائر اوزون  
اوزادی یه استجواب ایتمشدی ، اوکنجه ممکن مرتبه نصیحتلرده بیله بولونمشدی ،  
فقط بیلیوردی ، کورییوردی که (فترت) بو حیاتده باباسنک دلالتیه خط حرکتی  
هر خصوص ایچون مکمللاً تعیین ایتمشدی ، دلیلدن مستغنی ایدی ، ذاتاً فطره ده  
بر جوهره مالک ، تحصیله آتشین بر هوسله تشنه ایدی ، مرادینه پارلاق بر صورتده  
ایره جکدی .

اوله حرکتک فرداسنده ایدی . ( فترت ) علی الصباح بدناً ریاضتده بولونمق ایچون یوقاری کوکرتیه چیقدی ، بر مدت اوغراشدقدن صوکرده کزینیرکن راست کادیکی خاقان بکله مکالمه یه طالدی ، بر آراق :

— بک افندی ، بز استانبولدن آریلیرکن متأثر اولدق ، آبلامله برابر عادتا آغلادق . سز بزدن زیاده استانبوللی اولدیغکز حالدده بوافتراقدن بک اوقدر تأثر کوسترمه دیککز ، ینه ده کوسترمه یورسکیز .

دیدي ، او مخاطب مکرمدن شو مفصل جوابی آلدی :

— فترت بک ، اوغلم ، بر ترک شاعری :

گاه اولور غربت وطن ، گاهی وطن غربتله نیر .

دیمش ، بسیط لکن طوغری برسوز ! قیش ، یاز قرق سنه متماًدیاً ( پارس ) ده یاشادم . حیاتمک بتون آلامی ، اذواقی ( پارس ) ده کوردم ، کچیردم . خاطرده ده ، استانبولک طوتدیغی یر ناقدرد محدود ، سونوک ، مبهم ایسه ( پارس ) ککی بالعکس نامتناهی ، پارلاق ، براقدرد . اوت ، ابتداری غربت ، سفالتله قاریشیق اولدیغی ایچون بکا آغر کلشدی ؛ کونلرجه ، هفتسه لرجه صرف قوری ، بایات اکمکله یاشامق ، ولو او بدایع تمدن ایچنده اولسون ، بنی صارصمشدی . خیرپالامشدی ، لکن صوکرملری رفاهیت دوری کانجه او حیات پرمردده بیلله کوزیمه کیردی . عندمده قیمتله شدی ، شمدی اولیه صانیورم که استانبولده طوق یاشامقدن زیاده ( پارس ) ده آچ یاشایه بیلیمک بر سعادتدر . آه ، پارس نه اذعانسوز ، فقط نه جاذبه ناکدر ! .

چوق دفعه لر جیمده بش پاره ، دقت بیوریکیز ، بش پاره اولمازدی ، فقط ینه اوطه مدن چیقاردیم ، اولاً عنادیمه اک بلند بر معرض نفائسه ، مثلاً ( لوور ) ده کیدردم ، بتون او بها تقدیر اولونماز آثار بدایعی تماشا ایدردم ، ایتدجکده کندی کندیمه دیردم که : « ایشته میلیونلرک صاحبی برقارونده بومملکستده اک چوق بویله برصفا سوره بیلیر... » صوکرده یا بردارالفنونه ، یا بر اجتماع عالمی و ادبی یه اوغرااردم ، اک بلیغ خطبه لری دیکلردم ، در ضرورتی اونوتیردم .

نهایت ، خلاف مأمول دها زیاده صیقیلنجه آهسته آهسته ( شانزلهزه ) یه طوغری چیقاردم ، تا ( بووا ) یه قدر یوللانیردم ، اومسیرده برصیردنك اوسته اوطوریر ، فریح ، مستریح اطرافنی ، کلن کچنی کوزدن کچیریدم .

بویرلرده طبق بنم کی زوکورد ، بنم کی آچ برایشجی قیزه کلیشی کوزل تصادف ایدردم ، بر ایکی لاقیردی سویلردم ، اوده بکا جواب ویریردی . دیرکن بربریمزله دوست ، بر لحظه ، بر ساعت ، بر کون ایچنده عادتاً دوست قدیم اولوردق ، یمکی برابر یمکه ، حتی کیجه بی برابر کچیرمکه قرار ویردک . دردیمزی یکدیگریمزه یانديغمز ایچون ضرورت متقابله مزدن اوطانماز ایدک . انجق اکمکجیدن ، بقالدن ، قصابدن اقشام یمکی ایچون ویردسی یه اوته بری آلق چاره لرینی دوشونوردک . باش باشه ویرنجهده بولوردق .

قارنمزی طویورنجه برانبساطه ایرردک ، صرف عشقمزه وقف امل ایلردک . غم لیمزی اونوتور ، آرتق حیاتی لذیذ بولوردق . فقط حزین دکلیدر ؛ برکرده آیرلدقن صوکرده بلکه بربریمزی کورمزدک ، نه مزه کرک ! اوکیجه مسعود یاشاردق یا .

ایشته شبامک ایلک فصلی ( پارس ) ده بویله کچدی ، صوکرده بر فرشته آمال امدادیمه یتیشدی ، بنی بتون اومضایقه دن ، اومزاحمدن قورتاردی ، انسان ایتدی ، رفاهیته ، سعادتیه مظهر قیلدی . هله شمدی . بنم ایچون ( پارس ) ی سومه مک ، ( پارس ) دن خارجهده یشامق ممکن اولورمی ؟

رفیقه مده ، بنده ( پارس ) ده او یله برمربوطز ، او یله مفتونز که شاید باشقه بر اقلیمه ، بر شهره بالفرض تغریب اولونسه ق ، چوق سورمز ، حسرتمزدن ، کدریمزدن ، شبهه یوق ، نولورز . اوح ! طاشنه ، طوپراغنه ، اک بسیط ، اک آسوده بر حیاته وارنجه یه قدر بوشهر شعشعه پاشه باشند باشه عاشقز .

فترت — خاقان بك افندی، دیمك متأهلسکز..

— اوت، متأهلم، قلباء، فکرا، املاً متأهلم، رسماً دکلم. چونکه رفیقه حیاتمه اوتوز بش سنه اولی بربریمزی طانیدق ، سودک ، جاندن سودک ، او زماندن بری برابر یاشادق ، برلکده دوشدک ، قالدق . بریمز خسته اولسه دیکریمز مراقدن



اویقو اویومازدی ؛ بریمز غیبوت ایدنجه اوبریمز اوکا ملاقی اولسادقجه راحت ایدمزدی. سنه لردن بری بویله ایدی، ینه ده بویله در.

فقط رسماً، حضور قاضیده اوله نهدک. آرامزده کی رابطه حردر، خصوصیدر. ایسته سده بوکون یکدیگریمزدن آریلیرز، لکن بیلیرزکه بویله برافتراق محالدر. ساده قاری قوجهیه دکل، حتی قاردرش قاردرشه ؛ پدر، والده اولاده ناصل مجلوب، ناصل مرتبط ایسه بزده بر بریمزه اویله باغلی یز. هرکس بزى زوج و زوجه بیلیرلر، رسماً متأهل اولمادیغمیزی آکلاسلر بیله ینه اویله عد ایدرلر، تابتدادن بری ینمزدده قید رسمی ازدواجه تنزل ایتهدک. بویله سربست اولورسه ق یکدیگریمزه علاقه مزک دها صاف، دها صمیمی اوله جفنه قناعت ایتدک، شمدهیه قدرده او قناعتله مسعود، مبهج یاشادق.

حیاتمدن اویله مسعود ایدم که بر قاج سنه اولی بکا بوظلته عثمانیه مفتشالکنی تکلیف ایتدکلری وقت ایچمه بردن بره بر قورقو کادی، بابا کزک، دیگر دوستلریمک اصراری اولماییدی، او خدمتی قبول ایتیه جکدم، چونکه قبول ایدرسه بوحیات سعادتله سگته کله جکندن قورقویوردیم. رفیقهمله برابر سنه لردن بری ساده مرفه یاشامقله اکتفا ایتهدک، اوفاقدن اوفاقه تصرفده بولوندق، خاتمهیه قدر عمریمزی برشرکته تأمین ایتدیردک. شمدهیه کوچک، فقط بزده کوره کافی بر ایراده بیله مالکیز. طلبه مفتشالکنی احتیاج ایچون دکل، حیه درعهده ایله دم، بلکه بویوزدن وطنه المدن کلدیکی قدر خدمت ایتدم.

فترت — بک افندی، اوفاق بر استیضاحه-مساعده بیوریرمیسکز؟ طلبه عثمانیه دن ممنومیسکز؛ یوقسه مشتکیمیسکز؛

— عمومیت اعتباریه ممنونم، کنجلریمزک اکثریتله قدرت تمثیله سنه حیرانم، فی الحقیقه چوغی هنوز فطرة ناتراشیده درلر، بر قسمی بالفرض موسیقی کبی، رسم کبی فنون نفیسه یی بردرلو تمثیل ایدهمیورلر؛ مثلاً خجسته، بسته، حاصلی بلند، هرجهتجه بلند بر (اوپرا) دن ذوق آله میورلر، فقط مع الاسف اوهنوز ناقص، اوهنوز ابتدائی موسیقیمزه، اوهی هی لریمزه، تقسیملریمزه بایلیورلر؛ ینه (اوپرا) ده خارق العاده بررقاصه نک، بررقص مجتهدک آلاشنی، جذبه لری، رقتلری کشف

ایده میور، آکلایامیورلر اما چنکیلرمزك اوناموزون اولدینی قدر ثقیل جنبشلرینی ذوقه ملایم بولیورلر. بعضاً اودرجه ذوقسزلك بيله کوسترییورلر: اعتقادجه، معذوردرلر، تأثیرات ارث ایله الفت مخصوصات وطن ایله بویه یاپیورلر. بر، ایکی ذریتدن صوکره بونقصان دوزلیر. ابتدالری کنجلكمده عین حال بنده عینیه واقع اولدی. قاچ دفعه (قومه دی فرانسه ز) ده اك مکمل بر او یونی، (مولیه ز) لری (راسین) لری، حتی متأخرینی دیکلرکن میثیل میثیل او یودمدی؛ لکن (فولی برژر) ده برکورش، هله برترك کورشی، مثلاً اومشهور قره احمدی سیر ایدرکن تپه دن طرناغه تهیجه اوغرادمدی، بویه اولغله برابر (پارس) ده کنجلیرمزك یوزده طوقسانی تحصیللرینی مکمللاً یوروتیورلر، فرنکلردن هیچ کری قالمایورلر، حقوقده، طبده، تاریخده، حتی ادبیاتده، نه ده اولورسه اولسون، برقابلیت عرفان کوسترییورلر؛ بعضاً پك ایلری بيله کیدیورلر، معلومات عمومیه اعتباریه فرانسلری کچیورلر، یالکیز بر قصورده بولونیورلر: بر علمی اساس اعتباریه بر علم اولمق اوزره تلقی ایتمه یورلر، سومیورلر؛ برواسطه، مقصوده ایرمك ایچون بر آلت کبی عد ایدیور، او منتهایه واصل اولونجه ده چالیشمقدن فراغت ایله یورلر. حال بوکه غربیلیر بویه یامنازلر.

ایشته بالخاصه بوسائقه ایله درکه بوتون علامه ل، علومده، فنونده صاحب دهالر، مثلاً بوعصره کوره بر (هانری پوانقاره)، یابر (مچنیقوف) یابر (کوری) یتشمز، یتشمه یور.

بونقصانمزكده ینه باعنی عصرلردن بری شرائط اجتماعیه مزه اعتیادات ارثیه مزدر. هپ اوشرائطك، هپ اواعتیادلرك ضرورتیه درکه اك منور شبانمزك بيله قابلیت اجتماعیه لری یواندر، مزیت شخصیه لری نه اولورسه اولسون، او یله در. فکراً علماً ممتاز کنجلیرمزی بيله قاچ کره بر آرایه طویلادم، برانجمن فضل و ادب تشکیل ایله دم. مکر ممکن دکل، اوجمیت سورمدی، سورمه دن پریشان اولدی. چونکه اعضای جمعیته او یله بروظیفه نك، بر سعیک نه فوایدینی، نه لوازمی هیچ بر زمان بردرلو تقدیر ایده مدیلر.

حاصلی ، طبقه علیای عرفانه حقیقلم از سه ، وسطاه ، بر وسط مقبول ایله اکتفا اولونورسه طلبه عثمانیه اوروپاچه بر مرتبه مهمه بی حائزدرلر .

قصورلریمز یالکیز بزه خاص دکل ، عمومیتله شرقه ، شرقیلره مخصوصدر . حتی اوتقائیدن آزه ، چوق تبری ایدیه بیلنلر ، غرب تربیه سنی ، غرب عرفاتی . غرب ادراکنی ال سهولتله ایدینه بیلنلر ینه بز عثمانیلرلز .

تحفدر ، بعض جهلای فضلامز یا فضلای جهلامز بوتملده ، بوتعالیده نه قدر ایلری کیدرلرسه کنجلریمز اودرجه خیرپالایور ؛ فرنکله شسیور ، دییه خیرپالایورلر . فکرجه خلط ایدیورلر ، یعنی تقلید ایله تکملی بر برینه قارشیدیریورلر .

بز غربک مکارمنی ، محاسنی ، علومنی ، فنونی ، عوائد ترقی وتعالیسنی آلیر ، بویوزدن غربیللا شیرسه ق سونملی یز ؛ چونکه اوزمان ملیتمزی ، اساساً وارلغمزی اونوتمق شویله طورسون ، بالعکس تهذیب ، توسیع ایلرز ؛ متینله شدیدریرز ، الی نهپیه ادامه ایدرز . معرفت غرب انسانه بوفضائلی تلقین قیلار . یوقسه ، حال حاضر تدنیزده کومولور ، قالیرسه ق امین اولملی یز که ترقیمزده ، موجودیتمزده هپ یاواش یاواش تار اولور ، تاراج اولور ، کیدر .

بکا کلنجه ، صانیرم که شبامز غربیه هنوز درجه کفایه ده ، هنوز دهها زیاده انشراح ایله طالما یورلر .

اوغلم ، فترت بک ، ایشته سز فطرة ، ارثاده ، تربیه جهده مزایای لازمه بی حائزسکیز . تحصیلکیزی واسع بر نقطه نظردن یوروتیکیز ، بر مسنده ، بر مأموریتیه ایرمک ایچون دکل . فقط بالفرض بیوک بر مورخ اواغه چالیشکیز ؛ علمی علم اوله رق ، عالم . علامه اولمق ایچون نخبه مساعی ، حیاتیکزه اساس اتخاذا ایله ییکیز . (صوردل) ی بالطبع طانیرسکیز ، شخصاً دکل ، چونکه اوچوقدن ارتحال ایله دی ، فقط آثاریه طانیرسکیز . اوزات تحصیلنی بتیردکدن صوکره بر مسند ممتازه ایردی . مسلك خارجیده بر مأموریت آلدی . سفارتلره انتساب ایتدی ، ایسته سیدی ، او مسلکده چوق ترقی ایده جکدی ، بیوک مرتبه لری احراز ایله یه جکدی ؛ لکن دهها ایلک فرصته بتون او اقبالدن وازکچدی ؛ علوم سیاسیه مکتبه خواجه لقله کیردی ، عمرینی صرف تدریساته ، تألیفاتیه حصر ایله دی . سنه لرحه ، غالباً (۱۸۷۳) دن



(۱۹۰۶) یه ، صوگ نفسنه قدر لاینقطع چالیشدی ، کونده بلا مبالغه سکنز ، اون ساعت منتظماً علمه ، صرف علمه وقف عمر ایلهدی ؛ نه پاره ، نه رتبه ، نه دم باشقه بر اندیشه دوشوندی ؛ بوسایهده ایسه ، (فرانسه انقلاب کبیری واوروپا) عنوانیه یازدینی او سکنز جلد اثر خارقه نموتی ، تألیف غرای میخانه قویدی ، فقط نامنی صفحه تاریخده تأیید ایتدی .

دورلر کچر ، عمرلر کچر ، ناظرلر اونودیلیلر ، سفیرلر اونودیلیلر ، حتی حکمدار اونودیلیلر ، اونودیلیلر ؛ (صورل) اونودماز . چونکه او تاریخ کلمات فکر بشری حشره قدر تهذیبه ، تنویر خدمت ایلر . بوجهان فناده نه پایدار اولور ، اوله بیلیر ؛ انجق فکر ، آثار فکریه دکلی ؛ انسان سونر ، اشیا بیتر ، حتی مبانی بیله خرابه ایرر ؛ فقط فکر ، آثار فکریه تمادی ایدر . (هومر) ک عصرندن ، دورندن المزده مادی ، شخصی نه بقایا واردر ؛ (ایلیادا) ایسه حالا ، همده پارل پارل دایمدر .

شرقده ، غریبه بیله بالفرض (معلقات سبع) بوکون بعض بلند حافظه لری توشیخ ایلر ، لکن عینی دوردن مبانی اولسون ، نه اولورسه اولسون ، هیچ محفوظات مادیه قالیمی ؟ . قوجه راغب پاشا :

اگر مقصود اثرسه مصرع برجسته کافیدر ؛  
عجب حیرتدهیم بن ، سد اسکندر خصوصنده

دیمش ، غریب اولسهده بو نقطه نظرده کورد ، نه طوغری سوزدر ؛ سد اسکندر مایدیر ؛ عصرلرجه ، قرنلرجه صوکره البته محکوم زوالدر ، مصرع برجسته ایسه فکری اولدینی ایچون ابدیدر ، الی ماشاءالله ابدیدر .  
شرقده بقای جهانیه ، ابدیت شئونه اهمیت ویرلمز ،

فانیست جهان در او وفانیست

غریبه ایسه بیوکلر هپ او امللرله یاشارلر ، اولدکن صوکره یاشامق ایچون یاشارلر .

(پارس) ی طایرسکز ، شمدي دها زیاده طانییه جقسکز ، کورمدیکزسه کوره جکسکز که مثلاً (قارتیه لاتن) ک او صوری دبدبهرینی ، بتون اوجنیشلرینی ، اوبوشلقلرینی ، حاصلی ، اوظواهری برطرفه براقکز ، فقط ایسسر ، فقط ساکت گوشه لرند ، بوجاقلرنده طبق (صورل) کبی اجتهادات فکریه ایچون کیجه لرینی کوندوزلرینه قاته قاته خاتمہ حیاته قدر چالیشیر بیکلرجه علامه لر بولورسکز ، اونلر انجق یاشایه بیلجک قدر پاره قازانیرلر ؛ انجق اوقدر او ، بارق ، اشیا ، ثروت صاحبی اولورلر ، مادیاته صرف اودرجه اهمیت ویریرلر ؛ اویله اما بتون محصول سعیرلیله ، جهد فکریلرله فرانسه نك یوزینی آغار تیرلر ؛ جهانیه ، انسانیتیه بیله باعث شرف اولورلر ، عالمده ابدی برنام براقیرلر .

او درجه سفاهتله ، اسرافلردرغماً بتون بومالک غربیه ینه منقرض اولمایور ، بالعکس یوکسه لیور ، ابدیله شیورسه ، اساساً بوتجلی حسبۀ للفکر ، اویله مبجل برامل ، بر اندیشه ایله چالیشان او علامه لرك یوزندندر . اک بیوک فیلسوفلر ، اک مسعود متفکرلر ، موجدلر ، مخترعلر انجق اونلردن یتیشه بیلیرلر ، باشقه صورتله یتیشه منزلر .

بو تهیجات فسیحه فکریه نك عمومیتله ، هر نقطه نظرده مملکته فوج فوج منافی اولور . عادتاً او هوای فاسد عمومی تصفییه ایدن ، تنزیه ایدن نسیم پاک خصوصی اودر .

او غلم ، بو اعاضمه بکزدمکه جهد ایت ، ایت که سزکله ، امثالکیزله وطنمزده برکون حقیقی بیوکلک ، حقیقی معرفت نهدر ، کوردبیلسون ؛ آرتق اویستلکدن ، بر تشیه شاعرانه منزله ، مرغ پست پروازلقدن قورتوله بیلسون .

نه زمان بویله برحزب دهاته مظهر اولورسوق ، او وقت سیاسیاتمز ، ادبیاتمز ، بتون علوممز ، فنونمز باشقه برانشراحه ایرر ، حتی محیطمز دکشیر ، یوکسه لیر ، بر محیط متعالی اولور .

فترت . — حسن توجهکیزه تشکر ایدرم ، لکن اویله برطالع ، او دها بکا ازلدن صونولمامش اولسه کړک .. او درجه یوکسکلرده میل ایله مات حدیمی تجاوز ایتک دکلیدر ؛

— آه ، ايشته ينه بر شرق فکري ! باقيکيز ، غريده طوغديغکيز ، غريده بيوديکيز حالده سائقه وراثته ، کورده نکلکه ، هر نه ايله اولورسه اولسون ، بويله فکرلرک دائماً اسيريسکيز . بز عثمانيلر غريپز ، بر ادراک غريپه مالکيز . بالفرض اک بيوک بر دولته اعلان حرب ايتمکه ، بعضاً بر دفعه دها ( ويانه ) يه قدر بيله کيرمکه ، بتون او محالاره عقلمز ياتار ، ميلمز اولور ، حتی چاليشيرز . لکن بالفرض ( پاستور ) کبي ، ( برتلو ) کبي علمده تبحر ايتمکه ، دهات غرب درجه سنده کالاتده تميز ايله مکه هوس ، جسارت ايده مهيز . بو مشکلات ممکنه دن درحال ييلارز ، او ممکناتي محال کوريرز ، طبق او بر محالاتي ممکن کوردیکمز کبي . لکن طبيعت ، قوانين طبيعيه نظر اعتباره آلپيرسه مادام که بزده اوروپاليلر ايله عين عرقدن بر قومز . ايسترسهک ، جداً ، مدت مديده چاليشيرسه ق عيني فيوض مدنيه مظهر اولورز . مکمل عسکرلر ، مجاهدلر يتيشدير ييورز . نچون علامه لريمز ، متفنگلريمز اولماسون ؟ قاچ دفعه ( پارس ) ده جهان پهلو انلغني بز احراز ايتدک ؛ بر کرده ( نوبل ) مکافاتي قزانسه ق ، اوبارقه فکريه يي کوسترسهک نه اولور ؛ اعتقاد مچه بويله بر مزيقي کوسترمه مکدن زياده کوسترمک ايسته مه مک ، اوشرفه طالب اولما مقدر که بر ذلدر ، توقفه ، تدني يه طوغري بر تمايلدر ، تمدن بر نوع ييلغينلقدرد . غربليرک تفوقني تسليمدر .

فترت — خاقان بك افندي ، حقکيز وار ، صحیح ، نه طوغري دوشونيورسکيز . خاقان — بودوشونجه لرک فضلي بنم دکل ، ( پارس ) ده قرق سنه سورن حياتمک ، اقامتمکدر ؛ باخصوص اوحياتي ، اواقمتي ينه بنم ايچون اک مسعود ، اک منور بر طرزه صوقان رفيقه مکدر .

بو خطبه يه اشبو صوک سوزلرله خاتمه ويره رک اوپير مبارک چکلدي ، کيتدي ، لکن ( فترت ) ي فکراً مديد بر تهيج ، درين بر غليان ايچنده براقدي . بعضاً مؤثر ، بليغ بر موعظه هنوز آچلمغه باشلامش بر ذکائي بردن بره نه مرتبه تراشيده ايلر . ايشته بونصائح نافنده ده ( فترت ) ايچون اويله اولدي ، تا کوش جانه حلول يله دي .

واپور ( کليبولي ) بو غازيني چوقدن کچمشدي ، آچيقلره طوغري ايلريه مشدي ؛



قارەدن ايچە اوزاقلاشمىدى ؛ وطنك او صوك ظویراڭى ، صوك جزء مرئىسى  
كوزدن نهان اولمق اوزردە ایدی . ( فترت ) براو طرفه طوغرى محزون محزون  
باقدى .

وطن محزون ، بن محزون ! . .

برده نظره تعبىنى آمانه ، زمينه ، اودرياي احتشامه عطف ايلهدى ، اومحيط  
فسحت ايچنده كزديردى ، كزديردى ، قلباً ، فكرآ ، اولاً خلاق كائناته صيغدى ،  
ايسته اووجد ايچنده ايكن بى محابا :

— الهى ! شو بدبخت وطنمى بختيار ايت !

ندای تضرعى كوكاندن قوپاردى ، اوفضای كبرياه رفع ايلهدى .  
صاف بر كنجك بونياز معصومى برسكوت مهيب عميق ايچنده ابديته طوغرى  
آهسته آهسته يوكسه ليوردى ؛ فقط آرتق ساحل هيچ كورونمە يوردى ؛ واپور  
ايسه منزل مقصودينه طوغرى يولنى آلمىدى ...

برنجى كتابك صوكى
























3 1761 07825279 8

AC  
141  
A63